



ШАЙХ
ФАРИДУДДИН АТТОР

Мантиқ,
ум-тайр

Сайланма

I



ШАЙХ
ФАРИДУДДИН АТТОР
НИШОПУРИЙ
(1119 – 1221)

84.(0)
A87

ШАЙХ
ФАРИДУДДИН АТТОР

Мантиқ ум-тайр



4

Nizomiy nomli
T D P U
kutubxonasi

У-995415

ЯНГИ АСР АВЛОДИ

УЎҚ: 821.222.1-1

КБК: 84(0)9

A - 87

Аттор, Шайх Фаридуддин

Мантиқ ут-тайр: достон. Тўрт жилдлик: биринчи жилд/
Шайх Фаридуддин Аттор. Таржимон: Ж.Камол. Сўзбоши муаллифи: И.Ҳаққул. – Тошкент: Янги аср авлоди, 2022. – 464 б.

Шайх Фаридуддин Аттор – Шарқ тасаввуф адабиётининг буюк сиймоси, бир елкасида Мавлоно Жалолиддин Румийдек, иккинчи елкасида Мир Алишер Навоийдек устозларни тикка кўтаролган мўъжизакор адаб, даҳо ижодкор. Олти яшар Алишер «Куш тили»ни ўқиб, не аҳволга тушгани сизга маълум. Буни қарангки, ўн икки ёшли Жалолиддин ҳам Аттор қаламига мансуб «Асрорнома»ни ўқиб, айни аҳволни бошдан кечирган ва умр бўйи шу китобнинг шавқи, сурури билан яшаган.

Шайх Аттор асарлари – Ҳақ ва ҳақиқатнинг мангу барҳаёт тароналаридир. Уларнинг асрлар оша инсонлар қалбини забт этиб, ардоқланиб, севиб ўқилаётгани сабаби ҳам шунда.

Биз Шарқ маънавиятининг бу ноёб дурдоналарини зўр мамнуният ила азиз ўқувчиларимизга тақдим этамиз.

*Ушбу таржима «Мантиқ ут-тайр»нинг филология фанлари доктори, профессор Маҳмуд Жавод Машкур томонидан тайёрланиб, 1968 йилда Техронда нашр этилган
Маждий нусхаси асосида амалга оширилди*

Масъул муҳаррир ва сўзбоши муаллифи

Иброҳим Ҳаққул,

филология фанлари доктори, профессор

Муҳаррир

Воҳида Ҳамидова

Учинчи нашри

ISBN 978-9943-20-892-6

© Шайх Фаридуддин Аттор, «Мантиқ ут-тайр». «Янги аср авлоди», 2022.

НАВОЙНИ МАФТУН АЙЛАГАН КИТОБ

*Барча сўзлар мушкилидур бу ҳадис,
Безабонларнинг тилидур бу ҳадис.*

Алишер Навоий

Санъатда Оллоҳни таниш гўё чироққа нур бағишлиди, ҳар турли шавққа яқинлаштиради. Чунки ҳақиқий санъат азал-азалдан имонга суюнган, ҳатто имондан туғилган маърифатdir. Масалан, шеър, мусиқа ва рақсни олайлик. Маълумдирки, буларнинг ҳаммаси дастлаб диний маросимлардан пайдо бўлган. Шу учун улар кўнгилларни Буюк Яратувчининг ишқи, илҳоми ва ҳайратлари билан тўлдирган. Айнан қудратли иймон-эътиқод соҳиблари атрофларидағи одамларга дилларидағи туйғу ва ҳаяжонни аввало шеър, мусиқа ва рақс билан ифодалашган. Тасаввуф ва тасаввуф адабиётидан шеър, мусиқа, рақсу самонинг муҳим ўрин эгаллашининг туб сабабларидан бир ҳам ана шунда.

Инсон яратганни билишга қизиқмаса, ҳаётининг мазмун-моҳиятини ундан ажратса, илоҳий гўзалликни чукур ҳис қилишга уринмаса, унинг бахти – бахтсизлик, саодати

– тубанлиқдир. Оллоҳдан йироқлик – нафса, шайтонга, жаҳолат ва ёвузликка эрк бериш демак. Оллоҳни севиш эса руҳнинг зиёси, қалбнинг буюқ қувончи ва ақлнинг ҳиммати эрур. Шу боисдан қадим Шарқ шоири алломала-ри ҳар нарсадан аввал Ҳаққа таяниб, Ҳақ дардида ёниб, сўзни Ҳақ мадҳидан бошлаганлар, бир лаҳза бўлсин, Ол-лоҳ ва инсон муносабатини эътибордан четлаштирган-лар. Эҳтимол шу учундурки, Шарқ тасаввуф адабиётидан ўрин олган ҳар бир мавжудлик, ҳар бир тимсол – ердаги гулу булбул дейсизми, кўқдаги ой, қуёш, юлдуз дейсизми – ҳамма-ҳаммаси Оллоҳни эслатиб, гўёки ишқдан, безавол санъат ва абадиятдан хабар етказиб туради.

Аҳли ирфон шунга иқрордурларки, йўқ бўлган бор бўлмайди, бор бўлган эса «йўқ» демак билан йўқолмайди. Кўринадиган барча мосиво (Оллоҳдан ўзга нарсалар) нинг мустақил вужуди йўқдир. Илоҳий зухурот, ҳаққоний сифатлар ила мавжуд ва сифатлангандир. Биз мосивони жаҳлимизла бор билиб, унга хусусий сифатлар бериб аслида ва ҳақиқатда йўқ нарсани бор деб ҳисоблаймиз. Мавжудлигига жаҳолатимиз туфайли ишонгандаримизни йўқотиб ўртадан чиқариш лозим. Фақат Ҳақ тажал-лиларининг йўқолмаслигини билиш эса ирфондир. Ир-фон соҳиблари зоҳирда кўрганини ботинда ҳам кўргани учун уларнинг сийратида зоҳир ва ботин бирлашади. Бу ваҳдат – бирлик ҳоли Саноий, Аттор, Румий сингари ўн-лаб ижодкорларни ишқнинг оламшумул нуфузи ва олий мақомлари тўғрисида чукур мушоҳада юритишига илҳом-лантирган.

Мансур Халлож ёзади: «Ҳар насрдан, яратиш ва яратма илмидан ҳам аввал Оллоҳ аҳадият мартабасида, ка-ломсиз ва ҳарфсиз бир тарзда зотини зотида мушоҳада этди. Унинг ўз-ўзига ҳайронлиги ишқдан иборатдирки, бу ишқ бутун сифатларда покиза бўлган зотида зоти учун эди. Ушбу танзиҳият мартабасида Оллоҳ ўзини севди, ўзини шарафлади ва ўзининг зотида ишқи ила таайюн

этди. Бу, ишқнинг зоти илоҳиядаги илк намоён бўлиши эди. Шу зайлда исм ва сифатларида касрат майдонга келди. Анча вақт кейин, Оллоҳ, зотида, зоти учун сўзлашмоқ мақсади илиа ўзининг суратини кўришни истади. Азалга бокди ва «адам»дан барча сифат ва исмлари мажуд бир сурат яратдики, бу сурат Оллоҳнинг абадийлаштиргани Одам сурати эди...»

Бу сурат қанчалик гўзал бўлса, унга уфланган рух яна-да гўзал, қиёс қилиб бўлмас даражада латиф ва нафис эди. Рух вужудга киргани замон ўзини қафасда сезди, ҳижрон ва айрилиқдан ўртаниб – ёнди. Мумтоз адабиёти-миздаги асарларнинг аксариятида шу ҳижрон «қисса»си бир-бирига ўхшамайдиган ранг ва оҳангларда бадиий талқин қилинган. Уларнинг орасида Шайх Фариуддин Атторнинг «Мантиқ ут-тайр» достони алоҳида мавқе ва нуфуз қозонганд, деса, асло муболага бўлмайди. Бу китобнинг дунёга шуҳрат таратиши бежиз бўлмаганидек, тенгсиз даҳо санъаткор Алишер Навоийни болаликдаёқ ўзига мафтун айлаши ҳам тасодиф эмасди.

Профессор Хелмут Риттер «Ислом Қомуси»даги Фариуддин Атторга бағишлиланган мақоласида унинг ижодий фаолиятини уч босқичга ажратади: биринчи босқичда у моҳир ҳикоянавис, иккинчи босқичда ҳис-ҳаяжони юксак бир шоир, кейин эса ҳар қандай режадан фориғ бир ҳолда асарлар яратган эркин ижодкордир. Атторга нисбат берилган «Хусравнома», «Асрорнома», «Жавҳарнома», «Мусибатнома», «Илоҳийнома», «Мухторнома», «Мантиқ ут-тайр», «Девон», «Тазкират ул-авлиё» каби ўндан ортиқ нодир асарлар ана шу уч босқичда ёзилган. Аттор бошданоқ тасаввуф, ишқ ва маърифат сирлари билан қизиқкан. Сўфий, дарвеш, факру фано аҳлининг маънавий-руҳий ҳаётига оид китобларни у алоҳида дикқат билан ўқиб-ўрганган. Атторнинг ўз эътирофига кўра валий ва эранларга бағишлиланган мингга яқин китобни мутолаа қилиб, бир қанча жойларни кезиб сўфийлар

ҳақидаги ҳикояларни түплаган. Буларнинг маълум бир қисми халқ оғзаки ижодига мансуб эди. Умуман олганда, Атторнинг бутун ижодиёти халқ оғзаки адабиёти билан боғланган, ҳатто айтиш мумкинки, фольклор моҳиятига эгадир. Зеро, буюк шоирнинг асарларидағи күп ҳикоятлар ҳақиқатда ҳам халқ оғзаки меросидан олинган. Тўғри, улар қайси бир зайлда ўзгарган, қайси бир тарзда қайта ишланган, аммо, маъно ва моҳият «илдизи» сақланган, халқона соддалик, ифодадаги табиийлик ўзгариб кетмаган. Атторнинг тили Унсурий, Фирдавсий, Анварий ёки Саъдий ва Жомий каби шоирлар тилидан фарқланиши илмда қайд этилган. Чунки, ҳикоятларни халқдан түплаган ва билимини кенг оммага етказишни кўзлаб, минг-минглаб кишиларнинг кўнгил ҳолини ўзгартиришга интилган шоир ўзига хос бир тасвир йўли ва услугга соҳиб бўлиши, халққа халқ тили билан сўзлаши табиий эди.

Кўп шоирлар, хусусан, Мавлоно Жалолиддин Румий Атторнинг ана шу санъатидан илҳомланган. Фақат «Маснавий»да эмас, балки «Девони Кабир»да ҳам у Аттор тажрибаларини ривожлантирган эди. Турк олими А. Гулпинорлининг ёзишича, «Халққа илми, ишончини ҳикоялар орқали ифодалаган, халқ билан айнан халқ тилида сўзлашган Атторга Мавлоно издошлиқ қилган ва унга буюк бир севгисини намоён айлаган». Ҳақиқатда ҳам «Мантиқ ут-тайр», хусусан, «Илоҳийнома»даги айрим ҳикоятлардан Мавлоно «Маснавий»да жуда моҳирлик илиа фойдаланган. Албатта, Атторнинг ҳикоя тарзи билан Мавлононинг ҳикоя усули орасида муҳим фарқ ҳам кўзга ташланади. Аттор яратган ҳикоялар асосан кичик ҳажмли, улар орасида икки, уч байтлиси ҳам бор. У ҳикоядан ҳикояга ўтмайди. «Маорифи илоҳийя» дейилган фикҳ, ҳадис, калом сингари мавзулардан баҳс очмайди.

Аттор факри фано шоири. Борлиқ, мавжудлик сир-асорини у йўқликдан, фаноликдан ахтаради, фоний нар-

саларга күнгил күймаслик, башарий ўзлиқдан кечиш ва илоҳий ирода соҳиби бўлиш завқидан гапиради. Оллоҳни ахтариш, маъшуқи азал висолига восил бўлиш ғояси Атторнинг «Мухторнома, «Илоҳийнома» каби асарларида ҳам ёритилган бўлса-да, шоир уни «Мантиқ ут-тайр» достонида энг гўзал шаклда тасвирлашга эришгандир.

Машхур тасаввуфшунос Абу Аъло Афиифийнинг ёзишича, «Мантиқ ут-тайр»даги қушлар инсон нафслари-дир. Симурғ эса Ҳақ Таоло эрур. Водийлар, сўфий йўлида-ги мақомлардир. Достондаги қушлар на кўз или кўрилур, на қўл била тутилур... Уларнинг йўлчилиги маънавий водийлардаги бутунлай маънавий йўлчиликдир. Бу сай-ру саёҳат асносида, нафснинг ғаройибликлари, ҳоллар ва улардаги қоронғулик, нур, дунё ишларига боғланиш, «энг муқаддас илоҳий Ёр» ишқига таслим бўлиш каби ҳолатлар мушоҳада этилур».

Дарҳақиқат, Аттор достонидаги бош мақсад, энг авва-ло нафсни таниш, нафсга қарши курашиш ва уни поклаш йўли билан Ҳаққа етишишdir. Бир гуруҳ олимларнинг эътирофларига кўра шайтон ва малакнинг инсонга таъсири, нафс ва руҳнинг ҳаракатидан пайдо бўлади. Нафс ҳаракатга тушиши билан, унинг асл жавҳаридан бир зулмат юзага келади. Бу қоронғулик қалбда ёмонликка чорловчи бир йўл ахтаради. Ана шунда шайтон қалбга кўз тикиди ва уни ишғол айлашга киришади. Ва нафс жаҳо-лат, ғафлат, ҳавову ҳавасга таслим бўлади. Рух ҳаракат бошласа-чи? Унда руҳнинг сифатига уйғун порлоқ бир нур туғилади ва инсон маънавий ҳаёт завқига етишиб, олий ва улвий мақсадлардан чекинмай яшиш машаққатларини енгиб ўта олади. Кушлар тимсолида Аттор буни ниҳоятда ёрқин ва таъсирли манзараларда тасвирлаб бергандир.

Масалан, талаб водийсини олайлик. У зуҳд, норасо ва бераҳм дунёдан йироқлашиш ва бунинг асосий шарти бўлган «нафс ила мужоҳада» водийси ҳисобланади. Бу

водийга тегишли фикр-мулоҳаза ва рамзий ифодаларда гўёки покланиш «методи» талқин қилингган.

Ишқ водийси эса, маъшуқи азал нурининг шуълалари таъсир ўтказгандан сўнг нафснинг Унингла бирлашиши учун кучли иштиёқ сезиш, ўзидан воз кечиш мақомини акс эттиради. Аслида ҳақиқий ошиқ ҳаёти ҳам худди шундан бошланади ва бу кашф босқичларнинг дастлабкисидир. Зеро, Шарқ мутасавифлари, жумладан, Атторнинг ишонч-эътиқоди бўйича, инсон руҳи Оллоҳдан таралган бир нур. Бу нур «зоҳирий оламда» рангдан рангга, шаклдан шаклга, жисмдан жисмга ўтиб «комил»ларнинг вужудида тўла мукаммаллик топгандан кейин яна Оллоҳга қайтажак. Тоқ ва Мутлақ борлиққа сингиб – бирлашиб кетиш ошиқни ҳеч тасаввур қилиб бўлмас завққа толдиди. Лекин бундай саодат камдан-кам кишиларга насиб айлайди. Чунки илоҳий йўлни ўргатиш ва кўрсатишга мактабу мадрасаларда ўқитиладиган илмларнинг кучи ҳам, имконияти ҳам етишмайди. Бунинг учун ирфон зарурдир. Ҳақиқий илм ўлароқ тан олинган ирфон туйғу, сезги ва ишқ йўли билан ўрганиладиган билимдурки, у ўз нафсида Оллоҳни мушоҳада қилиш салоҳиятидир. Шу учун ҳам Муҳаммад Фузулий:

*Ишқ эмиш ҳар не вор оламда,
Илм бир қийлу қол эмиш анжақ,*

деган Шу боисдан ҳам улуғ ва оташнафас Аттор ишқ водийсининг сир-асоридан теран баҳс юритган эди.

Албатта, Оллоҳни ҳар ким ўзича мушоҳада этади. Шунинг учун Оллоҳга бориладиган йўллар нафаслар қадар кўпdir, дейилган. Оллоҳ дийдорига восил бўлишга тўсқинлик қиласидиган нафсоний ва зулмоний парда, яъни ҳижоблар ҳам беҳисоб. Маърифат водийсига тегишли гаплар шу пардаларнинг барҳам топиб, ҳар нафснинг Ҳақ Таоло қаришсида қайси мартабада экан

нини англагани түғрисидадир. Бунда ҳол ва ҳақиқатлар бир-биридан фарқланади. Ўзаро зид, муноазарали туйғу ва тушунчалар ўртага қалқиб чиқмоғи мумкин-ки, бундан асло ажабланмаслик керак. Бироқ, Ҳақ жамолининг тажаллий айлаши билан ҳар турли даъволар ҳам, ўт-кинчи ашёлар барҳам топади. Солик ўзидан, ўзлигидан кечиб, энди илоҳий севгига ғарқ бўлади. Аттор Истиғно водийсини шу ҳақиқат талқининг бағишилаган.

Тавҳид аталмиш водийга келсак, шоир бунда касрат, яъни кўпликнинг фоне бўлиб, солик қалбida ҳақиқий Бирнинг тажаллий қилиш мақомининг тасвирини яратган. Касратнинг йўқолиши билан унинг замини ўлароқ мавжуд бўлган замон, макон ва чегараланишлар ҳам йўқолади. Ана шу нуқтада Ҳақ, ҳамма нарсани қуршаган, ҳар бир мавжудликни ишғол айлаган бир гўзаллик суратида ўзини қўрсатади. Илоҳий жазба ҳам шу манзилда майдонга келади.

Ҳайрат водийсига юксалган ошиқ, худди олам-жаҳонни унугани сингари ўзини ҳам унугтади. Фано нима, бақо нима – буни билмайди. Билгани ягона бир нарса – ошиқлик. Танигани эса – маъшуқасидир.

Охирги водийда ошиқ ила маъшуқ бирлашади. Бошқача айтганда томчи денгизга айланиб кетади. Бу – парчанинг бутунга дўниши ҳамдирки, аввалда ҳеч қандай айрилиқ ва ҳижрон бўлмаганини акс эттиради.

«Биз шаҳватга қул бўлган кимса ҳис қилмаган ҳурриятни идрок этамиз. Чунки биз, борлиқقا ҳоким бўлган низомга иқрормиз. Бу эса борлиқнинг моҳиятини ва ундаги ўрнимизни билишнинг бир натижаси ўлароқ бизни қаноатлантиради», дейди Спиноза. Аттор достонида ифодаланган ҳуррият тушунчаси ҳам шунга жуда яқин: унда ҳам чинакам ҳуррияти, иродаси фақат илоҳий иродага бирлашажак даражада Оллоҳни севган кишига хосдир, деган хулоса келиб чиқади.

Маълумки, инсоннинг Оллоҳга сафари бевосита Йўл тимсоли билан алоқадордир. Қадимий хитой ти-

лидаги Дао йўл мазмунини билдирган. Ҳиндларнинг «бҳакти марго»си ҳам ишқ орқали ҳурликка юксалиш йўли деб таърифланган. Ҳазрати Исо «Мен йўлман», деганда инсонларни Оллоҳга томон бошлаш вазифасини назарда тутган экан. Шарқ мистикларидан бирининг эътирофи бўйича, Комил инсон малакдан кўп юксакдир. Негаки, малак турғун тургувчи, инсон эса юргувчидирки, у қалбан ва руҳан тинимсиз илгарилайди. Юксакка кўтарилади ва дунёни янгилайдиган ҳаракатларни таъминлай олади. Ибн Арабий бир ўринда авлиёларни Ақли куллнинг туялари деб таърифлайди. Чунки улар инсонларни Ҳақ йўлига чорлаб, ўз ортларидан эргаштирадилар. Аттор ўз достонида жон қушининг, улуҳият тимсоли бўлган Симурғ томон парвоз айлашини, Йўл ва йўлчилик заҳматларини шунчалик ёрқин тасвирлаганки, сезгир ўқувчи маънавий-руҳий йўлчиликда доимий инкишоф, нафснинг бир нурли очилиши мавжудлигини осон англайди. Ва ўз аслига қараб яқинлашаётган қушга «Эй жон қуши, уч, учгил, тўхтама», дегиси келади.

Атторнинг бу бетимсол достони тасаввуфий адабиётнинг тамал асарларидан бўлиб, қанча мутасаввиф ва шоирлар ундан илҳом олганлар. Алишер Навоийнинг «Лисон ут-тайр» достони ҳам ана шу асарнинг таъсир ва илҳом мевасидир. Навоийнинг ўзи буни қуйидаги тарзда таъкидлаб ўтган:

*Шайх руҳидин етиб кўп эҳтимом,
Қилдим оз фурсатда арқомин тамом.*

*Сўз дақиқ эрдию маъни онда гум,
Гарчи қилдим ўз-ўзумға уштулум.*

*Шайх руҳидин вале етти қушод,
Ким муродин топти ушбу номурод...*

Аттор достонини ўқиши «Лисон ут-тайр»ни яхши англашга, Навоий достонини мутолаа қилиш «Мантиқ ут-тайр»ни пухта ўқиб-ўрганишга ёрдам беради ва имкон очади. Аммо Атторнинг китоби ҳанузгача ўзбек тилига таржима қилинмаган эди.

Ўзбекистон Фанлар академияси Алишер Навоийномидаги Тил ва адабиёт институтининг Мумтоз адабиёти бўлими таклифи билан бу қийин ва сермашаққат ишни Ўзбекистон халқ шоири Жамол Камол амалга оширди. Демак, серғайрат, заҳматкаш шоиримиз форсий адабиётнинг яна бир ўлмас асари – Навоий бобомиз қалбларини ишқлантирган китоб таржимасини ўзбек китобхонига туҳфа этди. Бунинг учун Жамол Камолга чин дилдан миннатдорлик билдирамиз. Ўйлаймизки, адабиётга, илм, ижод ва китобга қизиқиши ва эътибор ошаётган замонамизда, мутаржим меҳнатига холис ва муносабатини дариф тутмайдиганлар топилади.

**Иброҳим ҲАҚҚУЛ
филология фанлари доктори, профессор**

БИСМИЛЛОХИР РАҲМОНИР РАҲИЙМ

Офаринлар унга, ул Яздони пок
Берди фармон, жону иймон топди ҳок.

Аршни сув узра бунёд айлади,
Одамий умрин шамолга жойлади.

Кўкни юксалтди, забардаст этди ул,
Ерни тубан айлади, паст этди ул.

Ул бирига жону жунбуш берди чун,
Бул бирига берди орому сукун.

- 5 Осмонни бесутун чодир қилиб,
Ерни ёйди остига, ҳозир қилиб.

Олти кунда етти анжум ўнглади,
Бўл, деди, тўққиз фалакни тиклади.

Кўқда юлдузларни яшнатди кейин,
Ҳар кеча этди фалак бирлан ўйин.

Тан тузофин турфа аҳвол этди ул,
Жон қушин тупроққа дунбол этди ул.

Амридин денгиз эриб, сув бўлди, ёш,
Ваҳмидин тош қотди буткул тоғу тош.

- 10 Сувсатиб денгизни андоқ этди хушк,
Тошни ёқут айлади ул, қонни мушк.

Тоққа юксак чўққи берди ҳам камар,
Тики мағрур юксалиб турсин ўшал.

Гоҳи оташ узра гуллар терди ул,
Гоҳи денгиз узра күпrik қурди ул.

Пашшани душман бошига жойлади,
Пашша түрт юз йил уни қон айлади¹.

Ҳикматидин анкабут түр солди, тор,
Садри олам топди орому қарор².

Қилча бел берди чумолига, камар,
Ул Сулаймон бирла бўлди ҳамсамар.

Берди хилъат унга, аббосий туни,
Бебадал «Тосин»га эш этди уни³.

Бор эди Исода нина, кўрди Ул,
Шул сабаб тўртинчи кўкда турди ул⁴.

Лолалардин тоғни алвон айлади,
Гумбази кўкни тутундин шайлади.

Лахта-лахта қон этиб тупроқни тиғ,
Олди қонлардин кейин лаълу ақиқ.

¹ Ҳазрат Пайғамбаримиз (с.а.в.) нинг Ҳижрат кечаси бир ғорга кириб, ўргимчак тўри воситасида мушриклар таъқибидан қутилгани ҳақидаги ривоятга ишорат.

² Куръони каримнинг 27-сураси Намл, яъни Чумоли деб аталади. Сура «То син» дея бошланиб, 16-оятда Сулаймон пайғамбарга мантиқ-ут-тайр-куш тили ўргатилгани баён этилади.

³ Ривоятга кўра, Исо алайҳиссалом кўкка кўтарилиганда ёқасида дунё молидан қолмиш бир нина туфайли унга яна-да баландроқ кўтарилишга рухсат этилмаган.

⁴ Ривоятга кўра, Исо алайҳиссалом кўкка кўтарилиганда ёқасида дунё молидан қолмиш бир нина туфайли унга яна-да баландроқ кўтарилишга рухсат этилмаган.

20 Йўлларида токи ул ою қуёш
Сажда этгайлар қўйиб тупроқقا бош.

Юзларида нур – нишони саждадир,
Сажда гар йўқ эрса, талъат қайдадир?

Сочди кундузларга шодликдин зиё,
Этди андуҳ бирла тунларни қаро.

Тўтига тақди чу маржони зари,
Этди Ҳудҳудни хабарчи раҳбари.

Кўйида гардун қуши силкиб қанот,
Бош урар дарбозасига бот-бот.

25 Чархи гардун айланур андин тутош,
Тун кетиб, кундуз етиб, келгай маош.

Дуд била кўпикни олам айлагай,
Бир нафасдин лойни одам айлагай.

Гоҳи тўрга ўтказар кўппакни ул,
Гоҳ мушук боис очар мақсаддага йўл.

Итни шерри мардга қурбат ҳам этар,
Шерри мардни итга нисбат ҳам этар.

Гоҳи бир девга сулаймонликни ҳам,
Гоҳ чумолига сухандонликни ҳам.

30 Аждаҳо айлар асони гоҳи ул,
Гоҳи тандир остидин тўфон келур.

Қишда оламга кумуш этгай нисор,
Кузда япроқларни айлар зарнигор.

Кўкни ул тойчоқقا ўхшаб сакратар,
Унга ул зарин ҳилолни наъл этар¹.

Кўкни кўк аҳлига дастурхон қилур,
Хон уза равшан қўёшни нон қилур.

Қоятошдин теваю нор келтирап,
Зар ҳўкиздин нолаю зор келтирап².

- 35 Руҳни пок сувратда кўрсатмиш, ажаб,
Барча ишга бир ҳовуч тупроқ сабаб.

Нафси саркаш бошини индириди ул,
Танга жон, жонга имон сингдирди ул.

Топди залвор тоғ унинг тадбиридин,
Баҳр сув бўлди уят, ташвиридин.

Ер унинг кўйида чун жонсадқадир,
Кўк унинг дорбозасида ҳалқадир.

Мехридин саккиз биҳишт эрмиш нишон,
Етти дўзах унга оний, бир замон.

- 40 Жумла тавҳид ичра мустағрақ анга,
Дема мустағрақки, мавҳ мутлақ анга.

Гар киши пайкон отиб, қон айлагай³,
Ғунча қонин зеби пайкон айлагай.

¹ Наъл – тақа.

² Солиҳ алайҳиссалом туясига ишорат... Зар ҳўкиз – Мусо алайҳиссалом амри билан сўйилиб, қотилнинг топилишига сабаб бўлган сариқ ҳўкиз.

³ Пайкон - ўқ.

Ё суманга кийдирап тожи саро,
Лола бошига илар қондин кулох.

Күндирап наргисга гоҳи тожи зар,
Сүнгра ул тожига шабнамдин гуҳар.

Ақлу ҳуш ҳайратда, дил сўзон анга,
Осмон саргашту ер ҳайрон анга.

- 45 Баҳру дарёда балиқ, то кўкда моҳ.
Ҳар не мавжуд, бергуси андин гувоҳ.

Ер паст, осмон баланддир қанчалар,
Ҳар бириси айрича бергай хабар.

Сув ва тупроқ, ел ва оташ айлагай,
Ҳар биридин сиррини фош айлагай.

Лой қориб, балчиқ пишиитди қирқ сабоҳ,
Жонга ором берди сўнгра тан аро.

Жонки кирди, тан тирикдир, зиндадир,
Ақлу ҳуш берди, кўришлик унладир.

- 50 Ақлу ҳушдин жон кўришни бошлади,
Илму фан берди, танишни бошлади.

Бас, таниб, ажзига иқрор бўлди ул,
Ғарқи ҳайрат бўлди, ишга урди қўл.

Хоҳи душман бўл, хоҳи дўсту ёр,
Барчанинг андин юки, залвори бор.

Ҳикмати юклайди залвор барчага,
Бул ажабким, ул нигаҳдор барчага.

Кимсада гар ҳеч кору бор йўқ,
Барча ишда, кимсайи бекор йўқ.

- 55 Жузву Кулл пок зотининг бурҳонидир,
Аршу фарш ҳам мулкидир, айвонидир.

Тоғни мих этди заминга бир йўла,
Ерни ювди сўнгра дарёлар била.

Ер ҳўкиз остида сокин, пастида
Бир балиқ тургай, ҳаводир остида.

Ул ҳаво не узрадир? Ҳеч узра, бас,
Барчаси сўнг ҳеч, ҳечдир, бошқамас.

Боқ, фикр қил санъатин, ул подшо
Ҳечу ҳечлардин яратмиш не бино.

- 60 Бас-ки ҳечлардин яралмиш ул, демак,
Жумла борлиқ ҳеч эрур бешубҳа шак.

Арш сув узра, сув остинда ҳаво,
Сув, ҳавони қўй, бутун борлиқ Худо.

Аршу олам баски тилсимдир тамом,
Барчаси Ундан иборат жисму ном.

Боқ бу оламга, у оламга абад,
Ўзга йўқдир ўртада, Улдир фақат.

Жумла зарроту шакллар муттасиф¹,
Жумла бир ҳарфу нақллар мухталиф.

¹ Муттасиф – бир сифат эгаси. Мухталиф – хилма-хил.

65 Эр керак, бўлсин у ҳар дам шаҳшунос,
Шаҳни билсин, бўлса-да ҳар не либос.

Ул ғалат этмас, билар подшони чун,
Бас, ҳама Улдир, яна айтмоқ нечун?

Чун ғалат этмоқ бу аҳволнинг иши,
Чин назар – марди муатталнинг иши¹.

Эй дариғо, йўқ бирорда сабру тоб,
Дийдалар кўрдир, жаҳон пурофтоб.

Жумла оламда Уни кўрса кўзинг,
Гум бўлур ақлинг, йўқолгайсен ўзинг.

70 Эй ажабким, барча кўлда домани,
Узр айтурлар ва истарлар Ани.

Эй хувайдову кўринмас Ҳувву Ҳай,
Жумла оламсенку, кимса кўрмагай.

Жон ниҳон тан ичра, жонда сен ниҳон,
Эй ниҳон ичра ниҳон, эй жонажон,

Ҳаммадин аввал ва охир сен ўзинг,
Барчада ошкору зоҳир сен ўзинг.

Эшигинг олдида посбону асас²,
Бир яқинлашмоққа йўл топгайми кас?

75 Ақлу жон зотингни истар, роҳ йўқ,
Ҳам сифотингдин бирор огоҳ йўқ.

1 Аҳвал – ҳилай. Муаттал – бечора, бенаво.

2 Асас – тунги соқчи, қоровул.

Жон аро ганжи ниҳон ҳам сен ўзинг,
Ошкори жисму жон ҳам сен ўзинг.

Жумла жонлар жавҳарингдин бенишон,
Анбиё хоки раҳингда жонфишон.

Ақл айтар борлиғингни эрта-кеч,
Лекин асрорингга ул етгайму ҳеч?

Мулки борлиқ ичра жовидсен мудом,
Боғламишсен жумла қўлларни тамом.

- 80 Эй ўзинг жон ичра, жондин ташқари,
Ҳар не айтсам, улсену ундан нари.

Эй хирад саргашта даргоҳингда чун,
Ақлу ҳуш гумдир йўлингда бус-бутун.

Гарчи сен-ла кўдим оламни аён,
Кўрмагум оламда лек сендин нишон.

Ҳар киши сендин нишоне берди боз,
Лек ўзингдин йўқ нишон, эй баҳри роз.

Гарчи гардун тикди кўзни, чекди дард,
Кўрмади хоки раҳингдин зарра гард.

- 85 На замон топди нишон гардингдин ул,
Сочди тупроқ бошига дардингдин ул.

Офтоб шавқингдин айлаб тарки ҳуш,
Ҳар кеча қўйгай қаро тупроққа тўш.

Ой сенинг кўйингда ҳар ой чун гадо,
Иштиёқинг бирла бўлгайдир адо.

Баҳр ишқинг бирла солди гулдирос,
Қолди лек тардоману лабташна боз.

Тоғ сенинг йўлигда кўрмиш юз довон,
Ботмиш ул балчиқقا, қолмиш нотавон.

90 Офтоб шавқинг била оташ эрур,
Үртаниб оташда чун, саркаш эрур.

Ел сенинг кўйингда сарсондир басе,
Кафтида тупроқ, паришондир басе.

Сув сенинг ҳажрингда ўртанган кўйи
Бекарордир, бошдин ошмишдир суйи.

Сен учун тупроқ басе дармондадир,
Хокисорлик ичра ул армондадир.

Неча сўйлай, сенга ожиздир сифат,
Не қилай, йўқ эрса менда маърифат?

95 Эй кўнгил, гар толиб эрсанг, йўлга юр,
Олду орtingга боқиб, огоҳ бўл.

Йўлчиларга боқ, нечук огоҳ улар,
Изма-из келгай сўйи даргоҳ улар.

Зарра борким, айру бир даргоҳи бор,
Зарранинг даргоҳга айру роҳи бор.

Не билурсен, ул нечук бир роҳ эрур,
Борса ул йўлдин нечук даргоҳ эрур?

Сен аён излар эсанг, бўлгай ниҳон,
Сен ниҳон излар эсанг, бўлгай аён.

110 Сен аён изла, ниҳондир ул нафас,
Сен ниҳон изла, аёндир ул нафас.

Изласанг ҳар иккисида, ул маҳал
Икки оламдин-да айродир ўшал.

Не йўқотдинг? Ҳеч вақое, излама,
Ҳар не дерсан, Ул эмас ул, сўзлама.

Ҳар не айтарсен, биларсен, хон, ўзинг,
Ўзни билгил, ўзни юз чандон ўзинг.

Сен ани андин таниб ол, қўй хирад,
Бошланиб йўл унга элтгайдир фақат.

105 Васф этарлар васфини, лек васфи, бас,
Лойиқи ҳар марду ҳар номард эмас.

Бўйла ожизликка эшdir маърифат,
Васфига етгайму ҳеч шарҳу сифат?

Халқнинг андин билгани ҳечdir, хаёл,
Бир хабар бермоққа борму бир мажол?

Васфиди ҳар турли сўздин айтдилар,
Андин эрмас, балки ўздин айтдилар.

Илмдан юксак ва хорижи аён,
Зоти поки борлиқ ичра бенишон.

110 Кимса андин бенишонлик топди, бас,
Чора излаб, жонфишонлик топди, бас.

Ҳар кишининг ҳуду беҳудлик аро
Айтгани «Оллоҳ лаззи»дир мутлақо¹.

¹ Аллоҳ беназирдир.

Зарра-зарра илғабон фаҳминг сенинг,
Ҳар не дерсан, ул фақат ваҳминг сенинг.

Ул турар манзилга жон етгайму ҳеч?
Ул маконни жон макон этгайму ҳеч?

Ақл истар кунжи васлин, роҳ йўқ,
Илм излар сиррини, огоҳ йўқ.

115 Неча юз минг феъли бор, жондин азиз,
Ҳар не истарсен, дегил ондин азиз.

Ақл ҳайрондир унинг савдосидин,
Жон-да ҳайрат ичрадир кимёсидин.

Жон унинг савдосида саргаштадир,
Дил эса қонлар била оғуштадир.

Хой, етар, этма қиёс, эй ҳақшунос,
Бекиёс бирлан нечук бўлгай қиёс?

Шавкатидин ақлу жон ҳайрон эрур,
Не эмиш ҳайронки, саргардон эрур.

120 Ҳам камоли ақлу жонни этди лол,
Ақлу ҳуш ҳайрону жон афтодаҳол.

Не набийлар, не расуллар ўтмади,
Бахри Куллдин бир насибе етмади.

Барчаси тупроққа юзни сурдилар,
Етмадик зотингга, деб оҳурдилар.

Ким бўлибмен мен чу лоф ургувчи қул?
Кимки машғулдир тамом, билгувчи ул.

Ундан ўзга йўқ эса оламда кас,
Кимга айларсен бу савдою ҳавас?

- 125 Дуру гавҳар денгизи бор мавж-мавж,
Воқиф эрмассен нечукдир унда авж.

Кимки ул денгизда гавҳар топмади,
Бўлди ло, Иллоҳ сари раҳ топмади.

Сиғса гар тавсифга ул Раҳмонмидир?
Васфини этмоқ унинг осонмидир?

Сиғмагай рамзу ишоратларга ул,
Урма дам, сиғмас иборатларга ул.

На ишорат тўғри келгай, на баён,
Зотидин йўқ кимсада илму нишон.

- 130 Сен ўзингдинг кеч, камол аслида шул,
Бир йўла йўқ бўл, висол аслида шул.

Унда йўқ бўлгил, ҳулулий шул демак,
Йўқса баҳс этма, фузулий шул демак¹.

Иккилиқдин воз кечиб, бир тусли бўл,
Бир кўнгил, бир қиблаву бир юзли бўл.

Эй халифазодайи бемаърифат,
Бўл маърифат ичра сен отанг сифат.

Ҳақ адамдин бор этиб, не этди фош,
Барчаси эгди унинг олдида бош.

- 135 Амри Ҳақ бирлан яралди фитрати,
Ҳақ уни юз парда бирлан чирмади.

¹ Фузулий – бу ерда беҳуда сўзлар сўзловчи, маъносида.

Деди: эй Одам, чу баҳри жуд бўл,
Сажда этгайлар сенга, масжуд бўл...¹

Этди саркашлиқ бири, бош эгмади,
Ул сабабдин бўлди малъун, лаънати.

Юз қаро бўлди, деди: эй бениёз,
Сен мени хор этма, корим ўнгла боз.

Ҳақ таоло деди: эй малъуни роҳ,
Ҳам халифа Одам ул, ҳам подшо.

- 140 Сен боқиб Одамга, ўртансанг бугун,
Эртага ўт ичра ёнгайсен бутун.

Жузв Кулл бўлди кириб жисм ичра жон,
Кимса бўйла тилсим этгайму аён?

Жон баланд эрдию тан паст эрди, хок,
Бас, қовушди хоки пасту жони пок.

Паст, баланд бундоқ қовушди ёр бўлиб,
Одамий келди ажиб асрор бўлиб.

Воқиф эрмас кимса, не асрор ул,
Ҳар гадонинг кори эрмас кор ул.

- 145 На билолдик, на таний олдик уни,
На кўнгиллардин нари солдик уни.

Баски хомушлиқдин ўзга роҳ йўқ,
Бир нафас чекмоқча ҳадди оҳ йўқ.

Кўрдилар денгиз юзини, сатҳини,
Кўрмади бир кимса лекин қаърини.

¹ Баҳри жуд – саховат денгизи. Масжуд – сажда этилгувчи.

Ганж денгиз қаърида тилсим ҳануз,
Кутмагил, тан отли ул тилсимни буз.

Бузсанг ул тилсимни, ганж пайдо бўлур,
Кетса тан, жон ҳам сенга пайдо эрур.

- 150 Сўнгра жонинг ўзга тилсим бўлгуси,
Ғайб етиб жонингга, жисминг бўлгуси.

Бўйлаким йўл юр-да, поён истама,
Бўйла бир дардингга дармон истама.

Баҳри бепоёндир улким, қанчалар
Бўлдилар ғарқ, кимсадин йўқдир хабар.

Бўйла денгиздирки, баҳри аъзам ул,
Оlam унда зарра, зарра олам ул.

Оlam эрса зарра, боис қудрати,
Зарра олам эрса, боис ҳикмати.

- 155 Olaming мўъжаз пуфакдир баҳраро,
Заррани ҳам бир пуфак бил мутлақо.

Зарраву олам агарда маҳв ўлур,
Баҳр аро икки пуфакча кам бўлур.

Кимса билмас, шу буюк баҳри амиқ
Икра тош пора азизми ё ақиқ?

Ақлу жону дил ва динни бойладик,
Лек камолин зарра билдик, билмадик.

Юм даҳонинг, сўрма аршу курсини,
Баски йўқ билмоққа имконинг уни.

160 Битта қил олдида ақлинг нотавон,
Жоиз эрмасму басе юмсанг даңон.

Битта зарра олдида лолсен тамом,
Борму боз сүрмакка ҳожат, вассалом.

Не эмиш күк, бош эгиб ул пойдор,
Бекарорликка мудом этмиш қарор.

Чарх истарки, бу сирни англасин,
Улки саргардон эса, не англасин.

Буйла ҳол бирла нечук султондир ул,
Баски бундоқ зору саргардондир ул.

165 Күйида саргашта, билмас қайдадир,
Парда узра пардадирким, пардадир.

Бўйла саргардонлик ичра ҳар замон,
Не билур ул парда ичра не ниҳон?

Чарх уриб лек орзуюи оташдадир,
Шул эшик атрофида саргаштадир.

Пардайи роз чун очилмасдир анга,
Пардайи асрор очилгайму сенга?

Кори олам бўйлаким ғайрат эрур,
Ҳайрат узра ҳайрату ҳайрат эрур.

170 Ҳар замон йўл янги поён ичрадир,
Халқ боқиб, ҳар лаҳза ҳайрон ичрадир.

Йўлчига йўл не кўрингай, шунга бок,
Ким йироқ кўргай уни, кетгай йироқ.

Бениҳоятдир, адоги йўқ унингн,
Беададдирким, саноги йўқ унинг.

Оламе кўрдик, ғаройибдир иши,
Жумла кўзлардан-да ғойибдир иши.

Кимсага сирри аслга роҳ йўқ,
Заррадин бир заррайи огоҳ йўқ.

- 175 Бўйладирким, ул йўқотмишдир йўлин,
Юз буриб деворга, тишлайдир қўлин.

Не улуғлар ушбу йўлни билдилар,
Йўлни билдиromoққа балки келдилар.

Жонларин, бас, ғарқи ҳайрат этдилар,
Жонга ҳамроҳ ажзу ҳасрат этдилар.

Аввало боқ, келган ул Одам эди,
Бошида дарду бало, мотам эди.

Кўр яна тўфонда қолган Нуҳни ҳам,
Чекди не йиллар у кофиридин алам.

- 108 Боқ чу Иброҳимга, соҳиб дил эди,
Унга ишқдин ўт-олов манзил эди.

Боз Исмоилга боқ, не англади,
Жонни ёр кўйида курбон айлади.

Боз ўшал Яъқуби саргардонга боқ,
Ўғли-чун чекди неча ранжу фироқ.

Боқ Юсуфга, токи султон бўлди ул,
Чоҳга тушди, банди зиндан бўлди ул.

Сол яна Аюби собирга назар,
Не жафолар чекди куртлардин ўшал.

185 Кўр яна Юнусни, янглиш айлабон,
Бир балиқ қорнида тутди ул макон.

Боқ Мусони, бўлди не событ анга,
Фиръавн доя, бешик тобут анга.

Зирҳар Довудни ҳам ёд айлаким,
Тафти дил бирлан темирни этди мум.

Беназир эрди Сулаймони хидев¹,
Мулки барбод бўлди, тахтин олди дев.

Боқ Закариё чу эрди қалби ўт,
Арра тушди бошига, этди сукут².

190 Кўр жамоат олдида Яҳёни ҳам,
Боши қирқилди мисоли сўхта шам.

Сен Исони кўр, уни кутганда дор,
Йўл топиб, қочди жуҳуддин неча бор.

Боқ, набийлар сарвари ул Мустафо
Кўрди кофирдин неча жабру жафо.

Сен буларни тутма кам, осон дема,
Жон бериш бирлан баробар бул ҳама.

Неча айтдим, айтгали сўз қолмади,
Неча тердим, лола, наргис қолмади.

¹ Хидев - подшо, султон.

² Закариё алайҳиссалом жуҳудлардан қочиб, бир қуриган дарахт ка-
вагида яширган. Душманлари шайтон воситасида бундан хабар
топиб, уни дарахтга қўшиб, арралаб ташлашган.

195 Үлдим ҳайрат ичра чун якбора мен,
Айладим бечораликни чора мен.

Эй хирад йўлингда ожиз тифли шир¹,
Ахтариб, кўйингда ҳайрон ақли пир.

Мен чу аblaҳ, сенга етгаймен нечук?
Сен мунаzzах, сенга етгаймен нечук?²

На илм зотингга етгай, на баён,
Сенга на суду зиёндик наф, зиён.

Сен биларсен ҳар гуноҳ, узримни чун,
Мен ёнармен, сенга ёнгаймен нечун?

200 Ташвишингдин қайнади қоним маним,
Лек жавонмардликни эплай олмадим.

Юз гуноҳ қилдим, vale боқмай анга,
Раҳматингни сен раво кўрдинг менга.

Подшоҳ, мискинга сен раҳм айлагил,
Не ёмонлик айласам, афв айлагил.

Билмайин қилдим, хатойимни кечир,
Сен қабул эт илтижойимни, кечир.

Бўлмаса жоним ниҳон ишқингда зор,
Кўзларимда нур бўлурму ошкор?

205 Холиқо, гар яхши қилдим ё ёмон,
Мен ўзим қилдим, ўзимдин ул ҳамон.

¹ Тифли шир – эмузикли бола, чақалоқ.

² Аblaҳ – содда, нодон маъносида. Мунаzzах – пок, тоза.

Эй Худо, дунхимматимни афв қил,
Неча айбу журматимни мавҳ қил.

Хун тўла кўнглим сарига сол назар,
Ғам ила андуҳни кўнглимдин кўтар.

Мен ўзимга мубтало, ҳайрон сенга,
Яхшидирмен ё ёмон, қурбон сенга.

Мен ярим жузвингга айла бир назар,
Куллга айлангум назар солсанг агар.

- 210 Ким бўлурмен гар бўлолсам кас сенга?
Йўқ бўлурмен гар эсам нокас сенга.

Кош бўлолсам эрди ҳиндуйинг сенинг,
Ҳиндуий хоки сари кўйинг сенинг.

Эйки лутфингдин кўнгил новмид эмас,
Ҳалқайи доғингману жовид, бас.

Кимни гар шод этмаса дардинг сенинг,
Бўйладирким, ул эмас мардинг сенинг.

Зарра дардинг дорую дармон менга,
Йўқ эса дардинг, не эрмиш жон менга?

- 215 Куфри кофирга, дини диндорга бас,
Зарра дардинг етса, ул Атторга бас.

Сенга маълум нолайи зорим ҳама,
Тунларимни менга мотам айлама.

Мотамим бўлди зиёд, сурим керак¹,
Зулмат ичра талъату нурим керак.

¹ Сур – бу ерда шодлик, шодиёна маъносида.

Лаззати нури мусулмонимни Бер,
Сен адамга нафси зулмонимни Бер.

Заррадирмен, бошим узра соя йўқ
Сендин ўзга кимсада сармоя йўқ.

- 220 Соямен, онҳазратим чун офтоб,
Риштамен, андин етишгай менга тоб¹.

Чун кўйингда заррайи саргаштамен,
Бас, кутилгаймен тутолсам риштамен.

Дарча бор, мен андин ўтмоқ истарам,
Олами равшангә ётмоқ истарам.

Мотамимда ёру ҳамдам бўл менга,
Бир кишим йўқ, раҳнамо ҳам бўл менга.

Эрта мендин холи қолгай масканим,
Кимсасиз эртамда ёрим бўл маним.

- 225 На Мусодин сенга етгайдир самар,
На Фиръавндин сенга етгай зарар.

Эй Худойи бениҳоят, ким яна?
Сен ўзинг беҳадду фоят, ким яна?

Сенки бундоқ бениҳоят, беадад,
Зотинга қайдин етишсин бул хирад?

Эй жаҳон халқини ҳайрон айлаган,
Ўзни парда ичра пинҳон айлаган,

Парда очгил энди, жоним ёқмагил,
Парда ичра бер омоним, ёқмагил.

¹ Ришта – ип, арқон.

- 230 Баҳри ҳайрат ичра қолдим ногаҳон,
Тут қўлим, саргашталиқдин бер омон.

Қонли денгиз ичрадирмен, ўтдамен,
Пардадин қолдим киролмай, четдамен.

Баҳри золим ичра солдинг бандани,
Бас, ўзинг солдинг, ўзинг қутқар мени.

Нафс тутиб илкимни, дасту пой менга,
Тутмасанг илкимни, Раббим,вой менга.

Қуршамиш жонимни чун беҳудалик,
Тоқатим тоқ этди бул олудалик¹.
- 235 Истамам олудалик, пок айлагил,
Ёки тўқ қонимнию хок айлагил.

Халқ сендин, мен ўзимдин қўрқамен,
Келди сендин яхшилик, мендин ёмон.

Чун ўлиқмен, олмамиш жисмимни хок,
Сен тирилт жонимни, эй жонбахшу пок.

Мўмину кофирни кўргил, қон ҳама,
Ёки саргашт, ёки юзтубан ҳама.

Гар чақирсанг, юз берур саргашталик,
Ҳайдасанг, келгай яна баргашталик².
- 240 Подшоҳим, қон аро оғуштамен,
Осмондек чарх уриб, саргаштамен.

Бир-бировга қўшнию ҳамсоямиз,
Сен мисоли офтоб, биз соямиз.

¹ Олудалик – ола-қуроқ, қоришиқ бир аҳволда яшаш.

² Баргашталик – қайтиш, юз ўгириш.

Сендин айру тушмагаймиз субху шом,
Кўнгил ичра сен тилақдирсен тамом.

Не бўлурди, эй Худойи муҳтарам,
Кўшилий ҳаққи, менга этсанг карам.

Дилда дарду жонда оҳим бор менинг,
Сенга бундоқ иштиёқим бор менинг.

245 Сўйласам дардимни, ҳеч поёни йўқ,
Кимсага арз айламак имкони йўқ.

Раҳбарим бўл, баски гумроҳмен, ўсал,
Давлатим бер, гарчи келдим бемаҳал.

Ҳар киши кўйингда давлатёр эрур,
Сенга сингиб, жонидин безор эрур.

Бор умидим чун, етар деб бегумон,
Менга ҳам ул баҳри лутфингдин нишон.

ҲИКОЯТ

Тутди ўғри бир мусоғир кимсани,
Сўнгра судраб, уйига элтди уни.

250 Бўйинини кесмоқчи эрди, шул замон
Хотини берди ғарибга бурда нон.

Ўғри келди тиф била, бош кесгали,
Ул ғариб қўлида нон кўрди вале.

Сўрди: ҳой, ким берди нонни, сўйлагил?
Хотининг берди бу нонни, деди ул.

Бас, эшитди кимса бу сўзни, тамом,
Деди: ўлдирмак сени бўлди ҳаром.

Ҳар кишиким еса бурда нонимиз,
Унга тиф чекмоққа йўқ имконимиз.

- 255 Нон егандин жонни тутмасмиз дариғ,
Бас, нетиб қонинг тўкармен, эй рафиқ?

ххх

Холиқо, то йўлда ҳолим шул менинг,
Кўп едим нонингни суфрангдин сенинг.

Чун киши нонини синдиригай киши,
Ҳақгузорлик унга бўлгайдир иши.

Сенدادир баҳри саховат тўлқини,
Кўп едим нонинг, риоят эт уни.

Ё Илоҳи оламийн, дармондамен,
Кема ҳайдаб даштаро, армондамен.

- 260 Тут қўлимдин, тобакай ғам остида,
Пашша янглиғ қўлларим бош устида?

Истасанг, бас, Холиқо, етгум анга,
Айлагайсен ёру ҳамроҳлик менга...

ҲАЗРАТИ РАСУЛИ АКРАМ САЛЛАЛЛОҲУ АЛАЙҲИ ВАССАЛАМ ВАСФИДА

Хожай дунёву дин, ганжи вафо,
Икки олам садру бадри Мустафо (с.а.в.)

Офтоби шарръу дарёйи яқин,
Нури олам, раҳмати ал-оламийн.

Пок жонлар пок жони хокидир,
Чун азалдин хоки жони покидир.

265 Икки олам сарвари, султони ул,
Икки олам жони ул, иймони ул.

Соҳиби меърожу садри коинот,
Сояйи Ҳақ, хожай хуршид зот.

Икки олам боғлидир фитрокига¹,
Аршу курси бош эгарлар хокига.

Пешвойи бул жаҳону ул жаҳон,
Муқтадойи ошкорову ниҳон.

Меҳтарину беҳтарини анбиё,
Раҳнамойи асфиёву авлиё.

270 Маҳди исслому ҳодийи сабил²,
Муфтийи ғайбу имоми жузву кулл.

Хожаким, ҳар не десам, андин баланд,
Барчадин устун, баланддин ҳам баланд.

Ўз-ўзин ул хожайи арсот демиш,
Аннамо он раҳмати мухлот, демиш³.

Икки олам жисмидин ном топди, бас,
Исмидин Арш тинчу ором топди, бас.

Шабнам эрди, маскани ул баҳри жуд,
Икки олам топдилар андин вужуд.

¹ Фитрок – отга бойланиб, ов қилинган жонворлар осиладиган қайиш тасма.

² Ҳодийи субул – йўлга бошловчи.

³ Мен аросат майдонининг хўжасиман, тўғри йўлга ҳидоят этилмиш раҳматман...

275 Нури ул мақсуди мавжудот эди,
Асл мавжудоту маъдумот эди¹.

Ҳақ этиб ул нури мутлақни зухур,
Сўнг яратди нуридин юз баҳри нур.

Ҳақ ўзига пок жонни шайлади,
Унга деб халқи жаҳонни шайлади.

Ҳаққа ундан ўзгаси мақсуд эмас,
Ул қадар покдомани мавжуд эмас.

Улки аввал жиби ғайбдин очди юз,
Нур эди, нури Муҳаммад шубҳасиз.

280 Нури олий баски чун чекди алам²,
Келди Аршу Курсию Лавҳу қалам.

Нури покдин бир нишон олам эрур,
Бир нишон ул гавҳари одам эрур.

Бўлди чун нури муаззам ошкор,
Саждага бош эгди, Ҳаққа интизор.

Шул сужуд ичра қарнлар кечдилар,
Шул руку ичра умрлар кечдилар.

Ўтди йиллар, бўлди машғули қиём,
Иштиёқ ичра кечиб умри тамом.

285 Чун сиғинди нури, ул дарёйи роз,
Фарз бўлди жумла умматга намоз.

¹ Маъдумот – йўқликлар.

² Алам – бу ерда нишон маъносида.

Нурни Ҳақ ою қүёшдек асрабон,
Кечди шундоқ неча мұхлат, не замон.

Сўнг муруват этди нурга, очди ул
Ногаҳон баҳри ҳақиқат сори йўл.

Курди нур не эрди мавжи баҳри роз,
Тошди андоқ, этди бир дам иззу ноз.

Чарх уриб айланди андоқ етти бор,
Етти осмон бўлди унга ошкор.

- 290 Ҳар назарким этди Ҳақ унга тўниб,
Ёнди кўк сахнида бир юлдуз бўлиб.

Сўнгра тинчиб қолди, ором олди нур,
Арши олий, Курси деб ном олди нур.

Аршу Курси акси зотин истади,
Сўнг малоик ул сифотин истади.

Ҳақ нафасдин бўлди анвор ошкор¹,
Кўнглидин оламга асрор ошкор.

Сирри руҳ фикр оламидин келди, бас,
Пас нафухт фиҳи мин руҳи нафас².

- 295 Бўлди ул анфосу ул асрор жамъ,
Бул сабабдин бўлди нур бисёр жамъ.

Нури боис жумла уммат келди бул,
Келди Ҳақдин жумла умматларга ул.

¹ Анвор – нурлар.

² Руҳимдан Одамга жон уфурдим.

Бўлди ул рўзи ҳисоб келгунча то¹
Жумла халқларга паямбар, муқтадо.

Даъват айлаб ул, басе этди талаб,
Бўлди шайтони мусулмон ул сабаб.

Ул яна жинларни даъват айлади,
Лайлутул жинга уларни чорлади².

300 Чорлади жумла Расул, қудсийни ҳам³,
Бўлдилар барча унинг олдида жамъ.

Даъват этди неча ҳайвонларки бор,
Шоҳид унга эчкию эчкиэмор.

Айтди сўз бутларга, бутларки тутош,
Барчаси қўйди унинг олдида бош.

Зарраларни даъват этди, ундади,
Кафтида тошлар Худони алқади.

Анбиёдин бул мақомга етди ким?
Барчани иймонга даъват этди ким?

305 Нури поки асли мавжудот эди,
Бор ҳама зотларга мунис зот эди.

Вожиб этди даватин икки жаҳон,
Ҳар нечук зарротки, ошкору ниҳон.

Жузву кулл чун унга уммат бўлдилар,
Ноили эъзозу ҳиммат бўлдилар.

¹ Рўзи ҳисоб – ҳисоб куни, қиёмат куни.

² Лайлутул жин – жин кечаси.

³ Қудсий – фаришталар, малаклар.

Рўзи маҳшар беамал шу бандани
Умматим деб, авфини сўргай Ани.

Жони шул шамъи ҳидоят деб атай
Ҳақ унинг умматларини сийлагай.

- 310 Ҳар бир ишда комил устоз эрди ул,
Барча ҳожатмандга ҳамроҳ эрди ул.

Боқмамишди нарсаларга мутлақо,
Йиғласа ҳар нарсасига лек раво.

Ҳар не мавжуддир, паноҳи бирладир,
Ҳар не мақсаддир, ризоси бирладир.

Сирли олам эрди олам ичра, бас,
Хаста кўнгиларга малҳам ҳар нафас.

Не кўринмиш хислати кўзгусида,
Кўрмамишди ўзгалар уйқусида.

- 315 Ўзни кулл деб, куллни ўз деб билди ул,
Олдини кўргандек ортин кўрди ул.

Унга хатм этди нубувватни Худо,
Мўъжиза, хулқу футувватни Худо.

Даъватига ҳозир айлаб хосу ом,
Неъматин ҳам унга баҳш этди тамом.

Берди коғирларга муҳлат, интихоб,
Бермади беҳуда озору азоб.

Дину дунёга паноҳдир ҳиммати,
Ул сабабдин файзёбдир уммати.

320 Ҳақ уни меърожга йўллаб, ул нафас,
Сирри кулл ёлғиз арода қолди, бас.

Икки қибла сори бош индириди ул,
Ғарбу шарқни шуълага тўлдирди ул.

Ҳақдин олди мўъжиза, уммул китоб,
Куллдин олди ул азиз, куллий ҳисоб.

Жумла мўмин она дер азвожини¹,
Хурмат айлар мурсалин меъроҗини.

Бор набийлар эргашиб, ул пешво,
Уммати олимлари чун анбиё.

325 Ҳақ зиёда айлаб унга эҳтиром,
Ёзмиш андин Инжилу Тавротда ном.

Тош андин қадру қиймат топди, бас,
Кудрати Ҳақ бирла топди, бас.

Қибла бўлди хоки поки турбати,
Чун залолатдин қутулди уммати.

Ул сабаб бутлар йиқилди сарбасар,
Уммати умматлар ичра мўътабар.

Оғзи суйи қатрасидин етди юқ,
Сувга тўлди қакраган, сувсиз қудуқ.

330 Ой ёрилди, бермади амрига дош,
Амридин қалқди яна ботган қуёш.

¹ Азвожини - аёлларини.

Икки елка ўртасида шуълавор
Эрди ул муҳри нубувват ошкор.

Бўлди ул хайрул билодга раҳнамун,
Ва ҳува хайрул халқ фи хайрил қурун¹.

Каъба андин бўлди байтуллоҳу нур,
Ким анга етди, омонлик топди ул.

Жабраил ҳам бўлди андин ҳирқадор,
Сўнг кўринди ул либосда ошкор.

- 335 Асирида тупроқда ортди вазну шан,
Бўлди масжиид, баски поку тоза ҳам.

Зарралар асрори бўлди чун аён,
Ҳақ, ўқи, деди анга амр айлабон.

Ҳақ тили Аҳмад забони эрди, бас,
Ҳур замон Аҳмад замони эрди, бас.

Рўзи маҳшар барча тиллар ўлгуси,
Тил бўлиб Аҳмад забони қолгуси.

Токи сўнгги дамгача дарё мисол
Кўнглида Ҳақ иззатидин шавқу ҳол.

- 340 Ғарқ этаркан қўнглини ул баҳри роз
Жўш уриб, шу лаҳза айларди намоз.

Чунки қўнгли бир буюк дарё эди,
Мавж уриб, мавжи ажаб, зебо эди.

¹ Байтнинг мазмуни: шаҳарларнинг энг хайрлисига раҳбар ва энг хайрли асрдаги халқнинг энг хайрлисиdir.

Гар сиқылса, дер: араҳни, ё Билол¹,
Токи тарк этсин күнгилни бу хаёл.

Гар жўшиб, жўшқинлик ичра эрди ул,
Каллимни, ё Хумайро, дерди ул².

Бўйла ҳол сиррни билгайму хирад,
Бормикин юздан бирин билмоққа ҳад?

345 Хилвати сори ақлга роҳ эмас,
Илму фан давронидин огоҳ эмас.

Дўст ила хилватда мажлис қурса гар,
Жабраил кирмас, қаноти кул бўлар.

Этса гар Симурғ жонин ошкор,
Ваҳм аро Мусо бўлур мусичавор.

Ул эшикка борди Мусо ҳам, шу тоб
Халъ наъланн, дебон етди хитоб³.

Ул сабаб андин йироққа кетди ул,
Водийи иймонда бўлди ғарқи нур.

350 Эрди чун меърожда шамъи Зулжалол,
Ул эшилди, етди овози Билол.

Гар Мусо Имроний эрди, подшо,
Топмади наълин бўлиб даргоҳга роҳ⁴.

Боқки, Ҳақ Аҳмадга не лутф айлади,
Ул туфайли чокарин ҳам сийлади⁵.

¹ Ё Билол, бизни севинтирип.

² Ё Хумайро, мен билан гаплаш.

³ Оёқ кийимингни еч...

⁴ Наълин – оёқ кийими кийган.

⁵ Чокар – хизматкор, мулоғизим.

Гарчи наълин бўлса ҳамки, сўйига
Кўйди, марду маҳрам этди кўйига.

Кўрди Мусо бўйлаким иззат эрур,
Чокари Аҳмадга не қурбат эрур¹.

355 Деди: ё Раб, унга уммат айлагил,
Кул бўлай Аҳмадга, ҳиммат айлагил.

Гар Мусода эрди бул ҳожат мудом,
Лек Исога етди ул олий мақом.

Қолмагай бас, тарки ул хилват этар,
Халқни Аҳмад динига даъват этар.

Чун тушиб тўртинчи кўқдин ерга ул,
Жонини шу кўйда қурбон айлаюр.

Унга қул бўлгач Масиҳи номдор,
Исмини кўйди Мубашшир Биру Бор².

360 Гар бирор деса, қани бир чорасоз
Кетса дунёдин ва изга қайтса боз.

Барча мушкулларни осон айласа,
Шубҳаю шакларни дилдан ҳайдаса.

Бил, раво айлаб у дунёдин дарак,
Қайтгучи бўлмас Муҳаммаддин бўлак.

Улки кўрди унда пешволик била,
Кимса ҳеч кўргайму донолик била?

¹ Қурбат – яқинлик.

² Мубашшир – хушхабар келтирувчи.

Улки султон, құл ва маҳрамдир ҳама,
Улки шох, тобе, мусалламдир ҳама.

365 Чун азиз бошиға тож қўндириди Ҳақ,
Эшиги олдида тупроқ бўлди халқ.

Мўйидин тушди жаҳонга атру мушк,
Соғиниб денгиз уни лабташна, хушк¹.

Бўлмамиш ким ташнайи дийдор анга,
Тош, оғочлар ҳам севиб, хуштор анга.

Ҳар сафар минбар сари қўйса қадам,
Юксаларди нолайи Ҳаннона ҳам.

Осмони бесутунда нур эди,
Айрилиқдин ул сутун ранжур эди.

370 Васфига сўз йўқса, қандоқ айтамен?
Тергамас, ботдим уятдин қонга мен.

Ул фасиҳи оламу мен лол анга,
Мен нечук бергум чу шарҳи ҳол анга?

Васфига лойиқму мендек телба кас,
Васфини Халлоқи олам айтди, бас.

Бул жаҳон бору бисот-ла хокидир,
Йуз жаҳон жон хоки жони покидир.

Анбиё ҳам васфида ҳайрон ҳама,
Сиршунослар борки, саргардон ҳама.

¹ Хушк - қуруқ.

375 Эйки кулсанг, кўқда кулгай афтоб,
Йиғласанг, йиғлар булулар ҳам шу тоб.

Икки олам хоки пойинг гардиdir,
Бир гилам остида ётмоғинг надир?

Бир нафас бошинг чиқар, эй безавол,
Ул гиламни сен оёқ остига ол.

Жумла шаръ шаръинг ила маҳв бўлдилар,
Бор асл фаръингга мағлуб бўлдилар¹.

То абад шаръинг ва аҳкоминг сенинг,
Ёдланур Ҳақдин кейин номинг сенинг.

380 Барча ўтган анбиё борким, Расул,
Барчаси динингни этгайлар қабул.

Келмади дунёга сендеқ кимса, ҳай,
Бўйлаким сендин кейин ҳам келмагай.

Оlam ичра афзали оlam ўзинг,
Ават эрдинг бунда, охир ҳам ўзинг.

Борми бир гардингга етган, етди ким?
Ўзни ул юксакка ноил этди ким?

¹ Фаръ – аслдан ўсиб чиққан, яъни, асл эмас, иккинчи даражали нарса, масалан, дарахтнинг бутоги.

◆ ◆ ◆

ҲАЗРАТИ РАСУЛИ АКРАМ САЛЛАЛЛОҲУ АЛАЙҲИ ВАССАЛАМГА ИЛТИЖО

Аҳмади мурсални билким то абад
Икки олам сарвари этди Аҳад.

- 385 Ё Расулиллоҳ, машаққат тортибон,
Кўлда ел, бошимда тупроқмен ҳамон.

Жумла бекасларга ёрсен ҳар нафас,
Сендин ўзга йўқ менга оламда кас.

Бир назар ҳолимга сол, оворамен,
Чора қил дардимга, чун бечорамен.

Мен умрни елга бердим бир йўла,
Ё Расул, Ҳақдин гуноҳимни тила.

«Ла таъман»дин келди қўрқув бас менга,
«Ла тайъасу»дин дарс менга¹.

- 390 Кеча-кундуз бошим узра мотаме,
Айлагайсенму шафоат бир даме?

Эшигингдин бир шафоат етса ул,
Не гуноҳ этдим, савобга айланур.

Эйки сен ерсан ғарибларнинг ғамин,
Ёқ ўшал меҳру шафоатнинг шамин.

Токи бир парвона янглиғ талпиниб,
Мен борай шамъинг ўтиға пар уриб.

¹ Байтнинг мазмуни: «Оллоҳнинг «макри»дан хотиржам бўлиб қолдиларми?» ҳукмидан қўрқаман, «Оллоҳнинг раҳматидан ноумид бўлманглар» ҳукмидан умидланаман... Куръони Карим, «Аъроф» сурасининг 99-ояти ва «Юсуф» сурасининг 87-оятига ишорат.

Ким кўрар шамъи жамолинг ошкор,
Жон фило айлар анга парвонавор.

- 395 Дийдайи жонга лиқойинг етса, бас,
Икки оламда ризойинг етса, бас.

Доруий дарди дилим меҳринг сенинг,
Нури жоним хуршиди чеҳринг сенинг.

Жоним остоңангдадир бойлаб камар,
Гавҳари тифи забоним бор магар.

Ҳар гуҳар сочдим забонимдин уни
Йўлларингда, қаъри жонимдин уни.

Бахри жоним бўлди чун гавҳарфишон,
Токи топгаймен дебон сендин нишон.

- 400 Гар нишонингдин нишон келгай менга,
Бенишонлик бир нишон бўлгай менга.

Ҳожатим улдирки, эй олий гуҳар,
Лутф этиб, ҳолимга солгайсен назар.

Ул назардин бенишонлик келгуси,
Бенишонлик, жовидонлик келгуси.

Ҳар нечук ширку гумонда йўқ нажот,
Боридин пок эт мени, эй пок зот.

Юз қаро қилма гуноҳдин, этма хор,
Мен адашмен сенга, этгил эътибор.

- 405 Бир гўдакдирмен йўлингда, сувга ғарқ,
Шул қаро гирдоб аро андуҳга ғарқ.

Кўзларим тортмиш қаро сувдин қаро,
Тут қўлимдин, йўлга сол, эй муқтадо.

ХИКОЯТ

Сувга тушди бир анонинг боласи,
Кўкка учди ул сабабдин ноласи.

Сув оқарди, тўлқин ичра жонсарак,
Гоҳ чўкиб, қалқиб борар эрди гўдак.

Кўл-оёқ силкирди, боқмай зорига,
Элтар эрди сув тегирмон сорига.

- 410 Новга етганда ано кўрди уни,
Сувга отди ўзни, қутқарди уни.

Бағрига босди, ҳарорат этди бахш,
Сув бериб, жонига роҳат этди бахш.

Эйки меҳринг юз анодин ҳам зиёд,
Бизга бул ғарқи балодин бер нажот.

Ғарқ бўлиб гирдоби ҳайрат ичра биз,
Чун оқармиз оби ҳасрат ичра биз.

Ул гўдак янглиғ чўкиб, қалқиб шу тоб,
Талпинармиз, дилда дарду изтироб.

- 415 Сувга ғарқ бўлган гўдаклармиз магар,
Бир нафас аҳволимизга сол назар.

Раҳмат айлаб, эт фалокатдин халос,
Чорасизларни ҳалокатдин халос.

Бизга сут бер, тут мурувват сийнасин,
Тутма кам лутфу карамлар суфрасин.

Сен ҳама васфу сифатлардин баланд,
Ақли хуш қаршингда лолдир, мустаманд.

Кимса фатрокингни истаб чўзди қўл,
Етмади, кўйингда тупроқ бўлди ул.

- 420 Хокинг ул асҳоби покингдир сенинг,
Аҳли олам хоки хокингдир сенинг.

Кимки асҳобингга хок эрмас, ўшал,
Дўстларинг наздида душмандир тугал.

Аввали Бубакру охир Муртазо,
Чор рукни қаъбайи сидқу сафо.

Ул бири сидқ ичра ҳамрозу вазир,
Бул бири адл ичра офтоби мунир¹.

Ул бири баҳри камол, ҳилму ҳаё,
Бул бири илм аҳли ичра подшо.

**ХАЛИФАЙИ АВВАЛИН,
АМИРАЛ-МЎМИНИН АБУБАКР-АС-СИДДИҚ
РОЗИЙАЛЛОҲУ АНҲУ ВАСФИДА**

- 425 Хўжайи аввалки аввал ёр эди
Ул Расулиллоҳга, маскан ғор эди.

Садри дин, сиддиқи Ақбар, қутби Ҳақ,
Ҳаммадин ҳар нарсада олмиш сабак.

Ҳар неким берди, насиб этди Худо,
Ҳар неким олди Мухаммад Мустафо,

¹ Офтоби мунир – порлок қуёш.

Тўқди Сиддиқ сийнасига борини,
Топди Сиддиқ ул буюк асрорини.

Бир нафасда икки олам чекди ул,
Оғзига тош солди, хуш дам чекди ул.

- 430 Ҳар кеча Сиддиққа одат бўлди шу,
Бош эгиб, то тонггача ҳув дерди, ҳув.

Ҳув етиб Чинга этарди бор-бор,
Охуйи тотор хунини мушкбор.

Шул сабабдин офтоби шаръу дин
Деди: илм излаб боринг то мулки Чин.

Ҳар нафас то Ҳувда бўлгай диққати,
Шул эди Сиддиқдаги тош ҳикмати.

Тангри номидин бўлак бир сўзни ул
Сўйламасликдин аломат эрди бул.

- 435 Тоши бўлса, кимса топгайдир виқор,
Тоши гар йўқ эрса, қайда эътибор?

Қадри олдида Умар ҳам эгди бош,
Деди: қил бўлсан унинг кўксисда кош¹.

Чун этарсен ҳадди иззатни қабул,
Бас, Расулдин сўнгра Сиддиқ эрди ул.

¹ «Умар Абу бакрдаги фазилатларнинг биттасидир» деган маънода ҳадис бор. Буни эшигтан Умар, кошки, мен Сиддиқ кўксисда ўсган бир тола қил бўлсайдим, деган.

◆ ◆ ◆

ХАЛИФАЙ СОНИЙ, АМИРАЛ-МҮМИНИН УМАР РОЗИЙАЛЛОХУ АНХУ ВАСФИДА

Хожайи шарь, офтоби жамъи дин,
Зилли Ҳақ, форуқи аъзам, шамъи дин.

Адлу инсофни анга бермишди Ҳақ,
Боз фаросатдин яна этмиш сабак.

- 440 Тоҳадин дарс етди унга илк бор¹,
Йўлга тушди, бўлди поку беғубор.

Тоҳанинг ҳойи ҳаяжон этди баҳш²,
Кимки етди, унга ул жон этди баҳш.

Ким ўтар аввал Сиротдин бехатар?
Деди Пайғамбар: ул ўтгувчи – Умар.

Жаннатул маъвога илк боргувчи ул,
Ҳай, очинг, деб эшигин ургувчи ул.

Бошдаёқ Ҳақ тутди баским қўлидин,
Боргай ул то сўнгги дам Ҳақ йўлидин.

- 445 Дин безанди адлу инсофи била,
Тошди Нил, тинди, босилди зилзила.

Шамъи жаннат эрди ул эл ичраким,
Эл аро шамъ соясини кўрди ким?

Сояси йўқ эрса шамнинг, бас, нечун
Соясидин қочди ул шайтони дун?

¹ Ҳазрати Умар илк бор Куръони каримнинг Тоҳа сурасини эшитган.

² «Тоҳа» сўзидағи ҳойи ҳаввоз ҳарфи.

Сүзга лаб очса, ҳақиқат ул замон
Тилга келгай, сүзда бўлгайди аён.

Дарди ишқдин гоҳи жони ўртанур,
Нутқи Ҳақдин гоҳ забони ўртанур.

- 450 Чун Набий кўрди, Умар ёнгайди зор,
Шамъи жаннатдир, деди, бул номдор.

УЧИНЧИ ХАЛИФА, АМИРАЛ-МЎМИНИН УСМОН РОЗИЙАЛЛОҲУ АНҲУ ВАСФИДА

Хожайи суннат, нури мутлақ эрур,
Икки нурга соҳиби барҳақ эрур¹.

Улки ғарқи баҳри ирфон эрди, бас,
Садри дин, Усмони Аффон эрди, бас.

Дину иймон юксалиб, ўсди ажаб
Ул амирал мўминин Усмон сабаб.

Ҳам бу дунё, ҳамда ул дунёда ҳам
Икки нурдин бўлди равшан, муҳташам.

- 455 Юсуфи соний, бақавли Мустафо,
Баҳри тақвову ҳаё, кони вафо.

Бошини кесганда ўлтирмиш эди,
Қайғу, ҳасратлар била тўлмиш эди.

Адли бирлан бўлди иймон мунташир,
Ҳукми бирлан бўлди Куръон мунташир².

¹ Ҳазрати Усмон Расулуллоҳнинг (с.а.в) бир қизларига уйланган, у вафот этгач, иккинчи қизларига уйланган. Шу муносабат билан Зиннурайн – икки нур соҳиби, деб ном олган.

² Мунташир бўлмоқ– ёйилмоқ.

Бу жаңонда ҳам ҳидоят, ҳам хунар
Топдилар равнақ у давронда, самар.

Ақрабосига этиб жонин фидо,
Хар не мушкул эрса, айларди адо.

- 460 Сайид-ус-содат демиши, борми шак,
Шарм айлар кўкда Усмондин малак.

Боз Расулиллоҳ демиш, очмиш ҳижоб:
Ҳақ таоло сўрмас Усмондин ҳисоб.

Ҳозир эрмас эрди байъат чоғи ул,
Үрнига құл узра құл қүйди Расул¹.

Бир киши дедики, кошкы бўлмасам
Бунда мен ҳам, етса бундоқ бир карам.

Сарвари олам деди: айтай сенга,
Хар не этсин, энди күркүв йүк анга.

ТҮРТИНЧИ ХАЛИФА, АМИРАЛ-МҮМИНИН АЛИ ИБНИ АБУ ТОЛИБ КАРРАМАЛЛОХУ ВАЖХАХУ ВАСФИДА

- 465 Хожайи ҳақ, пешвойи ростин²,
Кони илму баҳри ҳилму қутби дин.

Соқийи кавсар, имоми раҳнамо,
Ибни амми Мустафо, шерри Худо.

¹ Худайбийя жанги олдиdan Ҳазрати Усмон Маккага элчи қилиб жүна-тилиб, у ерда ҳибсга олинган эди. Бу хабар етиб келгач, Расулуллоҳ бир дараҳт остида ўлтириб, саҳобалар олдида ўнг қўлини чап қўли устига қўйиб, ҳазрати Усмон номидан байъат расмини адо этган эди.

² Ростин – хакикий.

Муртазойи мужтабо, жуфти Батул¹,
Хожайи маъсуму домоди Расул.

Сўзи бирлан раҳнамун эрди мудом,
Соҳиби сирри салун эрди мудом².

Муқтадойи дин эди, дарё кўнгил,
Муфтийи мутлақ, Алийи олим ул.

470 Тоқ эди Ҳақ оламида ончунон,
Ким унинг илмига этгайдир гумон?

Тўғри хукм этгувчи доим ул эди³,
Зоти Ҳақ бирлан мудом машғул эди.

Гар ўлик танни тирилтириди Исо,
Чун кесик қўлни тузатди Муртазо⁴.

Елкасин тутди Расул, чиқди Али,
Каъбада бутларни абгор этгали⁵.

Макнуноти ғайб эди кўнглида жам,
Етти офтобни чиқарди кўйнидан.

475 Етти офтоб этмасайди ошкор,
Илкига тушгайму эрди зулфиқор?⁶

¹ Батул – Расулуллоҳнинг (с.а.в) қизлари, Фотиманинг (розийаллоҳу анҳо) лақаби; зоҳида маъносида.

² «Энг тўғри хукм этгувчи кимса – Алидир» деган ҳадисга ишорат.

³ Ҳазрати Али бир гал хутба ўқиркан, шу осмон остида ҳар неким жумбок, муаммо бор эса, мендан сўрайверинг, кўксимда илм денгизи бор, деган. Бу ерда шунга ишорат этилмоқда.

⁴ «Энг тўғри хукм этгувчи кимса – Алидир» деган ҳадисга ишорат.

⁵ Ҳазрати Умар илк бор Қуръони Каримнинг «Тоҳа» сурасини эшиштган.

⁶ Зулфиқор – Муҳаммад алайҳиссаломнинг икки тиғли қиличи, уни Алига тақдим этган.

Гоҳ жўшар эрди кўриб ўз корини,
Чоҳга айтарди гаҳи асрорини.

Термулиб оламга, ҳамдам топмади,
Кўнглига жо бўлди, маҳрам топмади.

ТААССУБ БАҲСИ

Эйки сен ҳар дам таассуб айлаган,
Дўсту душманликка ўзни бойлаган.

Айтганинг ул ақлу хушдин бўлса чун,
Дам урарсен, айт, таассубдин нечун?

- 480 Йўқ халофат ичра майл, эй бехабар,
Майл этгайму Абубакру Умар?

Майл агар бўлсайди, икки муқтадо
Ўғлини этмасму эрди пешво?

Гар улар урсайди ҳақсизликка қўл,
Бошқалар бермасди асло бунга йўл.

Манъ этишлар бўлмади, ёхуд улар
Тарки вожибни равоми кўрдилар?

Чун уларнинг манъ этилмабти иши,
Жумла каззоб, деб нечук айтар киши?

- 485 Баски каззоб эрса асҳоби Расул,
Сенга Пайғамбар сўзи эрмас қабул.

Деди: ҳар асҳоб-дурахшоним менинг,
Энг гўзал даврон – шу давроним менинг.

Энг асл халқ – дүстүр ёримдир яна,
Ақрабойым, меҳри боримдир яна.

Яхшилар сенга ёмон эрса магар,
Ким сени оқыл дегай, соҳибназар?

Чунраво кўргайсен, асҳоби Расул,
Бўйла бир ноҳақни этгайлар қабул?

- 490 Мустафо ўрнига қўйгайлар уни?
Йўқ, сира асҳоб раво кўрмас буни.

Гар уларга ихтиёр эрмасраво,
Ихтиёри жамъи Куръон ҳам хато¹.

Ҳар неким асҳоби Пайғамбар этар,
Тўғридир ул, лойиқу афзал этар.

Гар уларнинг биттасин хор айладинг,
Ўттиз уч мингини инкор айладинг.

Улки Ҳақдин айру бир дам тутмамиш,
Тева тизбоғи-да андин йитмамиш.

- 495 Ўзгалар ҳақига қўл чўзгай, дема,
Қўй бу гапни, бир гумоне айлама.

Майли ботил бўлса Сиддиқда агар,
Бул мақомга ул нечук лойиқ бўлар?

Гар Умарда майл бўлса, ҳар тугул,
Дарра бирлан ўғлин ўлдирмасди ул.

¹ Байтнинг мазмуни: Агар саҳобаларнинг йиғилишиб, бир кишини сайлаши тўғри бўлмаса, Куръоннинг йиғилиб, бир китоб ҳолига келтирилиши ҳам хатодир.

Сиддиқ эрса йўлчи эрди, раҳнамо,
Фикрида ҳар лаҳза даргоҳи Илоҳ.

Молу қиз ҳам жонни тикиди ҳар маҳал,
Бўйла инсон зулм этарму? Ҳай, уял!

500 Йўқ эди қашри ривоят ичра ул¹,
Ҳар нафас эрди ҳидоят ичра ул.

Минбар узра лофу қоф урмас эди,
Хўжаси ўрнига ўлтирмас эди.

Барча ёқдин барча кўргайди буни,
Бас, нечук ҳақсиз деб айтарсен уни?

Мисли форуқ ул адолат айлабон²,
Ғишт қуяр, янтоқ чопарди ҳар замон.

Сўнг ўтинни боғлар эрди дасталаб,
Сўнг шаҳарга элтар эрди орқалаб.

505 Ҳар куни бу нафс зиндонида хос
Етти луқма нон егай эрди, холос.

Суфрасида туз ва сирка, бас, эди,
Нонни байтул-молдин ул олмас эди.

Кум тўшакда ухлар эрди доимо,
Болиши тупроқ эди шому сабоҳ.

Елкада машкоб, борар сув бўйига,
Сув таширди кекса кампир уйига.

Тунлари элга нигаҳбон эрди ул,
Ухламай, лашкарга посбон эрди ул.

¹ Қашри ривоят – ривоят пўстлоғи.

² Форуқ – ҳақни ботилдан ажратувчи, ҳазрати Умарнинг лақаби.

510 Сўрди: Хузайфа, Умарда сен магар
Кўрганинг борму нифоқдин бир асар?

Айбини айтдим юзига, ул ҳамон
Ранжимай, менга юборди армуғон...

Бўлса эрди бир хатоси, ҳийласи,
Эгнида бўлмасди эски ҳирқаси.

На гилам бор эрди унда, на равок,
Кийгани эрди ҳамиша юз ямоқ.

Баски подшоликда чун сабр айлагай,
Ўзгаларга ул нечук жабр айлагай?

515 Улки гоҳи ғишт кўтаргай, гоҳи лой,
Бул дағи изҳори ботилликми, ҳой?

Гар ҳукмронликни қилсайди ҳавас,
Шоҳ деб эълон этарди ўзни, бас.

Не шаҳарларким эди аҳкомида,
Топди иймонин унинг айёмида.

Гар таассуб айлагайсен бул сабаб,
Сенда инсоф йўқ, ёрил, эй беадаб.

Ўлмади ул сен кабилар қаҳридин,
Не ўларсен, тотмадинг-ку заҳридин?

520 Айлама, эй жоҳилу ҳақношунос,
Ул буюкларни ўзинг бирлан қиёс.

Ул буюклик сенга келсайди агар,
Ўт олиб, бағрингда куйгайди жигар.

Кимки олгайди халофат бўйнига¹,
Олгай эрди бори офат бўйнига.

Йўқ, осон эрмасди, токи танда жон,
Халқ юки бўйнингда турса ҳар замон.

ҲИКОЯТ ҲАЗРАТИ УМАРНИНГ ХАЛИФАЛИКДАН ВОЗ КЕЧГАНИ

Бир куни Вайс олдига келди Умар,
Дедиким, бездим халофатдин, етар.

Гар харидори топилса, бегумон,
Бир динор олтинга сотгаймен ҳамон.

Чун Увайс тинглаб бу сўзни, деди: бас,
Сен уни ташла, халос бўл шу нафас.

Йўлга от, бир кимса олгайдир уни,
Истаса, қўйнига соглайдир уни...

Тарқади, етди қулоқларга хабар,
Дўсту ёрон доду фарёд солдилар.

Дедилар: этма бу ишни, пешво,
Халқни сарсон айлама, баҳри Худо.

530 Салтанатни сенга Сиддиқ юклади,
Ҳар жиҳатни этди таҳқик, юклади.

Юз буриб, гар этмасанг фармонини,
Инжитарсен, ранжитарсен жонини...

Бу далил эгди Умарни мисли тош,
Бўйнига олди юмушни, эгди бош.

¹ Халофат – халифалик.

ХИКОЯТ ҲАЗРАТИ АЛИНИНГ ЎЗ ҚОТИЛИГА ШАРБАТ СУНГАНИ

Ногаҳон бир кимса, бадбахти қазо
Үрди тиф, қонга беланди Муртазо.

Тутдилар шарбат, vale сўрди карим:
Қайда ул қонимни тўккан душманим?

- 535 Мен ичармен сўнгра, аввал ичсин ул,
Шарбатим ичса, менга ҳамроҳ бўлур.

Шул замон хоинга шарбат тутдилар,
Деди: Ҳайдар менга бермоқчи заҳар...

Муртазо дедики, ичсайди уни,
Мен Худо ҳаққи, аниқ айтгум буни.

Етмагунча жаннатул маъво анга,
Бўлмас эрди жаннатул маъво менга...

Душмани истарки, ўлсин Муртазо,
Муртазо унга биҳишт кўргай раво.

- 540 Душманига меҳру шафқат этди чун,
Бубакрга қаҳру кин этгай нечун?

Душмани деб шунчалар ғам чекди ул,
Бас, нетиб Аътийқقا душманлик қилур?

То жаҳон тургай, топилмас ҳеч қачон
Муртазодек унга дўсту меҳрибон.

Неча дерсанки, Али мазлум эди,
Чун халофат ҳаққидин маҳрум эди.

Шери Ҳақ эрди Али, бош узра тож,
Шерга ким айлар зулм, эй кўзни оч.

ҲАЗРАТИ АЛИ ҲАҚИДА ЯНА БИР ҲИКОЯТ

545 Йўлда бир манзилга қўнмишди Расул,
Сув беринг лашкарга, деб амр этди ул.

Бир киши борди қудуққа, қайтди боз,
Деди: сув эрмас қудуқда, қон, холос.

Сўрдиким, билгаймисиз не борини?
Муртазо айтмиш анга асрорини...

Тинглабон чун ўртаниб, бўлмиш қуруқ,
Ложарам сўнг қонга тўлмишдир қудуқ...

Кимсаким, жонида бундоқ зори бор,
Бир чумолига нечук озори бор?

550 Ўртанур жонинг таассубдин ҳама,
Муртазода бўйла жон йўқ, сўйлама.

Муртазони этма аслингга қиёс,
Ҳаққа ғарқ эрди тамом ул ҳақшунос.

Бўйлаким мустағриқи кор эрди ул,
Кўй хаёлотингни, безор эрди ул.

Сен каби пуркийна эрса Муртазо,
Мустафо хайлига айларди низо.

Ул эди сендин кўра мардонарок,
Этмамишди кимсага кийну нифок.

- 555 Бўйла ноҳақ эрса гар Сиддик, ажаб,
Улки барҳақ ҳақни айларди талаб.

Турдилар ул хайли Уммул-мўминин,
Динни четлаб, этдилар Ҳайдарга кийн.

Солдилар гар неча ғавғо, ғулғула,
Этди дафъ бу ишни Ҳайдар зўр ила.

Чун қизи-ла жанг қилолган бешу кам
Жанг қилар эрди атоси бирла ҳам.

Сен Алидин бехабарсен, эй ўғил,
Билганинг ул айну лому ё нуқул¹.

- 560 Сенку жонинг ишқи бирлан бекарор,
Ул этарди юзта жонин ҳам нисор.

ҲАЗРАТИ АЛИ РОЗИЙАЛЛОҲУ АНҲУНИНГ БҮЮКЛИГИ, ОЛИЖАНОБЛИГИ ВАСФИДА

Аҳли асҳобдин ҳалок бўлса касе,
Ҳайдари Каррор чекарди ғам басе.

Мен нечун, дерди, тириқдирмен ҳануз,
Бўлди чун наздимда хор жони азиз?

Дерди Пайғамбар: сабр эт, ё Али,
Сенга ҳам келгай ҳалокатнинг Гали...

¹ Али сўзида ишлатиладиган ҳарфлар.

◆ ◆ ◆

ҲИКОЯТ БИЛОЛНИНГ ДИНДАГИ САБОТИ

565 Бир куни шўрлик Билолнинг қалтироқ,
Нотавон жисмига тушди юз таёқ.

Бошига калтак ёғаркан беадад,
Йиғламасди ул, Аҳад, дерди, Аҳад...

Гар оёғингга тикан кирса, ҳамон
Бўлмагай сенда бирорвга майли жон.

Бир тикан заҳмига бош эгкан киши
Бўйла қавм бирлан нечук бўлгай иши?

Бас, улар ундоғу сен бундоқ, қараб,
Табакай бу ишга ҳайронсен, ажаб?

Гар тилингдин бутпараст орастадир,
Ул забонингдин саҳоба хастадир.

570 Дафтаринг этма қаро беҳуда, ҳай,
Тилни тийганда ютардинг ҳар қалай.

ҲИКОЯТ ҲАЗРАТИ АБУБАКР ВА ҲАЗРАТИ АЛИНИНГ ПАЙҒАМБАРГА САДОҚАТИ

Гар Али эрди, агар Сиддиқ эди,
Жонлари чун ғарқайи таҳқиқ эди¹.

Фор томон юрганда бир кун Мустафо,
Ўрнига бош қўйди, ётди Муртазо.

¹ Жонлари ҳақиқат денгизига ботган эди.

Жонни Ҳайдар айламишди чун нисор,
То омон қолгай деб ул садри кибор.

Ёри ғор олдида Сиддиқи жаҳон
Ҳозир эрди ҳар нафас, тикмишди жон.

- 575 Иккиси ҳам жонфидо эрди анга,
Жону дил бирлан адo эрди анга.

Сен таассуб қил, улар мардонавор
Айламишди жонни жононга нисор.

Гар унинг сен марди эрсанг ё бунинг,
Борму андоқ дардидек дардинг сенинг?

Ё улардек жонфидолик пеша қил,
Ёки жим бўл, тарки бул андиша қил.

Сен биларсен ким Бубакру ким Али,
Бехабардирсен Худойингдин vale.

- 580 Ковлама, не кечди, бўлди воқеа,
Марди Ҳақ бўл сен мисоли Робиа.

Ул аёл эрмасди, юз бир мард эди,
Бор вужуди бирла айни дард эди.

Ғарқи нури Ҳақ эди ул доимо,
Поку мустағрақ эди ул доимо.

Биттаси сўрдики, эй соҳиб қабул,
Сўйла не эрди ул асҳоби Расул?

Дедиким, Ҳақ бирладирмен ҳар маҳал,
Менда асҳобу ёрондин не хабар?

585 Бўлмасайдим Ҳаққа бундоқ ҳамдаме,
Ҳаққа парво айлар эрдим бир даме.

Мен эдим чун Ҳаққа сажда айлаган,
Қўзларимга ботди, санчилди тикан.

Кўзларимдин қонларим оқмиш равон,
Мен улардин бехабар эрдим тамом...

Улки кўнглида бу янглиғ дард эди,
Йўқ, сира хотин эмасди, мард эди¹.

Боз дедиким, мен чу бўлдим ҳақшунос,
Ўзгаларни кимга айлармен қиёс?

590 Сен бу йўлда на Худосен, на Расул,
Торт қўлингни, этмагил радди қабул.

Қўй таваллою табарро, пок бўл,
Бир ҳовуч хоксен, бу йўлда хок бўл.

Бир ҳовуч хоксен, сўзинг хок айлагил,
Барчани покиза бил, пок айлагил.

ҲИКОЯТ

Юзланиб деди Худовандга Расул:
Умматим корини менга юклагил.

То гуноҳин ўзга кимса билмасин,
Умматимнинг айби ҳеч очилмасин.

595 Ҳақ таоло дедиким, эй мўътабар,
Кўрсанг эрди ул гуноҳларни агар.

¹ Мард – бу ерда эркак маъносида.

Тоб беролмасдинг боқиб, ҳайрон бўлиб,
Сўнг хижолатлар аро пинҳон бўлиб...

Эрди Ойша маҳбуби жонинг, ажаб,
Қолди кўнглинг, бўлди бир буҳтон сабаб.

Гарчи айтмишди уни аҳли мажоз,
Сен жўнатдинг қизни ўз уйига боз.

Севганингга этганинг иш мунчадир,
Умматинг ичра гуноҳкор қанчадир...

- 600 Тоб беролмассен гуноҳлар вазнига,
Умматингни қўй Худонинг измига.

Сен тиларсен, топмасин аҳли жаҳон
Умматинг этган гуноҳдин бир нишон.

Мен-да истармен, аё олий гуҳар,
Етмасин сенга гуноҳлардин хабар.

Ўртага тушма, чекил бир четга, ҳой,
Умматингни менга топшири, менга қўй...

Мустафога қолмамиш уммат иши,
Сенга қолмишму бу ташвиш, эй киши?

- 605 Қўй ўшал ҳукмингни, тийгил тилни ҳам,
Бетаассуб, тўғри йўлга бос қадам.

Бас, улар не айламиш, эт эҳтиром,
Соғ-саломат ўз йўлингда қил давом.

Ё садоқат ичра бўл Сиддиқвор,
Ё чу Форуқ эт адолат ихтиёр.

Ё чу Усмон пурҳаёву ҳилм бўл,
Ё Алидек баҳри жуду илм бўл.

Ё эшиит пандимниу тутгил адаб,
Ёки бошингни олиб кет бир тараф.

- 610 Марди сидқу илм эмасдирсенки, бас,
Марди нафсдирсен ва кофир ҳар нафас.

Нафси куфринг ўлдириб, мўмин бўл,
Нафсни ўлдир-да, басе эмин бўл.

Сен таассуб ичра гўллик айлама,
Ўз бошинг бирлан расуллик айлама.

Пуч сухан бўлмас шариатда қабул,
Сўзлама ундоқ деб асҳоби Расул...

Менда йўқ беҳуда сўзлар, эй Худо,
Бас, таассубдин йироқ тут доимо.

- 615 Фориғ айла, бўлмасин жонимда ул,
Бўлмасин бир зарра девонимда ул.

ДЕБОЧА ҚУШЛАРГА ХИТОБ

Марҳабо, Худхуд, ҳақиқат элчиси,
Жумла водийларда қушлар йўлчиси.

То Сабо етгунча ул сайринг на хуш,
Шоҳ бирлан мантиқут-тайринг на хуш¹.

¹ Бу ерда Сулаймон пайғамбарнинг қушлар билан мулоқоти назарда тутилмоқда.

Соҳиби сирри Сулаймонсен, ажаб,
Ярқирап бошингда тожинг ул сабаб.

Девни тутгил, банди зиндан айлагил,
Не эмиш рози Сулаймон, тинглагил.

- 620 Дев қачонким банди зиндан ўлгуси,
Масканинг қасри Сулаймон ўлгуси...

Кел, гўзал мусича, эй мусосифат,
Янграсин созингда сози матрифат.

Нағма созинг жон дебон тинглайди жон,
Хилъатин сен унга этгайсен аён.

Чун Мусо кўрдинг оловни, нурни сен,
Сўнгра Тур тоғида бўлдинг қумри сен.

Қоч Фиръавндин, магар ҳайвондир ул,
Кел, мудом Тур тоғининг сайрони бўл.

- 625 Тинглагил сўзсиз, садосиз нағмани,
Ҳам қулоғингда ҳамиша тут ани...

Марҳабо, эй тўтийи Тубонишин,
Гул либосинг узра тавқи оташин.

Тавқи оташ дўзахийликдин нишон,
Гул либос жаннат, сахийликдин нишон.

Ким Халилдек бўлса Намруддин халос,
Шодланиб, оташда ўлтиromoфи рост.

Кес ўшал Намруд бошин чун қалам,
Сўнг Халилдек қўй олов узра қадам.

630 Ваҳми Намруддин этолсанг ўзни пок,
Хуллапўшсен, тавқи оташдин не бок...

Эй гўзал каклик, хиромон айлагил,
Сайри боғи илму ирфон айлагил.

Қаҳқаҳа ургил, бу йўлда янграсин,
Тут Худо дарвозасининг ҳалқасин.

Кўй бу тоғни, баҳридин ўтгил анинг,
Тева чиқсин қоятошингдин сенинг.

Тевани тутдингми, қаршингда ҳамон
Сут, асал ирмоқлари бўлгай равон.

635 Тева сур бу йўлда кеча-кундузи,
Қарши олгайдир сени Солиҳ ўзи...

Марҳабо, лочин, чақин кўз, дарғазаб,
Мунча юргайсен ғазаб ичра, ажаб?

Номайи ишқи амал пойингда банд,
Очмагил, турсин ўшал жойингда банд.

Сен ақлни айла кўнгилга бадал,
Бир йўла кўргил абад бирлан азал.

Чор чўби табъни синдир мардвор,
Сўнгра ваҳдат ғорида тутгил қарор¹.

640 Фори ваҳдат гар эса маскан сенга,
Садри олам бўлгуси ҳамдам сенга...

¹ Чор тўби таъб – табиатнинг тўрт устуни, чор унсур: тупрок, олов, сув ва ҳаво, яъни улардан ҳосил бўлган тан, вужуд.

Эй гўзал дуррожи меърожи аласт¹,
Не бало кўрдинг кўриб тожи аласт.

Тингладинг ишқу аластни жон ила,
Хайдагил нафси балони бир йўла.

Чун балойи нафс бало гирдобидир,
Не бўлур иш қолса гирдоб ичра ул?

Нафсни Исодек ёқиши үйла сен,
Жонни жонон бирла равшан айла сен.

- 645 Нафсни ёқсанг, жон қушинг парвоз этар,
Йўлда Руҳилло уни пешвоз этар...

Марҳабо, булбул келиб ишқ боғидин,
Нола қил ишқ дарди, ҳижрон доғидин.

Дардинг айтиб, нола қил Довудвор,
Бўлсин ҳар дам сенга юзлаб жон нисор.

Довудий авж бирла маъноларни оч,
Халқقا хилъатни баён эт, бер қувонч.

Унга зирҳ кийдирма, ўлсин нафси шум,
Сен Довуд янглиғ темирни айла мум.

- 650 Мум бўлиб тортса мулойим ул қаро,
Мисли Довуд ўт бўлурсен ишқ аро...

Эй товус, жаннатда тортиб наъралар,
Етти бош аждарни куйдирдинг магар.

Тутма сухбат, қонга қоргайдир сени,
Ул илон жаннатдин ҳайдайдир сени.

¹ Дуррож – какликнинг бир тури, қирғовул.

Сидраю Тубога қўймас ул, аё,
Макр ила кўнглингни этгайдир сиёҳ.

Сен ҳалокат тиғини ургил анга,
Йўқса, бул асрор насиб этмас сенга.

- 655 Гар халос бўлсанг илондин, бил ани,
Одаминг жаннатга бошлайдур сени...

Кел, тазарв, кўзи йироқ кўргувчи қуш¹,
Боқ, кўнгилни баҳри нур ғарқ айламиш.

Сен асири чоҳи зулматсен ҳануз,
Мубталойи ҳибсу түхматсен ҳануз.

Чоҳи зулмонийни қўйгил, таркин эт,
Талпиниб, ул арши раҳмонийга ет.

Ҳамчу Юсуф айла тарк зиндану чоҳ,
Мисри иззатда ўзинг бўл подшо.

- 660 Бўйла мулкинг гар қўлингда жам бўлур,
Юсуфи сиддиқ сенга ҳамдам бўлур...

Эй гўзал қумри, ажаб дамсоз ўзинг,
Шод ўзинг, кўнгли синиқ ҳам боз ўзинг.

Танги дилсен, чунки дилхун ичрасен,
Ўйлаким, зиндани Зуннун ичрасен.

Эйки сен нафс аждарига мубтало,
Тобакай нафсингдин истарсен бало?

Кес унинг бошини, кутгайсен неча,
Сўнг кўтар бошингни ердин ойгача.

¹ Тазарв – туствовуқ.

665 Айласанг гар аждари нафсинг ҳалок,
Муниси Юнус бўлурсен, зеби хок...

Кел, гўзал ғуррак, кўнгил зорингни тўқ,
То гуҳар сочсин бошингга етти кўқ.

Баски ул бўйнингдадир тавқи вафо,
Бевафолик этмагинг эрмас раво.

Борлиғингдин қолса қилдек бир ушоқ,
Бевафо дерман сени бошдин оёқ.

Кел, ўзингдин кеч, ўзингдин айру бўл,
Сен топарсен ақл ила маънога йўл.

670 Ҳам хираддин маънилар етгай сенга,
Ҳам Хизир оби ҳаёт тутгай сенга...

Қарчиғай, учганда қаддинг эрди тик,
Қайтганингда не учун бошинг эгик?

Бўлма саркаш, сарнигундирсан ҳамон,
Эт итоат, ғарқи хундирсан ҳамон.

Боғланибсен шу палид дунё била,
Қолмамишdir бир ишинг уқбо била.

Кеч ўшал дунёданам, уқбоданам,
Сўнг ўзингга бир назал сол, муҳтарам.

675 Бўлмаса ул иккига ройинг сенинг,
Дасти Искандар бўлур жойинг сенинг...

Марҳабо, заррина қуш, заррин Ҳумой,
Ўт бўлиб кел, очгил оташдин чирой.

Келса ким ёнингга, ёқ жон ўтидин,
Кўзни юм якбора махлук зотидин.

Гар ёқарсен кимки келгайдир сенга,
Нури Ҳақ ҳар дам ёғилгайдир сенга.

Баски кўнглинг билди не асрори Ҳақ
Воқиф эт ўзни, не эрмиш кори Ҳақ.

- 680 Ҳақ ишида марди Ҳақ эрсанг тамом,
Ҳақ қолур, сен қолмагайсен, вассалом.

БИРИНЧИ МАҶОЛА **ХУДҲУДНИНГ ҚУШЛАРГА ХИТОБ ЭТГАНИ**

Бор жаҳоннинг қушлари жамъ бўлдилар,
Барча ошкору ниҳон тўпландилар.

Дедилар: этсанг жаҳонга эътибор,
Ҳар шаҳарнинг шоҳи бордир, шаҳриёр.

Не сабабдин юртимиизда шоҳ йўқ,
Ул сабабдин бизга равshan роҳ йўқ.

Бир-бировга айлабон ёрдам, кўмак,
Излашайлик, бизга бир подшо керак.

- 685 Мамлакат подшосиз эрса, бас, тамом,
Қолмагай лашкарда тартибу низом.

Хулласи, шоҳ изламоқчи бўлдилар,
Жам бўлиб, шундай қарорга келдилар.

Худхуди ошуфта қўнгил, интизор,
Ўртага тушди шу онда бекарор.

Эгнида эрди тариқатдин либос,
Бошида тожи ҳақиқат эрди боз.

Зийрак эрди баски ул, доно эди,
Не эмиш яхши, ёмон, огоҳ эди.

- 690 Деди: қушлар, пайки ғайбдирмен ўзим¹,
Сизга ғойибдин хабар бергай сўзим.

Ҳазрати Ҳақдин хабардормен яна,
Пайки фитрат, соҳибасрормен яна.

Улки бисмиллоҳдадир минқор анга,
Тонг эмаским, очса юз асрор анга.

Ғам аро мен кун кечиргувчи киши,
Кимсанинг мен бирла борму бир иши?

Қайду қуидим йўқ жаҳонда халқ билан,
Бас, қутулмишдир халойик менданам.

- 695 Баски жоним ичра дарди подшо,
Не қилур кўнглимда ул дарди сипоҳ?

Сув топармен қай тараф қўйсам қадам,
Маҳрами асрор эдим аввалда ҳам.

Шоҳ Сулаймон бирла бўлдим неча бор,
Хайли ичра топдим иззат, эътибор.

Хайлидин бир кимса йўқ эрса, ажаб,
Қайда, деб ул кимса этмасди талаб.

Бўлмасам ёнида ҳозир бир замон,
Ул талаб айлаб, топинг, дерди ҳамон.

¹ Пайки ғайб – ғайб хабарчиси.

- 700 Ёнидин қўймасди айру бир нафас,
То қиёмат бул шараф Ҳудхудга бас.

Номасин элтиб, баланд парвоз эдим,
Парда ортида анга ҳамроҳ эдим.

Кимсаким мақбули пайғамбар эрур,
Арзигай бош узра гар тож бўлса ул.

Кимни Ҳақ ул яхшидир деб зикр этар,
Қўкка парвоз этса, унга ким етар?

Неча йиллар баҳру барр сайдар айладим,
Йўл босиб, этдим гузар, сайдар айладим.
- 705 Водию тоғу биёбонлар кечиб,
Сирли олам ичра тўфонлар кечиб,

Шоҳ Сулаймон-ла сафар қилдим басе,
Не эмиш олам, кўриб, билдим басе.

Подшоҳим ким, аён бўлди менга,
Якка-ёлғиз етмоғим мушкул анга.

Менга ҳамроҳ бўлсангиз, событ қадам,
Шоҳга етгайсиз, ўшал даргоҳга ҳам.

Тобакай сиз нангу худбийлик аро,
Ёқилурсиз бўйла бединлик аро?
- 710 Ким анга жон тикиди, жондин кечди ул,
Ёр дебон яҳши, ёмондин кечди ул.

Йўл босинг жонлар тикиб жононага,
Етказинг бошни ўшал остоңага.

Подшо тоғ ортида, бул бехилоф¹,
Бир баланд тоғдирки, дерлар Күхі Қоф.

Шоҳи Симурғдир ўшал султони тоғ,
Ул яқиндир бизга, биз андин йирок.

Үлтирур юксак ҳарамда номдор,
Исмини айтишга кимнинг ҳадди бор?

- 715 Неча юз минг парда қат-қат олдида,
Барча нуру барча зулмат олдида.

Икки олам ичра йўқдир одаме,
То етишгай ул мақомга бир даме.

Подшоким, ҳукми мутлақдир мудом,
Ўз камолу иззига ғарқдир мудом.

Фаҳму хушга йўқ учиб, етмоққа ҳад,
Қайданам етсин анга ақлу хирад?

На анга йўл, на сабрнинг жойидир,
Юз туман халқ кўйида савдойидир.

- 720 Васфини айтурга жони пок йўқ,
Ақлу хушга қобили идрок йўқ.

Ҳам ақл, ҳам жон сусту хийрадир,
Санъатин кўрмакка кўзлар тийрадир.

Бир буюк билгич камолин кўрмамиш,
Бир буюк кўргич жамолин кўрмамиш.

¹ Бехилоф – шубҳасиз маъносида.

Ул сари юрмоқقا қурби етмади,
Бир бориб, күрмоқقا қурби етмади.

Билмади ул не камолу не жамол,
Билгани халқнинг фақат ваҳму хаёл.

- 725 Ул хаёлдин жон ошиб ўтгайму ҳеч?
Кўл чўзиб, ойга киши етгайму ҳеч?

Юз туман бошларки хирмон, ундаридир,
Доду фарёд, оҳу афғон ундаридир.

Йўлда кўп сахрову денгиз, сони йўқ,
Чун йироқ йўлдир, унинг поении йўқ.

Эр керак шердек бу йўлда паҳлавон,
Йўл йироқ, денгиз чуқурдир ончунон.

Йўл босармиз баски ҳайронлик била,
Гоҳи хандон, гоҳи гирёнлик била.

- 730 Топсак андин бир нишоне, ҳой-ҳой,
Топмасак, ул ҳолимизгавой-вой.

Жонга жононсиз бу дунёйинг нима?
Йўқса жононинг магар, жон истама.

Мард керак бу йўлда қўймоқقا қадам,
Жон фидо этмоқ керак манзилга ҳам.

Қўлни жондин ювмоғинг шарт мардвор,
То сени чин эр десинлар, мардикор¹.

¹ Мардикор – бу ерда, ишни қойил қиласиган, маъносида.

Жон фидо этсанг агар, ул дилнавоз
Юз туман жонингни бергай сенга боз.

- 735 Жонки жононсиз, абасдир, арзимас,
Эт фидо жонингни ул жононга, бас.

Жонни сен жононга топшир мардвор,
Сенга ҳам ул жонни этгайдир нисор.

ИККИНЧИ МАҚОЛА ҲУДҲУД СИМУРҒНИ МАДҲ ЭТГАНИ

Ибтидо Ситмурғ ишига шул, жигар,
Тун ярим Чин узра бўлди жилвагар.

Битта пар тушди қанотидин ҳамон,
Тутди жумла шаҳру кўйларни сурон.

Ҳар кишиким кўрди, андин олди нақш,
Ҳар киши бир ўзга суврат солди, нақш.

- 740 Чиндаги пар – боиси ҳикмат эмиш,
Чинда эрса илм агар, ўрган, демиш...¹

Бўлмасайди ул пари нақши аён,
Бунчалар ошуфта бўлмасди жахон.

Барча сувратлар сифоти бахшидин,
Барча жонлар ул қаноти нақшидин.

Боши йўқдир васфининг, поёни йўқ,
Бундан ортиқ сўйламак имкони йўқ.

Энди сиздан ким эса мардона ул,
Юз буринг йўлга, босинг мардона йўл...

¹ Машхур ҳадисга ишорат.

745 Барча қушлар тинглашиб бул сўзки бор,
Бўлдилар шоҳ иззатидин беқарор.

Шавқи бирлан жумла жонлар тўлдилар,
Бир йўла бесабру ором бўлдилар.

Юрдилар Худҳудга сўнг пайров бўлиб,
Унга ошиқ, ўзларига ёв бўлиб.

Йўл узун эрди вале, манзил йироқ,
Бул машаққат этди тоқатларни тоқ.

Йўл азоби баски бундоқ қийнади,
Ҳар бири бир узру маъзур сўйлади.

БУЛБУЛНИНГ УЗР СЎРАГАНИ

750 Булбули шайдо кўринди маст-аласт,
Ишқ камоли бирла мажнун эрди, бас.

Унда бўйла маънили овоз эди,
Маънилар остида минг бир роз эди.

Маънилар сиррини ошкор айлади,
Бир йўла қушлар тилини бойлади.

Дедиким, менга аён асрори ишқ,
Хонишимида ҳар кеча такрори ишқ.

Воҳки, йўқ Довуд каби бир интизор,
Сўйласам севгим Забурин зор-зор.

755 Найдаги зор севги изҳорим менинг,
Чангдаги мунг нолаю зорим менинг.

Сайрасам, боғу чаман сархуш эрур,
Мен билан ошиқ кўнгиллар хуш эрур.

Сўйласам, ҳар лаҳза розим ўзгача,
Куйласам, ҳар дам овозим ўзгача.

Ишқ менинг жонимга савдо келтиур,
Мисли дарё шўру ғавғо келтиур.

Кимса туғёнимга тоқат айламас,
Гарчи хушёр эрди бўлгай маству маст.

- 760 Топмадим жонимга асло маҳраме,
Сўйласам рози дилимни бир даме.

Маъшуқи ёрим вале ҳар навбаҳор
Мушку атрин этса оламга нисор.

Шод бўлурмен, очилур баҳри дилим,
Ҳал бўлур ёр талъатидин мушкулим.

Маъшуқи ёрим чу пайдо бўлмагай,
Булбули шўрида гўё бўлмагай.

Розини ҳар кимга булбул айтмас ул,
Рози булбулни чаманда гул билур.

- 765 Боғ аро гул ишқида ғарқмен чунон,
Бўйла ғарқу маҳви мутлақмен чунон.

Ишқининг савдоси бўлса, менга бас,
Ул гули раъноси бўлса, менга бас.

Бас, нечук Симурғга бўлгай тоқатим,
Тоқатим йўқ, гулга бордир ҳожатим.

Чун гули садбарг у дилдорим менинг,
Үзгаларга не эмиш корим менинг?

Гулки яшнаб, ўзни хандон айлагай,
Менга деб чун ўзни жонон айлагай.

- 770 Парда ортидин чиқиб, ҳозир эса,
Лабларида кулгуси зоҳир эса.

Бир кеча кечгайму булбул ишқидин,
Ҳар замон кулгувчи ул гул ишқидин?

ҲУДҲУДНИНГ БУЛБУЛГА ЖАВОБИ

Ҳудхуд айтди: эйки сен сувратга қул,
Ишқи раънодин нарига ўтмагил.

Гулни севдинг, ул тиконлар шайлади,
Неча бир заҳму зиёнлар айлади.

Гул деган не эрмиш ул, соҳибжамол,
Хусни рўйи ҳафтада топгай завол.

- 775 Бўйла бир ишқдин завол келгай фақат,
Аҳли комилга малол келгай фақат.

Ҳар сафар кулганда гулёринг сенинг,
Учди андин нолаю зоринг сенинг.

Кеч у гулдин, гулбаҳор келганда гул
Сенгамас, кулгай сенинг ҳолингга ул.

Ору номус ошно эрса сенга,
Қаҳру заҳрингни сочар эрдинг анга.

❖ ❖ ❖

ХИКОЯТ БИР ФАҚИРНИНГ ШОҲ ҚИЗИГА ОШИҚ БЎЛГАНИ

Подшонинг бир қизи бор эрди, ой,
Ишқида олам чекарди оҳувой.

- 780 Фитна бедорлик била пайваст эрур,
Уйкули кўзлар хумору масти эрур.

Орази гул эрди, сочи мушк эди,
Лабларидин оби ҳайвон хушк эди.

Гар жамолидин кўринса бир нишон,
Ақлу хуш мажнун бўларди шул замон.

Лаблари тотини тутсайди шакар,
Унда қолмасди шакарликдин асар.

Бенаво дарвеш ўтарди бир кези,
Ногаҳон ул ойга тўқнашди кўзи.

- 785 Кўлида бир бурда нон эрди, сахо,
Нонни бермишди анга бир нонво¹.

Боқди дарвеш, кўрдиким не нозанин,
Йўлга тушди илкидин нони анинг.

Олдидин қиз ўтди гўё ўт бўлиб,
Бир қиёлаб боқдию кетди кулиб.

Ул гадо чун кўрди андоқ кулгуни,
Кўзидин қон оқди, гарқ этди уни.

¹ Нонво - нонвой.

Бор бисоти бурда нону бурда жон,
Иккисидин ҳам қутулди шул замон.

- 790 Кечакундуз йиғлади, күз очмади
Үртаниб куйди, vale сүз очмади.

Ёдига тушганда кулгу, гулузор,
Ул булатдек ёш түкарди зор-зор.

Етти йил қўйида шайдо юрди ул,
Итлари бирлан-да ётди, турди ул.

Ул санамнинг чўри, хизматкорлари
Бўлдилар бу нарсадин воқиф бари.

Ул жафокорлар кейин жазм этдилар,
Бошини кесмоққа зуд азм этдилар.

- 795 Қиз уни пинҳона чорлаб, деди: ҳай,
Менга сендеқ бир гадо эш бўлмагай.

Ўлдиурлар бас сени, ўлтирма, кет,
Эшигим олдида ортиқ турма, кет.

Ул гадо айтди: сени кўргач, санам,
Кўлни ювганмен ҳамон жонимданам.

Неча минг жонларки мендек бекарор,
Бўлсин ул ойдек жамолингга нисор.

Бас, мени ўлдирмоқ истарлар шу тоб,
Бир саволимга, нигоро, бер жавоб.

- 800 Баски бошим кестиурусен бегумон,
Не сабабдин менга кулдинг ул замон?

Қиз дедиким, билмадингми сен магар,
Не учун кулдим сенга, эй бехабар?

Соч-соқолинг келтирур кулгим, аё,
Лек юзингмас, юзга қулмаклик хато.

Айтдию кетди, тутундек тарқади,
Аслида ҳам бор эмасди, йўқ эди.

ТЎТИНИНГ УЗР СЎРАГАНИ

Келди тўти, оғзида шаҳду шакар,
Писта тўнли, бўйнида маржони зар.

- 805 Пашша шоҳ бўлмишди лутфи, фарридин,
Майса ранг олмиш қаноти, парридин.

Сўз, сухан айтурда шаккарrez эди,
Ҳам шакархўрликда аввалхез эди.

Деди: нокас, тошюрак улдирки, бас,
Мен каби қушни этар банди қафас.

Мен темир зинданда андоқ нотавон,
Ташнайи оби зилолмен ҳар замон.

Жумла қушларга Хизирмен, сабзапўш,
Балки айлармен Хизир суйини нўш.

Йўл босармен, ўйлаким савдойимен,
Манзилим ҳар жойдадир, ҳар жойимен¹.

Менда йўқ Симурғ сари бормоқقا тоб,
Менга бас оби ҳаётдин нўши ноб.

Етса гар оби ҳаётдин бир нишон,
Гарчи қулмен, шоҳу султонмен ҳамон.

¹ Ҳар жойи – кўнимсиз, бир жойда туролмайдиган.

ХУДҲУДНИНГ ТЎТИГА ЖАВОБ БЕРГАНИ

Деди Ҳудҳуд: эйки давлатсиз, гадо,
Мард эмас ул этмас эрса жон фидо.

Жон нечук даркор учун келмиш сенга,
Ул висоли ёр учун келмиш сенга.

- 815 Оби ҳайвон истаюрсен, жонга дўст,
Жонга дўст бўлган бўлур бемағз пўст.

Не керакдир жон сенга, жононга бер,
Жонни жононга фидо айлайди эр.

ҲИҚОЯТ ХИЗРНИНГ ДЕВОНА БИЛАН СУҲБАТИ

Бор эди девона бир, олий мақом,
Хизр анга дедики, эй марди тамом¹,

Истасанг, бўлгил анису ёр менга,
Деди: бу ёрлиғ нечун даркор менга?

Неча бор ичдинг ўшал оби нажот,
То қиёмат ерда сургайсен ҳаёт.

- 820 Мен этармен жонни жононга фидо,
Жон керакмас менга жонондин жудо.

Сенку жонинг асрагайсен ҳар куни,
Мен эсам жононга баҳш этгум уни.

Яхшидир ул, бўйлаким күш бирла дом,
Бир-бировдин айру турсак, вассалом.

¹ Эй ишини тамомлаган эр.

ТОВУСНИНГ УЗР СҮРАГАНИ

Келди сүнгра ул товуским, зарнигор,
Парлари нақшида гул очмиш баҳор.

Чун келинчак ишваю ноз айлади,
Пар ёзиб, юз жилва оғоз айлади.

- 825 Деди: ғайб наққоши нақш чекди у дам,
Ахли Чиннинг қўлидин тушди қалам.

Гарчи мен қушларга Жибрилмен ва лек
Тушди иш бошимга қисмат қаҳридек.

Дўст тутиндим бир илон бирлан давом,
Ул сабаб жаннатдин ҳайдалдим тамом.

Ҳайдалиб, хилватдаман, зулматдаман,
Ўз оёғимдир оёғимга киshan.

Кошки топсайдим ўзимга раҳбар ул,
Бошласа, топсам яна жаннатга йўл.

- 830 Шоҳга етмоқлик мурод эрмас менга,
Талпиниб, дарбонга етсан, бас менга.

Йўқ сира Симурғга парвойим менинг,
Бўлса басдир жаннат ул жойим менинг.

Етсан ул жаннатга, битгайдир Ишим,
Унда бул дунё била не ташвишим?..

ХУДҲУДНИНГ ТОВУСГА ЖАВОБ БЕРГАНИ

Айтди Худҳуд: эй адашган, гумроҳ,
Подшодин хона сўрмоқлик хато.

Жомаси инсондин ортиқму сенга?
Хонаси султондин ортиқму сенга?

- 835 Хонайи нафсдир у жаннат, пурҳавас,
Дил уйи байтул вафодир, ўзгамас.

Ҳазрати Ҳақ мисли дарёдир, азим,
Қатраси юз бита жаннатдир, наим.

Қатраси бордирки, чун дарёдир ул,
Бўлмаса дарё, қуруқ савдодир ул.

Етгали дарёга етгай қудратинг,
Бас, нечун шабнамда битмиш журъатинг?

Улки офтоб бирла айлар арзи ҳол,
Зарранинг олдида ҳеч тургайму лол?

- 840 Улки куллдир, жузвга не эрмиш иши?
Улки жондир, узвга не эрмиш иши?

Марди кулл эрсанг, ҳамиша куллни кўр,
Куллни изла, кулл бўлиб, буткулни кўр...

•—————♦—————

ҲИКОЯТ ТАЛАБАНИНГ УСТОЗДАН САВОЛ СҮРГАНИ

Сўрди устоздин чу шогирди тамиз:
Нега жаннатдин қувилди отамиз?

Деди: одам эрди чун олам гуҳар¹,
Этди жаннат ичра кўп сайру сафар.

Келди ғойибдин бир овозе баланд:
Хой, нечун бўлдинг ўшал жаннатга банд?

845 Икки олам биздин айру эрса ким,
Биз яратган нарсага бош эгса ким,

Етказурмиз чун заволин унга, ҳай,
Токи дўстдин ўзгага қўл чўзмагай.

Жон не эрмиш, бўлмаса жононга ёр,
Ҳеч эмиш ул, гарчи бирмас, юз ҳазор.

Улки жононсиз жаҳонда зиндадир,
Гарчи инсондир, vale тубандадир.

Аҳли жаннатга, ҳадисдин бул хабар,
Жаннат ичра илк таом эрмиш жигар.

850 Аҳли жаннатким эмаслар аҳли роз,
Бас, киришгайлар жигархўрликка боз...

¹ Олам гуҳар – оламнинг гавҳари.

ҒОЗНИНГ УЗР СҮРАГАНИ

Пок, мусаффо ғоз чиқиб сувдин шу дам,
Ул жамоат олдига қўйди қадам.

Деди: мендирмен баланд овоза қуш,
Борму мендек покдоман, тоза қуш?

Ғул этиб ҳар дам, бўлиб пок-покиза,
Жойнамозимни ёзармен сув уза.

Сув аро тургувчи мендек кимса йўқ,
Мен каромат айлар эрсам, шубҳа йўқ.

- 855 Жумла қушлар зоҳиди мен, пок рой¹,
Пок дону пок жома, пок жой.

Бул жаҳон ичра ҳаётим сув била,
Ҳам ҳаётим, ҳам нажотим сув била.

Кўнглим ичра кўп эди дарду ғамим,
Ювди сув, дардим аритди ҳамдамим.

Сувсиз эрсам, тийра айёмим менинг,
Бас, қуруқлик ичра не комим менинг?

Сувки жоним ичра бундоқ сехри бор,
Бас, нетиб мен ўзни тортгаймен канор?

- 860 Не тирик эрса, тирикдир сув ичиб,
Ул тирик тургайму сувдин воз кечиб?

Йўқ, менинг водийдин ўтмоғим гумон,
Инчунин Симурғга етмоғим гумон.

¹ Пок раъй – пок ниятли.

Улки ҳар дам сувда топмишдир ҳаёт,
Унга ҳеч етгайму Симурғдин мурод?

ХУДҲУДНИНГ ҒОЗГА ЖАВОБ БЕРГАНИ

Деди Худҳуд: сув сени хуш айламиш,
Хуш надир, жонингни оташ айламиш.

Сув аро уйқу элитмишдир сени,
Қатра сув сувдин жудо этмиш сени.

- 865 Сув керак юзи ювиқсизларга ул,
Сен ювиқсизен, бориб, сув излагил.

Тобакай ул тоза сувдек бор-бор,
Ҳар ювиқсиз сувга бўлгайсен дучор?

ҲИКОЯТ ДЕВОННИНГ ДУНЁ ВА ОХИРАТ ҲАҚИДА АЙТГАНЛАРИ

Кимса бир девонадин сўрди савол:
Не эмиш ул икки олам чун хаёл?

Деди: бу икки жаҳон болову паст¹
Қатра сувдир, бор эмас ул, йўқ эмас.

Қатрайи сув бўлди аввал ошкор,
Қатрада акс этди сўнг нақши нигор.

- 870 Ҳар неким сув эрди, кўр охир ҳисоб,
Гар темирдин эрса ҳам бўлди хароб.

¹ Болову паст – баланду паст.

Борму бир нарса темирдек қаттиқ ул?
Боқ, ўшал ҳам сув била ҳосил бўлур.

Ҳар неким ул авали сув эрди, бас,
Охири тупроқ бўлиб, топгай абас.

Сувда кўргайму киши сабру қарор?
Сувда тургайму иморат устувор?

КАКЛИКНИНГ УЗР СЎРАГАНИ

Келди каклик сўнг, хиромон келди ул,
Солланиб, сармасту хандон келди ул.

- 875 Чун шафақ тўнли, қизил минқор эди,
Қонга тўлган кўзлари ҳушёр эди.

Маскани гоҳ чўққи эрди, гоҳ камар,
Гоҳи тиф олдида ожиз бош эгар...

Деди: конлар бошида парвонамен,
Лаъли гавҳар ишқи бирлан ёнамен.

Ул сабабдинким кезармен тогу тош,
Гавҳарим тепмоққа айлармен талош.

Урди ўт жонимга гавҳар отashi,
Хуш дурур жонимни бундоқ ўрташи.

- 880 Ҳар сафар бошин кўтарса оташ ул,
Кўнглим ичра тошларимни хун қилур.

Боқки, оташ тошни ҳам хун айлагай,
Таъсир этгай-да, дигаргун айлагай.

Бас, асири тошу оташмен мудом,
Бенаводирмен, мушаввашмен мудом¹.

Үртаниб бундоқ, ютормен реза тош,
Сүнгра ухлармен қўйиб тош узра бош.

Эй ёронлар, бўйладир ҳолим менинг,
Бир кўринг, не тийра аҳволим менинг.

- 885 Улки тошга бош қўйиб, тош чайнагай,
Борму ҳожат, не учун жанг айлагай?

Қатма-қатдир дилда дарду ғамларим,
Тортадир тоғларга ишқи гавҳарим.

Кимга хуш гавҳардин ўзга бир вақо,
Илкидин кетгай вақоси, бебақо.

Мулки гавҳарда низоми жовидон,
Ул сабаб пайваста этдим унга жон.

Менки тоғ девонаси, марди гуҳар,
Улфатим ҳар лаҳза ул тоғу камар.

- 890 Тоғдадир гавҳар давому бардавом,
Бас, уни тоғлардин излармен мудом.

Ахтариб, гавҳарча гавҳар топмадим,
Ундин ортиқ йўқ, баробар топмадим.

Менга ул Симурғга етмоқ қайдадир?
Тошу гавҳар деб оёғим лойдадир.

¹ Мушавваш – паришон.

Ул қавий күнгилга мен қандоқ етай?
Чун оёғим лойга банд, қандоқ етай?

Мисли тош ўт ичрадирмен ҳар маҳал,
Ё ўлармен, ёки топгаймен гуҳар.

- 895 Гавҳарим дерманки бўлсин ошкор,
Гавҳари йўқ эрга оламда не бор?

ХУДҲУДНИНГ КАКЛИККА ЖАВОБ БЕРГАНИ

Айтди Ҳдхуд: эй гуҳардек турфаранг,
Неча бор дерсан бу янглиғ узри ланг¹.

Пойи, минқоринг басе хуни жигар,
Сен ҳамон тошлардин изларсен гуҳар.

Не эмиш аслида гавҳар? Рангли тош,
Сен анга савдойидирсан, кўнгли тош.

Ранги кетса, гавҳаринг тошдир, қуруқ,
Улки рангдин ранга киргай, тоши йўқ².

- 900 Ким асл тош эрса, ул ранг истамас,
Заргар ул истайди гавҳар, тош эмас.

¹ Узри ланг – оқсоқ узр, яъни, маъносиз узр.

² Тоши йўқ – яъни, қиймати йўқ, қеч нарсага арзимайди.

ҲИКОЯТ СУЛАЙМОН ШОҲНИНГ САЛТАНАТ ҲАҚИДА АЙТГАНЛАРИ

Энг асл гавҳар шу олам мулкида
Эрди ул шоҳи Сулаймон илкида.

Ул сабаб юксалди номи, юлдузи,
Бир ажиб, мӯъжаз узук эрди ўзи.

Илкида эрканда ул гавҳар, нигин,
Хукмида эрди тамом рўйи замин.

Чун Сулаймон кўрди мулк қандоқ эди,
Измида мулки жаҳон, оғоқ эди.

905 Қирқ фарсанг эрди шоҳнинг чодири,
Амрида ел эрди, толмас шотири.

Бўйла чодирда сафо сурмоғида,
Эрди мӯъжаз бир узук бармоғида.

Деди: бўйла давлату бул кору бор
Шул кичик бир тош туфайли пойдор.

Истамасмен, токи бор дунёву дин,
Бўлмагай бир кимсада мулк инчунин.

Эй Худойим, мен этиб чун эътибор,
Офатин кўрдим бу мулкнинг ошкор.

910 Бермагил ҳеч кимсага бундоқ гуҳар,
Келмагай уқбода андин бир самар.

Йўқ менинг мулқу сипоҳ бирлан ишим,
Ҳар куни замбил тўқишидир ташвишим...

Гарчи гавҳардин Сулаймон бўлди шоҳ,
Лек ўшал банд солди йўлга, кесди роҳ.

Ул сабаб жаннатга киргай ул тайин
Беш аср ўтгач набийлардин кейин.

Ул гуҳар солди Сулаймонга абас¹,
Сен каби нодонни нелар айламас.

- 915 Чун гуҳар тошдир, қазиб, кон чекмагил,
Иста жонон, ўзгача жон чекмагил.

Дилни сен гавҳарга тўлдир, очма лаб,
Гавҳар изла, эт мудом гавҳар талаб.

ҲУМОНИНГ УЗР СЎРАГАНИ

Чун чиқиб келди Ҳумо ул, соябахш,
Подшолар бошига сармоябахш.

Бас, Ҳумо эрди, ҳумоюн келди ул,
Ҳаммадан ҳам ҳиммат афзун келди ул.

Деди: эй кезгувчисиз чўлу чаман,
Мен шу қушлардек эмасмен, бошқаман.

- 920 Ҳимматим олий, аёндир барчага,
Узлатим элдин баёндир барчага.

Нафс итин тупроққа қордим ложарам,
Топди мендин иззат Афридуну Жам.

Подшолар топди мендин парвариш,
Бўлмагай таъби гадолар менга эш.

¹ Абас - бу ерда ранж, кулфат маъносида.

Нафс итин олдига қўйгум устухон
Токи ул жонимга бергай деб омон.

Нафс итига устухон тутдим мудом,
Ул сабаб жонимда шул олий мақом.

- 925 Улки этгай сояси йўқсилни шоҳ,
Шавкату шаънига қайдин иштибоҳ?

Жумла истарлар менинг соямни, бас,
Зарраси ҳар дилда орзую ҳавас.

Қайданам бўлсин у Симурғ ёр менга,
Баски бул хусравнишонлик кор менга?

ҲУДҲУДНИНГ ҲУМОГА ЖАВОБ БЕРГАНИ

Деди Ҳудҳуд: эй ғуури бирла маст,
Солма соянгни, етар, кулдирма, бас.

Йўқ бугун хусравнишонликдин нишон,
Ит каби олдингда ёлғиз устухон.

- 930 Этмасайдинг шоҳни шоҳ кошкийди, боз
Устухондин ўзни айлардинг халос.

Ўйлаким, шоҳлар жаҳон ичра бутун
Бош кўтарса жумла соянгдин бугун,

Эртага бўлгайди шоҳликдин жудо,
Барчаси дарду балога мубтало.

Бўлмаса соянг, бўлурму шаҳриёр
Рўзи маҳшарда балоларга дучор?

◆ ◆ ◆

ХИКОЯТ БИРОВ ТУШИДА СУЛТОН МАҲМУДНИ КЎРГАНИ

Бор эди бир кимса пок рой, соф кўнгил,
Бир кеча Маҳмудни тушда кўрди ул¹.

- 935 Сўрди: эй султони соҳиб иқтидор,
Бас, нечуксен, масканинг дорул қарор?

Деди: таъна бирла қоним тўкма, ҳой,
Подшолик маскани эрмас бу жой.

Салтанат қурдим, ғалат иш эрди ул,
Бир ҳовуч тупроққа чун лойиқми бул?

Ҳақки султони жаҳондордир фақат,
Салтанатга ул сазовордир фақат.

Чун кўриб ожизлигу ҳайронлигим,
Бас, уят бўлди ўшал султонлигим.

- 940 Мен паришонмен, чақирсанг, хон дема,
Улки султондир, мени султон дема.

Улки султон, мен адо бўлсам эди,
Кошки дунёда гадо бўлсам эди.

Хор бўлсам, соҳиби жоҳ бўлмасам,
Кошки фаррош бўлсаму шоҳ бўлмасам.

Ҳеч вақосиз, чорасиздирмен, хароб,
Шул забун ҳолимда сўргайлар ҳисоб.

¹ Бу ерда султон Маҳмуд Фазнавий кўзда тутилмоқда.

Эй, Хумо қурсин, балога учрасин,
Солди ул бошимга бундоқ соясин...

ЛОЧИННИНГ УЗР СҮРАГАНИ

Келди лочин тик тутиб бошин, дадил,
Маънилар асроридин сўз очди ул.

Лоф урарди, мен асл минқор, дебон,
Эл аро бошимда тожим бор, дебон.

Деди: шоҳ илкида кўрдим ўзни мен,
Юмдим ул халқи замондин кўзни мен.

Кўзни юмдим, боқмадим ҳеч афтига,
Токи қўнгаймен ҳукмдор кафтига.

Тарбият этдим ўзимни тер тўкиб,
Худди зоҳиддек риёзатлар чекиб.

950 Элтсалар шоҳ олдига бир кун мени,
То билай шоҳимга хизмат расмини.

Кирмамиш Симурғ тушимга, бас, шу тоб,
Мен нечун бормоқقا этгаймен шитоб?

Подшоҳ кафти ғубори бас менга,
Бўйлаким бир эътибори бас менга.

Йўл босиб юрмоқقا етмас қудратим,
Подшоҳ илкида ошгай шухратим.

Кимки ул султонга манзур бўлгуси,
Сўзласа, султонга маъқул бўлгуси.

955 Яхшидир султонга гар манзур эсам,
Кўйсам ул водийни, унга бормасам.

Шоҳ хузурида фароғатлар била,
Кечса умрим баски роҳатлар била.

Гоҳ шоҳ йўлида чексам интизор,
Гоҳ шавқ ичра юриб, этсам ширкор.

ҲУДҲУДНИНГ ЛОЧИНГА ЖАВОБ БЕРГАНИ

Айтди Ҳудҳуд: эй гирифтори мажоз,
Сен сифатдин айру, суврат ичра без.

Шоҳга бир шерик чиқаркан, айт менга,
Подшолик ҳеч ярашгайму анга?

960 Салтанат соҳиби ул Симурғ, холос,
Баски беҳамто, шоҳлик унга хос.

Шоҳ эрмас улки, ҳар кишварда ул
Ўзни нодонлик била подшо қилур.

Подшо улдирки, беҳамто киши,
Чин вафо бирлан мадородир иши.

Шоҳи дунё гар вафолар айлагай,
Дам ўтиб, жабру жафолар айлагай.

Кимса гар унга яқинроқ боргуси,
Йўқ ажабким, бир балога қолгуси.

965 Доимо ваҳм ичра айтур ал-ҳазар,
Жонига пайвастадир хавфу хатар.

Шоҳи дунё мисли бир оташ эрур,
Гар йироқ юрсанг, ўзингга хуш эрур.

Ул сабабдин шоҳлар посбони бор,
Тур йироқ, деб қичқиурлар бор-бор...

ҲИКОЯТ ПОДШО ВА УНИНГ СЕВИМЛИ ҚУЛИ

Бор эди бир подшоҳ, олам гуҳар,
Бир қулига меҳри тушди ул қадар.

Ул қадар севди, анга дил берди, бас,
Ўлтиrolмасди унингсиз бир нафас.

- 970 Куллар ичра беназир эрди ғулом,
Шоҳ кўзи ўнгида эрди ул мудом.

Шоҳ камондин ўқ узар бўлса, у чоғ,
Кулни чин кўркув босарди, қалтироқ.

Шоҳ қўйиб бир олма қулнинг бошига,
Сўнг камондин ўқ узар эрди анга.

Шоҳ узаркан ўқни, ул шўрлик ҳамон
Сарғайиб, ранги бўларди заъфарон.

Сўрди қулдин бир кишиким, бехабар:
Не сабабдин сарғайибсен бул қадар?

975 Подшо олдида қадринг ончунон,
Нега чеҳранг сўлғину рангинг сомон?

Деди: шоҳ бошимга қўйгай олмани,
Отгали мўлжалга олгай сўнг ани.

Ўқ агар бошимга тегса, дерки ул:
Кулларим ичра ёмони эрди бул.

Ўқ агар мўлжалга тегса, йўқ гумон,
Подшонинг бахти, дерлар шул замон.

Ўртанурмен бўйла икки ғам аро,
Ҳар куни бошимда бундоқ можаро...

БУТИМОР ҚУШНИНГ УЗР СЎРАГАНИ

- 980 Бутимор қуш келди, ул сайрон эди¹,
Мен ўзим бирлан ҳамиша банд, деди.

Сув била кечгай қишу ёзим менинг,
Туймади ҳеч кимса овозим менинг.

Баски беозор эрурмен эрта-кеч,
Чекмади бир кимса озоримни ҳеч.

Масканим дарё бўйи, мен дардманд,
Ҳар қачон андуҳлидирмен, мустаманд.

Дилни сув орзуси бирлан хун этай,
Қизғанурмен сувни дунёдин, нетай?

- 985 Чун эмасмен аҳли дарёйи ажаб,
Сув бўйида жон берурмен хушклаб.

Чайқалур пойимда денгиз дамба-дам,
Лек ичолмасмен ани бир қатра ҳам.

Кетса денгиз қатраси, ҳолим хароб,
Ўртаниб, бағримни айлармен кабоб.

Мавжи денгиздин шу ғавғо менга бас,
Ишқидин бошимда савдо менга бас.

¹ Бутимор – сув бўйида яшайдиган, лайлаксимон, балиқчи қуш.

Ҳар нафас денгиз ғамидин роҳатим,
Бир нафас Симурғга борму тоқатим?

- 990 Улки асли қатрайи оби зилол,
Қайда бўлгай унга Симурғдин висол?

ХУДҲУДНИНГ БУТИМОРГА ЖАВОБ БЕРГАНИ

Деди Худҳуд: эй денгиздин бехабар,
Не наҳанглар унда, не-не жонвар.

Баҳр аро сув гоҳи аччик, гоҳи шўр,
Тўлқини гоҳ сусту ором, гоҳи зўр.

Гоҳ тинар, гоҳ ҳайқириб елгай яна,
Гоҳ кетар, гоҳ гулдираб келгай яна.

Унда не-не кемалар ғарқ бўлдилар,
Неча жонлар қаърида маҳв ўлдилар.

- 995 Неча ғаввослар унинг қўрқусида,
Ютдилар дам жонлари қайғусида.

Ким унинг қаърида чекса бир нафас,
Ўлдириб, отгай баландга мисли хас.

Баски ул денгизда йўқдир ҳеч вафо,
Айламак уммид андин нораво.

Чекмасанг андин канор, не бўлгуси?
Ул муқаррарким сени ўлдиргуси.

Ёр шавқи бирла чун жўшгай гаҳи,
Мавж уриб гоҳ, қайнагай, тошгай гаҳи.



1000 Ул ўзига топмамиш чун коми дил,
Қайда топмоқлик сенга ороми дил?

Чашмадир денгиз ўшал ёр кўйидин,
Сен нечун юзни буарсен сўйидин?

ҲИКОЯТ БИР КИШИННИГ ДЕНГИЗДАН САВОЛ СЎРГАНИ

Бир киши денгизга чўкди, сўрди ул:
Мунча мовийсен, сирингни сўйлагил?

Не учун устингда бул мотам тўни,
Ўт-олов йўқ, қайнагайсен ҳар куни?

Берди денгиз ул жавонмардга жавоб:
Ёр фироқида чекармен изтироб.

1005 Эр бўлиб мен унга лойиқ бўлмадим,
Ул сабаб устимда мотамлиғ тўним.

Ўлтирибмен ташналаб, мадхуш, бас,
Ишқ ўти бирлан жўшармен ҳар нафас.

Тотсам эрди кавсаридин қатра тот,
Эшиги олдида топгайдим ҳаёт.

Кўйида мендек гадолар юз ҳазор,
Кеча-кундуз жон берурлар бор-бор...

БОЙҚУШНИНГ УЗР СҮРАГАНИ

Келди Бойқуш, ўйлаким девона ул,
Деди: тутган масканим вайрона ул.

1010 Чун харобот ичра очдим кўзни мен,
Кўрдим ул вайрона ичра ўзни мен.

Не иморатларки чун кошонадир,
Оқибат кўрдим, бари вайронадир.

Кимки бир мажлиси маъно истаюр,
Маст каби борсин хароботларга ул.

Тикладим жой анда айлаб жонга ранж,
Чун хароботхона эрмиш жойи ганж.

Ишқи ганжим бошлади вайронага,
Ўзга йўл йўқ етгали жононага.

1015 Элга ошкор этмадим ранжимни мен,
Токи очгаймен дебон ганжимни мен.

Ногаҳон ганжга оёғим ботгуси,
Нотавон кўнглим муродга етгуси.

Ишқи Симурғ ўйлаким афсонадир,
Унга кўнгил бойлаган девонадир.

Менга ул мардона ишқи не ҳавас,
Ишқи ганжим бирла шул вайрона, бас.

ХУДҲУДНИНГ БОЙҚУШГА ЖАВОБ БЕРГАНИ

Деди Худхуд: эйки ганж ишқи-ла масть,
Ўйлаким, топдинг ўшал ганжи ҳавас.

- 1020 Мурда бил ганж устида ўзни тамом,
Умринг ўтгайдир, vale йўл нотамом.

Ишқи ганжу ишқи зар кофир иши,
Зарга бош эгмоқлик ул Сомир иши.

Зарпастлик келди кофир қавмидин,
Сен магар келдингму Сомир қавмидин?

Ким кўнгил бергай кумуш, олтинга ул,
Рўзи маҳшар ўзга бир суврат олур.

ҲИКОЯТ БИР ЎҒИЛНИНГ МАРҲУМ ОТАСИНИ ТУШИДА КЎРГАНИ

Ҳуққада зар йиғди марди бехабар¹,
Ўлди ул, қолди ўшал бир ҳуққа зар.

- 1025 Бир йил ўтгач, кўрди чун фарзанди туш,
Отаси зор йиғлаган сичқон эмиш.

Айланармиш гир чу топмоқ қасдида,
Ул кўмлган ҳуққа, олтин устида.

Сўрди фарзанди: нечун бу ҳолдасен,
Нега келдинг бунда бул аҳволда сен?

Дедиким, кўмган эдим мен бунда зар,
Бормикин ул ё бирор олмиш магар?

¹ Ҳуққа – сандиқча. марди бехабар – ҳақиқатдан хабарсиз киши.

Сўрди: қайдин сенга сичқон суврати?
Дедиким, бордир бунинг бир ҳикмати.

1030 Гар киши олтинга бергайдир кўнгил,
Айланур маҳшар куни сичқонга ул.

Симу зарга этма меҳрингни увол,
Эй ўғил, сен бу сабоқдин ибрат ол.

САЪВАНИНГ УЗР СЎРАГАНИ

Келди Саъва дил заифу тан низор,
Жонсарак эрди, оловдек бекарор.

Деди: мен ҳайрону фартут келмишам¹,
Бедилу бекуввату қут келмишам.

Йўқ менинг бир филча қурбим, қудратим,
Бир чумолидек эмасдир кувватим.

1035 Борми, йўқ қўлу қанотим, белгисиз,
Мен нечук Симурғга етгум, эй азиз?

Кушки ожиздир, ҳаво этгай нечук?
Саъва Симурғ олдига етгай нечук?

Бу жаҳон ичра талабгор унга мўл,
Қайда менга ул сари бормоққа йўл?

Бас, насиб этмас менга андин висол,
Йўл босиб бормоқ малол узра малол.

Ерга юз сурмоқ бўлиб даргоҳида,
Ё ўлармен, ё ёнармен роҳида.

¹ Фартут – ҳорғин, толиққан.

1040 Бас, йироқдирмен ўшал даргоҳдин,
Үз Юсуфимни тилармен чоҳдин.

Чун йўқотдим чоҳда Юсуфимни мен,
Ахтариб, бир кун муқаррар топгамен.

Гар тополсам, унда жоним борича
Ёр ила парвоз этармен ойгача.

ХУДҲУДНИНГ САЪВАГА ЖАВОБ БЕРГАНИ

Деди Худҳуд: эйки шўхликдир ишинг,
Шўхлик ичра баски саркашлик ишинг.

Хийладир, макру риёдир айтганинг,
Айтганинга эътибор этгаймидим?

1045 Йўлга туш, дам урма ортиқ, юм даҳон,
Ёқсалар, турма кутиб, ёнгил ҳамон.

Филмасал, сен Яъқуб эрсанг ҳам магар,
Этма найранг, Юсуфинг бермас улар.

Рашқ, ҳасад ўтдирки, ёнгайдир мудом,
Ишқи Юсуф жумла оламга ҳаром...

ҲИКОЯТ ЯЪҚУБНИНГ ЎҒЛИГА МУҲАББАТИ

Баски Яъқуб бўлди Юсуфдин жудо,
Бебасар бўлди, фироқ ичра адо¹.

Кўздин оқди қонли ёши, тинмади,
Ҳар замон айтар сўзи Юсуф эди.

¹ Бебасар – кўзи ожиз, кўр.

Келди Жаброил, деди Ҳақ амрини:
Тилга олсанг қайта Юсуф исмини,

Маҳв этгаймиз азиз жонингни, ҳай,
Анбиёлар ичра номинг бўлмагай.

Эгди Яъқуб бошини, дам урмади,
Юсуф исмин тилга у келтирмади.

Қўйди тилдин, чунки бор эрди ваҳим,
Лекин ул жон ичра эрди мустақим.

Бир кеча туш кўрди Яъқуб ўғлини,
Қўлни чўзди, чорламоқ бўлди уни.

1055 Эслади лек амри Ҳақни шул шамон,
Хушни жамлаб, ўзни тийди ул ҳамон.

Тоқати тоқ бўлди аммо, чун адo,
Ногаҳон оқ чекди ўтлиғ, дардли оҳ...

Уйқудин уйғонди, турди ўрнидан,
Жабраил юзланди амри Ҳақ билан.

Гарчи сен Юсуфни тилга олмадинг,
Не эди ул хўрсиниб, оҳ урганинг?

Оҳ уриб, кўнгилда зикр этдинг уни,
Бас, ҳақиқат улки, буздинг тавбани.

1060 Айтмиш эрдик, исмидин дам урма деб,
Топшир Оллоҳга уни, қайғурма деб.

Ишқбозлик, боқ, не ғавғо келтирур,
Ақлу хуш бошига савдо келтирур.

ҚУШЛАРНИНГ УЗР СЎРАШГАНИ

Бошқа қушлар ҳам келиб чун галма-гал,
Бўйлаким бир узру маъзур айтдилар.

Ҳар бири андоқ жаҳолатманд эди,
Айтди ул даҳлизни, тўрни айтмади.

Сўйласам, бир-бир баён этсам ани,
Гап чўзилгай, баски маъзур тут мени.

- 1065 Улки ул узру баҳона айлагай,
 Бас, нетиб боргай-да, анқо овлагай?

Жондин истарса, бўлур анқога ёр,
Кимки кечгай жонидин мардонавор.

Ошиёни ичра ўттиз дони йўқ,
Симурғ изларму? Бунинг имкони йўқ.

Битта дон излашга етмас ҳафсала,
Қайдা юзлашмоққа куч Симурғ ила?

Бир қадаҳ май бирла битгай суҳбатинг,
Қайдা ул майпаҳлавон-ла ишратинг?

- 1070 Заррага йўқ сенда зарра сабру тоб,
 Қайдা сенга васли ганжи офтоб?

Ғарқ бўлурсен қатрайи шабнамда хор,
Бас, нетиб денгиз тиларсен беканор?

Борни йўқ дерсан магарким, ёзни қишиш,
Ҳар ювиқсизнинг иши эрмас бу иш...

◆ ◆ ◆

УЧИНЧИ МАҚОЛА ҚУШЛАРНИНГ ҲУДҲУДДАН САВОЛ СҮРАШГАНИ

Жумла қушлар кўрдилар не эрди ҳол,
Сўрдилар ул барча Худҳуддин савол.

Эйки бизга раҳбари устоз ўзинг,
Балки сарварликда ҳам мумтоз ўзинг,

- 1075 Биз ҳама бундоқ заифу нотавон,
Кўл-қанотсиз, бир ҳовуч пар, хаста жон.

Не замон етгаймиз ул Симурғга чун,
Биттамиз етсак-да басдир биз учун.

Сўйла бизга не эрур нисбатда ул,
Кўр киши асрорни қандоқ излаюр?

Бизда мавжуд эрса гар нисбат анга,
Кўнглимиизда кўзғалур рағбат анга.

Ул Сулаймон, биз чумоли, майдамиш,
Сол назар, ул қайдаю биз қайдамиш?

- 1080 Чун қудуқ банди чумолига тўсиқ,
Биз баланд Симурғга етгаймиз нечук?

Келмагай биз бенаволардин бу иш,
Бўлмагай шоҳлик гадолик бирла эш.

ХУДҲУДНИНГ ҚУШЛАРГА ЖАВОБ БЕРГАНИ

Айтди Худҳуд: эй қуруқ, афтолалар,
Ул бузук дилларга ишқдин не самар?

Эй гадолар, бесамарлик энди бас,
Ишқ ила кўнгли бузуқлик мос эмас.

Ишқ аро ким кўз очиб, топди суурү,
Ул оёғин ўйнатиб, жонбоз эрур.

1085 Билки, ул Симурғ очиб юздин ниқоб,
Ўзни гар этса аён чун офтоб,

Соялар бўлгай бари тупроққа жо,
Сояйи Симурғ қолур майдон аро.

Соясин оламга ул этгач нисор,
Неча қуш ҳар дам бўлурлар ошкор.

Жумла қушлар сувратин ҳам сарбасар
Сояйи Симурғ бил, эй бехабар.

Сен шуни бил аввало, шу билганинг
Ул буюк ҳазратга юзни бурганинг.

1090 Сўнгра огоҳ бўлгани этгил талош,
Баски бўлдинг, айлама бу сирни фош.

Кимки Ул бўлди, чу мустағрақ эрур,
Хошааллоҳ, унга ҳамдам Ҳақ эрур.

Шунга етсанг, гар эмассен ҳақ мудом,
Лек бўлурсен Ҳаққа мустағрақ мудом.

Марди мустағрақ ҳулулий бўлмағай,
Бул сухан қавли Фузулий бўлмагай.

Сояи кимсен, шуни билдингми бот,
Гар ўликсен, гар тирик, топдинг нажот.

1095 Бўлмасайди гар Симурғ ошкор,
Даҳр аро қайдин бўлурди соявор?

Боз агар Симурғ бўлсайди ниҳон,
Соясин кўрмасди ҳар гиз бул жаҳон.

Ҳар неким солгай кўланка бунда ул,
Аввало бўлгай ҳувайдо унда ул.

Йўқса гар Симурғни кўргувчи кўзинг,
Кўзгудек равшан дилинг йўқ, юлдузинг.

Кимсада кўз йўкки, кўрса ул нигор,
Ки жамоли олди бул сабру қарор.

1100 Ҳуснига ишқ бойламак мушкул эрур,
Айламиш лутфу камолин кўзгу ул.

Кўзгу кўнгилдир, кўнгилга сол назар,
Токи кўргайсен жамолин, эй башар.

ҲИКОЯТ
ПОДШОНИНГ ОЙНАБАНД ҚАСР ҚУРГАНИ

Подшоҳ бор эрди чун соҳибжамол,
Хусни дунё ичра андоқ bemисол.

Мулки олам мусҳафи оёт анга,
Дилраболик парчами роёт анга.

Субҳи содик – чехрасидин бир нишон,
Рӯҳи қуддус – атридин анбарфишон.

- 1105 Жаннатул маъво унинг тимсоли, бас,
Хуснидин бир нусха эрди, бошқамас.

Лек бирор кимса жаҳонда бормикан
Ки ўшал ҳусну жамолдин баҳраманд?

Даҳр аро андин басе ғавғо эди,
Ишқидин эл бошида савдо эди.

Отланиб гоҳо чиқар эрди шитоб,
Юзига тортиб неча гулгун ниқоб.

Ул ниқобга кимса гар солса нигоҳ,
Бошидин ажрарди, гарчи бегуноҳ.

- 1110 Номини гар тилга олса қай бири,
Тонг эмас, дарҳол кесилгайди тили.

Васлини ким айлар эрса орзу,
Ақлу жонидин жудо бўлгайди у.

Ишқида жон бермоқ эрди мўътабар,
Юз умрдин яхшироқ эрди ўшал.

Хар куни кўйида минглаб жон нисор,
Бўйла ишқ эрди жаҳонда, бўйла кор.

Ишқида на сабру бардош бир даме,
Кўйида на тобу тоқатдин ғаме.

- 1115 Ким унинг кўрса жамолин ошкор,
Жон берар эрди соғинчдин зор-зор.

Бесабр эрди улус васлин сўраб,
На висоли, на фироқига, ажаб.

Гар бири сабр айласайди бир замон,
Шоҳ анга айлар эди васлин аён.

Лек бирида тобу тоқат йўқ эди,
Кутгали сабру қаноат йўқ эди.

Бўлмади бир кимса чун марди анинг,
Жон берарди, кўнглида дарди анинг.

- 1120 Ойина қурмоққа фармон берди шоҳ,
Токи ҳар дам унга соглай ул нигоҳ.

Шоҳни деб кошона бунёд этдилар,
Сўнгра ул ойинани ўрнатдилар.

Киргай эрди ул қасрга подшоҳ,
Ойина сорига ташларди нигоҳ.

Чехраси ойинада порлаб чунон,
Ҳар киши андин топар эрди нишон.

Сенда гар эрса жамоли ёри дўст,
Билки, дил – ойинайи дийдори дўст.

1125 Сен кўнгилга бок, жамолин кўр анинг,
Жонни эт кўзгу, жалолин кўр анинг.

Подшоҳнинг маскани қасри жалол,
Нур таратгай унда офтоби жамол.

Ҳар кўнгил сори эрур подшоҳга йўл,
Лек топилмас ҳеч дили гумроҳга йўл.

Ул буюк шоҳингни сен кўнгилда кўр,
Аршни бир заррайи ҳосилда кўр.

Ҳар либоским, дашту сахрода гўзал,
Соядир, солмиш уни Симурғ тугал.

1130 Сенга гар Симурғ кўрсатса жамол,
Соясин Симурғ деб айтгил bemalol.

Гар ҳама чил мурғу гар си мурғ эрур,
Неча кўрдим, сояйи Симурғ эрур¹.

Бўлмагай ул соя Симурғдин жудо,
Гар жудо дерсан уни, эрмас раво.

Иккиси пайвастадир, боз излагил,
Соядин кечгил, асл роз излагил.

Гар сени йўқ этса, ютса соя ул,
Қайда Симурғдин сенга сармоя ул?

1135 Гар сенга эшик очилса, бас, шу тоб,
Сояда балқиб кўрингай офтоб.

Соя офтобда йўқолгайдир тамом,
Сен басе офтоб кўрарсен, вассалом.

¹ Улар қирқ қуш бўладими, ўттиз қушми, барчаси Симурғнинг сояла-
ридир.

**ҲИКОЯТ
ИСКАНДАРНИНГ БИР МАМЛАКАТГА
ЭЛЧИ БЎЛИБ БОРГАНИ**

Бор эди Искандари соҳиб қабул,
Бир томон элчи юбормоқ бўлди ул.

Ўзни элчи сайлабон шоҳи жаҳон,
Тўн кийиб чун йўлга тушди ул ниҳон.

Не ажиб сўзларни унда сўйлади,
Деди: Искандар буни амр айлади.

1140 Элчиким ул сўйлади ёлғону чин,
Билмади бир кимса Искандарлигин.

Йўқ эди ҳеч кимда Искандар кўзи,
Ким ишонгай эрди айтса гар ўзи?

Ҳар кўнгилдин шоҳ сари бирроҳ эрур,
Бехабардир, улки дилгумроҳ эрур.

Эрмасанг гар уйда, шоҳ бегонадир,
Чекма ғам, кир уйга, ул ҳамхонадир...

СУЛТОН МАҲМУД ВА АЁЗ ҲИКОЯТИ

Кўз тегиб, оғриб, ётиб қолди Аёз,
Ул сабаб шоҳдин йироқ тушди бир оз.

1145 Дард ила чун хастаю зор бўлди ул,
Бош қўйиб болишга, bemor бўлди ул.

Бу хабар Маҳмудга етди бир замон,
Маҳрамин чорлаб, буюрди ул ҳамон.

Дедиким, боргил Аёзга ҳозироқ,
Айт анга, эй сенки подшодин йироқ,

Гарчи мен ҳам чун йироқдирмен бугун,
Үртаниб, дардингни тортармен бутун.

Ҳар сафар bemorligingni ўйласам,
Билмадим, сен хастаму, мен хастамен?

1150 Гар таним сендин йироқдир бул нафас,
Жони муштоқим сенинг ёнингда, бас.

Иштиёқинг тортамен, малҳам ўзинг,
Бир замон айру эмас, ҳамдам ўзинг.

Ул ёмон кўз ранжу озор айламиш,
Сен каби барнони bemor айламиш...

Боз дедиким, йўлга тушгил зуд-зуд,
Ўт бўлиб боргил-да, қайтгил мисли дуд.

Йўлда ҳеч тайсаллама, амримни эт,
Ел бўлиб, чақмоқ бўлиб манзилга ет.

1155 Судралиб этсанг агар фурсатни хор,
Икки оламни этармиз сенга тор...

Тушди йўлга шўрлик ул маҳрам шу тоб,
Ел бўлиб манзилга ҳам етди шитоб.

Кўрдиким, ул ерда султон ўлтирур,
Қолди чун ваҳму аросат ичра ул.

Ларза тушди, жисму жони титради,
Ўйлаким, дарду балога учради.

Деди: шоҳга гар кўринсан бул замон,
Ул тўқар қонимни, қўймас ҳеч омон.

1160 Ичди онт, мен йўлда ташларкан қадам,
Турмадим, ўлтирмадим бир лаҳза ҳам.

Етмагай ақлим, нетиб манзилга то
Мендин олдин чун етишмиш подшоҳ?

Гар ишонсин шоҳ, агар этсин гумон,
Зарра айбим бўлса, кофирмен ҳамон...

Шоҳ дедиким, маҳрам эрмассен анга,
Чун етишмоқликка йўл бўлсин сенга.

Ул сари пинҳона йўл бор менга, бас,
Ундан айру мен туролмам бир нафас.

1165 Мен ўшал йўл бирла келгум ҳар замон,
Бир киши билмас буни, кўздин ниҳон.

Ўртада пинҳона йўллар оз эмас,
Жон аро чун рози диллар оз эмас.

Сир тутармен рози пинҳоним менинг,
Унга ҳамдамдир мудом жоним менинг.

Зоҳиран истаб хабар, дилхоҳи мен,
Аслида ҳар дам унинг огоҳимен...

◆ ◆ ◆

ТҮРТИНЧИ МАҚОЛА ҚУШЛАРНИНГ ҲУДҲУДДАН ЯНА САВОЛ СҮРАШГАНИ

Чун ҳама қушлар эшитди бул сухан,
Билдилар, не эрмиш асрори кўҳан¹.

1170 Жумла ул Симурғга нисбат топдилар,
Ҳам ўшал асрорга рағбат топдилар.

Ул Сухан боис ҳама боз келдилар,
Жумла ҳамдарду ҳамовоз келдилар.

Бўлди Ҳудҳуд бирла суҳбатлар басе,
Йўлни билмас эрди андин ўзгаси.

Сўрдилар андинки, устоди буюк,
Бул мاشаққат йўлни ошгаймиз нечук?

Бизда парвоз йўқ баланд, олий мақом,
Бул йўсин манзилга етгаймиз қачон?

1175 Ҳудҳуди раҳбар деди қушларга, бас:
Ошиқ ўлган кимса жонни ўйламас...

ҲУДҲУДНИНГ ҚУШЛАРГА ЖАВОБ БЕРГАНИ

Хоҳи зоҳид бўл ва ё фосиқ ўзинг,
Жонни тарқ этсанг агар, ошиқ ўзинг.

Ўйлаким, жонингга душмандир кўнгил,
Жонни топширсанг, етар поёнга йўл.

¹ Асрори кўҳан – эски сирлар.

Садди роҳдир жон, жон ийсор қил¹,
Пардані от, ёр ила дийдор қил.

Десалар гар сенга: ҳой, иймонни қўй,
Ҳам хитоб айлаб дейишса: жонни қўй,

1180 Кўй уларни, сен ҳамон тарк айлагил,
Тарки иймон айла, он тарк айлагил.

Сўрсалар: бас, не эмиш ондин азиз?
Сен дегил: ишқ куфру иймондин азиз.

Куфру иймон бирла ишқнинг не иши?
Ул тану жон бирла ишқнинг не иши?

Ошиқ улким, ўт урап хирмонга ул,
Танга ўт ургай ва ургай жонга ул.

Дарду хуни дил эмишдир ишқ аро,
Қиссайи мушқул эмишдир ишқ аро.

1185 Соқиё, хуни жигардин жом тут,
Йўқса дардинг, биздин ол, пайғом тут.

Дард керак ошиққа чун ёндиргучи,
Гоҳ ёқиб ўтлар, гаҳи сўндиригучи.

Заррайи ишқ барча оғоқдин азиз,
Заррайи дард барча ушшоқдин азиз.

Ишқ – мағзи коинот эрмиш мудом,
Ишқки бедард эрса, ноқисдир тамом.

Олами қудсийда дарддин гард йўқ,
Одамийдин ўзгасида дард йўқ.

¹ Садди роҳ- йўлга тўсик.

1190 Кимки эрмиш ишқ аро собит қадам,
Ул куфрдин холидир, исломданам.

Ишқ фақирлик эшигин очгувчи ул,
Сүнг фақирликдин куфрлик сори йўл.

Ишқу коғирлик аро эшлик эрур,
Чун куфрлик – мағзи дарвешлик эрур.

Ишқ аро ул куфру иймон қолмагай,
Тан ила кўнгил кетиб, жон қолмагай.

Мард бўлурсен унда андоқ кор учун,
Мард керак бул шева, бул асрор учун.

1195 Бос қадам, бўл марди майдон, қўрқмагил,
Бир йўла қўй куфру иймон, қўрқмагил.

Мунча қўрқарсен мисоли бир гўдак,
Шер бўлиб майдонга тушмоғинг керак.

Юз бало юзланса сенга ногаҳон,
Этма парво, йўл босиб, ошгил довон...

ШАЙХ САНЬОН ҚИССАСИ

Шайх Санъон қутби даврон эрди, пир,
Ҳам камолу ҳам адода беназир.

Пири комил эрди эллик йил фаол,
Измида тўрт юз мурид соҳиб камол.

1200 Ҳар муриди эрди андоқ аржманд,
Кеча-кундуз бас риёзат бирла банд.

Шайх чун илму амалга ёр эди,
Соҳиби кашф, соҳиби асрор эди.

Ҳажни эллик бир адo этмишди ул,
Ҳар йили умра бажо этмишди ул.

Айлаган рўза, намози лак-лак¹,
Айламас эрди сира суннатни тарк.

Неча пешволар келарди қошига,
Бош эгиб, парвона эрди бошига.

1205 Қилни қирқ ёргувчи эрди, маънавий,
Ҳам каромат, ҳам мақомотда қавий.

Хасталар тутгай эди навбат анга,
Дам, нафас урса, етиб сиҳҳат анга.

Халқ била шодликда ҳам, қайғуда ҳам,
Муқтадо эрди, азизу муҳтарам.

Пир эди чун ўзгалар ўтрусида,
Бир кеча туш кўрди ул уйқусида.

Хижрат айлаб, Румни этмишди ватан,
Саждалар айларди бутга дамба-дам.

1210 Бўйлаким туш кўрди бедори жаҳон,
Эй дариғо, деб ҳамон чекди фифон.

Йўл бориб етди тўсиққа, турди, бас,
Юсуфи тавфиқ кудуққа тушди, бас.

Бу балодин жонни сақлармиз нечук?
Жон бериб, иймонни сақлармиз нечук?

¹ Лак-лак – минг-минг.

Йўқ магар мулки жаҳонда бир киши,
Бўйлаким мушкулда қолгайдир иши...

Гар тўсиқдин ошса, йўқ эрди гумон,
Йўл очилгайди анга равshan, равон.

- 1215 Ошмайин, қолса тўсиқ ортида чун,
Йўл мاشаққат ичра кечгайди узун.

Охир ул алломайи равshan сиришт
Дедиким, бошимга андоқ тушди иш.

Мулки Рум сорига зуд бормоқ керак,
Не эмиш туш таъбири, кўрмоқ керак.

Тўрут юз дарвешки, марди мўътабар
Бўлдилар ул пирга ҳамроҳ, ҳамсафар.

Бордилар чун Каъбадин то мулки Рум,
Кездилар ҳар неки маъво, улки Рум.

- 1220 Кўрдилар ногоҳ музайян кўшки нур,
Панжара ортида бир қиз ўлтирур.

Шўхи тарсо эрди, руҳоний сифат,
Дилда Руҳиллоҳ сабаб юз маърифат.

Чун ҳусн офтоби ичра ул жамол
Офтоб эрди ва лекин безавол.

Офтоб ул ҳусни тарсони кўриб,
Рашк аро қолмиш фалакда сарғайиб.

Ким унинг зулфига кўнгил бойлагай,
Ўзни зуннорга гирифтор айлагай.

1225 Жон дебон ким лаъли гулрангни суяр,
Кўйига қўймас оёғин, бош қўяр.

Зулфи атридин сабо мушкин бўлиб,
Аҳли Рум саргашталиқда Чин бўлиб,

Кўзлари чун фитнайи ушшоқ эди,
Қошлари мисли камони тоқ эди.

Бир қиёлаб боқса ошиқ жонига,
Ошиқ ул тушгайди ғамза домига.

Ой юзин ҳар лаҳза кўрсам, дерди халқ,
Ул камон қошларга тутқин эрди халқ.

1230 Ўйнатиб кўз мардумин, боқса хумор,
Неча минг мардум анга эрди шикор.

Сочи, зуфи шуълага уйқаш эди,
Зулф аро гул юзлари оташ эди.

Лаълига лабташна эрди эл бари,
Наргиси мастида мижгон ханжари.

Ким унинг наргис кўзига ўч эди,
Ханжари мижгонларига дуч эди.

Оғзига йўл топмас эрди сўз магар,
Сўйлаганлар эрди андин бехабар.

1235 Тор даҳони эрди асрори анинг,
Зулфидек белида зунори анинг.

Ҳам занахдонида кулгич ҷоҳи, бас,
Сўзлари жонбахш эди, Исонрафас.

Неча минг ошиқ күнгиллар ғарқи хун,
Кулгичи чоҳига тушмиш сарнигун.

Чехраси эрди мунааввар офтоб,
Тимқаро соchlар анга эрди ниқоб.

Чекди қиз юздин ниқобин ногаҳон,
Шайх жонига туташди ўт ҳамон.

1240 Очди қиз, кўрсатди гул рухсорни,
Бойлади шайх белга юз зуннорни.

Гарчи шайхга оқибат маълум эди,
Лек санам ишқига ул таслим эди.

Кечди ўздин, этди дунёни унут,
Гарчи оташ эрди, доғи урди ўт.

Борлиғи ўртанди, ёнди, бўлди кул,
Қолди оташлар, тутунлар ичра ул.

Ишқи тарсо этди ғорат жонини,
Куфру савдо чирмади иймонини.

1245 Берди иймон, олди тарсоликни ул,
Сотди уқбо, тутди расволикни ул.

Жону дилни этди забт ишқи санам,
Жонидин тўйди, яна кўнгилданам.

Дедиким, ишқ кетса, унда не қолур?
Шўхи тарсо севгиси мушкул эрур...

Чун муридлар кўрдилар, шайх эрди зор,
Билдилар, бошида не савдоси бор.

Бас, боқиб ҳолига ҳайрон бўлдилар,
Бош эгиб, кўйида сарсон бўлдилар.

- 1250 Панд-насиҳат этдилар, келди малол,
Иш бўлиб ўтганди, қайтармоқ маҳол.

Панд бор, тинглашга имкон йўқ эди,
Чунки дард бор эрди, дармон йўқ эди.

Ошиғи шайдога имкон қайдা бор?
Дарди дармонсўзга дармон қайдা бор?

Чун қоронғу тушди, тун чўқди қаро,
Бўлди ғойиб ул санам зулмат аро.

Қолмади хуршиду кундуздин висол,
Шайх боқиб айвонга эрди гангү лол.

- 1255 Ёнди юлдузлар фалакда дамба-дам,
Ёқди пирнинг қалбини ҳажру алам.

Шул кеча бир ишқи бўлди юз магар,
Кечди буткул, қолмади ўздин асар.

Кечди жондин, кечди оламдин тамом,
Сочди тупроқ бошига, чекди фифон.

Билмади бир лаҳза орому қарор,
Ишқидин ўртанди, куйди зор-зор.

Дерди: ё Раб, бул кечамнинг тонги йўқ,
Шамъи гардуннинг зиёси, ранги йўқ.

- 1260 Тунларим кечди риёзат ичраким,
Бўйла бир тунни ва лекин кўрмадим.

Шамъ каби ёндим, мадорим қолмади,
Хуни дилдин ўзга борим қолмади.

Бул ҳароратлар чу ўлдиргай мени,
Тун ёкиб, тонг бирла сўндиригай мени.

Тун бўйи бундоқ шабохун ичрамен,
Бошдин охир ғарқайи хун ичрамен.

Дуч келиб юз бир шабохунга ўзим,
Билмадим, қандоқ кечаркин кундузим?

1265 Улки бундоқ бир кеча кун кўргуси,
Кеча-кундуз ёнгуси, ўртангуси.

Кеча-кундуз ёндим, ўртандим неча,
Кундузимга етдим охир бул кеча.

Келмадим дунёга қай бир кунни деб,
Мен яралмишмен шу ялдо тунни деб.

Бўйла бир туннинг адоғи бормикин?
Порлаган шамъи чароги бормикан?

Ё Раб, андоқким аломатларда ул,
Ёки айёми қиёматдирми бул?

1270 Ёки оҳимдин ўчиб гардун шами,
Дилбарим чекди уятдин пардани?

Тун қаро, ўхшайди зулфи мўйига,
Йўқса, йўл излаб топардим кўйига.

Ёндиур жонимни бул садвойи ишқ,
Тоқатим олмиш базе ғавғойи ишқ.

Борми умрим, васфи жонон айласам,
Ахтариб бахтимни афғон айласам?

Борми сабрим, то йифиб мен ақлу хуш,
Этсам ул жоми майдин ноби нүш?

1275 Борми бахтим, токи уйғотсам уни,
Ишқ аро жонимга ёр этсам уни?

Борми ақлим, илм пайдо этгали,
Илму фандин ўзни доно этгали?

Қўл қани, бошимга тупроқлар сочай,
Ё узиб бошимни ердин, кўз очай?

Эй оёғим борми, борсам сорига?
Кўз қани, боқсам унинг дийдорига?

Ёр қани, дардимга бўлса малҳаме,
Дўст қани, тутса қўлимдин бир даме?

1280 Кун қани, то нолайу зорлиқ қилай?
Хуш қани, то сози ҳушёрлиқ қилай?

Кетди ақлим, кетди сабрим, кетди ёр,
Бул нечук дарддир, нечук ишқи нигор?

Дўсту ёрлар ул кеча жам бўлдилар,
Оҳ чекаркан, бошидин эврилдилар.

Бир аниси деди: эй шайхи кабир,
Чекма бу садвони, ювгил, ташлагил.

Шайх дедиким, бул кеча хуни жигар
Неча бор ювди мени, эй бехабар.

1285 Қай бири сўрдики, тасбиҳинг қани?
Иш битарму қўлга олмасдин ани?

Шайх дедиким, мен уни тарқ айладим,
Ташладим тасбиҳни, зуннор бойладим.

Бошқаси дедики, эй пири жамил,
Чун хато қилдинг, хатога тавба қил.

Деди: қилдим тавба, йўқ номусу ҳол,
Кетди шайхлик, кетди барча қилу қол.

Қай бири дедики, эй донои роз,
Эс-хушингни йиф бу дам, этгил намоз.

1290 Деди: қайда васли ёр, меҳроб этай,
Бўлмаса васли, намозни мен нетай?

Ўзгаси дедики, шайхи мўминин,
Бор-да, хилват тут, Худойингга сиғин.

Деди: гар қаршимда бўлсайди санам,
Саждалар айлардим унга дамба-дам.

Сўрдиким, йўқми пушаймонлик сенга?
Бир нафас дарди мусулмонлик сенга?

Шайх дедиким, мен пушаймонмен бари,
Нега ошиқ бўлмадим деб илгари.

1295 Деди: шайтон йўлдин оздирмиш сени,
Найзасин отмиш сенга деви дани.

Шайх дедиким, айт, яна отсин ўшал,
Найзаси кўксимга ботмоғи гўзал.

Айтдилар: ҳолингни күрган жумла эл,
Шайх нечун бормиш бу гумроҳликка дер.

Деди: менда ор-номус найласин,
Тош отиб, буткул ушатдим шишасин.

Айтдиларким, дўсту ёрлар, эй имом,
Маъюсу дилпорадирлар бул замон.

1300 Деди: менга ул санам хуш бўлса, бас,
Бу кўнгил ғайрига парво айламас.

Айтдилар: юр энди, турдик биз неча,
Каъба сорига борайлик бул кеча.

Дедиким, йўқ эрса Каъба, дайр бас,
Каъбада хушёрмену дайр ичра масти.

Айтдилар: тур энди, тутгил азми роҳ,
Масжиди аҳромда сўр узри гуноҳ.

Деди: мен узримни айтгумдир куйиб,
Ул пари остонасига бош қўйиб.

1305 Айтдилар: йўл узра дўзах бор, бироқ.
Кимки огаҳдир, ўшал ўтдин йироқ.

Деди: дўзах эрса ҳамроҳим менинг,
Етти дўзахни ёқар оҳим менинг.

Айтдилар: жаннат умидин тут мақом,
Тавба қил, кеч бул маломатдин тамом.

Деди: жаннат юзли ёrim менга бас,
Жаннатул маъвони этмасмен ҳавас.

Айтдилар: ҳой, Ҳақ таолодин уял,
Ҳақ яратмиш ахли дунёдин уял.

- 1310 Деди: бул оташга соглан Ҳаққи рост,
Ўз-ўзимни мен нечук этгум халос?

Айтдилар: роҳатда сокин бўл яна,
Юз буриб иймонга, мўмин бўл яна.

Дедиким, куфримни вайрон истама,
Кимки кофир, андин иймон истама..

Кўрдиларким, сўз анга кор айламас,
Бўлдилар ул барча маъюс, дилшикаст.

Ўртаниб андоқ юраклар бўлди қон,
Парда ортидин не келгайдир, дебон...

- 1315 Келди кундуз турки, ул зарин кулоҳ,
Этди тун ҳиндусини бошдин жудо.

Тонг отиб чун бул жаҳони пурғурур
Бошига кўқдин қуёш сочганда нур.

Шайхи шайдо юрди боз ёр сўйига,
Итлари кезгувчи жонон кўйига.

Кўйининг тупроғига ўлтирди ул,
Ёрини кўрганда гўё ўлди ул.

- 1320 Кутди ул бир ойча шундоқ интизор,
Ул санамнинг ой юзин кўрмоққа зор.

Бўлди бемор гарчи ул жононадин,
Бошини ҳеч узмади осто надин.

Бўлди тўшак ул кўйи жононаси,
Кечалар болиш анга остонаси.

Этмади тарк ул кўйи дилдорни,
Оқибат қиз билди бул асрорни.

Келди ногоҳ, сўрди шайхдин ул нигор,
Не сабабдин бўйлаким сен беқарор?

1325 Ширк шаробини ичиб зоҳид, бас,
Ўлтуур тарсо кўйида бўйла маст?

Шайх агар зулфимга пайваст этса жон,
Ҳар замон девона бўлгай бегумон...

Шайх деди: ҳолим забундир ул қадар,
Бул қадар кўнглимни олгансен магар.

Бер менга кўнглимни, ҳамроз айлама,
Ёки ҳамдам бўл менга, ноз айлама.

Эй санам, нозу такаббурликни қўй,
Бир ғарибдирмен, менинг ҳолимга куй.

1330 Сарсари эрмас бу ишқим, эй нигор,
Жоним ол ё эт менга лутфингни ёр.

Мен берай жонимни, фармон айласанг,
Ол лабимдин, хоҳиши жон айласанг.

Эй лабу зулфинг зиёну суд менга,
Ой юзинг ул мақсади мақсуд менга.

Гоҳи зулфингдек мени тоб этмагил,
Гоҳ кўзингдек масти пурхоб этмагил.

Маъюсу дилпорамен ишқинг била,
Бедилу бечорамен ишқинг била.

1335 Жонни мен сотдим, жаҳон ҳам менга йўк,
Лек сенинг ишқингда ҳамёним қуруқ.

Сендин айру кўзда ёшим шашқатор,
Мисли ёмғир ёш тўкармен зор-зор.

Кетди кўнглим, қолди кўз мотам аро,
Гул юзинг кўргач, кўмилди ғам аро.

Унча ғам кўрдимки, кимса кўрмади,
Унча дард чекдимки, кимса чекмади.

Хуни дилдин ўзга не ҳосил менга,
Хуни дил ичмоққа қайда дил менга?

1340 Раҳм қил, мискинни мундоқ ўртама,
Солма шу жонимга қийнок, ўртама.

Рўзгорим кечди бундоқ интизор,
Етсам ул васлингга, топгум рўзгор.

Ҳар кеча жон бирла ҳамрозмен фақат,
Ўлтириб кўйингда жонбозмен фақат.

Иzlарингга юз суриб, мен жон берай,
Жонни тупроқ нархида арzon берай.

Неча дерман ёлвориб, ҳамроз, қил,
Оч эшикни, бир нафас дамсоз қил.

1345 Офтобимсен, йироқ юргум нечук?
Соямен, сендин йироқ тургум нечук?

Соядек этмиш агарчи изтироб,
Панжаранг ўтрусида мен – офтоб.

Гар юзинг мендин дариғ тутсанг, нигор,
Етти гардунни этармен тору мор.

Мен кезармен унда ҳар дам охуриб,
Оташи жоним жаҳонни ёндириб.

Лойга ботдим бўйла ишқинг кўйида,
Кўлга олдим дилни шавқинг сўйида.

1350 Юзларинг орзусида жоним сабил,
Энди мендин ўзни пинҳор этмагил...

Қиз деди: эй чол, эси кирмаган,
Бор, ўзингга шайла кофуру кафан¹.

Муз нафасни менга дамсоз айлама,
Кексадирсен, ўзни жонбоз айлама.

Эйки сен васлимни истарсен ҳамон,
Бор, тадорики кафан қил бил замон.

Бенаво пирсен, магарким нонга зор,
Кўй бу ошиқликни, этма ихтиёр.

1355 Подшолик сенга этгайму насиб?
Қайга боргайсен гадоликдин қочиб?

Шайх деди: этгил маломат юз ҳазор,
Мен сенинг ишқингни этгум ихтиёр.

Ишқу савдо дилни гар мафтун қлур,
Ёшмидир ул, кексаму, мажнун қилур.

¹ Кофур - оқ, хушбўй модда, камфора.

◆ ◆ ◆ ◆ ◆

Қиз деди: гар әрса сенда шул мақом,
Юв қўлингни дини исломдин тамом.

Ул кишиким ёрига ҳамранг эмас,
Севгиси рангу бўёқдир бори, бас.

- 1360 Шайх деди: ҳар неки истарсен, аё,
Мен уни жон бирла этгаймен адо.

Ҳалқадирмен чун қулоғингда, ҳилол,
Ҳалқа қил зулфингнию бўйнимга сол.

Қиз деди: эрсанг агарда марди кор¹,
Тўртта шартим бор, шуни эт ихтиёр.

Сажда қил бутга, кейин Куръонни ёқ,
Май, шароб ич, бўл диёнатдин йироқ.

Шайх деди: этгум шаробни ихтиёр,
Бошқаси бирлан ишим йўқ, эй нигор.

- 1365 Термулиб ҳуснингга май нўш айларам,
Бошқа уч шартингни этмасмен, санам.

Қиз деди: тур унда, этгил майни нўш,
Май сенинг жонингга солгайдир хуруш².

Элтдилар шайхни сўйи дайри муғон,
Бас, муридлар кўксидин учди фифон.

Не ажаб мажлиси зебо кўрди шайх,
Унда бир ҳусни дилоро кўрди шайх.

¹ Марди кор – бу ерда ҳақиқий эркак маъносида.

² Хуруш – завқу шавқ.

Оташи ишқ жисми зорин чирмади,
Зулфи тарсо рўзгорин чирмади.

- 1370 Зарра ақли қолмади, чун хуш ҳам,
Ул сукутга толди, хомуш чекди дам.

Жоми май олди у дилдор илкидин,
Ичди, кетди ҳар неким бор илкидин.

Чун кўшилди ул шаробу ишқи ёр,
Бўлди бир ишқи юракда юз ҳазор.

Ул санамни лолу ҳайрон кўрди шайх,
Лаб эмас, гул ғунча хандон кўрди шайх.

Шавқ ўти чун ўтди жисму жонидин,
Оқди қон ёшлар унинг мижгонидин.

- 1375 Бир қадаҳ май сўрди доғи, ичди ул,
Ёр зулфи халқасига бўлди кул.

Ҳар не билмишди, унут бўлди тамом,
Бода келгач, ақли соврилди тамом.

Ҳар нечук маъники эрди жонида,
Бода ювди-ташлади бир онида.

Юз китоб ёзмишди, унга ёд эди,
Хифзи Қуръон бобида устод эди.

Май ила андоқ мақомга етди ул,
Илмидин айрилди, лофга ўтди ул.

- 1380 Қолди ёлғиз ул санамнинг ишқи-ла,
Ҳар неким бор эрди, кетди бир йўла.

Шайх сармаст бўлди, ишқи келди зўр,
Баҳри жонига ғалаён тушди, шўр.

Ул гўзал ҳам илкида май эрди, масть,
Шайх кўриб, буткул унутди ўзни, бас.

Чун унутди ўзни, расво бўлди ул,
Кўрқмади бир зарра, тарсо бўлди ул.

Май бир зум қўйди, шавқи қистади,
Қўл чўзиб, ёрга етишмоқ истади.

1385 Қиз деди: ҳай, эр эмассен ишқ аро,
Ишқни даъво этма, бўлма юз қаро.

Офият ишқ бирла бўлмас улфат ул,
Билки, ошиқлик адоғи куфр эрур.

Гар қадам қўйдинг эса ишқ қўйига,
Ҳалқа-ҳалқа зулфи мушким сўйига,

Бос қадамни энди кофирликка ҳам,
Сарсари иш эрмас ул ишқи санам.

Иқтидо этсанг агар зулфимга сен,
Қўл соларсен шул замон бўйнимга сен.

1390 Этмасанг зулфимга майли иқтидо,
Бор йўлингга, ол асову кий ридо...

Шайхки ошиқ эрди, чун чўкмиш эди,
Ҳам қазо олдида бош эгмиш эди.

Ул замонким масть эмас, хушёр эди,
Ҳар нафас жонида тамкин бор эди.

Энди эрса ошиғи зор эрди, масть,
Ихтиёри илкидин кетмишди, бас.

Күхна эрди май, ўшал кор айлади,
Шайхни чун саргашта, абгор айлади.

- 1395 Майки күхна эрди чун, ишқ эрди ёш,
Дилбари ҳозир, күнгил бергайму дош?

Бўлди пир ишқу шаробдин бўйла масть,
Ошиқ ул масть эрса, нелар айламас?

Деди: битди тоқатим, эй лолагул,
Мен ғарибдин не тиласен, сўйлагил.

Бўлмадим хушёр эканда бутпараст,
Энди Мусҳафни ёқармен масть-аласт.

Қиз деди: энди муносибсен менга,
Энди меҳру илтифот этгум сенга.

- 1400 Илгари думбул эдинг сен, баски хом,
Энди пишдинг чун, етишдинг, вассалом.

Етди тарсоларга шайхнинг этгани,
Май ичиб, не муддаога етгани.

Элтдилар шайхни калисо сори масть,
Дедилар: белингга зуннор бойла, бас.

Шайх ҳамон белига зуннор бойлади,
Ўтга отди ҳирқани, кул айлади.

Динидан кўнгилни озод этди ул,
На ҳарам, на шайхлигин ёд этди ул.

- 1405 Тарки иймон айламакни кўрди эп,
Кечди диндан бир насоро қизни деб.

Деди: хорлик этди дарвешни хароб,
Ишқи тарсо қилди бағримни кабоб.

Ҳар не фармонингга ҳозирмен, санам,
Бўйла этдим, айлагум баттарни ҳам.

Бўлмадим хушёр эканда бутпараст,
Бутпараст бўлдим бўлиб чун маству маст.

Май ичиб, ким дин таркин айлагай,
Балки бундан баттарин ҳам айлагай.
- 1410 Боз дедиким, дилбарим, не қолди, айт?
Ҳар не айтдинг, айладим, не қолди, айт?

Май ичиб, ишқингда бўлдим бутпараст,
Мунча кўрдим, бир киши кўрган эмас...

Мен каби бир кимса расво бўлмади,
Ишқ аро мажнуни шайдо бўлмади.

Ўйла, эллик йилки дилда ҳаққу рост,
Мавж урар эрди ажаб дарёйи роз.

Заррайи ишқ урди кўнгилга магар,
Элтди сўнгра бизни то лавҳи азал.
- 1415 Айлади ишқ бўйлаким, боз айласин,
Бойлади белимга зуннор, бойласин.

Боқ, хирадманд ишқ абжадхонидир,
Ғайб сирин билгувчи ишқ сарсонидир.

Хўп, бўлар иш бўлди, ўтди бешу кам,
Мен қачон васлингга етгаймен, санам?

Ишқ биносин айлаган аслинг эди,
Ҳар не қилдим, муддао васлинг эди.

Васлинг истаб, ошнолик истарам,
Бир нафас сендин жудолик истамам.

1420 Қиз дедиким анга: эй пири асир,
Мен басе қимматбаҳомен, сен фақир.

Сийму зар лозим менга, эй беҳунар,
Сийму зар йўқ эрса, ишда не самар?

Йўқсил эрсанг, турмагил бир зум, жўна,
Йўл харжинг бўлмаса, бергум, жўна.

Сен қуёш янглиғ шитоб эт, фард бўл,
Сабр қил мардонавору мард бўл...

Шайх деди: эй сарвқадду сиймбар,
Не учун аҳдинг бузарсен мунчалар?

1425 Сендин ўзга бир кишим йўқ, эй нигор,
Қўй, бу ишни, айлама ошиқни зор.

Ҳар нафас бир янги савдойинг сенинг,
Тобакай бошимда ғавғойинг сенинг?

Хуни дил ютдим дамо-дам сен учун,
Ҳар неким этдим, тамоман сен учун.

Ишқ аро руҳи равоним қолмади,
Куфру дин, суду зиёним қолмади.

Васлинг истаб бекарормен, интизор,
Қайда қолди этганинг аҳду қарор?

- 1430 Жумла аҳбобим мени тарқ этдилар,
Дўст эмас, жонимга душмандир улар.

Сен чунин, дўстлар чунондин, мен нетай?
Бўйлаким ҳолим ёмондин, мен нетай?

Сен билан, майлига, эй Ийсо сиришт,
Мен тушай дўзахга, ҳожатмас биҳишт...

Шайхки бундоқ чекди оташ оҳни,
Оқибат оҳи эритди моҳни.

Деди: эй ғўрсен ҳали, нимпухта, хом,
Бизга тўнғиз боқ юриб бир йил тамом.

- 1435 Бир йил ўтгач, баҳтни кўргаймиз баҳам,
Бирга бўлгаймиз севинчу ғамда ҳам.

Шайх жонон амрига бош эгди, ҳай,
Эгмаса бошин, висолга етмагай.

Борди шайхи каъба ул, пири кибор,
Айлади тўнғиз боқишини ихтиёр.

Ҳар киши зимнида юз тўнғиз бўлур,
Отмаса тўнғизни, зуннор боғлаюр.

Сен бориб шубҳа, гумонлар қошига,
Дема, бу келгай фақат пир бошига.

- 1440 Ҳар киши зимнида бордир бул хатар,
Йўлга тушганда чиройин кўрсатар.

Улки түнгиздин магар огох эмас,
Гарчи маъзур, лек у марди роҳ эмас.

Йўлга тушсанг сен агар, эй аржманд,
Бут била түнғиз кўтарсен юз туман.

Қир уларни сен кезиб сахройи ишқ,
Шайхга ўҳшаб бўлмагил расвойи ишқ...

ШАЙХ САНЬОН ҚИССАСИННИГ ДАВОМИ

Оқибат шайх бўлди тарсо, эй ажаб,
Кўпди Русм мулкида ғавғо бул сабаб.

1445 Дўсту ёрлар лолу ҳайрон бўлдилар,
Маъюсу дилхаста, гирён бўлдилар.

Кўрдилар ул не гирифтор эрди, маст,
Этдилар чун дўстлигу ёрликни бас.

Юз буриб ул жумла шайхдин қочдилар,
Оҳуриб, бошларга тупроқ сочдилар.

Бор эди бир дўсти, кўнгли эрди хун,
Келди шайх олдига, деди: эй забун,

Каъбага қайтармиз энди, не илож?
Бизга фармонингни айт, кўнглингни оч.

1450 Ё тутайлик биз-да тарсоликка юз,
Сен каби бул куфру расволикка юз?

Ё сени озим этайлик йўлга боз?
Лек қани этмоққа ул қурби ниёз?

Бизга хуш эрмас бу аҳволинг, аё,
Сен каби биз ҳам аламга мубтало.

Йўқ сени дайр ичра чун кўрмоққа тоб,
Бул заминдин, баски, қочгаймиз шитоб.

Ўлтириб сўнг Каъба ичра зухд ила,
Бунда кўрганларни кўрмасмиз сира.

- 1455 Шайх деди: жонимда оташ бўйлаким,
Қай тараф бормоқ тиларсиз, зуд боринг.

То тирикмен дайрдир жойим менинг,
Дилбари тарсо дилафзойим менинг.

Сиз боринг, озодсиз, йўқ сизга иш,
Бошингизга бўйла савдо тушмамиш.

Бошингизга тушса эрди бир dame,
Мен топар эрдим ғамимга ҳамдаме.

Ортга қайтинг, эй ёронлар, токи сиз,
Не келур бошимга, билмам, белгисиз.

- 1460 Сўрсалар: ул зору саргардон қани?
Аждаҳо домига тушди денг мени.

Дийдаси хун, оғзида оғу, дебон,
Ростин айтинг, тутмангиз элдин ниҳон.

Ҳеч кофир бўлмагай бунга ризо,
Пири ислом этди бул амри қазо.

Чун йироқдин кўрди тарсо қизни ул,
Кетди ақли, бас, унутди ўзни ул.

Бўйнига чун тушди зулфи ҳалқаси,
Тушди эл оғзига ишқи ғалvasи.

- 1465 Гар мени кимса мазаммат айлагай,
Денг анга: бу йўлда кимлар ўлмагай?

Бунда бош йўқдир, оёқ ҳам йўқ магар,
Қаршилар ҳар кимсани хавфу хатар.

Деди бул сўзни юзни бурди шайх,
Кўзғалиб, тўнғиз боқишга юрди шайх.

Дўсту ёрон бўлдилар гирён ҳама,
Бўйла гирён бўлмамишларди сира.

Юрдилар сўнгра улар сўйи ҳарам,
Лаб очиб лек урмади бир кимса дам.

- 1470 Каъба сори юрдилар барча шитоб,
Жонлари ўт ичра, танда изтироб.

Шайхлари қолмишди, ул танҳо эди,
Дину иймондин кечиб, тарсо эди.

Ул сабабдин лолу ҳайрон эрдилар,
Ҳар бири бир гўшада ўлтиридилар.

Шайхнинг бир дўсти бор эрди, расо,
Шайхни этмишди ўзига муқтадо.

Рахбар эрди, оқилу доно эди,
Шайхнинг ҳар сирридин осоҳ эди.

- 1475 Шайланиб шайх Рум сари тутганда йўл,
Кетмиш эрди, Маккада эрмасди ул.

Маккага қайтганда бахти чопмади,
Шайхни ул хилватсаройдин топмади.

Излади чун, сўрди шайхнинг ҳолини,
Ўзгалар арз этдилар аҳволини.

Шайхга ул амри қазо не этганин,
Ҳам қадардин унга нелар етганин.

Зулфи тарсо шайхни нелар айламиш,
Бир йўла иймон йўлини бойламиш.

1480 Бўйлаким банд айламишдир зулфу хол,
Ҳирқани ёқди, тузалмоғи маҳол.

Тоатин тарк этди ул иймон ёқиб,
Айни фурсатда юрар тўнғиз боқиб.

Хўжа эрди, муқтадоси барчанинг,
Энди эрса белида зуннор анинг.

Ҳар сўзи эрди жаҳолат сори ўқ,
Энди-чи, кекса габрдин фарқи йўқ.

Чун эшиитди сўзни бул содиқ мурид,
Жисму жонига аламдин тушди ўт.

1485 Деди: эй сидқу садоқат ичра, бас,
Эр эмассиз, балки хотин ҳам эмас.

Не учун даркор кишига дўсту ёр
Бўлмаса бундоқ қаро кунда мадор?

Шайхга содиқ эрсангиз, дўсти аниш,
Нега ёрдам айламай, тарк этдингиз?

Хой, уят сизга, шуми меҳру вафо?
Дўстга дўст айларму мундоқ бир жафо?

Шайхки зуннор бойлаб, этди корни,
Сиз-да бойланг эрди ул зуннорни.

- 1490 Баски тарсоликка юзни бурди ул,
Лозим эрди этсангиз сиз ҳам қабул.

Ким дегай, сиздин мувофиқлик келур,
Бас, ишингиз чун мунофиқлик эрур.

Кимки дўстдир, дўстга ёвардир ўшал¹,
Дўстлик айлар, гарчи кофардир ўшал.

Бир ёмон кунда билингай дўсту ёр,
Яхши кунларда агарчи юз ҳазор.

Аждаҳо комига тушмиш шайхи жон,
Сиз қочибсиз юз буриб андин ҳамон.

- 1495 Ишқ қасрига тамал бадномлик ул,
Кимки андин бош чекарса, хомлик ул...

Дедилар барча: буларни сўйладик,
Шайхга кўп панду далолат айладик.

Истадик биз бирга кўрмоқни баҳам
Шайх ила шодликини ҳам, андуҳни ҳам.

Зухд сотиб, расволик олгаймиз, дедик,
Дин сотиб, тарсолик олгаймиз, дедик.

Неча айтдик, этмади бир иштиёқ,
Бизни бир-бир ҳайдади ўздин йироқ.

¹ Ёвар – мададкор.

1500 Күрмади биздин магарким фойда, суд,
Амр этди ортга қайтмоқликни зуд.

Амри бирлан ортга қайтдик барча боз,
Сўйладик бор гапни сенга рўй-рост.

Деди ул дарвеши содиқ; эй ажаб,
Сизда бул мушкулга бўлсайди талаб,

Бош урадингиз ҳамон Ҳақ пойига,
Тиз чўкиб ул ҳусни мутлақ пойига.

Ёлбориб айлардингиз арзу ниёз,
Шайхни бул савдодин этгил деб халос.

1505 Ҳақ кўриб сизни бу янглиғ бекарор,
Шайхга айлар эрди лутфин ошкор.

Қочдингиз шайхдин бу янглиғ, майлига,
Бормадингиз не учун Ҳақ олдига?..

Тинглабон бул сўзни, афсуслар чекиб,
Турдилар ул барча бирдек бош эгиб.

Ул яна деди: хижолатдин не суд?
Бошга иш тушди, борайлик барча зуд.

Юзланиб даргоҳи Ҳаққа, қўл очиб,
Тавба айлаб, бошга тупроқлар сочиб,

1510 Ҳам қофоз кўйлак кияйлик барчамиз,
Шайхимиз бўлсин фалокатдин тамиз.

Юрдилар Рум сари тарк айлаб Араб,
Бўлдилар хилватда барча ҳақталаб.

Хар бири Ҳақ әшигинда интизор,
Гоҳ шафоат сўрди, гоҳи чекди зор.

Бўйлаким қирқ кеча-кундуздир тамом
Бош кўтармай, бўлдилар собит мақом.

Қирқ кеча кечди чу уйқудин йироқ,
Кечди қирқ кун нон ила сувдин йироқ.

- 1515 Сўрдилар бундоқ саботу сабр ила,
Оқибат тушди фалакка ғулгула.

Ул яшил кийган малоик, аҳли кўк
Кийдилар мотам либосин, ялпи кўк.

Раҳнамо дарвеш дуоси оқибат
Ўқ бўлиб мўлжалга тегди, чекди барқ.

Қирқ биринчи кеча ул дарвеши хос
Ёлвориб, хилватда ўздин кетди боз.

Субҳидам ел эсди унга мушкбор,
Бўлди ғайб дунёси дилга ошкор.

- 1520 Ой бўлиб балқиб кўринди Мустафо,
Елкасида икки кокил тим қаро.

Сояи Ҳақ, офтобдек чехраси,
Юз жахон бир тори мўйи садқаси.

Чун хиром айлаб, майин кулгайди ул,
Кимки кўрса, хушдин айрилгайди ул.

Кўрди дарвеш, сачради гўёки ўт,
Эй Набийуллох, деди, илкимни тут.



Раҳнамосен халққа баҳри Зулжалол,
Шайхимиз йўлдин адашди, йўлга сол.

- 1525 Мустафо дедики, эй ҳимматфузун,
Шайхинг озод бўлди, биз ечдик тугун.

Ҳимматинг ул мунча таъсир айлади,
Шайхни афв эттирди, маъзур айлади.

Неча бир фурсатки шайху Ҳақ аро
Неча бир гарду ғубор эрди, қаро.

Ул ғуборларни супурдик ўртадин,
Бўйлаким зулматни сурдик ўртадин.

Бир шафоат қатрасин сочдик атай,
Бир умрга ул кифоят айлагай.

- 1530 Ўртада гарду ғубор йўқ мутлақо,
Тавбалар бўлди қабул, битди гуноҳ.

Сен яқин билгилки, юз олам гуноҳ
Битта тавба тафтидин бўлгай адo.

Лутфу эҳсон денгизи мавж урса гар,
Эрмиdir, хотин, гуноҳин мавҳ этар...

Шул бир-икки сўзни айтиб сўнгидан,
Бўлди ғойиб сўнгра ул кўз ўнгидан.

Бўлди дарвеш шодланиб хушдин жудо,
Наъра чекди, титради еру само.

- 1535 Жумла асҳобин у огоҳ айлади,
Мужда берди, озими роҳ айлади.

Жумла асҳоби била фарёд этиб,
Елди, шайх олдига борди ул етиб.

Кўрдиларким, мисли оташ эрди шайх,
Бекарорлик ичра чун хуш эрди шайх.

Наъра тортиб чиқди андоқ бекарор,
Кўзидин ёлар оқарди шашқатор.

Барча ноқис сўзидин кечмиш эди,
Белидин зуннорни ҳам ечмиш эди.

1540 Ҳам кулоҳи габрини отишди ул,
Бори тарсоликни ирғитмишди ул.

Шайх йироқдин кўрди асҳобни ҳамон,
Ўзини нур ичра кўрди бегумон.

Ҳам хижолатдин яқо чок айлади,
Сочди тупроқ бошига, хок айлади.

Гоҳ булатдек ёш тўкиб, йиғларди ул,
Гоҳ аламдин жонини тиғларди ул.

Оҳидин гардун ёнар эрди гаҳи,
Тан ёнаркан, хун ёнар эрди гаҳи.

1545 Хикмати, асрори, Қуръони давом
Ақлидин бир-бир ювилмишди тамом.

Энди эрса ёдига тушмишди, бас,
Жаҳл ила бечоралик эрди абас.

Ҳолини англаб, эгарди бошини,
Саждалар айлаб, тўкарди ёшини.

Хуни дилга ўзни чулғатмиш эди,
Ҳам хижолат терига ботмиш эди.

Дўсту ёр шайх ҳолига ташлаб назар,
Гоҳ чекиб андуҳ, гаҳи шодландилар.

1550 Бордилар шайх олдига ҳайрон ҳама,
Тутдилар шукrona айтиб, жон ҳама.

Дедилар шайхга: аё билгувчи роз,
Чун булут кетди, қуёшинг чиқди боз.

Кетди куфр, ўрнига иймон келди, бас,
Бутпараст бўлди яна Яздонпараст.

Урди мавж ногоҳ у дарёйи қабул,
Чун шафоат айлади сенга Расул.

Бул замон шукrona бир оlam сенга,
Ҳаққа шукрон айла, не мотам сенга?

1555 Чун қоронғу баҳр аро Парвардигор
Йўл очиб берди қуёшдек ошкор.

Улки айлар субҳи равшанни қаро,
Тавбани этмиш гуноҳларга даво.

Тавбани андоқ бир оташ этди ул,
Ҳар нечук иллатни тубдан ёндирур...

Қиссадин ҳисса будирким, шул замон
Турди барча йўлга бўлмоққа равон.

Шайх ғусул этди ва кийди хирқа боз,
Юрди асҳоб бирла боз сўйи Ҳижоз.

- 1560 Шўхи тарсо кўрди туш уйқусида,
Бир қуёш эрмиш унинг ўтрусида.

Ул қуёш дермиш: аё, тургил ҳамон,
Бор, югур, шайхингга эргаш бул замон.

Йўлини тутгил унинг, хокини ўп,
Мунча этдинг, мазҳаби покини ўп.

Сенга келтирмиш эди ишқи мажоз,
Сен анга ишқи ҳақиқат эт ниёз.

Йўлини тўсган эдинг, дилҳоҳи бўл,
Йўлига тушгил унинг, ҳамроҳи бўл.
- 1565 Йўлдин оздирган эдинг, сен бу нафас
Оч кўзингни, айлагил ғафлатни бас.

Ул санам қўз очди, этди тарки хоб,
Қалби порлар эрди мисли офтоб.

Кўнглига тушмишди бир дарди ажаб,
Бекарор этмишди дилни ул талаб.

Масту сармаст жонига тушмишди ўт,
Борлигин ёқмиш, туташмиш эрди ўт.

Билмас эрди қиз, у жони бекарор
Айлагай кўнгилга неларни нисор?
- 1570 Куршамиш эрди ажиб бир оламе,
Дарди бор, йўқ эрди аммо ҳамдаме.

Бўйла бир оламки, унда роҳ йўқ,
Арзи дил айтай деса, огоҳ йўқ.

Бир замон шул нозу нахват ичра ул
Йиғлади, күз ёшларини түкди мүл.

Сүнгра фарёд чекди, чиқди ташқари,
Сочларин юлди, югурди сарсари.

Күнглида дард эрди, жисми нотавон,
Бўлди шайхнинг ортидан йўлга равон.

1575 Бир булатдек беқарор боргайди ул,
Бехушу беихтиёр боргайди ул.

Билмас эрди чун кезиб сахрою дашт,
Қайси йўл манзилга бўлгайдир туташ.

Ожизу саргашта боргай эрди қиз,
Юзини тупроққа сургай эрди қиз.

Айлар эрди Ҳаққа ул арзи ниёз,
Эй кариму роҳдону корсоз!..

Ожизу дармондаву бечорамен,
Хонумонимдин кечиб, оворамен.

1580 Йўлдин урдим бир азиз мардингниким,
Йўлдин урма сен мени, ғофил эдим.

Шафқат айла, этмагил қаҳру итоб,
Мен хато қлдим, менинг айбимни ёп.

Ҳар не қилдим, бенавомен, айблама,
Динга кирдим, сен мени динсиз дема...

Шайхга илҳом келди ғойибдин шу он,
Ки санам тарсолигин тарқ айлабон,

Бўлди шул даргоҳимизга ошно,
Бизни истаб, роҳимизга ошно.

- 1585 Ортга қайтгил, сен унинг пешвози бўл,
Ул санамнинг ҳамдаму ҳамрози бўл.

Ортга қайтди шайх ҳамоно жаҳд ила,
Аҳли асҳобига тушди ғулғула.

Дедилар: ҳой, ул ғазалхонлик қани?
Тавбаю узру пушаймонлик қани?

Тавба айлаб, ишқибозликум ишинг?
Тавбадин сўнг бенамозликум ишинг?

Шайх уларга айтди қизининг ҳолини,
Тинглабон, ҳис этдилар аҳволини.

- 1590 Шайху асҳоб қайтдилар чун ортга боз,
Етдилар ел урга, эрди дилнавоз.

Кўрдилар дилбарни, сарғаймиш юзи,
Гард-ғубор ичра эди қошу кўзи.

Бошяланг эрди, оёғи ҳам яланг,
Мурдадек йўл узраву уст-боши чанг.

Кўрди чун ул ой суюкли шайхини,
Эс-хуши як бора тарқ этди уни.

Шайх эгилди қизга, хушсиз эрди у,
Йиғлади, кўз ёшларидин сепди сув.

- 1595 Кўз очиб, ошиқни кўрди ул нигор,
Кўзлари ёш тўқди чун абри баҳор.

Күзлари тушмиш эди жон қасдига,
Отди ўзни шайх оёғи остига.

Деди: номусдин ёнар жоним маним,
Бас, етар ул мунча пинҳон ёнганим.

Парданы очгил, аё устози роз,
Арза қил исломни, кўрсат роҳи рост.

Арза қил исломни, кўрсат роҳи Ҳақ,
Эйки шайхи мўминин, огоҳи Ҳақ...

1600 Шайх анга исломни талқин этди то,
Чекдилар ул жумла ўтлиғ бир нидо.

Ул париваш бўлди чун аҳли аён,
Сел бўлиб кўз ёшлари оқди равон.

Бўйлаким топди ҳақиқат сори йўл,
Тўлди иймон завқига огоҳ кўнгил.

Завқи иймон бирла бўлди беғубор,
Келди ғам, сўнг ортидин бул ғамгусор.

Деди: шайхо, тоқатим чун бўлди тоқ,
Тоқатим йўқ тортгали дарду фироқ.

1605 Тарк этармен ғамли бу дунёни то,
Алвидо, эй шайхи олам, алвидо!..

Сўзни қисқа айладим, камситмагил,
Афв эт ошиқни сен, айбситмагил...

Айтди шул сўзларни жон берди ой,
Жонини жононга топширди хумой.

Офтобини булат босди қуюқ,
Жисмидин жони узилди, во дариғ.

Қатра эрди, маскани баҳри мажоз,
Боқ, ҳақиқат денгизига кетди боз.

- 1610 Улки кетди, биз-да кетгаймиз ҳама,
Ел каби оламдин ўтгаймиз ҳама.

Ишқ, муҳаббат күйида нелар бўлар?
Не бўлурни ишқни билганлар билар.

Ҳар не дерлар, йўлда бу мумкин эрур,
Аҳли раҳмат ҳам умид эмин эрур.

Нафс бул асрорни асло англамас,
Бенасиб майдонда чавгон ўйнамас.

Жон қулоғи бирла тингларсен буни,
Тан қулоғи илғамас, туймас уни.

- 1615 Жанг қилур ҳар дамда жон бирлан кўнгил,
Чек яна фарёдки, мотам чоғи бул.

Чусту чаққон бўл бу йўлда дам сайин,
Баҳри тоқат ичра сузгайсен кейин.

БЕШИНЧИ МАҚОЛА
ҚУШЛАРНИНГ ЎЗЛАРИГА РАҲБАР
САЙЛАШГАНИ

Жумла қушлар бул суханни тинглабон,
Дедилар: шаймиз ҳама тикмоқقا жон.

Симурғ олмиш эрди чун сабру қарор,
Бир эмас, жонларда ишқ эрди ҳазор.

Азми роҳ этмоқ учун шайландилар,
Чин ният айлаб, анга бойландилар.

- 1620 Дедилар барча: керакдир бул замон
Бизга бир йўлбошчи, доно, нуктадон.

Бошласин, йўлбошчилик бўйсин иши,
Ўз-ўзини бошламас йўлга киши.

Раҳнамо, раҳбар керакдир бизга чун,
Ул азим денгизни кечмоқлик учун.

Бош эгайлик амру фармонига биз,
Йўлга тушмайлик унинг фармонисиз.

Бас, қўяйлик энди урмоқликни лоф,
Бирлашиб, барча борайлик Қуҳи Қоф.

- 1625 Зарра етгай талпиниб офтобга ул,
Бошимизга сояйи Симурғ келур.

Бизга ким раҳбар бўлур деб бор-бор,
Этдилар чун қуръа ташлашга қарор.

Қуръа кимга тушса, раҳбар бўлгуси,
Биз кичик қушларга сарвар бўлгуси.

Бўйлаким бир эътиборга келди иш,
Бекарорликдин қарорга келди иш.

Баски шул аҳду қарорни олдилар,
Жим бўлиб, бир лаҳза ўйга толдилар.

1630 Отдилар қуръа, эди лойикқа ул,
Қуръа тушди Худхуди ошиққа ул.

Жумла күш Худхудни раҳбар этдилар,
Амрига ўзни сафарбар этдилар.

Олди тан Худхудни сарвар деб ҳама,
Раҳнамо, пешвою раҳбар деб ҳама.

Хукм унинг хукми эрур, фармони ҳам,
Унга шу танлар тасаддуқ, жони ҳам.

ОЛТИНЧИ МАҚОЛА ҚУШЛАРНИНГ ЙЎЛГА ШАЙЛАНИШГАНИ

Худхуди ҳоди чиқиб келди ҳамон,
Бошига кўндиридилар тож шул замон.

1635 Неча юз минг қүш жадал йўл олдилар,
Еру осмонларга соя солдилар.

Сарҳади водийга охир етдилар,
Кўрдилар водийни, фарёд этдилар.

Босди чун қушларни йўлнинг ҳайбати,
Солди ўт жонларга қўркув, даҳшати.

Тортишиб, парларни бир-бир юлдилар,
Юлқишиб, танларни абгор қилдилар.

Ювдилар қўлларни жонлардин шу чоғ,
Юклари кўп оғир эрди, йўл йироқ.

- 1640 Йўлда йўқ эрди йўловчи, сайр ҳам,
Заррайи шарр ҳам йўқ эрди, хайр ҳам.

Кимсасиз, сассиз-садосиз, сирли йўл,
На камаймас, на кўпаймас эрди ул.

Сўрдилар: йўл мунча бўм-бўшdir нечун?
Худхуд айтди: иззати подшо учун...

БОЯЗИД ҲАҚИДА ҲИКОЯТ

Бир кеча чиқди шаҳардин Боязид,
Кўрди халқдин холи оламда сукут.

Кўкда ой порларди, тун афруз эди,
Кеча эрмас, ўйлаким кундуз эди.

- 1645 Беҳисоб юлдуз ёнарди кўк аро,
Ҳар бирида айрича ҳусну жило.

Шайх кезиб, сайр айлади сахрони чун,
Чекмади мен бунда деб бир кимса ун.

Кучди бир ҳолат уни, бузди сукут,
Деди: ё Раб, тушди шу жонимга ўт.

Бу улуғворликки даргоҳингдадир,
Лек уни севгучи жонлар қайдадир?

Чун овоз келди: аё ҳайрону зор,
Бермагай ҳар кимсага йўл шаҳриёр.

1650 Бўйлаким иззатни юксак тутди шоҳ,
Келмагай то бу эшикка ҳар гадо.

Бул ҳарамдин сочилур оламга нур,
Ухлаган, ғофил улусга тушмас ул.

Чун эранлар кўз тутарлар интизор,
Бўлса деб мингдан бирорга толе ёр...

ЕТТИНЧИ МАҶОЛА ҚУШЛАРНИНГ ҲУДҲУДГА АРЗ ЭТИШГАНИ

Жумла қушлар қолдилар қўрқув аро,
Парлари қон, тиллари ёху аро.

Бор эди йўл, йўқ эди поён анга,
Бор эди дард, йўқ эди дармон анга.

1655 Чарх уради йўлда истиғно ели,
Жаҳд этарди кўкни ҳам ағдаргали.

Бўйла бир йўл эрдиким мушкул, маҳол,
Азмига ҳатто қуёш ҳам bemажол.

Борму бир қуш шу ёруғ оламда, ҳай,
Бўйла йўл жабрига тоқат айлагай?

Баски қушлар қўрқув ичра қолдилар,
Барчаси бир чеккада тўпландилар.

Боқдилар Ҳудҳудга ҳайронлик била,
Неки ҳайронлик, паришонлик била.

1660 Дедилар ул барча Ҳудҳудга қараб:
Шоҳ хузурида керак расми адаб.

Неча бор бўлдинг Сулаймон олдида,
Эътибор топдинг у султон олдида.

Расми хизмат сарбасар билгувчисен,
Унда не хавфу хатар, билгувчисен.

Йўл босиб, билдинг баланду пастини,
Айланиб, кўрдинг жаҳоннинг бастини.

Ройимиз бундок, шу соат айла нақд,
Чун ўзинг бизга имоми ҳаллу ақд.

1665 Чиқ ҳамон минбарга, огоҳ айлагил,
Яъни, ўз қавмингни йўлга шайлагил.

Сўйла, не ул расми одоби мулук,
Чун жаҳолат бирла бўлмас бу сулук.

Ҳар кўнгил зимнида бордир мушкули,
Йўлга тушгай, бўлса гар фориғ дили.

Арз этармиз сенга мушқулларни биз,
Шубҳадин фориғ этиб дилларни биз.

Аввало сен айла мушқулларни ҳал,
Сўнгра барча йўлга тушгаймиз жадал.

1670 Биз билармиз, йўл мاشаққатли, йироқ,
Шубҳа бўлган дилда бўлмас иштиёқ.

Дилни поклаб, йўлга қўйгаймиз қадам,
Бош уармиз сўнгра ул даргоҳга ҳам.

❖ ❖ ❖

ХУДҲУДНИНГ ҚУШЛАР МУШКУЛИНИ ҲАЛ ЭТГАНИ

Шунда Худҳуд сўзини соз айлади,
Чиқди ул минбарга, оғоз айлади.

Тож кийиб, ўлтирди зумрад тахтга ул,
Ҳар киши кўрди, етишди бахтга ул.

Неча юз минг қушки шу дунёда бор,
Чекдилар олдида бирдек саф-қатор.

- 1675 Булбулу қумри баробар келдилар,
Ҳам баробар нағма чекмоқ бўлдилар.

Қумри, булбул келдилар ҳамроз бўлиб,
Қоридек хуш лаҳжа, хушовоз бўлиб.

Иккиси ун чекди сўнгра ногаҳон,
Гулғула тушди жаҳонга шул замон.

Ул наволарким қулоқда янгради,
Бекарор этдию мадҳуш айлади.

Ким эшиитди нағмани, хуш эрди ул,
Гоҳи ҳушли, гоҳи бехуш эрди ул.

- 1680 Сўнгра Худҳуд сўзни сўзга бойлади,
Парда очди, сирни ошкор айлади.

САККИЗИНЧИ МА҃ОЛА ХУДҲУДНИНГ САВОЛГА ЖАВОБ БЕРГАНИ

Биттаси сўрди: аё соҳиб сабак,
Не сабаб сенга карамлар этди Ҳақ?

Биз-да қушмиз, сен-да қушсен, болу пар,
Ўртада бордир тафовут шунчалар?

Не гуноҳлар кечди биздин, хулласи,
Сенга софи тегди, бизга қуйқаси?

Деди Ҳудҳуд унга: эй қуш, бир кези
Бизга тушмишди Сулаймоннинг кўзи.

1685 Симу зардин етмади сарват менга,
Бир назардин етди бу давлат менга.

Етмагай тоат-ла бунга бир касе,
Тоат этмиш эрди Иблис ҳам басе.

Деса: қўй тоатни, не ҳожат сенга?
Бас, ёғилғай ҳар нафас лаънат анга.

Айла тоат, сен уни тарк этмагил,
Тоатингни лек баланд ҳам тутмагил.

Айлагил тоат-ла умрингни басар,
То Сулаймон сенга ҳам этсин назар.

1690 Бўлса гар манзур Сулаймонга сўзинг,
Не десак,ундан-да афзалсен ўзинг...

ҲИКОЯТ СУЛТОН МАҲМУД ВА БАЛИҚЧИ БОЛА

Шоҳ Маҳмудга етиб амри қазо,
Бўлди бир кун бори лашкардин жудо.

Отини елдирди ҳар ён жаҳд ила,
Кўрдиким, соҳилда эрди бир бола.

Қармоғин дарёга солмишди ҳамон,
Шоҳ салом берди, ўтириди ёнма-ён.

Маъюс эрди ул жужук, маҳзун эди,
Кўзлари ҳасратли, кўнгли хун эди.

1695 Сўрди Маҳмуд: нега ғамгинсен, болам,
Кўзларингда бунчалар дарду алам?

Ул бола дедики, сўрма, эй азиз,
Уйда биз етти гўдакмиз, отасиз.

Онамиз ётгай тўшакда, бедаво,
Камбағал, йўқсил, гадомиз, бенаво.

Мен балиқ тутмоқ бўлиб ҳар кун давом
Ўлтиурмен бунда тонгдин токи шом.

Не азоблар бирла тутгаймен балиқ,
Кечкурун бизга таомдир шу, аниқ.

1700 Шоҳ деди: осон эмас бу ҳар қалай,
Истасанг, мен дўсту ёрдамчинг бўлай.

Рози бўлди ул бола таклифга то,
Шул замон дарёга қармоқ солди шоҳ.

Күллади шоҳ давлати андоқ уни,
Юз балиқ қармоққа тушди шу куни.

Ул бола кўрди, балиқлар эрди чун,
Деди: ҳай, давлатли бўлдим мен бугун.

Не ажаб давлатлидирсен, эй ғулом,
Сен сабаб бўлди балиқлар банди дом.

1705 Шоҳ деди: кам бўлмагайсен, эй жигар,
Ким балиқ тутди бугун, билсанг агар.

Давлатинг юз очди бундоқ, ошно,
Чун сенга ёрдамчи бўлди подшо...

Отга минди сўнгра ул, бўлди савор,
Болакай деди: аё, ҳиссангни ол.

Шоҳ дедики, ол бугун ҳиссамни сан,
Эртага ҳар неки тутсанг, менга тан...

Эртага ҳозир бўлурсен сен менга,
Мен сира ҳиссамни бермам кимсага.

1710 Эртаси меҳри жўшиб огоҳнинг,
Ўртоғи ёдига тушди шоҳнинг.

Йўллади шотирни, олдирди ҳамон,
Тахтга ўтқазди етимни шул замон.

Булфузул дедики, шоҳим бул гадо,
Шоҳ деди: ул менга дўсту ошно.

Ҳар не бўлсин, биз уни этдик қабул,
Сўнг уни бир юртга подшо этди ул...

Бахтиёрдин биттаси сўрди савол:
Қайдин, айт, сегнга етишди бу камол?

- 1715 Деди: шодлик келди, кетди ғам, кадар,
Соҳиби давлат менга солди назар...

БИР ҚОТИЛ ВА ҲАБИБИ АЪЖАМИЙ ҲИКОЯТИ

Кимсани қатл этди подшо бир куни,
Тушда кўрди шул кеча сўфий уни.

Сайр этиб жаннатда, хандон эрди ул,
Гоҳи ҳуррам, гоҳ хиромон эрди ул.

Сўрди сўфий: сен ёвуз қотил эдинг,
Сарнигун эрдинг, иши ботил эдинг.

Қайданам сенга етишди бул мақом?
Этганинг ишларга зиддир бул тамом.

- 1720 Дедиким, қоним оқаркан ул дами,
Ўтди ёнимдин Ҳабиби Аъжамий.

Мен тарафга сал қиёлаб пири роҳ
Ёширин кўз солди, отди бир нигоҳ.

Келди бул бахту саодатлар менга,
Бир назарнинг иззати боис анга.

Кимга тушса соҳиби давлат кўзи,
Неча юз асрор анга юз очгуси.

Етмагунча то эранлардин назар,
Қайда сенга жисму жонингдин хабар?

1725 Якка эрсанг, уйда ўлтиргил басе,
Йўл босиб юргайму танҳо, бекасе.

Пир керак йўлларда, ёлгиз юрмагил,
Кўр бўлиб, дарёга ўзни урмагил.

Пир йўлингда раҳнамо бўлгай сенга,
Ҳар ишингда ул паноҳ бўлгай сенга.

Йўлда не пасту баланд, кўргаймисен?
Бир асокаш бўлмаса, юргаймисен?

Сенда кўз йўқ, йўл эса олис эрур,
Пир сенга йўлда қуловузлик қилур¹.

1730 Улки бор бошида соҳиб давлати,
Чарчамас йўлларда, бўлмас хижлати.

Кимки бир давлат била пайвастадир,
Илкига олса тикан, гулдастадир.

ҲИКОЯТ СУЛТОН МАҲМУД ВА ТИКАНЧИ ЧОЛ

Шоҳ Маҳмуд айлади сайру шикор,
Лашкаридин айрилиб, чекди канор.

Учради бир чол тиканчи, ногаҳон
Эшшаги мункиб, йиқлди юқ ҳамон...

Кўрди шоҳ; эшшак ҳаробу иш тифиз,
Бошни қашлаб чол туради чорасиз.

¹ Куловуз – йўлбошли.

1735 Ёнига борди ва сурди: эй ота,
Ортгани ёрдамлашайми? Деди: ҳа.

Ёрдам этсанг, не келур андин шу он?
Менга – фойда, сенга ҳам эрмас зиён.

Чун очиқ чехрангда күргаймен насаб,
Марҳамат этсанг ғарибга, не ажаб...

Бас, эшиитди сўзни, отдин тушди шох,
Сўнг тиканлар устига энгашди шох.

Йиғдию ортди эшакка ул ҳамон,
Отини сурди кейин лашкар томон.

1740 Деди лашкарга: тиканчи чол келур,
Чун тикан ортиб келур эшакка ул.

Сиз боринг-да, чолни ҳар ёндин тўсинг,
Келтиринг, сўнг рўпарамда ўтқизинг.

Тўсадилар йўлларни, чолни кўрдилар,
Йўлини подшо томонга бурдилар.

Чол деди: шу қилтириқ эшшак билан
Бўйла бир лашкарга бас келгайму мен?

Чолни қўрқув босди, лекин шул замон
Кўзга ташланди йироқдин соябон.

1745 Соябон сори эшакни сурди чол,
Соябон остида шоҳни кўрди чол.

Кўрдиким, шоҳ эрди унга ошно,
Бас, хижолат ичра қолди, чекди оҳ.

Деди: ё Раб, бул нечук ҳолим менинг?
Шоҳ Маҳмуд эрмиш ҳаммолим менинг.

Шоҳ деди: эй мискиним, ҳолинг нечук?
Сўйла бизга энди, аҳволинг нечук?

Чол деди: ҳолим биларсен, ўйнама,
Ўзни чун билмасга солма, қийнама.

1750 Бенаво чолмен, ғарибу дилшикан,
Кеча-кундуз чўлда чопгаймен тикан.

Сўнг сотиб бозорда, олгум нон анга,
Гар қўлингдин келса, бергил нон менга.

Шоҳ деди: айтгил баҳосин, эй ғариб,
Мен сотиб олгум тиконинг зар бериб.

Чол деди: шоҳим, сен арzon истама,
Ўнта ҳамён, де баҳосин, кам дема...¹

Шунда аскарлар дейиши: бўлди, бас,
Бул матоҳинг икки пулга арзимас.

1755 Чол деди: ҳа, арзимас бир пулга ул,
Лек анга бундоқ харидор кам бўлур.

Соҳиби давлат қўл урса, бул тикан
Гул очиб, юз товланиб, бўлгай чаман.

Борлиғи атру уфор бўлгай унинг,
Ҳар бутоғи бир динор бўлгай унинг.

¹ Чол, ўн ҳамён тилла, демоқчи.

Бўлдилар не ранжу озор дуч менга,
Келди то бундоқ харидор дуч менга.

Гар тикандир, нархи кўп арzon эрур,
Шоҳ қўл урса, қиймати чандон эрур.

- 1760 Шоҳ эшитди бул суханни сарбасар,
Ул тиканчи чолга тилло берди, зар.

Жумла лашкар ҳам кўриб бу ҳолни,
Сочдилар бошига танга чолни.

Ўн туман зар берди унга шахриёр,
Бул ҳикоят қолди биздин ёдгор...

ТЎҚҚИЗИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқа бир қуш сўрди: эй пушту паноҳ,
Мен нетай гар бўйла ожизмен, адо?

Куч-мадор йўқ менда юрсам сарсари,
Бўйла йўлда юрмаганмен илгари.

- 1765 Бул йироқ водийда йўл юрмоқ қийин,
Аввалин манзилда ўлмоғим тайин.

Йўлки, ўт пурковчи тоғлар бор талай,
Ҳар киши андин ошолмас ҳар қалай.

Юз туман жонлар чу ажраб бошидин,
Оқди селлар қон ила кўз ёшидин.

Юз туман ақлу заковат қўйди бош,
Кўймаса бошини, бошин ёрди тош.

Ушбу йўлда не эранлар бериё,
Юз яшириди, айлабон шарму ҳаё.

- 1770 Мен бу йўлда ким эмишмен, бир ғубор,
Гар борар бўлсам, ўлармен зор-зор.

ҲУДҲУДНИНГ САВОЛГА ЖАВОБ БЕРГАНИ

Худҳуд айтди: эй асиру сарнигун,
Тобакай кўнглингда бундоқ бир тугун?

Баски қадринг бунда пастдир бул қадар,
Хоҳи ўл, хоҳ ўлма, андин не самар?

Боқки, бул дунё нажосатдир давом,
Халқ уни истаб, адодирлар тамом.

Неча юз минглаб халойик куртдайин
Молу дунё деб ўлурлар тинмайин.

- 1775 Бу нажосат ичра этма ўзни хор,
Ўлганинг афзал бу йўлда зор-зор.

Мену сендин бу талаб эрса, хато,
Фам ила ўлсак магар, бўлгай рано.

Бу жаҳон ичра хато бисёр эрур,
Чун улардин биттаси инкор эрур.

Не эмиш бир яхши ҳажжом бўлганинг?¹
Яхшидир ишқ ичра бадном бўлганинг.

Неча юз минг халқ эрур таррор ҳама²,
Шу разил дунёни деб мурдор ҳама.

¹ Ҳажжом – томирдан қон олувчи, табиб.

² Таррор – ўғри, киссанур

1780 Майли, тут таррорчиликдин ишқни кам,
Сен учун кам эрса, борму менга ғам?

Бўлма таррор, бошқа савдо айлагил,
Ишқ ила кўнгилни дарё айлагил.

Десалар гар бу ғуур эрмиш, ҳавас,
Бўйла манзилким, киши етган эмас.

Бу ҳавас кўйида мен жон бермагум,
Яхшидир уйга, дуконга бермагим...

Бўйла инсонларни кўрдик, тингладик,
Бирнафас бўлсин-да, ўздин кечмадик.

1785 Иш кўпайди бизга халқ бирлан, ниёз,
Бир ҳовуч йўқсил, гадо ул, бенамоз.

Кечмагунча ўздину халқдин, ўлиб,
Жонимиз чиқмас оғиздин пок бўлиб.

Халқ учун ким мурда эрмас эрса, бас,
Мурдадир ул, пардага маҳрам эмас.

Маҳрами бул парда жон огоҳидир,
Халққа зинда кимса марди роҳмидир?

Эр эсанг, қўйгил қадам, мардана юр,
Эрмасанг, хотин бўлиб, бир четда тур.

1790 Бу талаб гар эрса кофирилик ҳама,
Сен бу ишни сарсари деб ўйлама.

Ишқ оғочи мевасиздир, бесамар,
Мева кутганларга айт, кетсин бадар.

Ишқ агар кўнгилни манзил айлагай,
Жонни шу дунёга бедил айлагай.

Эр кишини айлагай ул ғарқи хун,
Бўйлаким афтода этгай, сарнигун.

Бир нафас ҳолингга қўймас, бедаво,
Ўлдирап ул, сўнгра сўргай хунбаҳо.

- 1795 Сув берар бўлса, суви аччик, тахир,
Нон пиширса, қонга қоргайдир хамир.

Гар чумолидек заиф эрсанг-да, ул,
Ёприлиб бошингга чун зўрлик қилур.

Масканинг бўлгай мудом баҳри хатар,
Ютганинг бўлгай нуқул хуни жигар.

ҲИКОЯТ ШАЙХ ХАРАҚОНИЙНИНГ ХУДОДАН НОН СЎРАГАНИ

Шайх Харақоний Нишопурга юриб,
Етди ул манзилга чун чарчаб, ҳориб.

Хирқасига бурканиб, бир четда зор,
Ётди сўнг бир ҳафта ёлғиз, оч-наҳор.

- 1800 Ҳафта сўнггида дедиким, эй Худо,
Шафқат айла, бурда оним бер манго.

Етди овоз унга: бундоқ ётма, тур,
Бор-да, майдони Нишопурни супур.

Бир синиқ олтин топарсен, ол ҳамон,
Нон сотиб олгин ўзингга, эй фалон.

Шайх деди: йўқдир супурги, ғалвири,
Бўлса гар, бўлгайму эрди бул ғамим?

Бенаводирмен, қуруқ жону тана,
Бурда ноним бер, Худойим, қийнама.

1805 Деди хотиф: нон керак жон истасанг,
Бор-да майдонни супур нон истасанг...

Турди шайх, сўнг бир эшикка ул бориб,
Олди ғалвиру супурги ёлбориб.

Жаҳд этиб, майдон супурди, эгди қад,
Ул синиқ олтинни топди оқибат.

Бўлди хурсанд, ўрнига тушди кўнгил,
Борди зуд нонвойгаву нон олди ул.

Лек йўқолмишди супурги ушбу дам,
Йўқ эди ғалвир, синиқ тиллоси ҳам.

1810 Жонига ўт тушди, ёнди ул фақир,
Отди ўзни, оху фарёд солди пир.

Деди: борму мен каби бечора чун,
Энди нетгаймен, пулим йўқ нон учун?

Юрди ҳар ён ўхшаб ул девонага,
Урди ўзни бир бузук, вайронага.

Кўрди ногоҳ, чун киаркан ичкари,
Унда шай эрди супурги, ғалвири.

Шод бўлиб қичқирди: эй қодир Худо,
Нега этдинг менга дунёни қаро?

- 1815 Чун заҳар этдинг нечун нонимни сен?
Ол шу ноним, бер менга жонимни сен...

Хотиф айтди: этмаган эй ўзни хуш,
Тотли бўлгай нонга қўшсанг нонхуруш.

Сен қуруқ нонга ёпишдинг, ўйлагил,
Мен хуруш қўшдим анга, шукр айлагил...

**ҲИКОЯТ
БИР ДЕВОННИНГ ОЛЛОҲДАН ТЎН
СЎРАГАНИ**

Бор эди девона, бир дилхаста жон,
Тан яланғоч, хулқи хуш, ораста жон.

Деди: ё Раб, жубба бер, кийгум ани,
Бошқалардек айлагил хуррам мени.

- 1820 Етди хотифдин овозе, кутма, тур,
Бор ҳамон, иссиқ қуёшимда ўтири...

Деди: ё Раб, мунча бергайсен азоб,
Жубба эрмишми фалакда офтоб?

Деди: бор, сабр айла ўн кун унда чун,
Жубба бергаймен сенга, эй бағри хун...

Ўтди ул ўн кун ародин, ногаҳон
Жанда келтирди бирор, жулдур чопон.

Чун ямоғи мингта, балки мүл эди,
Түнни келтиргувчи ҳам йўқсил эди.

1825 Деди ул девона: эй донои роз,
Жанда тикдингму магарким менга мос?

Ёндими буткул бисотинг, эй Худо,
Менга бундоқ жандани кўрдинг раво?

Тўн тикибсен минг ямоқдин чинданам,
Бул хунарни кимдан ўргандинг, Эгам?..

Иш эмас осон унинг даргоҳида,
Иш бўлур тупроқ эсанг гарроҳида.

Неча бир жонлар анга талпиндилар,
Нору нурга ёндашолмай, ёндила.

1830 Бул эшиқда не умрлар ўтмади,
Чекди ғам, мақсадга аммо етмади...

**ҲИҚОЯТ
РОБИАНИНГ ЕТТИ ЙИЛ ЮРИБ,
МАККАГА БОРГАНИ**

Робиа чун эрди эрлар тожи ул,
Каъба деб йўлларда юрди етти йил.

Чун яқинлашди ҳарамга шодком,
Энди этгаймен, деди, ҳажжи тамом¹.

Каъба сўйига шошилди бекарор,
Лек аёллик узри бўлди ошкор².

¹ Ҳажжи тамом – мукаммал ҳаж.

² Ҳайз кўрди.



Орқага қайтди, деди: эй Зулжалол,
Етти йил чекдим басе ранжу малол.

- 1835 Оқибат етганда бозоримга мен,
Ташладинг қаршимга бундоқ бир тикан.

Ёки қўй хонангга, дилни шод этай,
Ёки қўй, хонамда мен маскан тутай...

Токи ошиқ бўлмасанг чун Робиа,
Ошкор бўлмас замири воқеа.

Токи бул денгизда сузгайсен давом,
Ул қабул тўлқинлари келгай мудом.

Каъбадин гоҳ ортга сургайлар сени,
Дайр аро асрорга бургайлар сени.

- 1840 Ўзни бул гирдобда бардам айлагил,
Хотирингни ҳар нафас жам айлагил.

Мубтало бўлсанг ўшал гирдобга лек,
Бошинг айлангай тегирмон тошидек.

Бўлмагай сенда жамиятдин нишон,
Пашшага ўхшаб қолурсен бегумон...

ҲИКОЯТ БИР АЗИZNИНГ ДЕВОНА БИЛАН СУҲБАТИ

Бор эди бир гўшада девона, хор,
Ёнига келди азизи номдор.

Деди: сенда аҳлият кўрдим аниқ,
Хотиринг жамдир мудом, фикринг йиғиқ.

1845 Деди: қайда хотири жамлик чунон?
Пашша бирлан бургадин йўқдир омон.

Кун бўйи пашша талаб, бергай азоб,
Тунда бурга қақшатиб, бермайди хоб.

Пашша кирмиш эрди Намруд бурнига,
Сўнгра солмишди уқубатлар анга.

Мен магар Намруди давронмен, Ҳабиб
Пашша бирлан бургани этмиш насиб...

ЎНИНЧИ МАҶОЛА БОШҚА БИР ҚУШНИНГ САВОЛ СЎРГАНИ

Бошқаси деди: гуноҳим менга юк,
Бул гуноҳлар бирла боргаймен нечук?

1850 Пашшаким ботмиш гуноҳларга шу тоб,
Йўл босиб, боргайму ҳаргиз Кухи Коф?

Чун гуноҳкор нотавондир йўл аро,
Бас, нетиб топгай у қурби подшо?

ХУДҲУДНИНГ САВОЛГА ЖАВОБ БЕРГАНИ

Айтди: ғофил, бўлма андин ноумид,
Сен мудом лутфу карамдин эт умид.

Бўйла осонликча тарк этсанг сипар,
Иш яна мушкул бўлур, эй бехабар.

Бўлмасайди тавбаси эрнинг қабул,
Ҳақ анга айлармиди неъмат нузул?

1855 Тавба қил этган гуноҳингга ҳамон,
Тавба эшиги очиқдир ҳар замон.

Сидқи дил бирлан қадам кўйсанг анга,
Юз муруватлар чиқар пешвоз сенга.

ҲИКОЯТ БИР ГУНОҲКОРНИНГ ТАВБАСИНИ БУЗГАНИ

Бир киши турлик гуноҳлар айлади,
Тавба қилди, тӯғри йўлни танлади.

Лек яна нафсига юзни бурди ул,
Айнади, шаҳватга ўзни урди ул.

Тавбасин бузди, чу маҳкам тутмади,
Йўлдин озди, не гуноҳлар этмади.

1860 Лек яна дард бирла ўртанди дили,
Кўп хижолат чекди, ортди мушкули.

Измида аввалги бори йўқ эди,
Тавба истарди, қарори йўқ эди.

Кечакундуз кўнгли дард ичра тутош,
Кўзларида дамба-дам қон эрди, ёш.

Йўлларига гар қўнар бўлса ғубор,
Айлар эрди ёши бирлан бегубор.

Бир саҳар хотиф чу овоз айлади,
Мушкулин осон, қишин ёз айлади.

1865 Деди: айтурким Худованди жаҳон,
Тавба этган эрдинг аввал, эй фалон.

Афв этиб, тавбангни этгандим қабул,
Этмагандим йиғлатиб зору малул.

Тавбани буздинг яна, қаҳр этмадим,
Сенга муҳлат бердим, эй беҳимматтим.

Жаннатул ризвонни истарсен бугун,
Бош уриб останамизга сен тағин.

Кел, гуноҳингдин яна ўтгувчи биз,
Сен гуноҳ этгувчисен, кутгувчи биз...

ҲИКОЯТ ТАНГРИНИНГ БУТПАРАСТГА ЖАВОБ БЕРГАНИ

1870 Бир кеча Сидрада ул Рухул амин
Тинглади Ҳақнинг саси, лаббайкасин.

Тангрини кимдир чақирмоқда, деди,
Ким эмиш ул банда, бир билсам эди.

Кам эмас, ҳар ҳолда олий банда ул,
Гар ўликдир нафси, кўнгли зинда ул...

Бир кўрай деб қай тарафга чопмади,
Ахтариб етти фалакни, топмади.

Ерга инди, топмади дарёда ҳам,
Топмади ул тоғда ҳам, сахрома ҳам.

1875 Ҳақ ҳузурига шошилди сўнг шитоб,
Тинглади лаббайка боз, Ҳақдин жавоб.

Чун камоли ғайрати ёнди яна,
Чарх уриб, оламни айланди яна.

Топмади ул бандани, деди: Худо,
Бир кўрай ул кимсани, кўрсат манго.

Ҳақ деди: Рум мулкига чопгил ҳамон,
Дайр ичра ўлтирур, топгил ҳамон.

Борди Румга, кўрди, кофир ошкор
Дайр аро бут олдида йиғларди зор.

- 1880 Жабраил чун бўлди оташдил яна,
Ҳақ ҳузурига шошилди ул яна.

Дедиким, англат менга, эй бениёз,
Парда оч, этгил аён, не эрди роз.

Дайр аро ул бутга этгайдир хитоб,
Лутф этиб, сен унга бергайсен жавоб.

Ҳақ таоло деди: ул кўнгли қаро
Йўл йўқотмиш янгилишиб ғафлат аро.

Янгилишиб, йўлдин адашди ул сақат,
Биз билармиз, йўлни этмасмиз ғалат.

- 1885 Лутф этиб, меҳробга бошлармиз уни,
Лутфимиз истар шу қулнинг узрини...

Ҳақ унинг жонига сўнгра очди йўл,
Ё Худо, ё Раб, демоққа тушди ул.

Билки ул ҳам Ҳақ учун миллат эрур,
Ҳақ иш ҳақдирки, беиллат эрур.

Ҳеч вақойинг бўлмаса даргоҳида,
Чекма ғам, хоку ғубор бўл роҳида.

Бунда ёлғиз зуҳдга эрмас эътибор,
Ҳечнинг ҳам даргоҳи Ҳақда қадри бор.

СҮФИЙ ВА АСАЛЧИ ҲИКОЯТИ

1890 Сўфийе Бағдодда боргайди шитоб,
Ногаҳон унга етишди бир хитоб.

Дерди кимдир: ҳой, асал бор, яхшилар,
Мен уни арzonга бергум, ким олар?

Борди сўфий, сўрди: эй соҳибкарам,
Ҳеч вақоға ҳам уни бергаймусан?

Деди: бор, девона, бўлма булҳавас,
Ҳеч вақоға бир нима бергайму кас?

Деди хотиф шунда: сўфий, кел бери,
Турма ортиқ, бир қадам бос илгари.

1895 Ҳечга биз ҳар нарса бергаймиз сенга,
Истагинг не эрса, бергаймиз сенга.

Раҳмати Ҳақ бўйла порлоқ бир қуёш,
Шафқатин этмиш бутун оламга фош.

Раҳматин кўргилки, бир кофирни деб,
Кўрди ул озорни пайғамбарга эп...

ҲИКОЯТ ТАНГРИНИНГ МУСОГА ТАНБИХ БЕРГАНИ

Ҳақ таоло деди: Қорун зор-зор,
Чорлади, Мусо, сени етмиш бор.

Бермадинг бир карра унга сен жавоб,
Гар менга бир бора этсайди хитоб,

1900 Ширк бутоғин жонидин узгай эдим,
Хилъати иймонни кийгизгай эдим.

Юз азоб бирлан уни этдинг ҳалок,
Бошини тупроққа тиқдинг, бўлди хок.

Сен яратган бўлсанг эрди гар уни,
Айламасдинг мунчалар мустар уни...

Улки бераҳматни ҳам раҳмат этар,
Аҳли раҳматни валинеъмат этар.

Лутфу эҳсон денгизи илҳомчири,
Айбимиз – денгизга томган томчири.

1905 Улки лутф айлар чу бахшойиш ила,
Ўзгарирму айбу олойиш била?

Ким гуноҳкорни гуноҳкор айлагай,
Ўзни жабр этгувчи, жаббор айлагай...

ХИКОЯТ ТАНГРИНИНГ МАРҲАМАТИ

Ўлди бир бузғунчи айлаб қўп гуноҳ,
Элтдилар тобутни шайлаб йўлга то.

Кўрди зоҳид, этди андин эҳтиroz,
Этмагай то бўйла мархумга намоз.

Шул кеча туш кўрди ул, ҳайрон эди,
Муфсид ул жаннат аро сайрон эди¹.

- 1910 Сўрди зоҳид: сўйла менга, эй ғулом,
Етди қайдин сенга бул олий мақом?

Ботмиш эрдинг сен гуноҳларга басе,
Бошдин охир ифтироларга басе.

Не сабаб сенга етишди манзалат?
Бул равому сенга, асрорингни айт.

Деди: сен раҳм этмадинг менга, аё,
Ул сабабдин менга раҳм этди Худо.

Ишқбозлик бўйла ҳикмат айлагай,
Ул этар инкор, бу раҳмат айлагай.

- 1915 Ҳикмати улдирки, тунда бир йўла
Бир гўдакни йўлга соглай шам ила.

Ел юборгай, шамни сўндиргай кейин,
Ул гўдакни ғамга тўлдиригай кейин.

Нега сўндиридинг, дея сўргай ҳисоб,
Унга юз шафқат ила этгай итоб...

¹ Муфсид – бузғунчи.

Гар ҳама бирдек намоз қилгай эди,
Ҳикмати ишқига тенг бўлгай эди.

Ҳикмати битмас сира, бўлмас тамом,
Бўйлаким бўлмишди, чун бўлгай мудом.

1920 Йўлида юз минг ажиб ҳикмат эрур,
Қатраси баҳрул нажот, раҳмат эрур.

Сен учун шул етти осмон, эй ўғил,
Айланур ҳар лаҳза, ҳар он, эй ўғил.

Сен учун кўкда малаклар жонфишон,
Хулду дўзах лутфу қаҳрингдин нишон.

Сажда айлар сенга құдсийлар фақат,
Куллу жузв бори вужудинг ичра ғарқ.

Ўзни кам тутма, назар сол ҳар сари,
Йўқ шу олам ичра сендин афзали.

1925 Жузв жисминг эрса, жонинг кулли кул,
Тутма ожиз ўзни сен, хор этмагил.

Порлади кулл, бўлди жузвинг ошкор,
Етди жонинг, бўлди узвинг ошкор.

Тан жондин, жон эмас жузвдин жудо,
Жон куллдин, кулл эмас узвдин жудо.

Беададдир бўйлаким роҳи Аҳад,
Жузву куллдин сўйламоққа борму ҳад?

Бошинг узра абри раҳматлар етиб,
Ёғдирур найсон сенинг шавқингни деб.

1930 Келса куллнинг юксалиш соатлари,
Сен учундир тўнлари, хилъатлари.

То малоик мунча ғайрат қилдилар,
Сен учун тоат, ибодат қилдилар.

Ул ибодатларни Ҳақ парвардигор
Сенга бахш айлар, сенга этгай нисор...

ҲИКОЯТ МАЛАКЛАР ИБОДАТИ

Деди Аббоса: қиёмат қўпса гар,
Қоплагай дунёни қўрқув сарбасар.

Фофили осийки этмишлар гуноҳ,
Бир нафасда юзлари бўлгай қаро.

1935 Халқи бесармоя ҳайронлик аро,
Ҳар бири айру паришонлик аро.

Шу заминдин токи ул тўққиз фалак
Ичра йиллар тоат этмишди малак.

Ҳақ таолдо олғай ул тоатларин,
Бир ҳовуч тупроқ уза сочгай барин.

Шунда юксалгай малоикдин нидо:
Нега инсон йўлимиз тўсгай, Худо?

Ҳақ таоло дерки, аҳли осмон,
Сизга бундан етмагай суду зиён.

1940 Аҳли хокийларга бул тоат зарур,
Қорни очганларга нон дармон эрур.

ЎН БИРИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси деди: муханнассохтамен¹,
Гоҳи ул шоҳда, гаҳи бул шоҳда мен.

Гоҳи риндмен, гоҳи зоҳид, гоҳи маст,
Бору йўқмен, гоҳ баланду гоҳи паст.

Гоҳи нафсимдин – хароботлар аро,
Гоҳи жонимдин – муножотлар аро,

Гоҳи шайтон йўлдин оздиргай мени,
Гоҳ фаришта измига солгай мени.

- 1945 Икки йўл устида, ҳайрон ичрамен,
Не қилай, чун ҷоҳу зиндан ичрамен?

ҲУДҲУДНИНГ САВОЛГА ЖАВОБ БЕРГАНИ

Деди Ҳудҳудким, аё ҳайрони роҳ,
Бўйладир кўпларга ҳукми подшо.

Бул сифатлар кўп кишида учраюр,
Оз бўлур яхлит сифатли кимса ул.

Ҳар кишининг пок бўлса тийнати,
Анбиёларнинг эди не ҳожати?

Чун ибодатга етишдинг, тут ани,
Аста-аста йўлга солгайдир сени.

- 1950 Эйки ғафлат тандирин тутдинг макон,
Аввал-охир мақсадинг бир бурда нон.

¹ Муханнассохта – хунаса қилиб яратилган.

Не эрур күз ёши, дил асроридир,
Ютса асрорин күнгил, зангоридир¹.

Сенки ит нафсинг этарсен парвариш,
Бўйла бир ишни муханнас айламиш...

ШАЙХ ШИБЛИЙ ҲИКОЯТИ

Шаҳрида Шиблик йўқолди бир куни,
Топмади бир кимса то излаб уни.

Ахтариб чун маъмуру вайронада,
Топдилар охир муханнасхонада.

1955 Беадаблар ичра ўлтирмиш эди,
Кўзда ёш эрди, басе хомуш эди.

Биттаси сўрди: муносибми сенга
Бўйла маскан, сўйла асроринг менга?

Айтдиким, бу ерда ҳозир аҳли нафс,
Эр эмасдирлар ва хотин ҳам эмас.

Дин йўлида мен-да шундоқмен бу дам,
Мард эмасдирмен, vale мардона ҳам.

Ўзни урдим гўшага, бўлдим бадар,
Ор этармен эрлигимдин шунчалар.

1960 Кимки ҳар дам этса бедор ўзни ул,
Тонг эмас, тупроқقا сургай юзни ул.

Эр бўлиб ул ўзни этгай хоксор,
Айлагай афтодаларга эътибор.

¹ Кўнгилни занг босади...

•—————◆—————
Үзни билсанг гар чумолидин баланд,
Бутпаратсен, балки тубан унданам.

Мадху замда гар тақовутдир сенга,
Бутпаратдин не тафовутдир сенга?

Банда эрсанг Ҳаққа, бутгар бўлмагил,
Марди Ҳақ бўлгил-да, Озар бўлмагил¹.

1965 Мардум ичра ким эрурсен, хосу ом,
Бандалиқдин яхшироқ йўқдир мақом.

Бандалик қил, ўзга даъво истама,
Марди Ҳақ бўл, иззату жоҳ истама.

Бут эрур юзлаб шу хирқанг остида,
Сен ҳамон сўфиймисен эл наздида?

Эр кияр эр жомасин ул, сен эмас,
Эй муханнас, ўзни сарсон этма, бас...

ҲИКОЯТ ИККИ ДАРВЕШ МОЖАРОСИ

Икки дарвеш айтишиб, тортишдилар,
Иккиси дорилқазога келдилар.

1970 Тортди қози иккисин ҳам бир томон,
Деди: сўфийлар талашса, бул ёмон.

Елкага таслим либосин солдингиз,
Бу хусуматни қаёқдин олдингиз?

¹ Бутгар – бут ясовчи. Марди ҳақ – бу ерда Иброҳим Халилуллоҳ кўзда тутиляпти, Озар – унинг отаси.

Эрсангиз гар аҳли жанг, аҳли қирон,
Бу кийимларни ечингиз шул замон.

Эрсангиз лекин кийимнинг аҳлидин,
Бу хусуматлар кўнгилнинг жаҳлидин.

Қозимен, сиздек эмасмен нуктадон,
Шу кийимлардин уялдим мен ҳамон.

1975 Хирқани кийманг, уни тарк айлангиз,
Бошингиизга сиз рўмоллар бойлангиз...

Эр эмас, хотин эмассен, хори ишқ,
Қайфданам етсин сенга асрори ишқ?

Не эмиш майдонда жавлонинг сенинг,
Қолмагай бошинг, кетар жонинг сенинг.

Гар эсанг асрори ишқقا мубтало,
Юз ўғирма келса ҳамки юз бало.

Лек уни беҳуда даъво айлама,
Ўзни бу майдонда расво айлама...

ҲИКОЯТ БИР ЙЎҚСИЛНИНГ МИСР ПОДШОСИГА ОШИҚ БЎЛГАНИ

1980 Бор эди шоҳким, Мисрда номдор,
Унга бир бечора ошиқ бўлди, зор.

Этдилар андин хабардор шоҳни,
Ул чақирди ошиқи гумроҳни.

Баски ошиқсен, деди ул шаҳриёр,
Икки ишдин биттасин эт ихтиёр.

Ё бўлурсен шахру юртингдин жудо,
Ё этарсен менга бошингни фидо.

Ё сенинг бошинг кесармиз, ўйлагил,
Ёки қувғин айлагаймиз, сўйлагил.

1985 Марди ишқ эрмас эди ул беқарор,
Шул сабаб қувғинни этди ихтиёр.

Баски ул қувғин бўлишни сайлади,
Бошини кесмоққа шоҳ амр айлади.

Деди ҳожиб: эрди шўрлик бегуноҳ,
Нега ўлдирдинг уни, эй подшо?

Шоҳ дедиким, бизга ул ошиқ эмас,
Чун тарийқи ишқ аро содик эмас.

Бўлса эрди кўнгли ичра ишқи ёр,
Айлар эрди ул ўлишни ихтиёр.

1990 Улки жон жононга бермас ишқ аро,
Лофи ишқ урмоқ анга айбу гуноҳ.

Гар, менинг бошимни кесгил, дерди ул,
Мамлакатни мендин олгай эрди ул.

Хизматин айлар эдим мен қул бўлиб,
Юрга подшо, унга бир йўқсил бўлиб.

Лек фақат даъвойи ишқи бор эди,
Бошини кесмоқ унинг даркор эди.

Кимки ишқим ичра чун шайдо бўлур,
Кечмаса жондин, басе расво бўлур.

- 1995 Сўйладик бу гапни то ҳар бефуруг¹
Урмагай ишқ бобида лофи қуруқ...

ЎН ИККИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси дедики, нафсим – душманим,
Мен нетай, ёв бўлса йўлдошим маним?

Нафс итим амримга асло юрмагай,
Мен нетиб жонимни андин қутқарай?

Бўри бўлди дашт аро ошно менга,
Ошно бўлмас итим асло менга.

Мен боқиб, ҳайратдадирмен, ул кучук
Ўз қадрдонига ташлангай нечук?

ХУДҲУДНИНГ САВОЛГА ЖАВОБ БЕРГАНИ

- 2000 Худҳуд айлаб неча бир фикри савоб,
Юзланиб сўнгра анга берди жавоб.

Дедиким, нафсинг адо этмиш сени,
Булғамиш, тупроққа жо этмиш сени.

Ҳам ғилайдир нафсинг ул, ҳам кўр эрур,
Ит эрур ул, бедаво кофир эрур.

Гар бирорвлар мақтаса ёлғондакам,
Шод бўлур нафсинг ўшал ёлғонданам.

¹ Бефуруг – нурсиз.

Битта ёлғондин семирса шунчалар,
Айт, қачон ул күп пагинг одам бўлар?

2005 Кўз очиб дунёга, беҳосил эдинг,
Норасида бир гўдак, ғофил эдинг.

Келди ёшлиқ, барчага бегоналик,
Демагил ёшлиқ уни, девоналик.

Ёшлигинг ўтгай, қоларсен кексайиб,
Дард ила жонинг хароб, жисминг заиф.

Баски умринг жаҳл ила ўтгай нуқул.
Нафс итинг келгайму ҳеч инсофга ул?

Ғафлат ичра айласанг умринг басар,
Бесамарлик сенга бўлмасму самар?

Кўп эрур бул итга банда, йўқ ками,
Итга қул бўлгайму насли одамий?

2010 Ўртаниб юз минг кўнгиллар ўлди, бас,
Нафс итинг ўлмайди асло, тинчимас...

ГЎРКОВ ҲИКОЯТИ

Сурди гўрков кўп яшаб, умри дароз,
Биттаси дежики, бизга сўйла роз.

Бир умрким гўр қазирсен, эй ҳабиб,
Кўрганинг ер остида недир ажиб?

Дедиким, кўрдим ажиб бир ҳасби ҳол,
Гўр қазирмен баски етмиш йил ҳалол.

- 2015 Нафс итим күргай, vale тек турмагай,
Бир нафас фармони Ҳаққа юрмагай...

ҲИКОЯТ АББОСАНИНГ НАФС ҲАҚИДА АЙТГАНЛАРИ

Бир кеча Аббоса деди: эй фалон,
Тўлса кофирларга бир кун бу жаҳон,

Сўнг эса ул жумла аҳли билфузул.
Қилсалар сидқ, этсалар иймон қабул.

Бу бўлар иш, лек жаҳонга нур каби
Келдилар бир юз йигирма минг набий.

Токи нафс бўлсин мусулмон бир замон,
Гар мусулмон бўлмаса, ўлсин, дебон.

- 2020 Бўлмади бул, кошки эрди бўлса ул,
Бу тафовут билмадим қайдин келур?

Барчамиз шу нафси кофир тутқини,
Парваришлаб, ичда асрармиз уни.

Бўйлаким ул нафси нофармон эмиш,
Ўлдириш нафсни қачон осон эмиш?

Икки йўлдин унга етгайдир мадад,
Маҳв ўлар бўлса, ажабдир беадад.

Дил бу мулк ичра суворийдир муқим,
Нафс ити унга мулозимдир, надим.

- 2025 От сурар бўлса суворий, шул замон
Ов учун ит ҳам юргай ул томон.

Дил гаҳи жонондин олгай ўлжани,
Нафс юлиб кўнгилдин олгайдир ани.

Кимки бу кўпакка арқон бойлагай,
Икки оламда арслон овлагай.

Кимки бу кўпакни этмишдир забун,
Гард, ғубордин тоза бўлмишдир бутун.

Ким бу итнинг бўйнига согай каманд,
Хоки афзалдир бировлар қонидан.

ПОДШО ВА СЎФИЙ ҲИКОЯТИ

2030 Жандапўш сўфий борарди йўл аро,
Ногаҳон унга йўлиқди подшо.

Сўрди шоҳ: ким яхшироқ ул, менму сен?
Сўфий айтди: шунчалар овсармисен?

Жандапўшлар гарчи ўзни мақтамас,
Кимки ўзни мақтагай, огоҳ эмас.

Лекин айтай: қайда мендек биттаси,
Қайда сендек кимсанинг минг биттаси?

Завқи дин жонингда борму, ул қани?
Нафс ити эшшак қилиб минмиш сени.

2035 Залварин устингга ортмиш, эй амир,
Сен унинг остида тутқинсен, асир.

Ул сенга урмиш жиловни, қай тараф
Бурса бошингни, борарсен йўрғалаб.

Не буюрса сенга ул, эй нотавон,
Амрига ҳозиру нозирсен ҳамон.

Мен эсам чун сирри динни англадим,
Миндим ўз нафсимни, эшшак айладим.

Нафсим эшшақдир менга, дастимдадир,
Улки устингда, менинг остимдадир.

2040 Эшшагим минмиш сени, бўлмиш савор,
Баски сендин яхшироқмен юз ҳазор...

Эйки нафсинг жилва айлаб, хуш сенга,
Шаҳватингдин ургай ул оташ сенга.

Баски оташ урди сенга шаҳватинг,
Кетди дилдан нур, танингдан қувватинг.

Кўз хира тортиб, қулоқнинг карлиги,
Нотавонлик, ақлу хуш овсарлиги,

Неча юзлаб хасталик – лашкар магар,
Сўнг уларнинг ортидин Мири Ажал...

2045 Кечакундуз ёприлиб лашкар келур,
Сўнг бошингга ул Амирлашкар келур.

Бас, ўраб олгач улар тегрангни, ҳай,
Сен туриб, нафсинг-да йўлга юрмагай.

Хуш-хуш кечди замонинг нафс ила,
Сурди айшин умри жонинг нафс ила.

Ишратида пойбаст бўлдинг мудом,
Кудрати олдида паст бўлдинг мудом.

Шоху лашкардин қанотинг қайрилур,
Сен нафсдин, нафс сендин айрилур.

- 2050 Айру тушгай сендин ул нафси бало,
Чун бўлурсиз айрилиққа мубтало.

Ғам ема, турмас у сендин нарида,
Бирга бўлгайсиз жаҳнам қаърида...

ОВЧИ ВА ТУЛКИЛАР ҲИКОЯТИ

Икки тулки учрашиб, эш бўлдилар,
Иккиси айшу фароғат қилдилар.

Эш бўлиб, шод эрдилар сайдар айлабон,
Айшу ишратлар бузилди ногаҳон.

Овга чиқди дашт аро бир подшо,
Тулкиларни этди бир-биридин жудо.

- 2055 Эркагидин сўрди урғочи шу пайт:
Энди қайда учрашармиз, менга айт?

Элтсалар, деди, шаҳарга гар сени,
Изла пўстиндўз дўконидин мени...

◆ ◆ ◆

ЎН УЧИНЧИ МАҶОЛА БОШҚА БИР ҚУШНИНГ САВОЛ СҮРГАНИ

Бошқаси дедики, Иблис ул ғуур -
Айлабон, доим мени йўлдин уур.

Менда куч-қувват қани урмоққа дам,
Хийласидин кўнглим ичра дарду ғам.

Қайси бир ёқдин нажот етгай менга?
Қайси бир майдин ҳаёт етгай менга?

ҲУДҲУДНИНГ САВОЛГА ЖАВОБ БЕРГАНИ

2060 Деди Ҳудҳуд: нафс итинг-ла сен иноқ,
Тирқираб Иблис-да қочгайдир йироқ.

Ишва айлар жонга маҳрам иблис ул,
Хилма-хил орзуларинг ҳам иблис ул.

Битта орзуга етар бўлсанг, тамом,
Бош қўтаргай сенда юз иблис ҳамон.

Гулхани дунё чу зиндандир ҳама,
Сарбасар ул мулки шайтондир ҳама.

Чўзма қўл мулкига асло, эй киши,
Бўлмагай сен бирла шайтоннинг иши...

ҲИКОЯТ БИР ҒОФИЛНИНГ ИБЛИСДАН ШИКОЯТИ

2065 Бир куни сўфийга ғофил бир касе
Этди Иблиздин шикоятлар басе.

Деди: Иболис йўлдин оздиргай мени,
Айлади динимни форат ул дани.

Деди сўфий: эй жовонмарди азиз,
Сен олдин келмиш эрди ул Билис.

Эрди зулмингдин ҳамом озурда ул,
Бошига тупроқ сочар эрди нуқул.

Дедиким, дунё эрур мулким маним,
Душмани дунё бўйлолмас одамим.

2070 Сен анга айтгилки, йўлда ўзмасин,
Ул менинг мулкимга қўлни чўзмасин.

Мен унинг динига ўт қўйдим туташ,
Чунки дунёйимни деб айлар саваш.

Торт, қўлинг мулкимга чўзма, эй киши,
Бўлмагай сенга бировнинг бир иши.

Кимки форигдир шу дунёдин тамом,
Унга парво айламасмен, вассалом.

◆ ◆ ◆

ҲИКОЯТ БИР КИШИ МОЛИКИ ДИНОРДАН, ҲОЛИНГ НЕЧУК, ДЕБ СҮРГАНИ

Биттаси сўрди Динордин: мен нечук
Ҳолдамен, билмасмен, аммо сен нечук?

- 2075 Ҳар куни ерман магар нони Худо,
Сўнг этармен амри Шайтонни адо...

Молики Динор деди: эй некмард,
Сайд этур шайтон башарни беадад.

Йўлдин урмиш ул сени, сен бениёз,
Бас, мусулмонликда номинг бор, холос.

Ҳирси дунёга гирифтурсен мудом,
Бошинга тупроқки, мурдорсен мудом.

Кўп дедим: дунёни қўй, ирғит уни,
Энди дерман: қўйма, маҳкам тут уни.

- 2080 Бор бисотинг олди ул шайтони зол,
Илкидин энди қутулмоғинг маҳол.

Ғарқ бўлибсен ҳирси дунёга бутун,
Бехабардирсен шу ҳолингдин бугун.

Икки олам бурканиб мотам аро,
Ёш тўкарлар... сенда бул айбу гуноҳ.

Ҳирси дунё этди иймонингни кул,
Орзу-истак айлади жонингни кул...

ҲАЗРАТИ ИСО ВА ШАЙТОН ҲИКОЯТИ

Бир куни Исо Масих ётмиш эди,
Фишт қўйиб бош остига, қотмиш эди.

- 2085 Уйғониб кўз очди, кўрди қошида,
Лаънати Иблис турарди бошида.

Сўрдиким, келдинг не ишнинг қасдига?
Бош қўйибсен, деди, ғиштим устига.

Жумла дунё бедаҳл мулким турур,
Шу синиқ ғишт ҳам менинг молим эрур.

Баски, молимни тасарруф айладинг,
Тонг эмас, менга ўзингни бойладинг...

Олди ул ғиштни Исо, ирғитди, бас,
Ерга бош қўйди этиб уйқуни қасд.

- 2090 Деди Исога у Шайтони разил:
Мен кетармен, энди роҳат ухлагил...

Эйки оламда чўзилган неча бор,
Тобланиб, ипдек узилган неча бор,

Баски бир кун тарк этарсен барчасин,
Мунча тутдинг сен жаҳоннинг риштасин?

Баски қўйгайлар сенинг қабрингга ғишт,
Мунча тикларсен ҳамон ғишт узра ғишт?

Баски етгай молу мулкингга завол,
Мунча тўпларсен жаҳонда мулку мол?

2095 Истагинг ул Қорун ўлмоқму, аё,
Йикқанинг бўлғай қаро тупроққа жо.

Анбиёким баски хизмат этдилар,
Сен уларнинг пандига этгил амал.

Бул жаҳон ҳирсу тамаҳдир бешу кам,
Қолди Фиръавндан ул, Намрудданам.

Гоҳи Қорундирки, қусгай, ямлагай,
Гоҳи Шаддоддирки, шиддат айлагай.

Лош демиши Оллоҳ¹, назар сол номига,
Сен эсанг жонингни тутдинг домига.

2100 Тортасен токай бу дунё ранжини,
Токи лош бўлгунчами дерсан уни?

Кеча-кундуз сен анга ҳайрону масти,
Лошидин бир зарра айларсен ҳавас.

Кимки шул бир зарра лош деб хам бўлур,
Бул қачон бўлғайки ул одам бўлур?

Ким ёпишгай унга бир зум, бас, тамом,
Ул ўшал лошдан-да тубандир, ҳаром.

Кори дунё не, у бекорлик ҳама¹,
Дема бекорлик, гирифторлик ҳама.

2105 Не эмишг дунё, оловдир, оташ ул,
Ҳар замон бир айру халқни ёндирур.

¹ Бу ерда бекорлик – беҳудалик, зое, фойдасиз маъносида.

Бул олов шиддат била ёнган замон,
Шери мардсен, бир тараф қочсанг ҳамон.

Шер каби қочгил оловдин, юм қўзинг,
Ёки бор, парвона янглиғ ёқ ўзинг.

Кимки чун парвонадир, оташпаст,
Кул бўлур оташда ул мағруру масти.

Бас, оловдир олду ортингда чунон,
Ҳар нафас ёнмоқлигинг бўлгай аён.

- 2110 Бул сенинг жойинг эмасдир, четга ўт,
Ёқмасин то даҳр аро жонингни ўт...

**ҲИКОЯТ
БИР БАДАВЛАТ КИМСАГА
ДЕВОНАНИНГ ДЕГАНИ**

Бир хўжа раҳмат сўраб вақти намоз,
Омадим бергил, деди, эй Чорасоз...

Етди сўз девонага, деди ҳамон:
Ҳай, хўжам, раҳматга етмоғинг гумон.

Ноз-фириқинг шу жаҳонга сиғмаюр,
Ҳар қадам қуйсанг, ёғар кибру ғуур.

Кўкка бош урган уйинг бор, силсила,
Тўртта девори мунаққаш зар ила.

- 2115 Хизматингда ўн канизак, ўн қулинг,
Омаду раҳматга бунда не ўрин?

Оч кўзингни, сол ўзингга бир назар,
Тангридин раҳмат тилайдирсен, уял.

Кечса мендек бурда нон бирлан кунинг
Жоиз эрди унда раҳмат сўрмофинг.

Молу мулкдин кеч, уларга бурма юз,
Кутганинг йўқса ўғирмас сенга юз.

Барчасидин сен халос бўл бир йўла,
Эр бўлиб сўнг Тангридин раҳмат тила...

БИР МУНОФИҚ ҲАҚИДА ҲИКОЯТ

2120 Жон бераркан бир мунофиқ, ҳийлагар,
Юзини қибла томонга бурдилар.

Ҳолбуки ул бундан аввал бардавом
Жоиз эрди қиблага боқса тамом.

Қуп-қуруқ шохни эгарсен ерга чун,
Юзни энди қиблага бурмоқ нечун?

Жон берарда юзни қанча бурма, ҳай,
Баски нопок эрди ул, пок бўлмагай...

ЎН ТЎРТИНЧИ МАҶОЛА БОШҚА БИР ҚУШНИНГ САВОЛ СЎРГАНИ

Бошқаси дедики, мен олтинга дўст,
Зар агар мағз эрса, жисмим анга пўст.

2125 Бўлмаса илкимда зар, давронлигим,
Бўлмагай гулдек гули хандонлигим.

Ишқи дунё чун адо этмиш мени,
Маънидин узмиш, жудо этмиш мени...

ХУДҲУДНИНГ САВОЛГА ЖАВОБ БЕРГАНИ

Дедиким, ҳой, ўзни ҳайрон айлаган,
Чун сафойи дилни пайхон айлаган.

Кеча-кундуз баски кўрликдир ишинг,
Бир чумолидек эмишдир турмушинг.

Марди маъни бўлмагай сувратга ўч,
Не эмиш маъни – асл, суврат – ҳеч.

- 2130 Зар бўёқли тош эрур суврат аро,
Сен гўдак янглиғ бўёққа мубтало.

Зар сени Ҳақдин айирса, бўлма мот,
Бут эрурким, сен уни тупроққа от.

Бул муносиброк эрур зар харжига,
Кулф ясаб, осгил хачирнинг фаржига.

На бирровга келгуси андин нажот,
На ўзингга келгуси андин мурод.

Зарра зар йўқсилга берсанг, оч кўзинг,
Гоҳи ул қонлар ютар, гоҳ сен ўзинг.

- 2135 Бермагайсен Амру Зайдга эътибор,
Гар Жунайддир ул, тариқча қадри бор.

Зарни деб халқ бирла дўстдирсан басе,
Манглайнингда муҳри бордир, тамғаси.

Сен оширгайсен дўконинг қийматин,
Тўхтамай, ҳар ой тўларсен ужратин[®].

Гар дўконингда камайса бир пулинг,
Ўт тушар жонингга, ғамдир ҳосилинг.

Эйки сен борингни бердинг нарсага,
Тобакай кўнгилни бергунг нарсага?

2140 Бошинг узра дор тикилмишdir ҳамон,
Бир куни арқонни тортгайдир замон.

Фарқи дунёсенки, дининг белгисиз,
Дин билан дунё келишмас, эй азиз.

Роҳат истарсен чу машғуллик била,
Лек ширин жонингда қўркув, ғулғула.

Мол бериб, йўқсил, фақирни сийлагил,
Ҳақ буюрмиш, хайру эҳсон айлагил.

Ҳар не боринг эрса, тарқатмоқ керак,
Бас, бу йўлда жонни ҳам бермоқ керак.

2145 Жонни бермай, молни бермоғинг қийин,
Жонни бергил, молни бергайсен кейин.

Гар палосу кўрпа-ёстиқ қолса ҳам,
Кўймагай, тўсгай йўлингни дамба-дам.

Бор, палосинг ўтга от, эй ҳақшунос,
Тобакай Ҳақ дерсану дерсан палос.

Ёқ палосни, йўқса билгил бешу кам
Эртага пойингга солмаслар гилам.

Шу жаҳонда не бисотинг бор ҳамон,
Ҳар бири жонингга ханжар бегумон.

- 2150 Кимки дунёву бисот дер,вой анга,
Сарбасар қайғу алам, эвой анга.

Вов, алиф – бу икки ҳарфdir, эй ғулом,
Қону тупроққа қоришмишлар мудом.

Вов мудом қон ичра топмишdir қарор,
Бас, алиф ҳам ҳар замон хун ичра хор...

ҲИКОЯТ БИР ДАРВЕШ ТАНГАСИНИ ЯШИРГАНИ

Бор эди янги муридда танга пул,
Айтмади, шайхдин яширди пулни ул.

Шайх буни сезди, васе сўз очмади,
Лек мурид ҳам муддаодин кечмади.

- 2155 Йўлда йўлдош эрди ул, пирроҳбар,
Йўл босиб олис, сафарда эрдилар.

Етдилар водийга, эрди тимқаро,
Икки йўл юз очди ул водий аро.

Кўрди чун йўлларни дарвеш, кўрқди ул,
Боқ, нечук одамни пул расво қилур...

Сўрди шайхдин: икки йўл эрмиш бу дам,
Қай бирига энди қўйгаймиз қадам?

Шайх деди: ҳар йўлга юрма, ул хато,
Юр қўнгил тортган йўлингга, ул раво...

2160 Кимки зар йиғмоққа айлар иштиёқ,
Деву шайтон ҳам қочур андин йироқ.

Бир зиғирча манфаат деб ул ҳаром
Хийла айлар, қилни қирқ ёргай мудом.

Юр диёнатга, десанг, юрмайды, бас,
Үйлаким, оқсоқ эшакдир, бошқамас.

Бедиёнатликда чун шайтон эрур,
Макру ҳийла бобида султон эрур.

Кимни зар мафтун этар, гумроҳ ўшал,
Юз тубан тушгай, асири чоҳ ўшал.

2165 Сен Юсуфдирсен, ҳазир бўл ҳар замон,
Чоҳ чуқур, андин қутилмоғинг гумон...

ҲИКОЯТ РОБИАНИНГ ИП ЙИГИРИБ СОТГАНИ

Басра шайҳи бир нима сургум, дея,
Борди сўфийга, деди: эй Робиа!

Кимсага айтар сўзинг йўқми магар?
Ё эшитдингми бирорвдин бир хабар?

Жондин ортиқ бир сўзинг йўқми сенинг?
Айт уни, чун иштиёқим бор менинг.

Робиа дедики, эй шайхи замон,
Икки тўпча ип йигирмишдим, ҳамон

2170 Элтдиму бозорга, сотдим мен уни,
Икки танга қўлга кирди шул қуни.

Тангаларни олдим икки қўл била,
Биттасин ўнгу бирисин сўл била.

Чунки қўрқдим, тангалар бирлашса ул,
Сўнг қўлимдин чиқмоғи мушкул эрур...

Кл сабабдинким Расули беғубор
Дин учун этди фақирлик ихтиёр.

Кимки дунё дер, аламга тўлгуси,
Йўлида юз минг тузоқлар бўлгуси.

2175 Гар зифирча зар анга етса ҳаром,
Ул ҳаром деб жонни бергай, вассалом.

Ворисига бўлса ҳамки ул ҳалол,
Юзқаро бўлгай ўзи, топгай завол.

Эйки зарга мунча кўнгил бойлаган,
Зар учун жонин ёқиб, шам айлаган,

Гар қадам қўйсанг бу йўлга, бил шуни,
Қил учун ёқангдин олгайлар сени.

Бўйлаким қил сиғмаса бу йўлга гар,
Бас, нетиб сиғгай хазина, симу зар?

2180 Этсалар қилча гуноҳга эътибор,
Ул тараф бормоққа кимнинг ҳадди бор?..

❖ ❖ ❖

ҲИКОЯТ БИР ЗОҲИД ҚУШ ОВОЗИГА МАҲЛИЁ БЎЛГАНИ

Бор эди зоҳид, саодатлиғ эди,
Тўрт юз йилким ибодатлиғ эди.

Халқдин айру бир макон тутмиш эди,
Суҳбати Оллоҳга ҳам етмиш эди.

Хамдами Ҳақ эрди, унга бас эди,
Ҳақдин ўзга кимсани билмас эди.

Бор эди боғда дарахти арғувон,
Унда қуш қурмишди мўъжаз ошиён.

- 2185 Кушки, хушилҳону хушваз эди,
Ҳар овози ичра юз бир роз эди.

Тинглади зоҳид, чу ҳамроҳ бўлди ул,
Кушга бир дам дўсту дамсоз бўлди ул.

Шул замон Ҳақдин етишди бир садо,
Ул ваҳий эрди, дедиким, зоҳидо.

Шунча йиллар менга тоат айладинг,
Кеча-кундузлар ибодат айладинг.

Иштиёқим ичра кўрмишдим сени,
Оқибат бир қушга сотдингми мени?

- 2190 Не ажаб парвозли қушдинг, хушсифат,
Бўйлаким чўнқирга тушдинг оқибат.

Мен сени сийлаб чу этдим аҳли роз,
Сен эса сотдинг мени, эй ҳақшунос.

Үтга отдинг улфату ёрликни сен,
Кимдин ўргандинг вафодорликни сен?

Бўйлаким арzonфурушлик этма то,
Ҳамдамингмен, бўлма ҳамдамдин жудо...

ЎН БЕШИНЧИ МАҚОЛА БОШҚА БИР ҚУШНИНГ САВОЛ СЎРГАНИ

Бошқаси деди: дилим оташ эрур,
Турмушим, тутган маконим хуш эрур.

2195 Унда қасрим зарнигору дилкушо,
Халқ боқиб, ҳайратдадирлар доимо.

Ҳар сафар боқсам, севинчdir ҳосилим,
Бас, нетиб мен андин узгаймен дилим?

Подшоҳ қушманки, жойим чун баланд,
Ўзни соглаймен нечун меҳнатга мен?

Давлатимни елга бергайманми бот?
Бул қасрсиз қайда топгаймен ҳаёт?

Ким қўйиб чун равзайи боғи Эрам,
Танлагай дўзах аро доғи алам?

ХУДҲУДНИНГ САВОЛГА ЖАВОБ БЕРГАНИ

2200 Деди: эй дунҳиммату номард, сукут,
Ит эмасдирсен, vale тегрангда ўт.

Бас, ёнур дунёйи дун гулхан бўлиб,
Тобакай қасринг турар гулшан бўлиб?

Қасринг ул гар равзаи ризвон эрур,
Гар ажал етса сенга, зиндан эрур.

Гар ўлимдин етмасайди оқибат,
Унда ўлтирсанг бўлурди то абад.

ҲИКОЯТ БИР СЎФИЙНИНГ ПОДШОГА АЙТГАНЛАРИ

Шахриёр этди саройин зарнигор,
Сарфлади дирҳам басе, сочди динор.

2205 Тиклабон қасри биҳиштосо тамом,
Берди сўнгра зебу зийнатдин низом.

Ҳар диёрдин ким гузор этгай эди,
Шоҳга инъомин нисор этгай эди...

Шоҳ бир кун давра тузди муҳташам,
Бўлдилар аъёну ашроф унда жам.

Шоҳ деди: курдик иморат бўйлаким,
Сиз боқинг, бир айбу нуқсон бормикин?

Дедилар ҳар кимса: олам ичра, ҳай,
Бўлмамиш бундоқ иморат, бўлмагай.



- 2210 Турди зоҳид, деди: қойил ҳар киши,
Лек бинонинг айби бор, бир тирқиши.

Бўлмасайди бўйла нуқсони агар,
Боғи фирдавсдин олурди тухфалар.
Шоҳ дедиким, кўрмадим тирқиши мен,
Бас, нечук кўрдинг ўшал тирқиши сен?

Деди: шоҳим, битта тирқиш бор, тешик,
Ул тешикдин очгай Азроил эшик.

Ул тешикни сен бекит, эй некбахт,
Йўқса, на қасринг қолур, на тожу тахт.

- 2215 Гарчи қасринг дилрабодир чун биҳишт,
Лек ажал андин ташир қабрингга ғишт.

Боқий эрмас қурганинг, ўтгай басе,
Билмадим, борму бунинг бир чораси?

Бўлма мағрур бул гўзал қасрингга, шоҳ,
Этма саркашлиқ била кибру ҳаво.

Бир билимдон кимса айлаб рой сенга,
Сўйласа айбингни бундок,вой сенга...

ҲИКОЯТ БИР САВДОГАРНИНГ ИМОРАТ ҚУРГАНИ

Бор эди тожир, иморат айлади,
Симу зар чекди, аломат айлади.

- 2220 Масканим кўрсин халойик, дерди ул,
Шул сабаб базму зиёфат берди ул.

Халқни даъват этди лутфу ноз ила,
Сийласинлар то уни эъзоз ила.

Чун югурди, елди ул даъват куни,
Йўлда бир девона учратди уни.
Деди: истармен саройингга бориб,
Даврада тотсам таоминг ўлтириб.

Бандмен, хурсанд этолмасмен сени,
Бошқаларни чорла, маъзур тут мени...

ПАШША ВА ЎРГИМЧАК ҲИКОЯТИ

2225 Неча ўргимчакни кўрдинг, бекарор,
Ўй-хаёл ичра кечиргай рўзгор.

Ул хаёл айлаб, узоқни ўйлагай,
Ин қуриб, бурчакда ўзни шайлагай.

Тўр тўқиб, қўйгай тузоқ ул, бўйла ин,
Токи бир кун пашша тушгай ё чивин.

Домига гар пашша тушса бир куни,
Қонини сўргай ҳамон, қўймас уни.

Чун қуритгай, дардига эм айлагай,
Неча муддат ўзига ем айлагай.

2230 Лек келур уй соҳиби ҳам бир замон,
Тўр-тузоқларни супургай беомон.

Тўру ўргимчак, унинг-ла пашша, бас,
Бир йўла барҳам топурлар шу нафас.

Ушбу дунё, аҳли дунё бесабр,
Тўру ўргимчак ва тутқун пашшадир.

Жумла дунё гар мусалламдир сенга,
Кўз очиб юмгунча барҳамдир анга.

Сен шу подшолик-ла мағурсен, ажаб,
Парда ўйнарсен гўдакдек, тортқилаб.

- 2235 Оқил эрсанг, орзу этма тожу тахт,
Чун хўқизларга берилгай салтанат.

Кимда байроғу довул, дарвеш эмас,
Топгани елдир, довулнинг бонги, бас.

Елда байроқ, бонгда гумм-гум, шақ-шақа,
Ел билан бонгнинг баҳоси бир чақа.

Эй чўлоқ отлиқ хўжам, кибр айлама,
Баски этдинг, мунча ҳам кибр айлама.

Шилдилар қоплонни, кўрдинг бешу кам,
Бўйла шилгайлар сенинг нафсингни ҳам.

- 2240 Бўлмаса васлу висол имкони ул,
Ё ииқилмоқ, ё йўқолмоқ яхшидир.

Бошни тик тутмоқ иложи йўқса гар,
Бошни қўйгил сен, ўйиндин не самар?

Ё эгиб бошингни, сарварликни қўй,
Ёки бош ўйнашни, қайсарликни қўй.

Эй саройи гулшанинг зиндан сенга,
Хонумонинг бир балойи жон сенга.

Кеч жаҳондин, бул жаҳони пурғуур,
Неча согайсен анга ғавғою шўр?

2245 Оч ўшал ҳиммат кўзингни, йўлга боқ,
Бос қадамни йўлгаву манзилга боқ.

Етсанг ул даргоҳи жонга ул замон,
Сифмагайсен шул жаҳонга бегумон...

БИР АВОМ ВА ДАРВЕШ ҲИКОЯТИ

Бир авом елгайди сарфлаб бори куч,
Чўлда ногоҳ келди ул дарвешга дуч.

Сўрди: эй дарвеш, нечук ҳолинг сенинг?
Деди: қайдин бўйла аҳволинг сенинг?

Бўйла бир танглиқдадирмен бул замон,
Кўзларимга тангу тордир шу жаҳон.

2250 Ул авом дедики, чин эрмас сўзинг,
Кенг биёбондир бу, кўрмасму кўзинг?

Деди дарвеш: бўлмасайди тор жаҳон,
Менга қайдин дуч келардинг, эй фалон...

Сенга юзлаб ваъда бергайлар, хуш ул,
Аслини сўрсанг, нишони оташ ул.

Ул нечук ўтдир, у-дунёйи гузар,
Шер каби қоч ул оловдин, эт ҳазар.

Чун ҳазар этсанг, дилинг хуш бўлгуси,
Хуш дилингдин манзилинг хуш бўлгуси.

2255 Оташ ул ўнгингда ҳозир, йўл – азоб,
Тан заифу дил асиру жон хароб.

Барчасидин кеч-да, фориғ, айру бўл,
Арзимас бир лаҳза парвойингга ул.

Гар басе кўрдинг жаҳонни, жонфишон,
Қолмагай сендин вале ному нишон.

Ҳар неча кўрдинг, бари эрди абас,
Бундан олдин неча айтдик, энди бас...

ҲИКОЯТ ЎҒЛИ ЎЛГАН КИМСАГА ОШИҚНИНГ АЙТГАНЛАРИ

Бир кишининг ўлди фарзанди, алам –
Доғида ул чекди фарёд дамба-дам.

2260 Тобути ортига тушди, бўзлади,
Ёш тўкиб, дарди дилини сўзлади:

Эй болам, келдинг жаҳонга, турмадинг,
Бемурод кетдинг, жаҳонни кўрмадинг...

Тинглади бедил бу сўзни, деди: ҳай,
Қанча термулма, тикан гул бўлмагай.

Шу жаҳонни орқалаб гар кетса ким,
Оқибат дерки, жаҳонни кўрмадим.

Тобакай наззорайи олам сенга?
Битди муҳлат, не керак малҳам сенга?

2265 Токи йўлдошинг эрур нафси хасис,
Боқ, нажосат ичрадир жони азиз...

ИНСОН УМРИНИНГ АЗИЗЛИГИ ҲАҚИДА ҲИКОЯТ

Уд ёқар эрди бирор гулханда, бас,
Бошқаси ҳидларди оҳлаб ҳар нафас.

Бир азиз деди: ёқарсен мунча уд?
Удгамас, қўймоқдасен умрингга ўт.

Ҳар нафасни бил ғанимат эрта-кеч,
Андин ортиқ борму шу оламда ҳеч?

Ҳар дамингга айла айру эътибор,
Ҳаққа етгайсен, бўлиб давлатга ёр...

ЎН ОЛТИНЧИ МАҶОЛА БОШҚА БИР ҚУШНИНГ САВОЛ СҮРГАНИ

2270 Бошқаси деди: эшит, эй сарбаланд,
Ишқи дилдор айламиш кўнглимни банд.

Келди ишқ, чун жабру бедод айлади,
Олди ул ақлимни, барбод айлади.

Юзлари орзусидин – жонимга ўт,
Тушди сўнгра бори хирмонимга ўт.

Бир нафас айру туролмам васлидин,
Айрилиқ дардига сабр этгайму мен?

Бошим айланмиш, яна елкамда юк,
Юк билан мен йўлга тушгаймен нечук?

2275 Водийи заҳмат аро юрмоқ керак,
Юз балою юз жафо кўрмоқ керак.

Мен нечук ой юзли ёрдин айрилиб,
Ул йироқ йүлларда юргум ох уриб.

Дардга дармон бирла битмас ташвишим,
Куфру иймондин ошибдир бул ишим.

Куфрим, иймоним-да оташ ишқидир,
Жисмаро жоним-да оташ ишқидир.

Йўқ бу андуҳ ичра бир ёнимда кас,
Ғам ила андуҳ менинг ёнимда, бас.

- 2280 Ишқи тупроқларга қормишдир мени,
Зулфи элдин ҳам айирмишдир мени.

Айру тушдим сабру тоқат боридин,
Айру тушмам бир нафас дийдоридин.

Этди бундоқ ишқи золим, мен нетай?
Бўйладир ишқ ичра ҳолим, мен нетай?

ХУДҲУДНИНГ САВОЛГА ЖАВОБ БЕРГАНИ

Деди: эй сувратга толмишсен тамом,
Ғам, кудурат ичра қолмишсен тамом.

Ишқи суврат бу, на ишқи маърифат,
Ул келур шаҳватдин, эй ҳайвонсифат.

- 2285 Ҳар ҳуснким, ҳусни нафсоний эрур,
Келса андин ишқ агар, фоний эрур.

Ҳар ҳуснким, оқибат топгай завол,
Унга ошиқлик куфр бўлгай, вубол.

Хилту хундан суврат ул орастадир,
Номи тўлган ой, маҳи нокастадир.

Суврат ичра гар камайса хилту хун,
Тасқара тортгай у суврат, ул ҳусн.

Ул ҳуснким, қону ахлатдин келур,
Сен билурсен, бир кун охир не бўлур...

- 2290 Мунчалар сувратга учсен, мубтало,
Бас, келур бошингга андин юз бало.

Ким демиш нуқсону айбдин излагил?
Сен ҳуснин ҳусни ғайбдин излагил.

Гар кўтарса пардани Парвардигор,
На диёр қолгай ва на аҳли диёр.

Маҳв ўлур шул суврати оғоқ кулл,
Жумла юксаклар чўкиб, тубан бўлур.

Бўлма сувратларга дўст, эй бехабар,
Бир-бири бирлан ғанимдирлар улар.

- 2295 Олами ғайб бирла дўст бўлгил, иноқ,
Бўйла дўстлик айбу нуқсондин йироқ.

Бошқаларни дўсту ёр тутса касе,
Айлагай афсус, надоматлар басе...

ҲИКОЯТ УСТОЗИННИГ КАНИЗАГИГА ОШИҚ БҮЛГАН ТАЛАБА

Бир йигит бор эрди, ғоят кордон,
Оқилю зийрак эди, бисёрдон.

Фикру зикри таълиму таҳсил эди,
Унга ҳар йил икки тун таътил эди.

Халқи олам бирла йўқ эрди иши,
Таълим эрди ташвиши ёзу қиши.

2300 Мақбули устоз эди ул, қобиле,
Толиби илм эрди, андоқ нодире.

Ўзга шогирдлардин ул афзал эди,
Унга устози ширин сўзлар эди.

Бор эди устоз уйида бир гўзал,
Бир канизак, ўйлаким шамсу қамар.

Кўзлари шаҳлову жонпарвар эди,
Хурлиқо эрди, кумуш пайкар эди.

Суврати бошдин-оёқ такмили рух,
Лутф эди лутф ичра, файз ичра футух.

2305 Эрди ширинликда шаккардин лазиз,
Нозу истиғнода гулдин ҳам нафис.

Ерга тушмиш эрди сумбул соchlари,
Қўш камон эрди эгилган қошлари.

Лаълидин шаккар ёғарди ҳар нафас,
Тўтилар айларди орзую ҳавас.

Ўқ отарди киприги, ўқ ҳар маҳал,
Қонга ботгай эрди жонлар сарбасар.

Кўрди шогирд ногаҳон, берди кўнгил,
Деди: мен шогирдману устоз - ул.

- 2310 Этди зеболик йигитни беқарор,
Хусну раънолик йигитни беқарор.

Дедиким, жон бирла шогирдмен анга,
Ундан ортиқ бўлмагай устоз менга.

Кўнглим ичра ул санамнинг ёдидир,
Ишқ шогирддир, ҳусн устодидир...

Этди тарк устози дарсин, бормади,
Сабри кун-кундан камайди, қолмади.

Кеча-кундуз бўлди шайдо, жонҳалак,
Бир йўла устози дарсин этди тарк.

- 2315 Дарди ишқ бирлан қорайди кундузи,
Заъфарон ранг олди, сарғайди юзи.

Келди ишқ, этди ақлни сарнигун,
Жонидин тўйдирди ул ошиқни чун.

Панд-насиҳат этди унга нечаси,
Заррайи ишқ бирла битди барчаси.

Илми зоҳир кибру ғавғо келтирур,
Ишқи ботин сўзу савдо келтирур.

Кимки беишқ илму дониш истагай,
Илми бирлан молу давлат излагай.

- 2320 Хулласи, ишқ унга нелар қлмади,
Гул ва мул, кун бирла тунни билмади¹.

Оқибат якбора bemор этди ишқ,
Хаставу дилхаста, абгор этди ишқ.

Бўлди ёр кўйида чун зору асир,
Етди бул устозга, маълум бўлди сир.

Ҳийлаву тадбирга тушди ул ҳамон,
Қизнинг икки қўлидин олдирди қон.

Сўнгра мусҳил берди қизга изма-из,
Ичди сурги доруни, ҳайз кўрди қиз.

- 2325 Сўлди, гулдек ранглари бўлди сомон,
Юзлари сарғайди, бўлди заъфарон.

На тароват қолди ул дийдорида,
На малоҳат қолди гул рухсорида.

Ҳуснидин бир зарра боқий қолмади,
Чун қадаҳ синди ва соқий қолмади.

Ҳар не ичмишди, лаганга қусди, бас,
Хуни ҳайз ҳам ул лаганга тушди, бас.

Шунда ул шогирдни хўжа чорлади,
Ул канизакни-да ҳозир айлади.

¹ Мул – май.

2330 Күрдиким, жой олди шогирд курсида,
Қизни турғизди унинг ўтрусида.

Қизга боқди ошиқ ул, қиз ёқмади,
Ул тарафга бошқа бир бор боқмади.

Чун таажжуб ичра қолди, ул нигор,
Шунча ўзгармиш, хазон бўлмиш баҳор...

Ишқи сўнди, рағбати ёнди яна,
Мехри таҳсилга оловланди яна.

Кўрди устоди чу озод эрди ул,
Ғамни мағлуб айлабон, шод эрди ул.

2335 Кўнгли ичра меҳри таҳсил жилвагар,
Йўқ эди ишқи канизакдин асар.

Амр этди, ул лаганни келтириб,
Қўйдилар олдига, қопқоғин суриб.

Деди устоз: ихтиёринг йўқ эди,
Бекарор эрдинг, қароринг йўқ эди.

Ул канизак эрди чун жонинг сенинг,
Боқ, мана, олдингда севгонинг сенинг...

Қайда қолди оташинг ул, шиддатинг?
Қайда ул безбетлигинг ҳам журъатинг?

2340 Сенга ҳар дам орзу эрди ул санам,
Ол, мана, қаршингда ҳозир бешу кам.

Ишқ аро жонингни ёндириган надир?
Сўнг ўшал оташин сўндириган надир?

Сен ҳамон сенсан, канизак ҳам ҳамон,
Лек анга андак етишмас бул замон.

Улки ёқмишди, юзингни сўлдириб,
Бул замон тургай лаганни тўлдириб.

Бул канизакдин жудо бўлди ҳама,
Баски ишқинг ҳам адо бўлди ҳама.

- 2345 Ўйладингким, қизга бўлдинг маҳлиё,
Аслида сен хунга эрдинг мубтало.

Йўлда бундоқ бефаросат сен эдинг,
Ошиқи хуну нажосат сен эдинг...

Ўртади шогирдни бу кору бу сўз,
Тавба қилди, бурди боз таълимга юз.

Ким этар сувратпарастлик пеша ул,
Бул сифатни айламас андиша ул.

Аҳли суврат нафси шайтонинг сенинг,
Аҳли маъни жони раҳмонинг сенинг.

- 2350 Тарки суврат қил десанг ишқи сифат,
Порласин то офтоби маърифат.

Сувратинг ул хуну хилтдир, ўзгамас,
Улки суврат дер, узоқни кўзламас.

Ҳар не хуну хилт ила зебо бўлур,
Ким анга ошиқ эса, расво бўлур.

Учма сен сувратга, маъни кўзлагил,
Хусн эрур ғайб ичра, ғайбдин излагил...

ҲИКОЯТ ШИБЛИЙНИНГ ЧИН ДҮСТ ҲАҚИДА АЙТГАНЛАРИ

Бир киши йиғларди ёши тирқираб,
Сўрди Шиблик: йиғларингга не сабаб?

- 2355 Деди: шайхо, дўсти жоним бор эди,
 Дўст эмас, руҳи равоним бор эди.

Ўлди ул, мен ҳам ўлармен ғам ила,
Сим-сиёҳдир шу жаҳон мотам ила.

Шайх дедиким, баски қайғу, зор сенга,
Не керак андин алам, озор сенга?

Бошқа бир дўст топки, асло ўлмасин,
Мотаму зорингга боис бўлмасин.

Дўстки ўлгай, нега дўст дерсан ани?
Бас, ўлиб, ғамларга қўйгайдир сени.

- 2360 Кимки ул сувратга бўлгай мубтало,
 Тонг эмас, бошига келгай юз бало.

Илкидин кетгай у суврат бегумон,
Ул эса ғамларга қолгайдир ҳамон.

ҲИКОЯТ БИР ТОЖИРНИНГ ПУШАЙМОНЛИК ЧЕККАНИ

Бор эди тожир, бадавлат эрди у,
Бир канизи бор эди ойдек сулув.

Сотди қизни, бўлди сўнг овора ул,
Бас, пушаймон бўлдию бечора ул.

Борди хўжа олдига ул бекарор,
Бер канизакни, деди, олгил ҳазор.

2365 Ишқида сабру қарорим қолмади,
Сот, деди ул, хўжа бунга кўнмади...

Қайтди тожир ноумиду талхкам,
Бошига тупроқ сочар эрди мудом.

Йиғлар эрди, дерди: бу доғи алам,
Бу алам, доғи ситамлар менга кам.

Чун ҳамоқатлик била юмдим кўзим,
Дилбаримни ақчага сотдим ўзим...

Кун келур, сен унда англарсен аён,
Не зарар кўрдинг жаҳонда, не зиён.

2370 Ҳар нафас умринг асл гавҳар эрур,
Ҳақ сари бошловчи бир раҳбар эрур.

Бошдин охир неъмати Ҳақ ичрасен,
Боқ ўзинг, не раҳмати Ҳақ ичрасен.

Ўйла, кимдин шунчалар тушдинг йироқ,
Сабр этарсен бўлса ҳам ҳажру фироқ.

Ҳақ сени ўстирди айлаб иззу ноз,
Сен эсанг бегоналарга ишқибоз...

ПОДШО ВА СУЯККА ИНТИЛГАН ИТ ҲИКОЯТИ

Подшо чиқди шикорга бир куни,
Деди сакбонга: кетургил тозини.

- 2375 Тозиси бор эрди подшонинг нажиб,
Устида атлас ёпинчиқлар ажиб.

Тасма эрди бўйнида заррин нуқул,
Дуру гавҳардин мурассаъ эрди ул.

Тўрт оёғида узуклар инжудак,
Тасмага боғлиқ ипи эрди ипак.

Тозини зийрак деб ўйлар эрди шоҳ,
Гоҳ етаклаб, сайдайлар эрди шоҳ.

Бу сафар ҳам бўлдилар йўлга равон,
Йўлда ногоҳ учради бир устухон.

- 2380 Кўрди този устухонни, тўхтади,
Шоҳ боқиб ит ҳолига, ҳайрон эди.

Жаҳли чиқди, чун ғазабдин тошди шоҳ,
Тозига қаҳру ғазабни сочди шоҳ.

Деди: мендек бир шаҳаншоҳ олдида
Бошқаларга кўзни солгайсен нега?

Ипни қўйди, аҳли аъёнга қараб,
Йўл беринг, кетсин, деди, ул беадаб...

Итга қиммат тушди бўйла кирдикор,
Яхши эрди игна ютса юз ҳазор.

2385 Деди сакбон: ит басе орастадир,
Зебу зийнатлар аро, атласдадир.

Майли, итга дашту саҳро, туз сазо,
Зебу зийнатларга лекин биз сазо.

Шоҳ деди: кўйгил, шу ҳолда кетсин ул,
Ундаги олтин, кумушдин уз кўнгил.

Бир куни келгай хушига бегумон,
Ўзни чун ораста кўргай ул замон.

Илгари тутган маконин эслагай,
Мен каби шоҳи жаҳонин эслагай...

2390 Эйки, аввал топган эрдинг жойгоҳ
Сўнгра ғафлат босди, бўлдинг мосуво.

Ишқ ўйлига бос қадамни бардавом,
Аждаҳо бирлан адо эт нўши жом.

Бўлма ғофил, бунда бордир аждаҳо,
Бунда ошиқлар этурлар жон фидо.

Улки, жонни марди олий айлагай,
Аждаҳони бир чумоли айлагай.

Бирмидир, юз, боқма ошиқ сонига,
Ташнадирлар ул бари ўз қонига...

•—————
ХИКОЯТ
ХАЛЛОЖ ЮЗИГА ЎЗ ҚОНИНИ СУРГАНИ

2395 Баски Халлож дорга тортилган замон
Ул Аналҳақ дерди тақрор айлабон.

Лек бу гапнинг зимнига етмасдилар,
Шул сабаб қўлу оёғин кесдилар.

Қони оқди, сарғайиб қолди юзи,
Кетса қон, қайда қизиллик қолгуси?

Сурди кесик қўлларини юзга ул,
Қон сураркан юзга, дерди ўзга ул:

Эр киши гулгунаси шу тоза хун,
Гулгун этгумдир юзимни мен бугун.

2400 Кўрмасин сарғайганимни бир касе,
То қизил юз бирла тургаймен басе.

То бирор сарғайганимни қўрмагай,
Кўрқди Халлож деб хаёлга бормагай.

Йўқ менинг жонимда қўрқувдин асар,
Юзларимга гулгуна сурсам, етар.

Эр киши гар дорга тикса бошини,
Шер бўлиб этгай аён бардошини.

Шул жаҳон наздимда мимдан ҳалқадир¹,
Бас, менинг жонимга қўрқув қайдадир?

¹ Мимдан ҳалқа – «мим» арфининг алқаси... Шу жаҳон кўзларимга тор бўлиб қолди, дейилмоқда.

2405 Бир киши то қаъри таммузга тушар,
Етти бошли аждаҳо бирлан яшар.

Ким ўйинни бўйла бисёр айлагай,
Ўзни андоқ маҳкуми дор айлагай...

ҲИКОЯТ ЖУНАЙДНИНГ ЎҒЛИНИ ЎЛДИРИШГАНИ

Муқтадойи дин Жунайд, пири азиз
Бир кеча Бағдодда айтар эрди сўз.

Баски юксак эрди ул сўзлар чунон,
Бош эгарди эшигига осмон...

Чун Жунайд асрори ғайбга ёр эди,
Бир гўзал, навраста ўғли бор эди.

2410 Кесдилар бошин, басе йиғлатдилар,
Сўнг жамоат ўртасига отдилар.

Кўрди ул бошни Жунайд, дам урмади,
Юзланиб элга, насиҳат айлади.

Дедиким, қурдик бу оқшом дош қозон,
Неча асрор унда бўлгайдир аён.

Чун қозон остига ёқдик ўтни ҳам,
Шунча бўлгай бўлса, бўлмас бешу кам...

ЎН ЕТТИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси деди: ўлимдин қурқаман,
Йўл йироқ водийда, етмас озуқам.

- 2415 Чун ажални эсласам, титрар дилим,
Аввалин манзилда топгаймен ўлим.

Гар эсам мири ажал, чобуксувор,
Чун ажал етса, ўлармен зор-зор.

Ким ажалнинг тифига дуч келса, бас,
Кўли сингайдир, тифи топгай шикаст.

Эй дариғо, гар ажалдин етса тиф,
Во дарифдин ўзга сўз йўқ, во дариф.

Қанча жон ер остида ухлоқ ҳама,
Балки ухлоқ эрмас ул, уйғоқ ҳама.

- 2420 Йўлни кўргил, қанчалар мушкул эрур,
Унда қабрим аввалин манзил эрур.

Гар ўлимнинг заҳмидин етса хабар,
Шу ширин жонинг бўлур зеру забар.

ХУДҲУДНИНГ САВОЛГА ЖАВОБ БЕРГАНИ

Деди Худҳуд: эй заифу нотавон,
Бир ҳовуч патсен, суяксен, устухон.

Устухонлар ул бирикмишлар тузук,
Ул суяклар ичра сўнг иссиқ илик..

Маълум эрмасму, шу умринг бешу кам
Бору йўғи қўш нафасдир, икки дам.

2425 Маълум эрмасму, туғилган ҳар тирик
Бир куни бежон бўлур, бўлгай ўлик.

Баски келдингму, кетарсен оқибат,
Бас, туғилдингму, ўларсен оқибат.

Бошинг узра кўк лагандир, сарнигун,
Ҳар кеча бўлгай шафақдин ғарқи хун.

Офтоб шамширин ургайдир фақат,
Ул лаган қонларга тўлгайдир фақат.

Бу жаҳонга тийраму келдингму, пок,
Қатра сувдирсан, бўлурсен зери хок.

2430 Бошдин охир қатра сувдирсан туташ,
Бас, нетиб дарё билан этгунг саваш?

Гар яшарсен даҳо аро султон бўлиб,
Жон берурсен бир куни гирён бўлиб...

ҚАҚНУС ҚИССАСИ

Тингла, Қақнусдин келур бул достон,
Мулки Ҳиндистонда тутмиш ул макон.

Бир гўзал қушким, узун минқори бор¹,
Най каби унда тешиклар саф-қатор.

Ҳар тешикдин бир садо янгроқ эди,
Ҳар садо бир айру эрди, тоқ эди.

¹ Минқор – тумшук.

- 2435 Ҳар тешикнинг савти, сози ўзгача,
Ҳар овоз остида рози ўзгача.

Янграса савту садолар зор-зор,
Жону жонзотлар бўлурди бекарор.

Жумла қушлар тинлабон, хомуш эди,
Жумла ҳайвонлар дағи бехуш эди.

Файласуф бор эрди, дамсоз бўлди ул,
Мусиқий илмида устоз бўлди ул...

Куш яшаб, минг йилча умри бор эди,
Ҳам қачон ўлгай, анга ошкор эди.
- 2440 Бас, умр паймонаси тўлган замон,
Хас-хашак, ўтин йифар эрди ҳамон.

Сўнг чиқар эрди у хирмон устига,
Нола айлар эрди чун жон қасдига.

Ҳар тешик минқоридин ул жони пок
Ун чекарди айру-айру, дарднок.

Навҳагардек навҳалар қилгай эди,
Навҳа узра навҳалар келгай эди.

Навҳаси эрди ўлимнинг доғидек,
Титрар эрди жон хазон япроғидек.
- 2445 Нолишин тинглаб ҳама паррандалар,
Жумла ҳайвонлар, неча даррандалар.

Теграсин қуршаб басе ҳайрат ила,
Дилни дунёдин узарди бир йўла.

Неча диллар қонга түлгай эрдилар,
Неча бирлар шунда ўлгай эрдилар.

Эрди Қақнус ҳолига ҳайрон ҳама,
Үн чекиб, ҳамдард бўлиб, гирён ҳама.

Хулласи, ул кун ажиб кун бўлур,
Ноласи бирлан юраклар хун бўлур.

- 2450 Умрига етганда охир, сўнг нафас
Силкитур Қақнус қанотин басма-бас.

Шунда бир учқун чиқар-да ногаҳон,
Хору хасларга туташгай ул ҳамон.

Ўт туташгайдир кейин, ҳар ёнга ўт,
Сўнгра чирмашгай ўшал хирмонга ўт.

Чўғ бўлур хирмон ёниб, Қақнус-да ул,
Сўнг қолур чўғ ўрнида бир тўда кул.

Кул совиб, ўтгач яна фурсат пича,
Кул аро пайдо бўлур қақнус бача.

- 2455 Барча кул бўлганда оташ дастидин,
Бош кўтаргай жўжа кулнинг остидин...

Кимсага дунёда борму бул сана,
Ки ўлиб, туғмиш, туғилмишdir яна?

Берсалар гар сенга Қақнус умрини,
Шум ажал келгай, совургайдир уни.

Қақнуси саргашта умри минг, ҳазор,
Бир умр ийғлаб, чекар фарёду зор.

Бир умр йиғлар, насиби қайғу, дард,
Жуфти йўқдир, насли йўқ, танҳову фард.

- 2460 На ёруғ дунёда бир пайванд анга,
На аниси ёру на фарзанд анга.

Умри сўнггида ажал келгай ҳамон,
Кулларни сочгай, совургай ҳар томон.

Бўйлаким сен ҳам қутулмассен сира
Шум ажалдин ҳийлаву тадбир ила.

Қолмагай, ўлгай жаҳонда барча, бас,
Бул ажабки кимса парво айламас.

Гар ўлим чун беомон, золим эрур,
Даҳр аро нон изламак лозим эрур.

- 2465 Бошимизда гарчи дунё офати,
Ҳаммадин оғир vale нон заҳмати.

БИР БОЛАНИНГ ОТАСИ ТОБУТИ ОЛДИГА ТУШИБ, ЙИҒЛАГАНИ

Тобут олдига тушиб, тортиб алам,
Бир ўғил фарёд чекарди: вой, отам!..

Не қаро кун, қорди кўз ёшимга ул,
Тушмаганди илгари бошимга ул.

Деди сўфий унга: бундоқ кун, болам,
Тушмагай энди отанг бошига ҳам.

Баски боис бўлди бул кўз ёшига,
Тушди мушкил иш атонинг бошига...

- 2470 Эйки сен, дунёга келган бесамар,
Соч ўзинг бошингга тупроқ ҳар маҳал.

Тожу тахтга гар туташгайдир йўлинг,
Лек кетар чоғингда бўм-бўшдир қўлинг...

ҲИКОЯТ НАЙЧИДАН АҲВОЛ СЎРАШГАНИ

Найчига етгач ажал ул чорасоз,
Биттаси сўрди, дедиким, сўйла роз.

Хўш, нечуксен, бул замон ҳолинг қалай?
Деди найчи: сўрма, айтиб бўлмагай.

Ўтди умрим найга ел пуфлаб тамом,
Оқибат тупроқقا киргум, вассалом.

- 2475 Чун ўлим ўтрусида дармондамен,
Зор йиғлармен, басе шармандамен...

Баски ўлмоқ-чун туғилгаймиз ҳама,
Қолмагай бир кимса, ўлгаймиз ҳама.

Улки тутмишди жаҳонни дастида,
Энди ётгайдир қаро ер остида.

Улки ўқ отмишди кўкка ҳар замон,
Энди бир қабр ичра сокин, бенишон.

Боқки, ер остида ухлоқ барчаси,
Дема ухлоқ, балки тупроқ барчаси.

- 2480 Ҳа, ўлим бул чун мاشаққат йўл турур,
Гўр бу йўлда аввалин манзил эрур.

Гар ажалнинг талхидин етса хабар,
Шу ширин жонинг бўлур зеру забар...

ҲИКОЯТ ИСОНИНГ АРИҚДАН СУВ ИЧГАНИ

Бир ариқдин ичди сув Исо Расул,
Ичгани эрди гулобдин тотли ул.

Бир киши тўлдирди сувга қўзасин,
Ичди бир қултим Исо ул қўзадин.

Оғзи ул сувдин тахир тортди шу он,
Қолди ҳайрон сирри не эрмиш, дебон.

- 2485 Деди: ё Раб, бир ариқда икки сув,
Ширину аччик, нечук асрор бу?

Кўзадин ичса, тахирдир ушбу дам,
Лек ариқдин ичса, ширин, тотли таъм...

Тилга кирди кўза, деди: эй Исо,
Мен даги инсон эдим олам аро.

Шум фалак остида йилларким ҳазор
Кўза, хум бўлдим гаҳи, бўлдим тафор[□].

Этсалар кўза яна минг йил дағи,
Кетмагай тандин ўлимнинг аччиғи.

- 2490 Бас, ўлимнинг аччиғи жисмимда ул,
Ул сабабдин қуйса сув, аччик бўлур...

Фофило, хумдин симиргил дилга роз,
Қолма ғафлат ичра, андин бўл халос.

Сен йўқотмишсен ўзингни, кўзлагил,
Чиқмайин жонинг ўзингни излагил.

Гар тирик эрканда ўзни топмасанг,
Ўлганингда сен уни топгаймисен?

На тирик эрканда ўздин бир хабар,
На ўлар бўлсанг, вужудингдин асар.

- 2495 Гар тириксен, аслида жонсиз, ўлик,
Гарчи одам, одам эрмассен валек...

Олдида чун неча юз минг парда бор,
Ўзни топгайдир нечук дарвеши зор?

ҲИКОЯТ БУҚРОТ ҲАКИМНИНГ АЙТГАНЛАРИ

Улки Буқрот баски назъи жон эди,
Келди бир шогирди, эй устод, деди.

Чун танинг поклаб, кафанлаб сўнг ани,
Қайси жойга дафн этайлик биз сени?

Деди Буқрот: гар тополсанг, эй ғулом,
Истаган жойингда дафн эт, вассалом.

- 2500 Мен узун умримда ўзни топмадим,
Ўлганимда сен уни топгаймидинг?

Мен кетармен, келди чун кетмоқقا гал,
Бир туким ҳам топмамиш ўздин хабар...

Гар шаҳаншоҳдир ва ё Парвиз эрур,
Қабр аро тупроқ бўлиб, ожиздир ул.

Бўйлаким шоху гадо кетгай бари,
Ўзга бир оstonага етгай барии.

Бу ҳаёт – ранжdir, ўлим – озору ранж,
Икки ранждин сен ўзингга изла ганж.

- 2505 Ганж – Симурғ, бошқаси ранжdir ҳама,
Даҳр аро умрингни зое айлама...

ЎН САККИЗИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси деди: аё пок эътиқод,
Бўлмади менга мұяссар бир мурод.

Бу жаҳонда бир нафас шод бўлмадим,
Бир даме қайғудин озод бўлмадим.

Бу кўнгил қайғудадир, ғам ичрадир,
Ғам чекиб, ҳар лаҳза мотам ичрадир.

Мен мудом ҳайрону ожиз даҳр аро,
Кўрмадим шодликни ҳаргиз даҳр аро

- 2510 Қайғу, ғамлардин басе бошимда юқ,
Сарсаримен, йўлга тушгаймен нечук?

Бўлмасайди бўйла ғамдин ҳосилим,
Бу сафардин шод бўлур эрди дилим.

Дилхуну дилпора бўлсам, мен нетай?
Мискину бечора бўлсам, мен нетай?

ХУДҲУДНИНГ САВОЛГА ЖАВОБ БЕРГАНИ

Худҳуди хушлаҳжа, зийрак, нуктадон,
Англагувчи ҳар неким суду зиён.

Деди: эй мағруру шайдосен, ажаб,
Бошдин охир ғарқи савдосен, ажаб.

- 2515 Ул муроду бемуродлик бегумон
Даҳр аро бир лаҳзада кечгай ҳамон.

Неки бор, ул бир нафасда ўтгуси,
Умр оний бир ҳавасда ўтгуси.

Бу жаҳон ўтгай-ку, сен ўтгувчи бўл,
Боқмагил, тарк эт уни, кетгувчи бўл.

Кимки фоний нарсага бергай кўнгил,
Зинда эрмас, бу жаҳонда мурда ул.

Гар муродга етмасанг, сен унда, бас,
Дардида оҳлар чекардинг ҳар нафас.

- 2520 Гар муродинг етса, бўлсанг сарфароз,
Бир дам андин айру тушма, этма ноз.

ҲИКОЯТ БИРОВНИНГ ҚЎЛИДАН ШАРБАТ ИЧМАЙДИГАН КИМСА

Бор эди исонафас бир шайхи дин,
Шарбат ичмасди бирорвинг илкидин.

Биттаси сўрдики, бўйла нисбатинг,
Не учун шарбатга йўқдир рағбатинг?

Деди шайх: бошимда пайдодир ўлим,
Шарбат ичмак истасам, түсгай қўлим.

Баски бошимда муваккил бор чунон,
Шарбат ичсан, оғу бўлгай ул ҳамон.

- 2525 Турса бошимда муваккил, хушми ул?
Шарбатим шарбат эмас, оташ эрур.

Ҳар неким ул пойдордир бир нафас,
Гарчи юз олам, кепакка арзимас.

Бир нафас эрса висол ул, васли йўқ,
Мен нечук кургим иморат, асли йўқ.

Номуродлик бирла бўлсанг тийра ҳол,
Нолима, бир зумда кечгай бул малол.

Етса гар бир ранжу озорлик сенга,
Иzzатингдир бул, эмас хорлик сенга.

- 2530 Анбиёга ёғди чун ранжу бало,
Кўрмамиш бундоқ балони Карбало.

Кимки сувратда сенга ранж айлагай,
Ранж эмас ул, аслида ганж айлагай.

Юз иноят бирла тўлгай ҳар даминг,
Лутфидин эҳсон эрур юз оламинг.

Ёдга олмассен vale эҳсонини,
Ранжина чекмоққа бардошинг қани?

Бўйла ҳолинг бирла Ҳаққа дўстмисен?
Дўст эмассен, мағзи йўқ бир пўстмисен?

- 2535 Ишқ йўлида бўлса дўстлик, эй киши,
Жўш урар жонингда шавқи, шўриши.

ҲИКОЯТ БИР ПОДШО ҚУЛИГА МЕВА БЕРГАНИ

Подшоҳким, эл севар эрди уни
Чокарига мева берди бир куни¹.

Хуш кўриб ул мевани, деди ғулом:
Тотмадим бундоқ ширинни ҳеч қачон...

Чокари еркан, назар ташлаб анга,
Подшонинг кўнгли кетди мевага.

Деди: андин менга ҳам бер бир тилик,
Баски мёванг тотли эрса шунчалик...

- 2540 Берди чокар, мевани подшо татиб,
Боқди қулга қаҳр ила қошин чатиб.

Дедиким, бу шум мунофиқнинг иши,
Бўйла аччиқни ширин дерму киши?

Деди подшога қули: эй шаҳриёр,
Совғалар олдим қўлингдин юз ҳазор.

Шунчалар етди қўлингдин ганж менга,
Бита аччиқдин келурму ранж менга?

Неъматинг ҳар дафъа ширин эрди ул,
Энди илкингдин нечук аччиқ келур?

¹ Чокар – хизматкор.

- 2545 Гар қўлингдин олсам аччиқ мевани,
Мен ҳамон аччиқ этайму шевани?..
- Ҳақ йўлида эйки ранж етгай сенга,
Сен аниқ билгилки, ганж етгай сенга.
- Бир-бирига тескари эрмиш иши,
Не қилурсен, бўйла эрса хоҳиши.
- Шодлик истарсен чекиб ранжу алам,
Бу жаҳоннинг шодлиги шу, дарду ғам.
- Хуни дил бирлан есанг ҳар луқмани,
Юз очур сенга ҳақиқат гулшани.

- 2550 Боқ, эранлар бўлдилар йўлга равон,
Хуни дил бирлан қориши ошу нон.
- Чун емакка ҳар сафар ўлтирсалар,
Ўртада эрди таом хуни жигар.

ҲИҚОЯТ БИР СЎФИЙНИНГ АЙТГАНЛАРИ

Сўрди сўфийдин кишиким номдор:
Айт, нечукдирсен, нечукдир рўзгор?

Дедиким, гулханда кечгай ҳар дамим,
Лабларим чанқоғу хўлдир доманим.

Битта нон деб ўт ёқармен ҳар нафас,
Бермагайлар токи бўйнимга шикаст.

- 2555 Излама дунёда сен кўнгил хушинг,
Туш кўрарсен ёки сўйларсен тушинг.

Истасанг күнгил, хуши бўл эҳтиёт,
То етишгилер бўлиб сўйи Сирот.

Кўнглихушлик бу жаҳонда урф эмас,
Қилча хушнудлик тополсанг бунда, бас.

Нафски бундоқ беомон оташ эрур,
Қайси кўнгил бу замонда хуш эрур?

Чарх уриб, жумла жаҳонни излабон,
Топмагайсен бунда шодлиқдин нишон...

ҲИКОЯТ
БИР КАМПИРНИНГ ШАЙХ МИҲНАЙДАН
ДУО СЎРАГАНИ

2560 Миҳнайдин сўрди бир кампир: аё,
Хушкўнгилсен, менга ҳам ўргат дуо.

Бемуродлик бўлди баски одатим,
Йўқ уни чекмоқقا ортиқ тоқатим.

Ўрганиб олсам дуойинг, мени уни
Бетиним такрор этардим ҳар куни...

Шайх дедиким, саждага бошим букиб,
Неча муддат ўлтирибмен тиз чўкиб.

Қанчалар жонлар чекиб мен чопмадим,
Истагим бир зарра бўлсин, топмадим.

2565 Топмадим излаб давое мен давом,
Бу жаҳон ичра севинч йўқ, вассалом...

◆ ◆ ◆

ХИКОЯТ БИР ТИЛАНЧИННИНГ ЖУНАЙДДАН САВОЛ СҮРГАНИ

Бир куни келди Жунайдга бир гадо,
Ўлтириб, дедики, эй сайди Худо,

Кўнглихушлик ул қачон ҳосил бўлур?
Деди: ул соатки дил бедил бўлур.

Бўлмагунча то висоли подшо,
Кўйганинг ҳар бир қадамдир музди роҳ.

Зарранинг саркашлиги эрмиш савоб,
Унда йўқдир чунки тоби офтоб.

- 2570 Зарра гар юз бора ғарқи хун бўлур,
Демаким, саркашлиқ андин айрилур.

Зарра токи зарра бўлгай, заррадир,
Ким деса бу зарра эрмас, ғаррадир[□].

Зарралиқдин этсалар хориж-да, бас,
Заррадир ул, чашмайи рахшон эмас.

Бош кўтармиш эрди аввал заррадин,
Чунки асли зарра эрмишдир тайин.

Гарчи жо бўлгай қуёшга оқибат,
Заррадир ул, заррадек қолгай абад.

- 2575 Яхшидир ёки ёмондир, кўпми, оз,
Зарралиқдин ул сира бўлмас халос.

Бўйлаким, эй зарра, сен масту хароб,
Бир куни бўлмоқчи дирсен офтоб.

Сабр этармен зарра янглиғ бекарор,
Бир куни кўргайсен айбинг ошкор...

ҲИКОЯТ ШАБПАРАКНИНГ АЙТГАНЛАРИ

Шабпарак бир кеча бошлаб ҳасратин,
Йўқ, деди, ҳаргиз қуёшга тоқатим.

Бир умр юргум мاشаққатлар ила,
То қутилсан деб қуёшдин бир йўла.

2580 Ойу иииллар кўз юмиб юргум чунон,
Оқибат манзилга етгаймен дебон...

Биттаси дедики, эй мағруру масти,
Ўртада – минг йил масофа, кам эмас.

Сен нечук боргунг бу йўллардин ошиб,
Ойга етгайму чумоли тирманиб?

Дедиким, майли, учармен тинмайин,
Неки ҳосил бўлса, кўргаймен кейин...

Неча йиллар учди масту бехабар,
Шабпаракда қолмади куч, болу пар.

2585 Ўртаниб жисми, йиқилди, толди ул,
Оқибат парсиз, қанотсиз қолди ул.

Йўқ эди лекин қуёшдин бир хабар,
Дедиким, ўтдим қуёшдин мен магар...

Деди бир оқил: кўзинг оч уйқудан,
Босганинг йўл бу арода бир қадам.

Болу парсиз қолганинг улким, гумон –
Айладинг ўтдим қуёшдин деб ҳамон...

Чун эшилди шабпарак бу сўзни то,
Бас, адо эрди, тамом бўлди адо.

- 2590 **Боқди ожизлик-ла сўйи офтоб,**
Жону дил бирлан анга этди хитоб:

Кўзлари кўргувчи қуш бўлдим, бироқ,
Сен яқин келма, йироқ тургил, йироқ...

Дарду ҳасрат бирла бундоқ сўйлади,
Офтоб унга саховат айлади.

Кўзларига тўлди офтоб равшани,
Келди давлат, камбағал бўлди ғаний...

ЎН ТЎҚҚИЗИНЧИ МАҚОЛА БОШҚА БИР ҚУШНИНГ ДЕГАНИ

Бошқаси деди анга: эй раҳнамо,
Ҳақ буюрса, нега этмасмен адо?

- 2595 **Ўзгаларга айламасмен эътибор,**
Амри Ҳаққа лек турармен интизор.

Ҳар не фармон айласа, этгум қабул,
Этмасам амрин, жазойим берсин ул.

ХУДҲУДНИНГ УНГА ЖАВОБ БЕРГАНИ

Деди: сендин яхши келди бу савол,
Эр кишига бундан ортиқ не камол?

Жон топарсен жон фидо этсанг агар,
Жон била фармон адo этсанг агар.

Айласанг амрин адo, имкон бўлур,
Барча мушкуллар сенга осон бўлур.

- 2600 Амрида тоатда кечсин соатинг
Не эмиш улсиз умрлик тоатинг?
- Кимки саркашдир, чекар заҳмат басе,
Ит эрур Ҳақ кўйида ул нокасе.
- Не келур гар чекса заҳмат ит ҳамон?
Айлагай саркашлик ул, кўргай зиён.
- Чекса заҳмат амри Ҳақ бирлан даме,
Чун савоби бирла тўлгай оламе.
- Шул замину осмону хосу ом
Бўйсуниб Ҳақ амрига, топгай мақом.

- 2605 Ишни айла амри Ҳақ бирлан адo,
Бандадирсен, бандалик этгил бажо.

ХИКОЯТ МАҲБУСЛАР ЗИНДОННИ БЕЗАТИШГАНИ

Подшо қайтар сафардин шаҳрига,
Халқ берарди зебу оройиш анга.

Ҳар неким очгай чирой, келтирдилар,
Кўча-кўйга хусну аро бердилар.

Аҳли зинданда йўқ эрди зийнат ул,
Бор бисот занжир, кишанлар эрди, ғул.

Бор эди неча кесилган бош яна,
Неча хунолуд жигар ёндош яна.

2610 Ҳам кесик қўллар, оёқлар, илдилар,
Барчасин зинданга зийнат қилдилар.

Бўйлаким шаҳрига қайтди шаҳриёр,
Шаҳрини кўрди ясанмиш, зарнигор.

Келди зинданга яқинлаб, турди шоҳ,
Отидин тушди, пиёда юрди шоҳ.

Этди маҳбусларга ул лутфу карам,
Симу зардин ақча берди, ваъда ҳам.

Махрами бор эрди шоҳнинг ҳамнишин,
Сўрди бул лутфу карамнинг боисин.

2615 Деди: кўрдинг зебу зийнат юз ҳазор,
Зебу зийнатдин шаҳарни зарнигор.

Гавҳару тилло сочилмишди расо,
Мушку анбарларга тўлмишди ҳаво.

Сен уларга зарра парво этмадинг,
Қайрилиб ё бир қиёлаб ўтмадинг.

Лек етиб зиндонга, турдинг бир маҳал,
Ул кесик бошлар сари солдинг назар.

Не эди тортган нигоҳинг ул нафас?
Неча бош, қўллар, оёқлар эрди, бас.

2620 Барчаси эрди кесик ҳам ғарқи хун,
Сен уларнинг олдида турдинг нечун?

Шоҳ дедиким, ўзгаларнинг зийнати
Неча айёр луттибозлар санъати.

Ҳар бири айлар аён ўз ҳолини,
Ҳар бири кўз-кўз қилур ўз молини.

Барчаси ботмиш гуноҳга, айнамиш,
Аҳли зиндан ишни ўбдан айламиш.

Йўқса, амрим чун бажо бўлгаймиди?
Каллалар тандин жудо бўлгаймиди?

2625 Бунда кўрдимки, юрар ҳукмим равон,
Шул сабаб тизгинни тортдим мен ҳамон.

Бу шаҳар аҳли ғууррга ғарқ ҳама,
Ўзни ўйлар, ўзгага бефарқ ҳама.

Аҳли зиндан эрса саргардону хор,
Ҳукми қаҳрим остида ҳайрону зор.

Гоҳи бошдин, гоҳи қўлдин айрилиб,
Гоҳ қуруқдин, гоҳи хўлдин айрилиб,

Мунтазирлар боргали жон қасдига,
Чоҳи зиндандин баланд дор остига.

2630 Бўйла зиндан менга гулшандир ажаб,
Мен уларданмен, улар ҳам мен тараф...

Йўлчилар фармонга юрмоғи дуруст,
Шоҳлар зинданга бормоғи дуруст.

ҲИКОЯТ БИРОВ ТУШИДА БОЯЗИД ВА ТЕРМИЗИЙНИ КЎРГАНИ

Бор эди бир хўжа, чин арбоб эди,
Кутби олам эрди, дурри соф эди.

Деди: тушда бўлди чун огоҳ менга,
Боязиду Термизий ҳамроҳ менга.

Тушдим олдинга магар сарвар бўлиб,
Иккисин ҳам бошладим раҳбар бўлиб...

2635 Ўйладим туш таъбирин сўнгра давом,
Не сабабдан менга бундоқ эҳтиром?

Эсладим сўнг, беҳуд эрдим бир саҳар,
Чекдим оҳи ногаҳон, оҳи жигар.

Учди оҳим, бошлади роҳимга ул,
Бошлабон, етказди даргоҳимга ул.

Очдилар дарвозани менга шу тоб,
Янгради тилсиз, дудоқсиз бир хитоб:

Боязиддин ўзга асҳоблар ҳама
Сўрдилар биздан, беринг, деб бир нима.

2640 Боязид мардлар ичинда мард эди,
Бизни сўрди, бошқа нарса сўрмади...

Чун етишди менга андоқ бир хитоб,
Англадим, ул ҳам эмас, бул ҳам савоб.

Билмайин дардинг, сени ким излагай?
Бўлмайин мардинг, сени ким истагай?

Амру фармонинг ҳамиша хоҳишим,
Ҳар замон фармонпазирликдир ишим.

Ҳеч вақо йўқ ҳеч вақойимдин бўлак,
Ким бўлибмен менда то бўлсин тилак.

2645 Банда Ҳақ амрига юрса, шул етар,
Менга Оллоҳим буюрса, шул етар...

Бул сўзим тинглаб ул икки муҳтарам
Этдилар андоқ тавозе, ложарам.

Банда юрсин Ҳақ деган фармон ила,
Ҳаққа юзлансин ҳамиша жон ила.

Банда эрмас улки, этмай бир савоб,
Бандаликдин баски ургай лофу қоф.

Бандага то имтиҳони юзланур,
Имтиҳон қил, бир нишони юзланур...

ҲИКОЯТ
ШАЙХ ҲАРАҚОНИЙНИНГ СҮНГ НАФАСДА
АЙТГАНЛАРИ

2650 Сўнг нафас етганда сўзга очди лаб,
Шайх Харақоний дедиким, эй ажаб!..

Кошки шу бечора кўксим ёрсалар,
Ҳам куйик қалбимни андин олсалар.

Ошкоро этсалар элга дилим,
Айтсалар халқقا не эрмиш мушкулим.

Сўйласа дарди дилим доноиي роз,
Бутпарастлик куфр эрур, эй кажмажоз¹.

Бандаликни билма сен ҳою ҳавас,
Бандалик – афгандалик, эй булҳаввас².

2655 Сен худолик этма, этгил бандалик,
Йўқса, келгайму сенга афгандалик?

Ўзни ҳар дам хоксор тут, банда бўл,
Бандайи афганда бўлгил, зинда бўл.

Банда бўлсанг, бўл яна ҳурматда ҳам,
Ҳурмат ичра бўл яна ҳимматда ҳам.

Кирса йўлга банда беҳурмат бўлиб,
Подшо даргоҳидин ҳайдар қувиб.

Баски беҳурматга масжид ҳам ҳаром,
Ҳурмат этсанг сен уни, неъмат тамом...

¹ Кажмажоз – қинҳир табиатли.

² Афгандалик – қуллик, бош эгишлик, хоксорлик.

ХИКОЯТ

2660 Бир куни бир қулга түн кийдирди шох,
Түнни кийгач, йўлга тушди ул гадо.

Кўнди йўл гарду ғубори тўнга, бас,
Қоқди қул гарду ғуборни шул нафас.

Кўрди бир ағёр, деди: эй подшо,
Йўл ғуборин қоқди хилъатдин гадо...

Шоҳ бехурматни инкор айлади,
Ул гадони маҳкуми дор айлади.

Кимки шоҳга бўйла бехурмат эрур,
Шоҳ даргоҳида беқиймат туур...

ЙИГИРМАНЧИ МАҚОЛА БОШҚА БИР ҚУШНИНГ САВОЛ СЎРГАНИ

2665. Бошқаси сўрдики, Ҳақ йўлида, ҳой,
Покбозлик не бўлур, эй пок рой?

Ҳар нечук машғули дил менга ҳаром,
Ҳар не борим эрса, сочгаймен давом.

Ҳар не топсам, ул ҳамоно гум бўлур,
Ҳар не борим қўлда чун каждум бўлур.

Нарсани асраб, туголмасмен сира,
Тукканим очгум, совургум бир йўла.

Покбозлик айлагаймен кўйида,
Бир куни васлига етмоқ ўйида...

ХУДХУДНИНГ САВОЛГА ЖАВОБ БЕРГАНИ

- 2670 Худхуд айтди: йўлга кирганда киши
Покбозлик этса, не хушдир иши.

Бору йўғин ким гаровга ютқазур,
Покланиб, етгай кейин роҳатга ул.

Эй биродар, тикма йиртилганни сен,
Яхшидир ёқсанг барин кул айласанг.

Оташин оҳинг-ла ёқ жон қасдига,
Кулларин йиф-да, ўтиргил устига.

Сўнгра кулларни совургил ҳар томон,
Қолмагай токи улардин бир нишон.

- 2675 Бўйла этгил, кору борингдин қутил,
Этмасанг, қонлар ютарсен бир умр.

Сен уларни ўтга от, топсин адам,
Йўқса, бул даҳлизга қўймассен қадам.

Баски бу зинданда заҳмат беқиёс,
Ўзни сен ҳар нарсадин этгил халос.

Чун ажал етганда келгайдир улар,
Бирма-бир қонингни сўргайдир улар.

Чек улардин қўлни аввал, тўпла ҳуш,
Сўнгра сен азми сафар эт, йўлга туш.

- 2860 Бўйлаким бир покбозлик йўқса, ҳай,
Бу сафар сенга ибодат бўлмагай...

ХИКОЯТ

Пири Туркистон бериб ўздин хабар,
Деди: менга икки нарса жон қадар.

Ул бири – отим, қанотимдир менинг,
Бул бири – фарзанд, ҳаётимдир менинг.

Үлди ўғлинг, деб хабар етган замон,
Шукр этиб, отимни бергаймен ҳамон.

Иккиси икки санамдир, билсангиз,
Дийдайи жонимга гавҳардек азиз...

- 2685 Сен ёниб, то қуймагунча мисли шам,
Покбозлиқдин бирорвга урма дам.

Покбозлиқдин бирорвим дам урар,
Ўз ишига ул ўзи барҳам урар.

Иштаҳо бирлан еса нон покбоз,
Шул замон бўйнига мушт тушмоғи рост.

ХИКОЯТ

Шайх Харақоний эди шайхи қабул,
Бақлажонга бир замон ўч эрди ул.

Онаси ҳайрону лол эрди анга
Ва яримта бақлажон берди анга.

- 2690 Шайх еди ул бақлажонни, шу маҳал
Қасд этиб, фарзанди бошин кесдилар.

Тунда ул бошни ёвуз бир лаънати
Келтириб, шайх эшигига ташлади...

Шайх деди: менму ўшал ошуфтакор,
Бундан олдин сўйламишдим неча бор:

Гар гадо еса яримта бақлажон,
Жонига бир зарба етгай шул замон...

Ҳар замон жонимни ёндиргай чунин,
Бир ситам жонимга кўндиргай чунин.

2695 Кимни тутмишдир, у ҳаргиз қўймагай,
Бир нафас осуда, ёлғиз қўймагай.

Тушди бошимга, ёронлар, бўйла иш,
Олдида жангу мадоро ҳеч эмиш.

Беилм қолгай билимдон, бекарор,
Илми бирлан бошда бул савдоси бор.

Ҳар замон бошимга бир меҳмон келур,
Имтиҳон этмоққа бир карвон келур.

Ғам чекар ғам узра шул жони азиз,
Ул эса ғамлар юборгай устма-уст.

2700 Ҳар не этмишдир адамдин ошкор,
Барчасин қонин тўқар ул зор-зор.

Жумла ошиқ жон берурлар галма-гал,
Майлига, қонимни тўқсин деб ўшал.

Жумла жонларнинг муроди жони шул,
Йиғлатиб, қонларни баским тўқсин ул...

❖ ❖ ❖

ҲИКОЯТ ЗУННУННИНГ САВОЛ БЕРИБ, ҲОТИФДАН ЖАВОБ ОЛГАНИ

Деди Зуннун: бир сафар мен чўл аро
Йўл босиб ёлғиз борардим, беасо.

Йўлда қирқ дарвешни кўрдим ногаҳон,
Барчаси бермиш эди бир ерда жон...

2705 Тушди ўт ақлимга чун боқдим шу дам,
Тушди оташ жони пуржўшимга ҳам.

Мен дедим: бу не синоат, эй Худо,
Токай этгайсен азизларни адо?

Деди хотиф: ишни хўп билгувчи биз,
Үлдириб, сўнг дийятин бергувчи биз¹.

Сўрдим: ўлдирмоққа қанча ниятинг?
Деди: этгум токи етгай дийятим.

То хазинам ичра ақчам битмаса,
Үлдиармен, сўнгра тутгаймен аза.

2710 Ўлдиармен қонига ғарқ айлабон,
Юзтубан судраб, чекармен ҳар томон.

Маҳв ўлиб, то сўлу соғи қолмагай,
Ажралиб, боши, оёғи қолмагай.

Кўрсатармен сўнгра офтоб талъатин,
Ўз жамолимдин этармен хилъатин².

¹ Дийят – хунбаҳо, мақтул эгасига қотил томонидан тўланадиган маблағ.

² Хилъат – тўн.

Юзларин гулгун қилурмен қонидин,
Жой берармен муттақийлар ёнидин.

Масканимда соя этгаймен уни,
Сүнгра очгаймен юзим офтобини.

2715 Чун юзим офтобини кўрган замон
Соядин қолгайму ҳеч ному нишон?

Соя қолгайму юз очса офтоб?
Ул қолур, валлоху аълам бис-савоб.

Кимки унда маҳв бўлгай, бўлди, бас,
Кечгай ул ўздин, бўлолмас худпаст.

Маҳв бўлгил, мавҳ бўлишни сўйлама,
Жон фидо этгил, ўлишни сўйлама.

Кечса ўздин, бир йўла йўқ бўлса ким,
Бундан ортиқ ганжу давлат бормикин?

ҲИКОЯТ
ФИРЪАВН СЕҲРГАРЛАРИ ТОПГАН ДАВЛАТ

2720 Етдиму давлатга андоқ бир башар,
Фиръавн соҳирлариким етдилар?

Ул не давлат эрди, хушҳол топдилар,
Юз буриб иймонга, дарҳол топдилар?

Бўлдилар жондин жудо чун ул нафас,
Кўрмамишди бўйла бир давлатни кас.

Кўйдилар дин сори андоқ бир қадам,
Бир қадам-ла кечдилар дунёданам.

Этмамиш ҳеч кимса бу янглиғ амал,
Ҳеч бутоқдин келмамиш бундоқ самар.

ЙИГИРМА БИРИНЧИ МАҚОЛА БОШҚА БИР ҚУШНИНГ САВОЛ СҮРГАНИ

2725 Бошқаси сўрдики, эй соҳиб назар,
Борму бу маънода ҳимматдин асар?

Гарчи суврат ичра пастдир қийматим,
Лек ҳақиқатда баланддир ҳимматим.

Гарчи кўпмас тоатим, эй шаҳсувор,
Устивор ҳиммат ва ғайрат менда бор...

ХУДҲУДНИНГ САВОЛГА ЖАВОБ БЕРГАНИ

Деди: неча эрса ушшоқи Аласт,
Ҳиммати олий қўриқлар ҳар нафас.

Кимда бўлса ҳиммати олий, басит,
Икки олам қулфига солгай калит.

2730 Гар кишига зарра ҳиммат берса даст,
Ҳиммати этгай баланд офтобни паст.

Даҳр аро шамсу камар ҳиммат эрур,
Жон қушига болу пар ҳиммат эрур.

ҲИКОЯТ ЮСУФНИ МИСРДА СОТИШГАНИ

Ул куни Юсуфни сотмоқ бўлдилар,
Эл ҳама шавқу ҳавасга тўлдилар.

Бас, харидорлар кўпайди, ошди чун,
Ўн саноч тиллога тенглаб қийматин.

Кекса бир кампир-да бор эрди у дам,
Илкида бир неча дона ип ўрам.

2735 Даврага тушди басе айлаб хуруш,
Деди: эй даллол, аё Юсуффуруш.

Шу ўғилни орзу айлаб ҳар замон,
Ўн калоба ип йигирдим мен ҳамон¹.

Ипларим олгил, нисор этдим анга,
Илкини илкимга тутқиз, бер менга...

Кулди даллол, деди унга: эй салим,
Тушмагай илкингга бул дури ятим.

Ўн хазина зар анга холис баҳо,
Қайда бўлгай ип бериб олмоқсанго?

2740 Деди кампир: мен билармен, тингла, ҳай,
Бу ўғилни ипга ҳеч ким сотмагай.

Менга басдир ёд этиб исмим менинг,
Десалар, шул ҳам харидори анинг...

Ҳиммати олийга етса ҳар кўнгил,
Давлати beminnat унга юзланур.

¹ Калоба – калава.

Соҳиби ҳиммат эди подшоҳи жуд,
Ул ўзи подшолигига урди ўт.

Қўйди подшоликни, чун айрилди ул,
Неча подшоликка ноил бўлди ул.

2745 Ҳиммати жўш урди, тутди илкидин,
Юз ўғирди тожу тахти, мулкидин.

Тушса гар ҳиммат кўзи офтобга, бас,
Зарра бирлан ҳамнишинлик айламас.

ҲИКОЯТ ИБРОҲИМ АДҲАМНИНГ БИР ФАҚИРГА АЙТГАНЛАРИ

Бир киши бор эрди, йўқсил эрди ул,
Мен фақир, деб оҳ чекар эрди нуқул.

Сўрди чун Иброҳим Адҳам: эй жигар,
Арzon олгансен фақирликни магар?

Деди кимса: бул сўзинг бехуда, бас,
Хеч фақирликни сотиб олгайму кас?

2750 Деди: мен жондин севиб қолдим уни,
Мулки олам нархига олдим уни.

Неча юз оламга олгаймен ҳануз,
Гавҳарим деб жонга солгаймен ҳануз.

Баски арzon тушди менга бул матоҳ,
Ул сабаб шоҳликка айтмишмен видо.

Мен билармен қадрини ул, сен эмас,
Мен қиласармен шукрини ул, сен эмас.

Ахли ҳиммат жону дил айлаб гаров,
Ою йилларким ёнурлар лов-лов.

2755 Бўлди ҳиммат қушлари Ҳаққа якин,
Кечдилар чун, қолди дунё, қолди дин.

Сен агар чун соҳиби ҳиммат эмас,
Тур йироқким, сен валинеъмат эмас...

ҲИКОЯТ

Шайх Ғаврий неча мажзуб дўсти-ла¹
Борди-да, жойлашди кўприк остига.

Подшо Санжар ўтаркан бошукух,
Сўрди: кўприк остида не ул гурух?

Шайх деди: бошсиз, оёқсизмиз ҳама,
Бизни икки нарсадин хориж дема.

2760 Бизга дўст бўлсанг агарда бардавом,
Бездирамиз ушбу дунёдин тамом.

Бизга душманликни гар кўрсанг раво,
Айлагаймиз унда динингдин жудо.

Гар тушиб, биз бирла бўлсанг бир нафас,
На ҳаво жонингда қолгай, на ҳавас.

Дўсту душманликни кўр, камситмагил,
Бос оёқни, ўзни расво этмагил...

Деди Санжар: сизга мен ҳамдам эмас,
Хуш эмассиз менга, нохуш ҳам эмас.

¹ Мажзуб – девона.

2765 На менинг дўстимсизу на душманим,
Мен кетармен, ёнмасин то хирманим.

Сиз билан фахрим ё орим йўқ менинг,
Яхисизми, йўқми, корим йўқ менинг...

Ҳиммат ул қушдирки чун учқур қанот,
Ҳар замон этгай шитоб, айлар сабот.

Кўрмаса то йўлни ул, учгай нечук?
Ул ҳақиқат чўққисин қучгай нечук?

Ул учар борлиқ жаҳон узра баланд,
Юксалиб хушёrlигу мастиликданам...

ҲИКОЯТ

2770 Бир кеча девона йиғлаб бесабр,
Дердиким, мен сўйлайин олам надир...

Хуққадир қопқоқли ул, биз ичдамиз¹,
Жаҳл ила ошуби савдо ичрамиз.

Бас, у қопқоқни кўтарса гар ажал,
Ким қаноти бўлса, учгай то азал.

Ким қанотсиз эрса, унда юз бало,
Хуққада қолгай асиру мубтало.

Ҳимматинг қушдир, қанот бер, бол анга,
Ақлу жонинг сийла, дил бер, ҳол анга.

2775 Ҳуққа қопқоғи очилмасдин бурун,
Йўлчи қуш бўлгил, қанотинг ёз бутун.

¹ Ҳуққа – Кутича.

Нолима қўлу қанотинг ёнса ҳам,
Ҳаммадин олдинда юргил, пешқадам...

ҲИКОЯТ

Шабпаракка биттаси деди: аё,
Тобакай юргунг қуёшдин мосуво.

Ҳар куни зулмат, қоронғу ичрасен,
Тийракўздирсен чу ёғду ичрасен.

Сайр этарсен зулмат ичра тинмайин,
Тунаро қилча ёрӯғлк кўрмайин.

2780 Баҳраманд бўлсанг қуёшдин сен агар,
Нурдин айру тушмас эрдинг мунчалар.

Бас, етар, урма кавакларга ўзинг,
Ярқираб ёнган қуёшга бур юзинг.

Бошинг узра порлаган офтобга боқ,
Нур бўлиб жонингда ёнсин иштиёқ...

Шабпарак деди: ажаб, эй бехабар,
Менга не эрмиш ўшал шамсу қамар?

Офтобким оқибат тортгай қаро,
Унга боққанлар қолурлар тун аро.

2785 Сарғаяр ул, эгнида мотам тўни,
Зору ҳайронликда кўргайсен уни.

Ўзгалардин ташнадир юз бора ул,
Шавқ ила оғуштаю хунхора ул.

Ким солур бундоқ қүёшга бир назар?
Үзга офтоб бор, кўзимга жилвагар.

Ухлама бир кеча сен ҳам, эй фалон,
Тун аро офтобни кўргайсен аён.

Кундузим, эй жони гумроҳ, тундадир,
Офтоби нури Оллоҳ тундадир.

2790 Тун аро гар юзни очса офтоб,
Халқи оламни қилур машғули хоб.

Офтоб гар кўрса ул нуру зиё,
Парда торттар юзига, айлар ҳаё.

Кимки бўлгай мен каби маҳрам туни,
Офтоби порлагай мотам туни.

Ул қуёшким, тун аро ҳосил эрур,
Сенки кўрсан, кўрмагинг мушкул эрур.

Ул қуёш деб ухламасмен тонггача,
Ул қуёш ҳажрида ёнгаймен неча.

2795 Бас, юзин кўрсатса хуршиди мажоз,
Ошиён қургум кириб зулматга боз.

Ул қуёш тун ичра хуршиди илоҳ,
Ухлаганлар бўлмагайлар аҳли роҳ.

Бўлса гар лочин мисоли ҳимматинг,
Подшо илкида бўлгай иззатинг.

Пашшадек беҳиммат эрсанг, боқ анга,
Пашша янглиғ бўлмагай ҳурмат сенга.

Пашшадек ким маҳви нафсон бўлгуси,
Пашша янглиғ хору яксон бўлгуси.

2800 Улки соҳиб ҳиммат эрса, мард эрур,
Шамсдек юксакда порлаб, фард эрур.

Ҳимматинг гар лаълдек олиймақом,
Подшо тожида тутгайсен мақом.

Тушмасанг йўлга, нари турсанг-чи, ҳай,
Сенга подшо илкидин келгайму май?

ЙИГИРМА ИККИНЧИ МАҚОЛА БОШҚА БИР ҚУШНИНГ САВОЛ СЎРГАНИ

Сўрди бир қуш: ҳазрати ул подшо
Олдида не қатла инсофу вафо?

Ҳақ таоло берди чун инсоф менга,
Бевафолик этмадим ҳеч кимсага.

2805 Бир кишида бул сифатлар барчаси
Жамъ эса, айтгил, не бўлгай рутбаси?

ХУДҲУДНИНГ САВОЛГА ЖАВОБ БЕРГАНИ

Дедиким, инсоф – у султони сифот,
Ҳар нафас инсонга бергайдир нажот.

Айламак инсоф бировга, бул йўриғ
Бир умрлик зухду таотдин улуғ.

Бир эмас, икки жаҳон ичра магар
Йўқ футувват, ўйлаким, инсоф қадар.

Кимки инсоф айлагай, ул кони қут,
Бўлмагай ҳаргиз риёкор, эсда тут.

2810 Юқмагай инсоф бирордин, ўйла то,
Ул азиз инсонга эҳсони Худо...

ҲИКОЯТ

Аҳмади Ҳанбал имоми роҳ эди,
Фазлу дониш бобида танҳо эди.

Чун кутилса дарси софийдин, ҳамон
Ошиқарди Башри Ҳофийга томон.

Ҳар сафар Ҳанбални Ҳофий қошида
Кўрсалар, таъна ёғарди бошига.

Дердилар: алломадирсен номдор,
Сенга teng келгувчи доно қайдабор?

2815 Ул қулоқ осмасди бу сўзларга ҳеч,
Иштиёқи Ҳофий эрди эрта-кеч.

Дер эди: тўғри, менинг илмим баланд,
Мен ҳадис, суннатда ўздим ҳаммадан.

Яхши илмим бор менинг алломадек,
Ул Худони яхшироқ билгай валек...

Эйки ноинсофу ўздин бехабар,
Яхшилар инсофига сол бир назар.

ҲИКОЯТ

Ҳиндулар подшоси эрди кекса, пир,
Бўлди Маҳмуд лашкарига ул асир.

2820 Судрабон келтирдилар шоҳга ҳамон,
Бош эгиб, бўлди мусулмон шул замон.

Англади то, билди ким эрмиш Худо,
Бўлди бирмас, икки оламдин жудо.

Ўлтириб чодирда, танҳо эрди ул,
Оҳ чекарди, ғарқи савдо эрди ул.

Кеча-қундуз йиғлар эрди тинмайин,
Кечаву кундузни ҳеч фарқ этмайин.

Чун кучайди нолаву зори анинг,
Етди ул Маҳмудга изҳори анинг.

2825 Чорлади шоҳ, сўрди йиғларсен нега?
Истаган мулкингни бергаймэн сенга.

Сен-да бир шоҳсен, хукмдорсен, ажаб,
Мунчалар кўз ёш тўйкарсен не сабаб?

Ҳинд хукмдори деди: эй подшо,
Йиғларимга боис эрмас мулку жоҳ.

Унга йиғларманки, Ҳаққи зулжалол
Сўрса мендин тонгла маҳшарда савол,

Десаким, эй аҳди ёлғон, бевафо,
Ҳақ тарийқин тутмадинг, этдинг жафо.

2830 Келмагунча Маҳмуд ул бошингга боз,
Бир жаҳон лашкар-ла ғолиб, сарфароз.

Сен мени ёд этмадинг, эй бекўнгил,
Айт, вафо расмига ҳеч киргайми бул?

Мен бу ёқда йиғдим эрса лашкарим,
Сен у ёқда жамладинг ўз аскаринг.

Этмадинг то сўнгги дам ёдим маним,
Кимсан, айт, дўстимми ёки душманим?

Тобакай биздин вафо, сендин жафо,
Бул вафодорликда эрмишму раво?

Ҳақ таолодин етишса чун хитоб,
Бул саволга мен нечук бергум жавоб?

2835 Кел, хижодатлиғ аро додимга ет,
Йиғларимнинг боиси шул, эй йигит...

Сен бу инсоғу вафодорликни кўр,
Сарнигунлик бирла бул зорликни кўр.

Гар вафодорсен, қимирила, йўлга, туш,
Йўқса, торт илкингни, келма бизга дуч.

Ҳар неким, зимнида йўқ меҳру вафо,
Ул жавонмардликка эрмас ҳеч раво.

• • •

**ХИКОЯТ
БИР ҒОЗИЙ НАМОЗ ЎҚИШ УЧУН КОФИРДАН
МУҲЛАТ СЎРАГАНИ**

Гарчи гозий эрди жангда сарфароз,
Сўрди мухлат, айламак бўлди намоз.

2840 Кўнди кофир, ул намозни айлади,
Ўзни боз жангу жадалга шайлади.

Бор эди кофирни-да ўз тоати,
Ул дағи тоатга мухлат истади.

Тутди гўша, сурди ҳар ён тошини,
Кўйди бут олдида ерга бошини.

Кўрди ғозий, кофир эрди сарнигун,
Айни фурсатдир, деди, тўкмоққа хун.

Истади шамшир уришни ул ҳамон,
Бир нидо етди фалақдин шул замон:

2845 Эйки сен бадаҳду худбин, бедаво,
Айладинг аҳдингга бундоқ бир вафо.

Улки бўйнинг чопмади, қўйди сени,
Жоҳил ўлгайсен агар чопсанг ани.

Эйки сен «Авфу аҳад»ни уқмаган[□],
Бир қадам қўйганча қотган, тўхтаган.

Улки кофир, айлади ҳиммат сенга,
Бўлма номард, бўлма беҳиммат анга.

Яхшилик этди, ёмонлик этмагил,
Норавони сен раво деб тутмагил.

2850 Улки кофир, чун вафоси бор унинг,
Сенки мўмин, қайдা инсофинг сенинг?

Эй мусулмон, номусалламсен бугун,
Боққи, кофир олдида камсен бугун...

Тинглабон бу сўзни ғозий титради,
Терга ботди, чекди афсус, йиғлади.

Курди кофир, зору гирён эрди ул,
Илкида шамширу ҳайрон эрди ул.

Сўрди кофир нега йиғларсен дебон,
Бор гапни сўйлади ғозий ҳамон.

2855 Бемурувват деб аталдим сен учун,
Бўйла оғир кунга қолдим сен учун...

Бўлди кофирга чу ҳолат ошкор,
Чекди фарёд, ёши оқди шашқатор.

Деди: мендек душмани маъюбига,
Ён босиб чун, дўстига, маҳбубига.

Бевафо, деб Тангри этмишdir итоб,
Мен бу эҳсонга нечук айлай жавоб?

Ўргат исломни менга, дин айлайнин,
Ширк ёқиб мен, шарр ойин айлайнин.

2860 Бор эди кўнглимда кўп банду тугун,
Бехабар эррдим Худодни то бугун...

Сен-да матлубингга чун, эй беадаб,
Бевафолик айлагайсен рўзу шаб¹.

Лек муқаррар бир куни чархи кабир
Қилмишинг солгай юзингга бирма-бир...

ҲИКОЯТ ЮСУФ ВА УНИНГ ОҒАЛАРИ

Ўн ағоси бор эди, чарчаб, тўзиб,
Келдилар Юсуфга олис йўл босиб.

Айтдилар бечора, мискин ҳолдин,
Чун қаҳат йил ичра танг аҳволдин.

2865 Юзига тортмиш эди Юсуф ниқоб,
Олдида бор эрди бир тос ҳам шу тоб.

Урди илкин тосга Юсуф ошкор,
Учди андин нола, ғам, андуҳу зор.

Сўрди сўнгра Юсуфи ҳикматшунос:
Айтингиз, англармисиз, не дейди тос?

Ўн аго бош чайқашиб, жим турдилар,
Баски жумла лолу ҳайрон эрдилар.

Дедилар сўнг: эй азизу ҳақшунос,
Кимса билгайму магар не дейди тос?

2870 Юсуф айтди: мен билармен не деюр,
Менга равшан, гар қоронғу сизга ул.

¹ Рўзу шаб – куну тун.

Тос айтур: неча йил бундан бурун
Бир инингиз бор эмиш соҳиб ҳусн.

Оти Юсуфмеш, меҳрга эш эмиш,
Яхшилик бобида сиздин пеш эмиш...

Тосга қўл урди тагин, учди овоз,
Дедиким, тос менга айтур бўйла роз.

Отдингиз Юсуфни чоҳга жам бўлиб,
Бегуноҳ бўрини сўнгра ўлдириб,

2875 Қонини кўйлакка суркаб сиз бутун,
Этдингиз Яъқубни андоқ бағри хун...

Тос яна дерким, Юсуфни сотдингиз,
Отасин дарду аламга отдингиз.

Бўйла ишни айламас кофир магар,
Эй Худо олдидা сиз шармандалар!..

Бул сухандин бўлдилар ҳайрон ҳама,
Нон сўраб, сув бўлди ул сарсон ҳама.

Гарчи Юсуфни чунон сотмишдилар,
Энди бор мулки жаҳон сотмишдилар.

2880 Отдилар Юсуфни чоҳга илгари,
Энди ул чоҳи балода ўзлари.

Қиссайи Юсуфни тинглаб кимса ул,
Олмаса бир ҳисса андин, кўр бўлур.

Сен анга бир қисса деб солма назар,
Остида кўп ҳисса бор, эй бехабар.

Балки сен ҳам бевафолик айладинг,
Нурга чун ноошнолик айладинг.

Гар биروف тосни урап бўлса, ҳамон
Неча бир қинғир ишинг бўлгай аён.

2885 Кут, этурлар уйқидин бедор сени,
Неча ғамларга солиб такрор сени.

Эртага жабру жафойингни тамом,
Барча куфрингни, хатойингни тамом,

Тикка айтурлар юзингга, эй жаноб,
Бирма-бир айлаб ҳисобу сарҳисоб.

Сенга ҳам етгай садойи тос чунон,
Ақлу хуш қолгайму сенда ул замон?

Бўлма тос атрофида парвона чун,
Кеч ўшандин, бир лаган бу, бағри хун.

2890 Йўқса, бўлгайсен шу тосга мубтало.
Айру бир овоз келур ҳар дам санго.

Этмасанг тарк бу маконни, ҳақшунос,
Айлагай расво сени овози тос...

ЙИГИРМА УЧИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси сўрдики, бўлгайму, аё,
Ул баланд даргоҳга густоҳлик раво?

Гар бири кўрсатса густоҳлик, азим,
Ортидин келмасму ул қўрқув, ваҳим?

Унда густоҳлик не бўлгай, сирни оч?
Маънидин сен дурру гавҳарларни соч.

ҲУДҲУДНИНГ САВОЛГА ЖАВОБ БЕРГАНИ

2895 Айтди Ҳудҳуд: кимда аҳлият эса,
Маҳрами рози улуҳият эса,

Айласа густоҳлик ул, бўлгай раво,
Чунки ул маҳрам эрур, роздони шоҳ.

Улки марди роз эрур ҳам роздор,
Айт, қачон густоҳлик этгай ошкор?

Чун адаб чапдин келур, ўнгдинми ё,
Бир нафас густоҳлик унга нораво.

Тевачи чўпон юриб бир четда ул,
Қайданам подшога ул маҳрам бўлур?

2900 Аҳли роздек этса густоҳлик агар,
Бир йўла иймону жондин айрилар.

Улки ринд эрса, сипоҳ ичра туриб,
Шоҳга густоҳлик этар қандоқ қилиб?

Йўлда густоҳлик этаркан Аъжамий,
Боиси кўнгил севинчи, хуррами.

Бўлмиш ул девона ишқнинг шўридин,
Сув уза юргай шу ишқнинг зўридин.

Жонида ҳар лаҳза ишқ садвоси бор,
Бошида ҳар лаҳза ишқ ғавғоси бор.

2905 У не билгай, билса, ёлғиз Раб билур,
Ёрининг жазби-ла густоҳлик қилур.

Хуш эрур густоҳлиги ул, хуш эрур,
Боқки, ул девона чун оташ эрур.

Йўлда оташга саломат не писанд?
Улки мажнундир, маломат не писанд?

Баски, мажнунлик асир айлар сени,
Ҳар неким дерсан, эшитгайлар сени...

ҲИКОЯТ АМИДНИНГ ҚУЛЛАРИ ВА ДЕВОНА

Ул Хурсон бўлди чун мулки басит,
Баски давлат бошига келди амид¹.

2910 Юз қули бор эрди, турку моҳрӯй,
Сарвқомат, сиймусумбат, мушкмӯй.

Чун қулоқларда гуҳар юлдуз эди,
Аксидин тун ҳам ёруғ кундуз эди.

Ҳар бирида кўк қулоҳу тавқи зар,
Сарбасар сиймин либос, заррин камар.

Белга ул зарин камарларни сириб,
Чиқсалар учқур саманларни миниб,

Барча кўрганлар басе ҳайрон эди,
Дил бериб, кўйида саргардон эди...

¹ Басит – кенг, катта. Амид – Хурсонда молия нозирини шундоқ деб аташган.

2915 Жандапүш девона бир қун ҳоли танг,
Қорни оч, боши, оёғи ҳам яланг.

Күрди ул қулларни ногох, сүрди: ҳай,
Бул йигитлар ким, хуру жононадай?

Айтди бир кимса жавобин: бул бари.
Шаҳримиз беги, амиднинг қуллари...

Тинглабон бу сўзни ул девона зуд,
Учди шўрлик бошидин осмонга дуд.

Деди: ё Раб, сен-да шафқат айлагил,
Сийласанг кулни амиддек сийлагил...

2920 Сен агар девонасен, густоҳ бўл,
Бўлса япроғинг, аниси шоҳ бўл.

Бўлмасанг япроқ, бутоқда ўйнама,
Этма густоҳлик, ўзингни қийнама.

Хуш дурур не қилса ул девоналар,
Ўтда ёққай ўзни чун парвоналар.

Ўзгага маълум эмас бу қавми роҳ,
Кўргай ул яхши, ёмонни подшо...

ҲИКОЯТ

Бир ғариб девона босгай эрди йўл,
Бас, юпун эрди, яна оч эрди ул.

2925 Қиш эди, аччиқ аёз ҳамроҳ эди,
Қору ёмғирдин у шалаббо эди.

Интизор эрди эшикка, хонага,
Оқибат бош сүкди бир вайронага.

Бош эгиб, вайронага кирган замон
Бошига ғишт тушди томдин ногаҳон.

Оқди қонлар бошидин, ювди юзин,
Ул эса тикди самоларга кўзин.

Деди: токай ҳукми султонлик сенга?
Яхшидир гар отмасанг тошинг менга...

2930 Улки жони маҳрами дилҳоҳ эрур,
Бир оғочдек сабзаву зебо эрур.

Ё камол топгил унинг даргоҳида,
Ёки бўл девона кўйи, роҳида.

Ҳар киши девона бўлса, бегумон,
Кўнгли не истар, уни айлар баён...

ҲИКОЯТ

Бор эди бечора, бир мискин, ҳароб,
Қўшнисининг эшагин олди сўраб.

Сўнг тегирмон борди, унда ухлади,
Эшшаги кетди йироқлаб, ўтлади.

2935 Бўри учраб, еди эшшакни ҳамон,
Сўрди эшшак эгаси андин тавон.

Тушди чун савдо уларнинг бошига,
Бордилар алқисса қози қошига.

Бор гапни рўй-рост айтиб улар,
Сўрдилар: эшшак товонин ким тўлар?

Деди: улким гушна айлаб бўрини,
Сўнгра қўймиш дашту саҳрого уни.

Бас, товонни ул ўзи қўйсин тўлаб,
Иккингиз ҳам айлангиз андин талаб.

2940 Бир эмас, минг битта эшшак бўлса гар,
Истаса ул, бир йўла барҳам топар.

Бўрини бундоқ яратмишdir ўзи,
Бир юхову гушна этмишdir ўзи.

Йўқ бу ишда кимсада айбу гуноҳ,
Ҳар неким истар, уни айлар Илоҳ.

Не эди мисрий аёллар ҳолати,
Чун уларни ёқди Юсуф талъати?

Борму ҳайронлик магар девонадин
Етса ҳолат унга давлатхонадин?

2945 Ҳар не мушқул етса, киприк қоқмагай,
Олди, ортига қиёлаб боқмагай.

Ҳар нечук сўз айтса, сўзлайдир Уни,
Ҳар не излар эрса, излайдир Уни...

ХИКОЯТ БИР ДЕВОНАНИНГ ТАНГРИГА ХИТОБ ЭТГАНИ

Чулғади очлик Мисрни беомон,
Халқ ўлар эрди тополмай бурда нон.

Кўчаларда халқ ўлиб, нон, дер эди,
Ул ўликларни тириклар ер эди.

Кўрди бу аҳволни бир девона чун,
Халқ ўлиб, овора эрди нон учун.

2950 Деди: эй соҳиб жаҳону охират,
Кўлда ризқинг кам эса, камроқ ярат...

Боқки, ошиқлар бу янглиғ иш қилар,
Ўз вужудидин ўзи безор улар.

Ҳар неким девона айлар, бил шуни,
Айбламас, маъзур тутарлар эл уни.

Не ёмонлик этса, этгайлар қабул,
Яхшилик айлаб, балога учраюр.

Халқ анга лутфу иноятлар этар,
Доимо сийлаб, мукофотлар тутар.

2955 Келдилар ишқ аҳли поку бегумон,
Ёш оғочлардек басе рақс айлабон.

Ерга, тупроққа оёқларни тираб,
Кўл чўзарлар кўкка, комиллик тараф.

Кимки густоҳдир бу даргоҳга келиб,
Узр истайдир кейин огоҳ бўлиб.

Нораво сўз айтса густоҳлик ила,
Узрини айтур у ширин тил била.

ҲИКОЯТ

Бор эди девона, маъюс, сарнигун,
Болакайлар тош отиб, этмишди хун.

- 2960 Кирди бир уйга, макон тутди уни,
Дарчаси бор эрди ул вайронани.

Дарчадин дўл ёғди шунда бошига,
Бул синов бўлди унинг бардошига.

Дарчага боқди, ҳақорат айлади,
Баски тош отгувчилар деб ўйлади.

Нега тошинг менга отгайсен, дебон,
Сўқди, дашномларга кўмди беомон.

Эсади ногоҳ ел, эсиб ўтди нари,
Дарчадин тушди ёруғлик ичкари.

- 2965 Кўрди дарвеш тош эмас, дўл эрди ул,
Чекди афсус, қолди ночору малул.

Деди: ё Раб, тийра тортмишди кўзим,
Хар неча этдим маломат, ул ўзим...

Гоҳида девона урса бўйла лоф,
Этма саркашлик била қаҳру итоб.

Масту бехуш ким десанг, девона ул,
Бекарору бекасу бедил эрур.

Ўтказур умрини нокомлиғ била,
Эш эмас бир лаҳза оромлиғ ила.

2970 Отма таъна тошин унга, дамни ют,
Ошиғи девонани маъзур тут.

Бенаволар ҳолига солсанг назар,
Барчасин маъзур тутарсен сарбасар.

ҲИКОЯТ

Воситий боргайди саргардон бўлиб¹,
Ҳайрат ичра бесару сомон бўлиб.

Кўрди ул жуҳуд мозорин шу кези,
Сўнг уларнинг ўзига тушди кўзи.

Бул жуҳудлар, деди ул, маъзур, ҳай,
Лек буни ҳеч кимга айтиб бўлмагай...

2975 Чун эшитди сўзни қози одами,
Элтди қози олдига судраб ани

Тинглади ул сўзни қози, бўлмади,
Этди инкор, сўзга рози бўлмади.

Воситий дедики, ул қавми табоҳ
Эрмаса маъзур сенинг ҳукминг аро,

Лек Худо ҳукми-ла йўлда бегумон,
Барчаси маъзур эрурлар бул замон...

¹ Абубакр Мұхаммад ибни Мусал Воситий – Жунайднинг муридлари-дан бўлиб, ҳижрий 320 йилда Марвда вафот этган. Атторнинг «Газкиратул авлиё» китобида ҳам бу ҳикоят нақл этилган.

ЙИГИРМА ТҮРТИНЧИ МАҚОЛА БОШҚА БИР ҚУШНИНГ АЙТГАНЛАРИ

Бошқаси дедики, токи зиндамен,
Мен анга лойиқману зебандамен.

2980 Ўзгалардин воз кечиб, тутдим канор,
Хар нафас бошимда ул савдойи ёр.

Мен кўриб аҳли жаҳонни бирма-бир,
Ҳеч бирига бўлмади кўнглим асир.

Бошдаги савдойи ишқим менга бас,
Бўйла савдо ҳар кишининг коримас.

Ишқида елдим, югурдим қанчалар,
Бўлмади ошуфта жонимдин самар.

Етди фурсат, жонга мен жонон берай,
Термулиб ёримга энди жон берай.

2985 Ҳусни бирлан кўзни равshan айлайнин,
Васли билан дилни гулшан айлайнин.

ҲУДХУДНИНГ ҚУШГА ЖАВОБ БЕРГАНИ

Ҳудхуд айтди: бўйла даъво, бўйла лоф
Бирла ҳеч кимса беролмас Кўхи Қоф.

Ишқида лоф урма бундоқ ҳар нафас,
Ул бирорванинг қопига сиққан эмас.

Гар эсиб давлат шамоли ногаҳон,
Чекса парда, айласа ишни аён.

Лутф этиб Ул бошласа даргоҳига,
Йўл олурсен якка хилватгоҳига.

2990 Ул мақомда айласанг даъво бўлур,
Унда даъвойингда бир маъно бўлур.

Дўст бўлиб йиғла, фифонинг тинглагай,
Дўст бўлиб Ул ҳам ишингни ўнглагай.

ҲИКОЯТ БИР МУРИД БОЯЗИДНИ ТУШИДА КЎРГАНИ

Кўз юмиб кетди жаҳондин Боязид,
Тушда кўрди шул кеча пирни мурид.

Сўрдиким, эй муқтадо, шойиста, пир,
Келдиму бошингга ул Мункар, Накир?

Дедиким, балли, малаклар келдилар,
Ким эрур Раббинг сенинг, деб сўрдилар.

2995 Мен дедим Мункар, Накирга: бу савол
Менга бўлмас, сизга ҳам эрмас камол.

Раббим – Оллоҳим десам-чи, унда бас,
Бул куруқ сўздин иборат бир ҳавас.

Борсангиз сўйи Худойи Зулжалол,
Сўрасангиз андин не эрмиш бунда ҳол.

Ул мени бандам деса, йўқдир гумон,
Мен Худога бандадирмен шул замон.

Гар мени бандам демас эрса Худо,
Айлагай бундоқ Худойимдин жудо.

3000 Кимса бирлан боғланиш мушкул магар,
Ул Худойимдир, десам, борму самар?

Бандалик бандига боғланмай туриб,
Чун Худовандим дегаймен лоф уриб?

Мен унинг олдида сарафгандамен¹,
Ул десин бандам, мен унга баңдамен.

Ул тарафдин етса ошиқлик агар,
Сен унинг ишқига лойиқсен, башар.

Ишқу савдо сен тарафдин келса ул,
Бул фақат сенга муносиб иш бўлур.

3005 Ул агарда урса сенга оташин,
Ишқ аро ёнгувчи жонсен, оташин.

Сендамас, иш ундадир, эй бехабар,
Бехабар бу нуқтани қайдин билар?

ҲИКОЯТ

Бор эди дарвеш, ажаб ошиқи зор,
Ишқ аро ўт эрди гўё, бекарор.

Жони эрди оташи ишқдин ёник,
Ҳам ҳаяжондин тили эрди дудук.

Ўртаниб чун ишқ аро жону дили,
Мушкул узра тушмиш эрди мушкули.

3010 Йўл босиб, одим отарди бекарор,
Йиғлабон шу сўзни айтур эрди зор:

¹ Сарафганда – боши эгик.

Ёқди жоним оташи рашким менинг,
Неча йиғлай, қолмади ашким менинг?..

Хотиф айтди: йүқ эсанг ғавғосига,
Не учун тушдинг унинг савдосига?

Деди дарвеш: мен эмасмен, ёлғизи,
Бўйла савдоларга солган ул ўзи.

Мен каби мискинда қайдা мағзу пўст,
Токи ул акбарга бўлсам ёру дўст?

3015 Мен не қилдим? Ҳар не қилса, қилди Ул,
Этди қон кўнглимни, бағрим тилди Ул...

Ул берар бул ишқу савдойинг ҳама,
Боиси савдо ўзим деб ўйлама.

Масканинг чоҳи азим эрмиш фақат,
Ташқари чиқмоққа борму сенда ҳад?

Улки сенга ишқибозлик айлагай,
Сен билан бундоқ ўйинлар ўйнагай.

Сенки ҳечсан, мунча ёнмоғинг нега?
Маҳв ўл, санъатни қўй санъатчига.

3020 Гар ўзингни кўрсатар бўлсанг, ионон,
Айрилурсен жону иймондин ҳамон.

◆ ◆ ◆ ◆ ◆

ҲИКОЯТ СУЛТОН МАҲМУД ВА ГУЛХАНИЙ¹

Бир кеча Маҳмуд бўлиб дилтанг жуда,
Борди, меҳмон бўлди бир гулханчига.

Ўтқазиб подшони кул узра, нуқул
Ўт қалар эрди ўзи гулханга ул.

Сўнгра қоқ нон бирла шоҳни сийлади,
Кўл чўзиб Маҳмуд тановул айлади.

Дердиким, бул кеча мендин гулханий
Сўрса узр, бошдин жудо этгум ани.

3025 Оқибат кетмоқ бўлиб қўзғалди шоҳ,
Гулханий деди анга: кўрдинг, аё,

Хўрду хобу уйу айвоним менинг,
Ногаҳон бўлдинг чу меҳмоним менинг.

Келмоқ истарсен яна, тургил у дам,
Бул тарафга йўлга туш, қўйгил қадам.

Истамас эрсанг, омон бўл, соғ бўл,
Йўқладинг мискинни, кўнгли чоғ бўл...

Кам эмасмен гарчи, ортиқмас ҳамон,
Мен қаён, сенга баробарлик қаён?..

3030 Хуш кулиб боқди улуғ султон анга,
Етти кара бўлди ул меҳмон анга.

¹ Гулханий – гулханчи, ҳаммомга ўт ёқувчи.

Сүнгги гал ҳам шоҳ ўшандоқ жўр эди,
Бир нима шоҳи жаҳондин сўр, деди.

Деди гулханчи: агар айтса гадо,
Хожатин султони этгайму раво?

Шоҳ деди: айтгил тилакни рост рўй,
Истасанг шоҳ бўл ҳамон, гулханни қўй.

Деди: ёлғиз истагим шул – подшо
Бўлсалар чун менга меҳмон гоҳ-гоҳ,

3035 Менга подшолик – лиқойингдир сенинг,
Бошда тожим – хоки пойингдир сенинг.

Шаҳриёrim, сенда кўпdir дўсту ёр,
Мен каби гулханчи дўстинг қайдা бор?

Сен ила гулханда бўлсам, не суур,
Яхшидир гулшанда подшоликдин ул.

Баски мен гулханда топдим давлатим,
Куфру нонхўрлик эмасму рихлатим?

Баски бул гулханда учратдим сени,
Икки олам мулкига бермам ани.

3040 Гулханим сен бирла равшан кун сайин,
Сендин ортиқ яхши не бор, истайин.

Бошига тупроқ сочилсин, гар кўнгил
Сендин ўзга шоҳни истар бўлса ул.

Жазб этолмас чун шаҳаншоҳлик мени,
Мен фақат сендин сўрайдирмен сени.

Бошимизда тур мудом султон бўлиб,
Гоҳ-гоҳ келгил менга меҳмон бўлиб...

Ишқи Ҳақ бўлсин мудом коринг сенинг,
Ул фақат, Улдир ғаму ёринг сенинг.

3045 Ошиқ эрсанг, сен Ани Андин сўра,
Тут этогин, кўйма илкингдин сира.

Эски ишқ янги санобар истагай,
Кони ганж бир дона гавҳар истагай.

Ўз суви гоҳ хуш эмас, bemattra сув,
Денгиз истайдир яна бир қатра сув...

ҲИКОЯТ

Сув ташиб саққо эди йўлда равон,
Ўзга бир саққони кўрди ногаҳо¹.

Меш тўла сув бирла елдек елди у,
Борди ул саққога, андин сўрди сув.

3050 Деди ул саққо бу саққога қараб:
Ўз сувинг бор, сув сўрайдирсен, ажаб...

Дедиким, дўстим, менга сув бер бу дам,
Ўз сувимдин тўйдим, ортиқ истамам...

Боқки, Одам равзадин тўймиш эди,
Янгини хоҳиш этиб, буғдой еди.

Эски деб хор этди жаннатзорини,
Битта буғдой деб совурди борини.

¹ Саққо – сув ташувчи, мешкоб.

Янги бир дард бирла ўртанди кўнгил,
Янги ишқ келди, эшикни қоқди ул.

3055 Истади боз янги ишқни, толмади,
Эски кетди, янгиси ҳам қолмади.

Кетди буткул, бори бўлди ҳеч вақо,
Қолди майдон ичра зору мосуво...

Даҳраро тўймоқ ва ўлмоқдир басе,
Сиррини англаб етолмас бир касе.

ЙИГИРМА БЕШИНЧИ МАҚОЛА БОШҚА БИР ҚУШНИНГ АЙТГАНЛАРИ

Бошқаси дедики, бундоқ ўйласам,
Мен ўсиб, етдим камолга бешу кам.

Ҳосилин ўрдим даламга дон экиб,
Унга етдим мен риёзатлар чекиб.

3060 Баски бунда менга чун ҳосил эрур,
Кетмагим бундан басе мушкул эрур.

Ҳар киши гар турмас эрса ганж ила,
Дашту саҳроларда юргай ранж ила..

ХУДҲУДНИНГ ҚУШГА ЖАВОБ БЕРГАНИ

Деди: эй иблис табиат, пурғурур,
Кўй бу манманликни, андин айру тур.

Ўз хаёлинг бирла мағурсен, бироқ
Аслида хомсен, маърифатдин йироқ.

Нафс сенинг жонингга солмишdir каманд,
Деву шайтон айламиш бошингни банд.

3065 Қуршамиш ақлингни тахмину гумон,
Ул гумонлар ичра тутқунсен чунон.

Гар йўлингда нур кўринса, оташинг,
Завқинг ул - тахмин, гумонлар айлашинг.

Важду ҳолинг ҳам хаёлдин ўзгамас,
Ҳар неким дерсан, маҳолдин ўзгамас.

Алданиб қолма чароғон эрса йўл,
Нафс ҳамроҳинг эрур, огоҳ бўл.

Бўйла шамшир эрса душман дастида,
Кимни ул тутмас хавотир остида?

3070 Чиқса нур нафсингдин ул, алданма, бас,
Чун чаён заҳмини қўзғатгай караф[®].

Бўйла итдир, кимки дўст тутгай уни,
Топмагай бир кимса кафши гардини.

Нафс – фиръавндири, анга берма омон,
Кекса кофирни унутма ҳеч қачон.

Бўйла бир нури нажасга берма қўл,
Баски ул офтоб эмассен, зарра бўл.

Йўл қоронғу эрса, навмид бўлмагил,
Йўл чароғон эрса, хуршид бўлмагил.

3075 Бас, гумонлар ичра бундоқ ғарқ эсанг,
Арзимас бир пулга ташвиш, талвасанг.

Гар вужудингдин нари қўйсанг қадам,
Айрилур сендин унинг мезони ҳам.

Сенга шу борлиқ хаёли эрса ҳеч,
Бўлмагай йўқликдин ўзга нарса ҳеч.

Бўлса борлиқ бирла зарра ташвишинг,
Куфр этарсен, бутпарастликдир ишинг.

Зарра борлиқ бирла бўлсанг ҳамнафас,
Ўқ ёғар бошингга, шафқат айламас.

3080 Токи борсен, сенга офат келгуси,
Ҳар замон ранжу маломат келгуси.

Ўзни борлиқ бирла этсанг ошкор,
Юз бало бошингга солгай рўзгор...

ҲИКОЯТ ШАЙХ НИШОПУРИЙНИНГ ДАРВЕШГА АЙТГАНЛАРИ

Шайх Абубакри Нишопурый, кутб,
Йўлга тушди хонақони тарк этиб.

Шайх бораркан неча асҳоби била,
Ел чиқарди эшшаги бир зарб ила.

Шайхда зоҳир бўлди шунда ҳоли пок,
Чекди фарёд ул, яқосин этди чок.

3085 Не эмишди сир, муридлар билмади,
Шул сабабдин кимса парво қилмади.

Лек баҳарҳол сўрди бир дарвеш савол:
Ел сабаб бўлгайму зоҳир важду ҳол?

Шайх дедиким, күў югуртсам юз буриб,
Йўл босар теграмни асхоб тўлдириб.

Олдда ҳам, ортимда ҳам эрди мурид,
Бас, дедим, мен ҳам мисоли Боязид...

Ўзни чун ораста, зебо айлабон,
Олду ортимда муридни шайлабон,

3090 Эртага бешак чу айлаб иззу ноз,
Дашти маҳшарга киармен сарфароз...

Шул фикрга ўзни ром этганда мен,
Ногаҳон ел чиқди эшшак ортидин.

Яъни, мен урганда андоқ лофу қоф,
Ел чиқармоқ бирла берди ул жавоб.

Ул сабабдин тушди шу жонимга ўт,
Важду ҳолдин чиқди осмонимга ўт...

Сен улуғлик этма даъво, кўй ғуурур,
Кўймасанг, сендин ҳақиқат айрилур.

3095 Ёқ ҳавойингни, ғуурни айла кул,
Нафсдин келган ҳузурни айла кул.

Эйки бундоқ тусланарсен ҳар замон,
Ҳар тукинг остида Фиръавн ниҳон.

Бир нишон қолса сиёқингдин сенинг,
Юз нишон келгай нифоқингдин сенинг.

Менни тарк айлаб, йироқ тутсанг ани,
Икки оламнинг бўлурсен душмани.

Бир куни етса фанойи мен сенга,
Тунларинг бўлгай басе равшан сенга.

3100 Мен, дема, манманлик ичра юз бало,
Бўлма иблизликка сен ҳам мубтало.

ҲИКОЯТ ИБЛИСНИНГ МУСОГА НАСИҲАТИ

Ҳақ таоло сўйлабон Мусога роз,
Дедиким, Иблисданам ўрган бир оз.

Кўрди чун Иблисни Мусо, қистади,
Айт, деди, рамзу ишорат истади.

Деди Иблис: ўзни доно тутмагил,
Мен дема, мен этганимни этмагил...

Зиндалиқдин қолса сенда бир асар,
Бандалик эрмас бу, кофирлик бўлар.

3105 Топганинг бу йўлда нокомлиғ эрур,
Яхши ном дарвешга – бадномлиғ эрур.

Кимса гар бу йўлда бўлса комрон,
Юзта манманлик туғилгайдир ҳамон...

ҲИКОЯТ БИР ПОКДИННИНГ АЙТГАНЛАРИ

Деди бир покдин: ажабдир бу амал,
Қолса бошловчи қоронғу ичра гар.

Бахри жуд ичра кўмилгай ул тамом,
Қолмагай банди вужуддин бир нишон.

Гар қолиб, бир заррае зоҳир бўлур,
Fappa бўлгай унга, сўнг кофир бўлур.

3110 Сенда не бухлу амал барқ ургуси,
Сен кўрлмассен, эранлар кўргуси.

Бор сенинг жисмингда неча аждаҳо,
Парваришлайсен уларни доимо.

Кеча-кундузлар чекарсен заҳматин,
Еб-ичиши бирлан ётоги, роҳатин.

Тушса гар бир тола мўйи ногаҳон,
Сен уни аждар этарсен шул замон.

Ичқародир ул, палиддир, бетамиз,
Сен нечун ғафлатда юргайсен ҳануз?

ҲИКОЯТ ШАЙХ ВА УНИНГ ИТИ

3115 Бир ити бор эрди иркит, эрта-кеч,
Шайх андин этагин чекмасди ҳеч.

Биттаси сўрди: аё соҳиб сабоқ,
Нега тутмайсен уни ўздин йироқ?

Шайх дедиким, сирти иркитдир анинг,
Худи шундоқ сийратим иркит менинг.

Итда не зоҳирда бўлмишдир аён,
Менда ул ботинда эрмишдир ниҳон.

Сирти қандоқ бўлса, шундоқдир ичим,
Баски шундоқ эрса, қочгаймен нечун?

3120 Ичда мавжуд эрса зарра иркитинг,
Сиртдаги ул неча иркитликка тенг.

Ҳар неким тўсгай йўлингни, ул ёмон,
Хоҳ тоғ бўлсин ўшал, хоҳи сомон.

ҲИКОЯТ БИРОВ МУСОДАН САВОЛ СЎРГАНИ

Эрди Мусо даврида бир обиде,
Ҳар замон тоат этарда сабите.

Кўнглида завқу кушойиш йўқ эди,
Офтобдин зарра тобиш йўқ эди.

Тўрвадек соқоли бор эрди, ажаб,
Машғул эрди дамба-дам сийпаб, тараб.

3125 Бир куни ногоҳ Мусони кўрди ул,
Деди унга: эй сипоҳсолори Тур,

Ҳақ таолодин сўраб бергил савол,
Йўқ нечун кўнглимда завқ, жонимда ҳол?

Чун Мусо Тур тоғига чиқмиш эди,
Сўрди ул нозик саволни, Ҳақ деди:

Васлимиз инжусидин айрилди ул,
Ҳар замон соқолга машғул бўлди ул...

Келди Мусо, Ҳақ жавобин сўйлади,
Ул киши юлди соқолни, йиғлади.

3130 Жабраил келди Мусога шул замон,
Деди: соқол бирла машғулдир ҳамон.

Дамба-дам юлгай соқолин, зеб берур,
Хуллас, ул соқоли бирла банд эрур...

Сен Худодин айру тушма бир нафас,
Айри тушсанг, барча этгонинг абас.

Эйки шул соқолга ўзни бойлаган,
Ўзни хун дарёсига ғарқ айлаган,

Аввалам бор кеч соқолингдин, кейин
Шул азим дарёда сузмофинг тайин.

3135 Тушмагил дарёга соқолинг билан,
Қолмагайсен, қолмагай соқолинг ҳам.

ҲИКОЯТ БИР ТҮРВА СОҚОЛНИНГ СУВГА ЧҮККАНИ

Бор эди бир түрва соқол, билфузул,
Тушди дарёга, чўкиб, ғарқ бўлди ул.

Бир кишиким кўрди қирғоқдин ани,
Деди: от бўйнингдаги ул тўрвани.

Тўрввамас, деди, бу соқолим менинг,
Кўр, бу соқол бирла не ҳолим менинг.

Ул киши деди: соқолинг бўлса чун,
Ушбу дарёда нажот йўқ сен учун...

3140 Эйки ўзни хор этиб, хорланмаган,
Эчки соқол ўстириб, орланмаган,

То бу янглиғ нафси шайтон сендадир,
Тонг эмас, Фиръавну Ҳомон сендадир.

Кеч шу борлиқдин Мусо янглиғ тайин,
Фиръавн соқолидин тутгил кейин.

Тут соқолни, берма эрку ихтиёр,
Ёв била жанг айла сен мардонавор.

Йўлга тушгач, айлагил соқолни тарк,
Турма унда беҳуда жанг айларак...

3145 Англа соқолингни, ўз ҳолингни сен,
Суфра қил йўлларда соқолингни сен.

Дин йўлида бўлса ким фарзона ул,
Топмагай соқол тарашга шона ул.

Ишқидин ўзга азоби бўлмагай,
Кўнглидин ўзга кабоби бўлмагай.

Кирчи бўлса, кўрмагай офтоб юзин,
Эрса дехқон, сувга тиккайдир кўзин...

ҲИКОЯТ БИР СЎФИЙНИНГ БУЛУТГА ДЎҚ УРГАНИ

Кир ювишни бошласа сўфий, ҳамон
Бурканур эрди булутга осмон.

3150 Бўз булутлар ғамга солгайди уни,
Не илож, совунталаб эрди тўуни.

Борди ул баққолга ушнон олгали¹,
Томчилар сочу соқолни ҳўллади.

Дўқ уриб шунда булутга деди: бас,
Мен майиз олмоқчимен, ушнон эмас.

¹ Ушнон – совун ўрнида ишлатиладиган гиёҳ, ўсимлик.

Мен майиз олмоқчимен андин ниҳон,
Сен нечун тушдинг изимга, кет ҳамон.

Неча ушнонларни сочдим сен сабаб,
Кўлларим ювдим совун-ла неchalаб...

3155 Дил хузурин берма қўлдин, тут ани,
Йўқса, ғафлат измига солгай сени.

ЙИГИРМА ОЛТИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси сўрдики, айтгил, эй кубод,
Не била этгум сафарда дилни шод?

Сўйласанг, дилдан арир эрди ғамим,
Бир қадар осон кечарди юрмагим.

Эр кишига йўлда ҳушёрлик зарур,
То юришдин толмасин йўлларда ул.

Менда йўқдир ул қабули рушди ғайб,
Рад этурлар эл кўриб бул нуқсу айб.

ҲУДҲУДНИНГ УНГА ЖАВОБ БЕРГАНИ

3160 Дедиким, Ҳақ бирла борсен, шод бўл,
Банда бўлма бандага, озод бўл.

Баски Ҳақ бирлан шу жонинг шод эрур,
Ғамни қўй, жонингга андин ол сурур.

Икки оламнинг севинчи Ҳақ била,
Гумбази гардун таянчи Ҳақ била.

Хақ севинчи бирла сен ҳам зинда бўл,
Айланиб осмон каби фархунда бўл.

Борму бундин яхшироқ, эй булҳавас,
Дилни шод этсанг анинг-ла бир нафас...

ҲИКОЯТ ТОҒДАГИ МАЖНУН

3265 Тоғда бир мажнун яшарди беватан,
Кеча-кундуз эрди қоплонлар билан.

Гоҳ-гоҳ руҳида айру ҳол эди,
Бир киши келганда шу аҳвол эди.

Нақ йигирма кун чу ҳолат ичра ул,
Айрича ҳолу ҳаловат ичра ул.

Нақ йигирма кун сабоҳдин токи шом
Рақс этар эрди ва сўйларди давом:

Иккимиз танҳомизу анбуҳ йўқ¹,
Жумла шодликдир ҳама, андуҳ йўқ.

3170 Ҳеч ўлурму Ҳаққа берганлар кўнгил?
Унга бер кўнгилни, кўнгил истар ул.

Гар унинг шавқига эрсанг мубтало,
Айт, ўлим сенга қачон бўлгай раво?

¹ Карафс – гиёҳ, чаён чаққан киши уни еса, ўлади деб ишонишган.

ҲИҚОЯТ ОШИҚНИНГ ЎЛИМ ҲОЛАТИДА ЙИҒЛАГАНИ

Жон бераркан йиғлади ошиқ басе,
Сўрдилар андин не эрди боиси...

Деди: йиғлармен чу абри навбаҳор,
Чунки чиқмоққа етишди жони зор.

Йиғламай, ғам ичра бўлгаймен нечук?
Баски кўнглим Унда, ўлгаймен нечук?

3175 Дўст деди: гар Ундаридир кўнглинг сенинг,
Йиғламоқ не, яхшимасми ўлганинг?

Деди: қай кўнгилдадир ишқи Худо,
Унга бўлгайму сира ўлмак раво?

Ҳақ била васлу висолдир бўлмагим,
Энди мушкулдир, маҳолдир ўлмагим...

Сен бу сир-асрорга етсанг бир замон,
Ҳеч бўлур қаршингда ул ганжи жаҳон.

Кимки Ҳақнинг борлигидин шод эрур,
Жумла борлиқдин кечиб, озод эрур.

3180 Ишқи жовид ол кўнгилга ёрдин,
Гул бўлиб, атрингни соч гулзордин...

ХИКОЯТ

Бир азиз дедики, етмиш йил тамом
Күнглим ичра шодлигу ҳолу маром.

Бор чунин зебо Худовандим менинг,
Ул Худовандимга пайвандим менинг.

Үзгалардин айб қидиргайсен ҳамон,
Файб чиройига севингайсен қачон?

Кўзларингким айб излар эрта-кеч,
Айбни кўргач, ғайбни ул кўргайму ҳеч?

3185 Аввало халқ айбидин озод бўл,
Ғайби мутлақ ишқи бирлан шод бўл.

Үзгалар айбини кўргайсен чунон,
Лекин ўз айбингни кўрмоғинг гумон.

Гар эсанг айбинг ила машғул ўзинг,
Гарчи айбинг бўлса ҳам, мақбул ўзинг.

ХИКОЯТ

Бир киши ичмишди пайдар-пай шароб,
Маст эди андоқки ул, масти хароб.

Софу қуйқа ҳар неким ичмишди ул,
Ақлу хушдин бир йўла кечмишди ул.

3190 Кўрди бир хушёр, таниб қолди уни,
Қопга солди, елкага олди уни.

Учради йўлда уларга ўзга маст,
Ураганга гап отарди маст-аласт.

Қопдаги маст кўрди мастнинг ҳолини,
Кўрди бундоқ маст-аласт аҳволини.

Камроқ ичсайдинг, деди, ҳолинг билиб,
Сайр этардинг мен каби роҳат қилиб...

Ўзгани кўрди у, ўзни кўрмади,
Бўйладирмиз барча, гапнинг омади.

3195 Сенда бўлсайди агар ишқдин хабар,
Айб эмас, излар эдинг фазлу ҳунар.

Сенки айб кўргувчисен, ошиқ эмас,
Айб кўриш ишқ аҳлига лойиқ эмас.

ХИКОЯТ

Бир йигит бор эрди арслондек дадил,
Бир жувонга бўлди ошиқ неча йил.

Ул жувон гар нозанин, дилдор эди,
Кўзида тирноқча оқи бор эди.

Бехабар эрди йигит андин тамом,
Термулиб боқмишди гарчи бардавом.

3200 Бўйла ошиқ эрди ул ошуфта, зор,
Термулиб, ёр айбини кўргайму ёр?

Сўнг сусайди ишқи, андак бўлди кам,
Дардига дармон топилди, чора ҳам.

Фазли ёри очди юз нуқсон бўлиб,
Мушкули қолди анга осон бўлиб.

Тарк этаркан ишқи савдоси уни,
Ёр кўзига боқди, кўрди айбини.

Сўрди: ҳай, кўзингга оқ тушди қачон?
Деди қиз: ишқинг камайгандан буён.

3205 Ул замонким бўлдинг ишқимдин йироқ,
Шул замон тушди менинг кўзимга оқ...

Васваса этгувчи дирсен, қўнгли кўр,
Кўз очиб, бир лаҳза ўз айбингни кўр.

Ўзгалар айбин кўрарсен бешу кам,
Излагил бир бора ўз айбингни ҳам.

Кўз очиб, кўрсайдинг айбингни агар,
Ўзгалар айбига солмасдинг назар.

ҲИКОЯТ

Муҳтасиб бир мастни калтаклар эди,
Маст анга, ҳай, этма бағрим хун, деди.

3210 Гар ҳаромдин маст-аласт бўлса киши,
Кўча-кўйда бўлса расволик иши.

Мендин ортиқроқ бўлардинг маст-аласт,
Лекин ул мастиликни кимса пайқамас.

Ҳар киши инсофли эрса, мард ўшал,
Йўқса инсофи, қабих, номард ўшал.

Айлама жабру жафойинг мунча кўп,
Кел бир оз инсофга, менга урма чў...

ЙИГИРМА ЕТТИНЧИ МАҚОЛА БОШҚА БИР ҚУШНИНГ САВОЛ СҮРГАНИ

Бошқаси сўрди: етиб манзилга мен,
Келтирай қандоқ тилакни тилга мен?

3215 Ул сабаб равshan жаҳоним кун сайин,
Билмадим, ундан яна не истайин?

Яхшироқ не бор яна? Билсам ҳамон,
Мен сўрар эрдим етиб борган замон...

ҲУДҲУДНИНГ САВОЛГА ЖАВОБ БЕРГАНИ

Деди: эй, ғофил демасларму сени?
Нарса сўрма, истагил андин Ани.

Атру бўй олса киши гар хонадин,
Бош кўтаргайму ўшал остонадин?

Улки юрт хилватсаройин айлагай,
Унга ошиқликни ойин айлагай.

3220 Нарса истарсен, кўнгилнинг нақшидир,
Не эмиш ул нарса билган яхшидир.

Жумла оламнинг унингдек нақши йўқ,
Сен уни сўргилки, ундан яхши йўқ...

ҲИКОЯТ

Жон бераркан Бу Алийи Рудбор,
Деди: жон оғзимга келди интизор.

Осмон эшикларини очдилар,
Элтдилар жаннатга, гуллар сочдилар.

Хурлар булбул каби айлаб наво,
Дедилар: хуш келдинг, ошиқ, марҳабо.

3225 Шукр этиб, кел бул тараф, айлаб хиром,
Кўрмамиш бир кимса бундоқ бир мақом.

Гарчи бул эҳсони Ҳақ, лутфи Худо,
Лек менинг жоним анга бўлмас ризо.

Дерки, мен жаннатга этмам эътибор,
Ул учунми шунча чекдим интизор?

Аҳли шаҳватдин эмасмен, то бугун,
Бош эгиб турсам неча ришват учун.

Жо эмиш жонимга ишқинг, бас менга,
Жаннату дўзах раво эрмас менга.

3230 Гар ёқиб оташда, кул этсанг мени,
Мен сени дерман, сени дерман, сени.

Сен деганда куфру динни билмагум,
Сен кечарсен балки, сендин кечмагум.

Мен сени дерман, сени билгум фақат,
Сен ўзинг жонимга жондирсен, мадад.

Бул жаҳону ул жаҳоним ҳам ўзинг,
Икки оламда равоним ҳам ўзинг.

Бер муродим, ҳамнафас бўл, ҳамдамим,
Кечмасин ёнингдин айру бир дамим.

- 3235 Этса жоним қилча саркашлик сенга,
Розимен, ҳар неки этсанг, эт менга...

ҲИКОЯТ

Ҳақ таоло деди: эй Довуди пок,
Қулларимга айт, аё маҳсули хок,

Бўлмасайди дўзахим ҳам жаннатим,
Бош эгиб, этгайму эрдинг тоатим?

Бўлмаса измимда бундоқ нуру нор,
Сиз менга айлармидингиз эътибор?

Менда чун ҳаққу лаёқатдир азим,
Не керак тоатда уммиду ваҳим?

- 3240 Йўқса гар хавфу рижолар ёрингиз,
Мен била бўлгайму эрди корингиз?

Тангримен, сизга Худовандмен мудом,
Тан аро жонларга пайвандмен мудом.

Сўйла, бандам боқмасин ғайрига ҳеч,
Айласин менга ибодат эрта-кеч.

Биздин ўзга бўлса не маҳрам анга,
Кўймасин, берсин басе барҳам анга.

Синдириб, ёқсин-да, этсин кулни жам,
Сүнгра елларга совурсин кулни ҳам.

3245 Беаёв сочсин, совурсин ул ҳамон,
Колмасин ҳаттоки кулдин ҳам нишон.

Бўйла этсанг, бас, қутулсанг дастидин,
Кутганинг келгай ўшал кул остидин.

Ул Худованди карим вақти сахар
Айлади Лут қавмини зеру забар.

Ўнгига ақлу хирад бўлди адо,
Кимки кўрди, ўзданам бўлди жудо.

Улки чун ҳиммат кўзи хуршидбин¹,
Зарра бирлан ҳеч бўлурму ҳамнишин?

3250 Бўйла этсанг гар, қутулдинг барчадин,
Этмасанг, оворадирсен барчадин.

Хулду хурга гар асир этгай сени,
Англаким, ўздин йироқ тутгай сени...

ҲИКОЯТ

Чорлабон Маҳмуд Аёзни бир куни,
Кийдириб тож, тахтга ўтқизди уни.

Деди: бердим, шоҳлигу лашкар сенинг,
Подшолик айла, бу кишвар сенинг.

Истагим шул, подшолик қил чунон,
Жумла эл хукмингда бўлсин ҳар замон...

¹ Хуршидинбин – Күёшни кўрувчи, бу ерда Оллоҳни танийдиган кимса маъносида.

3255 Чун эшилди гапни бул хосу сипох,
Бас, ҳасаддин күзлари тортди қаро.

Дедиларким, подшо бўлмиш ғулом,
Қайси қул кўрмиш бу янглиғ эҳтиром?

Лек Аёз эрди басе ҳушёр қул,
Ўлтириб тахт узра йиғлар эрди ул.

Унга барча дердилар: девонасен,
Ақлу ҳушдин айрилиб, бегонасен.

Подшоликка етишдинг, эй ғулом,
Нега йиғларсен, ўтиргил шодком.

3260 Ҳол тили бирлан Аёз айлаб жавоб
Дер эдиким, сиздин айрудир савоб.

Кўрмаяпсизми, мени шоҳи жаҳон
Бир йўла ўздин йироқ этгай ҳамон.

Бўлмагаймен токи мен машғули шоҳ,
Токи бўлгаймен чу машғули сипох,

Берса ҳам ҳукмимга ул мулки жаҳон,
Ундан айру тушмагаймен бир замон.

Не деса, этгум бажо амрини, бас,
Айру тушмам лекин андин бир нафас.

3265 Салтанат, туғроси не ҳожат менга?
Ул азиз дийдоридир давлат менга...

Баски сен ҳам Ҳаққа бермишсен кўнгил,
Бандалик этсанг, Аёздек айлагил.

Эйки кун-тунлар тутиб айни макон,
Бир қадам босганча қолган нотавон.

Хар кеча, бас, сен учун, эй билфузул,
Хақ этар кўқдин малакларни нузул.

Сен эсанг тошдек қотиб турган кези,
На кеча юргайсену на кундузи.

3270 Гар малаклар чиқса сенга пешвоз,
Сен боқарсен ортга айлаб эҳтиroz...

Во дариго, кўрмадим бир мардни мен,
Кимга сўйлай бу давосиз дардни мен?

Бор экан то йўлда дўзах, жаннатинг,
Бул сиру асрорни сен англармидинг?

Иккисидин баски кечгайсен тамом,
Тонг кулар бошингда, кечгай тийра шом.

Гулшани жаннатни асҳоб истамас,
Барча оқилларга иллайин ҳавас¹.

3275 Унга бергил сен уни, бунга буни,
На буни этгил ҳавас сен, на уни.

Иккисидин баски кечдинг, фард ўзинг,
Гар аёл эрсанг-да, жангда мард ўзинг.

Лойиқи дийдори Ҳақдирсен мудом,
Бас, яқинлардин бўлурсен субху шом...

¹ Иллийин – жаннатнинг олий мартабаси.

ҲИКОЯТ РОБИАНИНГ ҲАҚҚА ИЛТИЖОСИ

Робиа дедики, эй донойи роз,
Бер шу душманларга дунёни, холос.

Охират дўстларга бўлсин бардавом,
Мен кечиб бўлдим улардин, бас, тамом.

3280 Иккисидин айрилиб, муфлис эсам,
Не ғамим бор, гар сенга муnis эсам.

Бўйла муфлислик писанд эрмас менга,
Сен эсанг ёнимда доим, бас менга.

Икки оламга назар солсам-чи, ҳай,
Ёки боқсам бошқага, кофир бўлай.

Кимда Ҳақдир, ул жаҳон устиндадир,
Етти денгиз кўприги остиндадир.

Ҳар не бордир, ҳар не бўлгайдир мисол,
Мисли бор, ёлғиз Худойим bemисол.

3285 Ҳар не истарсен, топилгайдир назир,
Бекиёс Улдир фақат, Ул беназир...

ҲАҚ ТАОЛОНИНГ ДОВУДГА ХИТОБ ЭТГАНИ

Ҳақ таоло, акбару олийжаноб,
Ҳазрати Довудга этмишди хитоб.

Дедиким, ҳар неки шул мулки жаҳон
Ичра бордир неча ошкору ниҳон.

Барчасига бори топгайсен эваз,
Бору беҳамто фақат мен, беэваз.

Беэваз мен, мендин айро тушмагил,
Сенга жонмен, ўзгага ёндашмагил.

3290 Менга мұхтож, менга мұштоқ одаме,
Бўлма ғофил, ҳамдамим бўл ҳар даме.

Бир нафас менсиз тирик жон истама,
Келса менсиз давру даврон, истама...

Эйки сен, шу мулки дунё истаган,
Кеча-кундуз давлату жоҳ истаган,

Икки олам ичра мақсадинг Худо,
Бош эгарсен унга, маъбудинг Худо.

Сотмагай манфур жаҳонни сенга ул,
Сен-да Раббингни жаҳонга сотмагил.

3295 Ундан айру не тиласен, бут бўлур,
Ундан айру тушса жон, топгай куфр.

Ҳар кишига жондин ортиқ жон ўшал,
Ҳар нечук дардингга ҳам дармон ўшал

Жон не эрмиш, етса жонингга мамот,
Ишқи бирлан Ҳақ яна бергай ҳаёт...

ХИКОЯТ СУЛТОН МАҲМУД БУТНИ ЁНДИРГАНИ

Лашкари Маҳмуд оларкан Суманот,
Топдилар бир бутни, номи эрди Лот.

Хиндулар ул бутни олмоқ бўлдилар,
Бут баробар тилла бермоқ бўлдилар.

3300 Кўнмади шоҳ, балки рад этди буни,
Ўтга ташлаб, ёндиринг, деди, уни.

Биттаси дедики, бутни ёқмайин,
Тиллага сотсак уни, бўлмасмикин?

Деди Маҳмуд: кўрқамен, Парвардигор
Рўзи маҳшарди тизиб халқни қатор.

Дерки, Озар бирла Маҳмудни кўринг,
Бут тарашлар биттаси, сотгай бири...

Шоҳ буюрди, гурлади гулхан ўти,
Ўтда ёнди бутпастларнинг бути.

3305 Қолди бутдин қанча бойлик бирла кул,
Нақ йигирма манн жавоҳир эрди ул.

Шоҳ дедиким, лойиқи Лот бул эрур,
Ҳақ Худойимдин мукофот бул эрур.

Синдир ул бутларни, ёнтир сарбасар,
Ол улар ўрнига дарёйи гуҳар...

Ёнтир ул нафсингни ҳам, эй шавқдўст,
Гавҳари қолгай ёниб битганда пўст.

Етди чун жонингга ул бонги Аласт,
Балли, деб айтишни қўйма бир нафас.

3310 Бас, Аласт аҳдига бойлабсен кўнгил,
Балли, деб айтишни сен тарк этмагил.

Айладинг иқрор тутиб жонингга дўст,
Энди инкор этмагинг эрмас дуруст.

Эй Аластни бошда иқрор айлаган,
Сўнгра ул иқрорни инкор айлаган.

Не эди аввалда паймонинг сенинг?
Не эмиш охирда исёнинг сенинг?

Ҳар нафас ул чорасозингдир Худо,
Бандалик қилдинг қабул, этгил вафо.

ҲИКОЯТ

3315 Шоҳ Маҳмуд эрди подшолар шами,
Юрди ҳиндулар била жанг қилгали.

Ҳиндуларнинг лашкари анбуҳ эди¹,
Ул сабабдин дилда бир андуҳ эди.

Шунда ният қилди шоҳи додгар:
Шу улуғ жангда зафар қучсам агар,

Не ғанимат қўлга тушса бардавом,
Тарқатар эрдим гадоларга тамом.

Оқибат қучди зафар ул шаҳриёр,
Қўлга тушди кўп ғанимат, бешумор.

¹ Анбуҳ – кўп, беҳисоб.

3320 Бўйлаким эрди ғанимат беқиёс,
Ҳаддига етмасди юз ҳикматшунос.

Бас, ғаниматларга ҳар ён тўлдилар,
Хиндулар майдонда мағлуб бўлдилар.

Шоҳ ғаниматларни тақсим айлабон,
Тарқатинг, деди, гадоларга ҳамон.

Сўйламишдим Ҳаққа назр этмоқни то,
Энди ул аҳдимга этгаймен вафо...

Дер эди ҳар кимса: шунча молу зар,
Ҳайф, барин йўқсил, гадолар олсалар.

3325 Ё сипоҳга бер-да, ҳуррам айлагил,
Ё хазина ичра йиғ, жам айлагил...

Ўртада чун лолу ҳайрон қолди шоҳ,
Неки ҳайрон, балки сарсон қолди шоҳ.

Бул Ҳусайн отлиғ эди фарзонае,
Марди бедил эрди ул, девонае.

Ул кезарди, ҳар тараф лашкар, сипоҳ,
Чун уни кўрди йироқдин подшо.

Амр этди: келтиринг девонани,
Ул деса ҳар неки, айлармен ани.

3330 Чунки ул шоҳу сипоҳга бандамас,
Не деса, бўлгай самимий, бегараз.

Хуллас ул девонани шоҳ чорлабон,
Бор муаммони анга этди аён.

Деди девона анга: эй подшо,
Икки ишдан биттасин этгил бажо.

Ҳаққа тушмайдир, десанг, корим яна,
Бер буларга молни, ташвиш айлама.

Ҳаққа тушгайдир, десанг, корим тағин,
Эт вафо аҳдингаву шарм айлагин.

3335 Ҳақ бугун соҳиб зафар этди сени,
Лек сенинг аҳдингда тургонинг қани?

Этди Маҳмуд ул ғаниматни нисор,
Оқибат бўлди бу янглиғ шаҳриёр...

ЙИГИРМА САККИЗИНЧИ МАҚОЛА БОШҚА БИР ҚУШНИНГ САВОЛ СЎРГАНИ

Бошқаси дедики, бизга сўйла бир,
Ул буюк даргоҳга не маъқул келур?

Сўйласанг бизга, тушунтиранг буни,
Неки жоиз эрса, элтгаймиз уни.

Шоҳга доим тухфа элтгайлар нафис,
Тухфасиз борган саналгайдир хасис.

ХУДҲУДНИНГ САВОЛГА ЖАВОБ БЕРГАНИ

3340 Худхуд айтди: гар эшитгайсен мени,
Унда не йўқ эрса, элтгайсен ани.

Унда бор бир нарсани сен орқалаб,
Элтар эрсанг, маъқул ўлгайму, ажаб.

Унда баским илм ила асрор эрур,
Ҳам малаклар тоати бисёр эрур.

Сўзи жону дарди дил элтгил ҳамон,
Чунки йўқ унда булардин бир нишон.

Унда гар чексанг аламли, ўтли ох,
Етказур дардингни ул то пешгоҳ.

3345 Жойи хос ул мағзи жонингдир сенинг,
Териси нафси ёмонингдир сенинг.

Оҳ агар ул жойи хосингдин келур,
Шубҳа йўқтириким, халосингдин келур.

ҲИКОЯТ ЗУЛАЙҲО ЮСУФНИ КАЛТАКЛАГАНИ

Чун Зулайҳо соҳиби ҳашмат эди,
Қасд этиб, Юсуфни зиндан айлади.

Сўнг ғуломин чорлабон амр этди ул,
Бор, деди, Юсуфга эллик дара ур.

Ур, деди, андоқки, ҳеч раҳм этмайин,
Чеккан оҳини йироқдин тинглайин.

3350 Борди қул, Юсуфни кўрди ул замон,
Қалбида қўзғалди шафқатлар ҳамон.

Кўрди бир пўстакни, унга бурди юз,
Урди ул пўстакка калтак устма-уст.

Кул ўшал калтак туширса неча бор,
Нола айлар эрди Юсуф зор-зор.

Ноласин четдан Зулайҳо тинглабон,
Қичқиарди, ур, дея, ур беомон!..

Қул деди: эй Юсуфи хуршидвар,
Гар Зулайҳо солса сенга бир назар,

3355 Кўрмаса жисмингда бир заҳми таёқ,
Менга сочгай қаҳрини, этгай сўроқ.

Оч менга елкангни, мен бир чўп урай,
Битта калтакка чидарсен ҳар қалай.

Гарчи бул зарбдин зиён етгай сенга,
Заҳми из согай, нишон этгай сенга...

Кўйлагин ечди Юсуф ул бир йўла,
Етти қат осмонга тушди ғулғула.

Қул кўтарди чўпни бош узра баланд,
Зарб ила урди, йикитди юз тубан.

3360 Чун Зулайҳога Юсуфдин етди оҳ,
Бас, деди, бул чеккан оҳидир раво.

Бошда оҳлар чекди эрмакка нуқул,
Эндиги оҳин юракдин чекди ул...

Бўлса гар мотамда юз бир навҳагар,
Мотам аҳли оҳидин етгай асар.

Халқа ичра бўлса юз бир ғамзада,
Халқанинг боши яна мотамзада.

Кўзда ёшу дилда дардинг бўлмайин,
Мардлар ичра мард бўлмоғинг қийин.

3365 Кимда дарди ишқ бордир, сүз ҳам¹,
Бекәордир кеча ул, кундуз ҳам.

ҲИКОЯТ БИР ҚУЛНИНГ ХҮЖАСИГА АЙТГАНЛАРИ

Хўжада бор эрди доно, занжи қул,
Кўлни дунёдин тамом ювмишди ул.

Бас, узоқ тунлар ғуломи покбоз,
Мижжа қоқмас эрди, айларди намоз.

Деди хўжа бир қуни чорлаб уни:
Кечалар турганда сен уйғот мени.

Токи мен ҳам сен била тоат этай,
Кул жавоб берди ширин сўзлаб атай:

3370 Дарди дин кўнглида бўлган кимса ул,
Кечалар уйғотмасанг-да, уйғонур.

Дилда дардинг бўлса, уйғоқсен мудом,
Тоат айлаб, Ҳаққа муштоқсен мудом.

Баски уйғотгувчи лозимдир, демак,
Сен учун тоат этувчи ҳам керак...

Кимда бул ҳасрат, бу янглиғ дард эмас,
Бошига тупроқ унинг, ул мард эмас.

Кимки бўйла дард ила топмиш сиришт,
Дўзахинг ҳечдир анга, ҳечдир биҳишт.

¹ Бу ерда «сўз» куйиш, ўртаниш маъносида.

ҲИКОЯТ АБУ АЛИ ТУСИЙНИНГ АЙТГАНЛАРИ

3375 Бу Али Тусийки пири аҳд эди,
Солики водийи жадду жаҳд эди.

Бўйла юксакларгаким етди иши,
Билмадим, етгайму унга бир киши?

Дерди: эрта аҳли дўзах зор-зор
Сўргуси аҳли биҳиштдин ошкор.

Бизга айтинг жаннат ичра ҳолингиз,
Шавқи вуслат бирла не аҳволингиз?

Аҳли жаннат жумла дерлар ул замон:
Боғи жаннат қаршимизда йўқ ҳамон.

3380 Ҳақ қуёши балқитиб ҳусни камол,
Жаннат ичра бизга кўрсатди жамол.

Ул жамолга баски термулдик тўниб,
Олдида саккиз биҳишт қолди сўниб.

Шуъла сочганда жамоли жонфишон,
Қолмади жаннатдин ул ному нишон...

Аҳли жаннат дедилар бу ҳолни,
Аҳли дўзах айтдилар аҳволни:

Эйки сиз фориғи фирдавси жинон,
Ҳар не дерсиз, ул чунондир, ул чунон.

3385 Бизку бундоқ дарду ҳасрат, ғашдамиз,
Бошдин охир ўт аро, оташдамиз.

Ёр юзин күрсатди бир бор ошкор,
Қолди ҳасрат бизга андин ёдгор.

Англадикким, бўлдик андин биз жудо,
Энди восил бўлмагай рўйи Худо.

Келди андин бизга чун жон ўрташи,
Баски эсдан чиқди дўзах оташи.

Кимга чирмашса бу оташ, ёқса гар,
Унга дўзах ўти этгайму асар?..

3390 Кимки тушгай йўлга, ёр ҳайрат анга,
Қайдা орому қарор, роҳат анга?

Куршасин ҳасрат, жароҳатлар сени,
Не жароҳат, завқу роҳат бил ани.

Етсанг ул манзилга гар мажруҳ бўлиб,
Маҳрами хилватсаройи руҳ бўлиб,

Ул жароҳатларга малҳам сурмагил,
Ичга ют дирдингнию дам урмагил...

ҲИКОЯТ

Чун Набийга юзланиб бир пурниёз,
Деди: ёзсам жойнамоз, этсам намоз...

3395 Йўқ, деди унга Расули муҳтарам,
Кум қизиқ, тупроқ-да иссиқдир бу дам.

Сур юзинг тупроқса сен Ҳақ олдида,
Доғланур ҳар бир жароҳат аслида.

Баски кўргайсен шу жонингда яро,
Доғламоқ бирлан анга этгил даво.

Доғламай кўнгилни бунда, эй жигар,
Сен нетиб Оллоҳга солгайсен назар?

Доғлагил кўнгилни дард қайноғидин,
Аҳли диллар мардни билгай доғидин...

ЙИГИРМА ТЎҚҚИЗИНЧИ МАҚОЛА БОШҚА БИР ҚУШНИНГ САВОЛ СЎРГАНИ

3400 Бошқа бир қуш сўрдиким, эй раҳнамо,
Кўзларим тортди бу водийдин қаро.

Ваҳму заҳматларга тўлмиш бу тарийқ,
Неча фарсангдир бу йўл, айт, эй рафиқ?

ХУДҲУДНИНГ САВОЛГА ЖАВОБ БЕРГАНИ

Деди: йўлда етти водий дуч келур,
Етти водийдин кейин даргоҳи нур.

Кимса бу йўлдин бораркан, қайтмамиш,
Қайтмамишким, неча фарсанг, айтмамиш.

Қайтмамиш бир кимса ортга, бас. нетиб
Айта олгай ул сени огоҳ этиб?

3405 Кетди бир-бир барчаси, бўлди бадар,
Бас, нетиб бергай улар йўлдин хабар?

ЕТТИ ВОДИЙ

Ул талаб водийси келгай илк бор,
Сүнгра ишқ водийси, улкан, беканор.

Сүнг учинчи водий – илму маърифат,
Сүнгра ул тўртинчи – истиғно сифат.

Сүнг бешинчи – водийи тавҳиди пок,
Сүнгра ул олтинчи – ҳайрат, ваҳмнок.

Охири еттинчи ул – фақру фано,
Сүнгра йўл юрмоққа ҳожат йўқ санго.

3410 Ҳақ олур даргоҳига, гум бўлгасен,
Қатра эрсанг, баҳри Қулзум бўлгасен...

ТАЛАБ ВОДИЙСИ

Чун талаб водийсига етдингми, бас,
Юз бало сенга ёғилгай ҳар нафас.

Юз бало бошингга келгач дам сайин,
Тўти эрдинг, энди бўлгайсен чивин.

Жадду жаҳд юклайди йилдан йил сенга,
Юзланур қалбингда ҳолдин ҳол сенга.

Молни лозимдир отиб, ирғитмофинг,
Мулкни лозимдир басе тарк этмофинг.

3415 Бунда қонларга бўялгайсен расо,
Барча нарсангдин бўлурсен мосуво.

Хеч вақойинг қолмагач илкингда ул,
Покламоқ күнгилни ҳам лозим бўйур.

Қолмагач күнглингда борлиқдин сифот,
Юз очур даргоҳи Ҳақдин нури зот.

Баски нур бўлгач күнгилда ошкор,
Бир талаб бўлгай юракда юз ҳазор.

Гар йўлингнда неча бир оташ эса,
Неча бир водийки, тунд, нохуш эса,

3420 Ўзни айлаб шавқидин девонавор,
Ўтда ёнгайсен куйиб парвонавор.

Талпинарсен, баски муштоқсен анга,
Қатра май бергайму деб соқий менга.

Қатра майни тотиниб, нўш этгасен,
Икки оламни фаромуш этгасен.

Фарқи дарёсен ва лекин ташна лаб,
Айлабон жонон сирин жондин талаб.

Сирниким билмоққа бўлдинг арзуманд,
Жон олувчи аждаҳо эрмас писанд.

3425 Куфру лаънат келса, этмай эътибор,
Кўз тикарсен Ул эшикка интизор.

Бас, эшик очилса, қолмас куфру дин,
Чунки ул фориғ эрур ҳар нарсадин...

ҲИКОЯТ

Амр Бу Усмон макон айлаб ҳарам¹,
Ёзди ул «Ганжнома»ни, сурди қалам.

Дедиким, Тангри уфурди руҳи пок
Ул тани одамга, ул сув эрди, хок.

Истади токи малаклар сарбасар
Топмагайлар жони Одамдин хабар.

3430 Деди: эй руҳониёни осмон,
Сажда айланг зоти Одамга ҳамон.

Эгдилар бош, ўпдилар олдида хок,
Билмайин лек не эмиш ул сирри пок.

Келди Иблис, дедиктм, мен бул нафас
Сажда этмасмен унинг олдида, бас.

Майлига, бошдин жудо бўлсин таним,
Олсалар бошимни, бордир гарданим.

Мен билармен, хок эмас Одам нуқул,
Бунда сир бор, сирни билмоғим зарур...

3435 Кўймади ул ерга бошин, чайқади,
Шамғалат қилди ва сирни пайқади.

Ҳақ дедиким, эй жосуси муттаҳам,
Сирни билдинг шамғалат айлаб бу дам.

¹ Шайх Амир ибни Усмон Маккай, Ҳусайн Мансурнинг устози, «Ганжнома» деган китоби или машҳур, Маккадан ҳайдалган, Жиддада қози бўлган, мелодий 909 йилда вафот этган.

Кўрдинг ул ганжники мен этдим ниҳон,
Ўлдирармен, йўқса, айларсен аён.

Махфий айлаб, тушмагай деб бир нигоҳ,
Ганжини кўздин яширгай подшо.

Лек бировнинг кўзи тушса андаки,
Ўлдирап ундоқ гувоҳни бешаки.

3440 Баски сен ганжимни кўрдинг ошкор,
Айладим мен бошинг узмоққа қарор.

Этмасам бошинг жудо тандин сени,
Йўқ ажаб, оламга ёйгайсен ани...

Деди: ё Раб, вақту муҳлат бер менга,
Чора қил мендек забун, бечорага.

Ҳақ таоло деди: бердим муҳлатинг,
Лек бўлур бўйнингда тавқи лаънатинг.

Урдим ул номингга каззоб деб рақам,
То қиёмат сен лаинсен, муттаҳам.

3445 Шунда Иблис дедиким, ул ганжи пок
Бас, аёндир менга, лаънатдин не бок?

Лаънат ул сендин ва раҳмат ҳам сенинг,
Банда ул сендин ва қисмат ҳам сенинг.

Гар лайнлик қисматимдир, бок эмас,
Оғу ҳам даркор, фақат тарёқ эмас.

Халқни кўрдим, барчаси раҳматталаб,
Лаънатинг олдим фақат мен беадаб.

Лаънатингни истаган бир банда йўқ,
Лаънат олган мен каби афганда йўқ...

3450 Инчунин бўлгай талаб, толиб эсанг,
Йўқки даъвойингда гар ғолиб эсанг.

Топмасанг излаб уни, борму ажаб,
Ул йўқолганмас, талабда йўқ талаб...

ШИБЛИЙ ҲИКОЯТИ

Жон бераркан Шиблий эрди бекарор,
Кўзларин юммишди, кўнгли интизор.

Белига зуннори ҳайрат бойлабон,
Бир уюм кул узра тутмишди макон.

Эрк берарди гоҳи ул кўз ёшига,
Гоҳида тупроқ сочарди бошига.

3455 Биттаси кўрди, деди: бу не эмиш,
Бўйла бир фурсатда зуннор бойламиш?

Деди: мундоқким ёнармен, не қилай?
Рашк, ҳасаддин ўртанаармен, не қилай?

Кўзни юмдим икки оламдин, фақат
Бул замон Иблисга айлармен ҳасад.

Лаънати, деб этди Иблисга хитоб,
Менга эрса на хитобу на итоб.

Бунда Шиблий бағри хун кутгай ани,
Ул эса бергай бировга бергини.

3460 Шоҳ тарафдин тошми ё гавҳат келур,
Ким тафовут айласа, номард эрур.

Гавҳарин тутсанг азиз, тошини хор,
Шоҳ тарафдин сенга бўлмас эътибор.

Тошу гавҳарга на душман бўл, на дўст,
Сен ани кўргилки, бермиш сенга дўст.

Яхши де, тош отса ул маъшуқи маст,
Тошга боқ, ёт берган ул гавҳаргамас.

Эр киши бўлгай талабда интизор,
Ҳар замон йўл узра этгай жон нисор.

3465 Ул талаб айларда сокин бўлмагай,
Бир даме ороми мумкин бўлмагай.

Бир замоне гар бўшаштиrsa талаб,
Йўл аро муртад бўлур ул беадаб...

МАЖНУН ҲИКОЯТИ

Бир азиз Мажнунни кўрди дарднок,
Титкилаб тупроқ, совургай эрди хок.

Сўрди: эй Мажнун, не изларсен бу дам?
Дедиким, Лайлини ахтармоқдаман.

Айтди: ул тупроқда не қилсин сенга?
Деди: излармен, топилгай деб менга...

ШАЙХ ЮСУФ ҲАМАДОНИЙ ҲИКОЯТИ

3470 Ҳазрати Юсуф Ҳамадоний, аё,
Соҳиби асрор эди, чин муқтадо.

Дер эдиким, боқсангиз болову паст¹,
Неки қўзга ташланур ул ерда, бас,

Ундаги ҳар зарра Яъқубдир магар,
Юсуфи гумгаштадин сўргай хабар.

Дард керак йўл узра, бўлмоқ интизор,
Дарду муштоқлиқда кечсин рўзгор.

Холи эрсанг гар ғаму озоридин,
Бир замон дам урма сир-асоридин.

3475 Кимда дард йўқдир, қароқчи ул эмиш,
Дардини чекмай, Анал-Ҳақ ким демиш?

Ташқари чиқма кўнгилдин бир даме,
Қон ютиб нон ўрнига ўлтири даме.

Она қорнида гўдак қон ютса, бас,
Ташқари чиққанда ғавғо ҳар нафас.

Баски қон ютсанг-да сен сабр айла, ҳай,
Бир куни дунё ишингни ўнглагай.

Истагил ё истама, сабр айлагин,
Ўрганурсен йўлни қай бир кимсадин.

3480 Она қорнида гўдакдек қон ютиб,
Сен-да ўлтири қонлар ичра сабр этиб.

¹ Болову паст – юқори ва қуйи.

Эрмасанг гар бунда аҳли таҳният¹,
Не учун йўқ сенда мотам, таъзият?

Бўлмаса сенга севинчу васли ёр,
Тур оёққа, чек басе ҳижрону зор.

Ёр жамолин қўрмасанг турма қараб,
Қалқ оёққа, айлагил асрор талаб.

Гар талаб ҳам этмасанг, нодон, уял,
Юрма бошвоқсиз эшакдек бесамар.

ҲИКОЯТ

3485 Тошга айланмиш бирор Чин тоғида,
Ёш тўкарди кўзлари ғам доғида.

Йиғлабон, ёшлар тўкаркан зор-зор,
Тош бўлиб қотгайди ёшлар шашқатор.

Гар булут бағрига етса бўйла тош,
Ғам ёғар, андуҳ ёғар эрди тутош...

Ул – илмдир, ростгўйлик мазмани,
Чинда ҳам бўлса, бориб, ахтар уни.

Етмади унга бирорлар ҳиммати,
Тошга айлантириди куфри неъмати.

3490 Қопқоронғудир бу дунё, ал-фироқ,
Илму фан йўлларда машъалдир, чироқ.

Раҳбари жондир шу зулмат ичра ул,
Нур эрур нур ичра, талъат ичра ул.

¹ Таҳният – табрик, муборакбод.

Зулмат ичра бир вақое йўқ сенга,
Чун Скандар раҳнамое йўқ сенга.

Йўқ эса илкингда бундоқ жавҳаринг,
Кўп пушаймонлар чекар жонинг сенинг.

Жавҳарингни топмасанг, эй булҳавас,
Энг пушаймонлиғ ўзингсен, ўзгамас.

3495 Икки олам жонни тутмишлар макон,
Тан у жондин, жон бўлиб тандин ниҳон.

Бул фано дунёсидин чиқдингми, бас,
Сенга шайдир, одамий, ул жойи хос.

Жойи хоским, талпиниб етсанг анга,
Очилур юз бир синоатлар сенга.

Йўл аро қилсанг магар, ҳолинггавой,
Қолмагай ному нишонинг ҳойнаҳой.

Ухлама тунларда, кундуз тотма туз,
Очмагунча то талаб қалбингда юз.

3500 Сен талаб этгил, талаб битсин ҳама,
Кундузи туз тотма, тунлар ухлама...

ҲИКОЯТ

Шайх Миҳна бўлди дилтанг, бағри хун,
Юрди сахрогоға кўнгил ёзмоқ учун.

Кўрди бир қишлоғини олисдан ул,
Хўқизин судрарди чол, сиймоси нур.

Шайх яқинлашди анга, берди салом,
Нотавон ҳолини англатди ҳамон.

Чол боқиб деди анга: эй Бу Саид,
Ер юзидин то ўшал Арши мажид.

3505 Тўксалар хирмон этиб буғдой тамом,
Этсалар бу ишни юз кара давом.

Сўнгра бир қуш қайданам пайдо эса,
Неча минг йил битталаб буғдой еса.

Сўнгра ул қуш неча бир вақту замон
Чарх уриб, сайдар айласа даври жаҳон.

Етмаса жонингга даргоҳдин атири,
Бул узун муддат сенга бир лаҳзадир.

Толибонларга сабр лозим басе,
Толибу собир бўлолмас ҳар касе.

3510 Ёнмагунча то талаблар тобида
Қон мушк бўлмас кийикнинг нофида.

Кетса кўнгилдин талаб, эй муҳтарам,
Қонга тўлгай гарчи гардун бўлса ҳам.

Кимда йўқ эрса талаб, мурдор ўшал,
Одам эрмас, суврати девор ўшал.

Кимда йўқ эрса талаб, ҳайрон эрур,
Ҳошаалло, инс эмас, ҳайвон эрур.

Гар қўлингга тушса бир ганжу гуҳар,
Сен талабни айла афзун сарбасар.

3515 Улки ганжга кўз тикиб, хурсанд эрур,
Бил, ўшал ганжу гуҳарга банд эрур.

Йўлда ким бир нарсага дил берса, бас,
Нарса бут бўлгай анга, ул бутпараст.

Ёнди жонинг ишқ аро бехуш бўлиб,
Бир пиёла май ила сархуш бўлиб.

Бир пиёла май ила маст бўлма, ҳай,
Май талаб қил, бениҳоя бунда май...

ҲИКОЯТ

Бир кеча Маҳмуд сипоҳдин айрилиб,
Кўрдиким, бир кимса йўл узра туриб,

3520 Ағдааради қум, этар эрди уюм,
Бозбандин шоҳ ечиб, отди шу зум¹.

Бир уюм қум устига, кетди нари,
Учди тулпори анинг ел сингари.

Келди боз иккинчи оқшом шаҳриёр,
Кўрди, ул кимса ҳамон машғули кор.

Дедиким, эй, кеча бунда топганинг
Етти авлодингга етгайдир сенинг.

Ахтарарсен не уйиб қумларни боз
Подшолик қил, яшайвер бениёз.

3525 Деди кимса: бунда топдим давлатим,
Топдим ул ганжи ниҳоним, сарватим.

¹ Бозбанд – подшолар билагига боғлайдиган қимматбаҳо боғич.

Баски давлат бунда бўлди ошкор,
Энди менга шул эрур оламда кор.

Мард бўлиб қоқсанг, эшик очилгуси,
Истасанг, йўл сенга равshan бўлгуси.

Бўлма ғофил, оч кўзингни йўлга тик,
Бор, талаб қил, ёпиқ эрмасдир эшик...

ҲИКОЯТ

Бехабар бир кимса айлаб илтижо,
Дер эди: очгил эшикни, эй Худо...

Робиа бул сўзни тингларкан, демиш:
Менга айтгил, ул қачон ёпиқ эмиш?

3530 Ул эшик очиқ ҳамиша, эй ўғил,
Сен бориб, андин муродинг истагил...

ИШҚ ВОДИЙСИ

Сўнгра ишқ водийси очгайдир варак,
Унга етганлар бўлур оташга ғарқ.

Ким демишким, ул басе оташ эмас,
Оташ эрмас эрса, ушшоқ хуш эмас.

Ошиқ улдирки, басе оташ эрур,
Ёндириб, куйдиргучи саркаш эрур.

3535 Оқибатандеш бўлолмас бир замон,
Ғарқи оташ ул, яна барқи жаҳон.

Лаҳзае на куфр билгай ул, на дин,
Заррае на шакку шубҳа, на яқин.

Йўлида яхши, ёмони бўлмагай,
Келса ишқ, яхши, ёмони қолмагай...

Эйки, муртад, сен бу сўзлардин йироқ,
Йўқ сенинг жонингда завқу иштиёқ,

Нақд бергай ошиқ ҳар не борини,
Нақд бериб, кўргай у васли ёрини.

3540 Ўзгаларга ватъда бўлгай эрта кун,
Лекин ошиқ аҳлининг нақди бугун.

Ёқмагунча ўзни то якбора ул,
Чора топгайдир нетиб бечора ул?

Жавҳари то жонни маскан этмагай,
Шуғласи кўнгилни равшан этмагай.

Чун балиқ дарёдин айрилган замон
Талпинур дарёга тушсам деб ҳамон.

Ақл ишқ савдосида устоз эмас,
Ишқ ақлга улфату ҳамроз эмас.

Ишқ оловдир, ақлу хуш монанди дуд,
Ишқ келса, ақлу хуш қочмасми зуд?

Гар насибинг эрса ғайбдин сенга кўз,
Сен кўрарсен қайдин эрмиш ишқу сўз.

Ҳар не боринг бори ишқдандир сенга,
Ишқ ила масти бўл-да, бошинг бер анга.

Файб күзи чиндан насибанг эрса ул,
Сенга зарроти жаҳон ҳамроуз.

Ақлу хуш күзи-ла солсанг сен назар,
Ишқ сенинг қаршингда бўлмас жилвагар.

Тантию афтода лозим ишқ аро,
Мардуми озода лозим ишқ аро.

Мард эмассен, унда ошиқсен нечук?
Мурдадирсен, ишққа лойиқсен нечук?

Зиндадил бўлгай бу йўлда мардвор,
Юзта жонин ҳар нафас этгай нисор.

ҲИКОЯТ

Хўжа ошиқ бўлди бир шарбатчига,
Бир йўла ўт тушди сабри, тинчига.

Ишқ ила чун фатҳи савдо бўлди ул,
Эл аро шарманда, расво бўлди ул.

Ҳар не моли бор, кечарди бетиним,
Ўрнига шарбат ичарди бетиним.

Ҳеч вақоси қолмади, бўлди гадо,
Битта ишқи бўлди юз, этди адo.

Баъзилар гоҳо берарди нон анга,
Оч эди, лекин кўринмас жон анга.

Ул ўшал нондин кечар эрди яна,
Нон бериб, шарбат ичар эрди яна.

Ўлтиарди оч-наҳору тийраком,
Фикрида шарбат, фуқоъ эрди мудом.

Биттаси сўрди: аё ошиғи зор,
Ишқ надир, сиррини этгил ошкор?

Деди: ишқ ул, юз жаҳон молингни, бас,
Бир қадаҳ шарбатга этгайсен эваз...

Тушмагунча бошига савдою сир,
Кимса билмас ишқ надир, савдо надир.

ҲИКОЯТ

Аҳли Лайли Қайсни ҳеч суймас эди,
Чун яқин келмоққа ҳам қўймас эди.

Кўй боқар эрди чўпон атрофда, бас,
Олди бир қўй терисин Мажнуни маст.

3565 Ўзни ул терига буркаб олди ул,
Ўзни бир қўй сувратига солди ул.

Сўнгра ёлборди чўпонга: эй ғани,
Илтифот айла, сурувга қўш мени.

Лайли ёққа ҳайда қўйларни ҳамон,
То кўрай Лайлим юзини бир замон.

То тутиб пинҳон ўзимни ёрдин,
Бахра олгаймен ўшал дийдордин...

Бўлса гар кўнгилда чун дардинг сенинг,
Тола мўйинг ҳам бўлур мардинг сенинг.

Эй дариғо, дарди мардон сенда йўқ,
Куввати ул марди майдон сенда йўқ.

Оқибат Мажнун ўзини қўй қилиб,
Лайли манзилгоҳига борди елиб.

Чун йироқдин Лайлига тушди кўзи,
Баҳри нур ичра тамом қолди ўзи.

Аавали қўзғалди тўлқин, урди жўш,
Охири тарк этди буткул ақлу ҳуш.

Ишқ суви чун босди, ғарқ этди уни,
Олди чўпон елкага, элтди уни.

Юзига сув сепди, ул масти хароб
Сесканиб, қўз очди, чекди изтироб.

Эртаси сахрода маъюсу малул,
Неча қавми бирла ўлтиришиди ул.

Биттаси деди анга: эй сарфароз,
Қип-яланғочсен, танингда йўқ либос.

Қайси тўнни хушлагайсен, айт менга,
Келтирай қайси либосингни сенга?

Деди: менга ҳеч либосинг хуш эмас,
Ёпгали устимга пўстак бўлса, бас.

Келтиринг шу онда бир қўй терисин,
Ёндирай исриқни, қўздин асрасин.

Атласу кимхобдин аъло менга ул,
Лайлинин севганга пўстак хуш эрур.

Ёпиниб пўстак етишдим ёрга мен,
Тўн кийиб боргаймидим дилдорга мен?

Пўстак ичра билдим ул ёр розини,
Энди этмасмен нечук эъзозини?

Ишқ қерак, ақлу хирадни ҳайдасин,
Дил сифотингни мубаддал айласин.

Бўлмагай ошиқда ўзга фикр ўй,
Жон тикарсен унга, ўзга гапни қўй.

Кўй қадам, жонинг сарафroz эрса ул,
Бу ўйнимас, балки жонбозлик эрур.

ҲИКОЯТ

Чун Аёзга бўлди ошиқ бир фақир,
Тушди эл оғзига, ошкор бўлди сир.

Йўлга чиқса отланиб ҳар галл Аёз,
Ул гадо ҳам ортидин тушгайди боз.

Тушса майдонга Аёзи мушкбор,
Тўпидин узмасди кўз ҳайрону зор.

Бу хабар Маҳмудга етди айланиб,
Ки Аёзга бир гадо ошуфта деб.

Эртаси тушди Аёз майдонга то,
Ортидин тушди яна ул мубтало.

Кўзлари коптоқдаю чолок эди,
Ўзи чун чавгон еган копток эди.

Ул тарафга солди султон бир нигох,
Күрди, жони ўтда, ранги каҳрабо.

Тўп каби оворайи майдон эди,
Ҳар томонга чирпираб, сарсон эди.

3595 Чорлади Маҳмуд, дедиким, эй гадо,
Шоҳ ила тенглашмоқ истарсен, аё?

Ринд дедиким, гар гадомен, гар абас,
Ҳимматим ишқ ичра сендин кам эмас...

Ишқу мискинлик туташ ҳамсоядир,
Бўйла сарватдирки, бесармоядир.

Ишқ топар мискинлик ичра тузуtot,
Ишқ ўзи мискинга лойиқ бир сифот.

Сенки дунё шоҳи, дилафрухтасен,
Ишққа мен лозимки, чун дилсўхтамен.

3600 Ҳар не боринг васл учун восита, бас,
Дарди ҳижронга чидаб бер бир нафас.

Васл учун мунча этарсен кору бор,
Мард эсанг, бўл дарди ҳижронга дучор.

Шоҳ дедиким, эйки маству бехабар,
Мунчалар коптокка согайсен назар?

Ринд деди: ул мен каби саргаштадир,
Мен у янглиғмен, таним оташдадир.

Ул билур қадримни, мен билгум уни,
Иккимиз ул битта чавгон тутқини.

3605 Иккимиз саргаштаю афтодамиз,
Бошсизу жонсиз бўлиб юрмоқдамиз.

Ул билур ҳолимни, мен ҳам бегумон,
Икки ғамдош дардлашармиз ҳар замон.

Лекин ул давлатлидир мендин расо,
Отининг наълини ўпгай гоҳ-гоҳ.

Гарчи тўпдек мен-да меҳнат ичрамен,
Лекин ортиқроқ мاشаққат ичрамен.

Тўп танига зарбайи чавгон етар,
Лекин андин менга заҳми жон етар.

3610 Гарчи тўпга зарба етгай беқиёс,
Лек уни қувлаб, елиб юргай Аёз.

Гарчи заҳмим кўп эрур тўп заҳмидин,
Ул менингмас, мен қувармен ортидин.

Тўп гаҳи тургай Аёзнинг олдида,
Мен гадо эрсам, ҳамиша ортида.

Олдида турса, ҳузур етгай анга,
Васлидин завқу сууруп етгай анга.

Етмади чун менга бўйи вуслати,
Кетди коптокка висоли давлати...

3615 Шаҳриёр дедики, бундоқ сўйладинг,
Менга муфлисликни даъво айладинг.

Сўзларинг рост эрса гар, эй бенаво,
Баски даъво айладинг, келтир гувоҳ.

Деди: жоним борки, мен муфлис эмас,
Истагим ҳам бўйла бир мажлис эмас.

Ишқ аро бўлдим ва лекин жонфишон
Жонфишонлик бори муфлисдин нишон.

Сенда, эй Маҳмуд, қани маънойи ишқ?
Жон фидо қил, айласанг даъвойи ишқ...

3620 Айтди бу сўзларни кесди забон,
Жонини жононга берди шул замон.

Кўйди тупроқ узра бош ул бенаво,
Кийди шоҳ дунёси ғамлардин қаро.

Сенга жонбозлик кўринса сусту ғўр,
Кел, ўйинга боқ ўзинг, санъатни кўр.

Кел бери, деб гар сенга етса хитоб,
Бўлмагай бу йўлда ортиқ лофу қоф.

Бош, оёқсиз унда юргайсен мудом,
Бор эшиклар ланг очикдирлар тамом.

3625 Бас, юргайсен топармен деб хабар,
Ақлу жонинг бўлгуси зеру забар.

Барчадин озоду фориғ ўзданам,
Бўлмагай қаршингда ортиқ ёки кам.

Ақлу ҳушга бунда йўл йўқ, ташнасен,
Йўл босиб борган сари саргаштасен.

ҲИКОЯТ

Чун сафар қилди Ажамга бир араб,
Унга бу эл одати келди ажаб.

Сайр этар эркан гузарда бехабар,
Бир қаландархонага солди назар.

3630 Неча риндлар давра тутмишлар эди,
Икки оламни унутмишлар эди.

Барчаси тубан эди, қайсар яна,
Ул биридин бул бири баттар яна.

Кўза эрди ҳар бири илкида, бас,
Барчаси май қуйқасидин маст-алааст.

Чун уларни кўрди ул, майл айлади,
Ақлу жонин ўлтиришга шайлади.

Кўрдилар ул қавм, чунон эрди араб,
Жону дил бирлан боқарди мўлтираб.

3635 Дедилар: кир ичкари, қўйди қадам,
Ҳамнафас бўлди уларга бешу кам.

Ринди маст бўлди, йўқотди ўзни ул,
Берди қўлдин мастилигу номусни ул.

Молу мулку симу зарни басма-бас
Сочди буткул, ҳеч вақосиз қолди кас...

Бир қадаҳ май сунди унга биттаси,
Турғизиб, секин жўнатди хулласи.

Юртига бўлди равона ул араб,
Муфлису зору гадову ташналаб.

3640 Сўрдилар барча: ажабдир ҳолатинг,
Қайда ул олтин, кумушлик давлатинг?

Не эди йўллар босиб, ҳормоқ сенга?
Бехайр бўлди Ажам бормоқ сенга.

Бенавосен мунчалар, афтода, хор,
Йўлтўсар ўғригами бўлдинг дучор?

Деди: йўлда кўз солиб ҳар ёнага,
Ногаҳон кирдим қаландархонага.

Бошқаси ёдимда йўқ, ёдимда то
Симу зар харжланди, қолдим бенаво.

3645 Сўрдилар: ким ул қаландарлар, ахир?
Деди: ҳолимга боқингиз, англатир...

Ул араб йўкликка ботмишди тамом,
Ёдида «кир ичкари», ёлғиз калом.

Йўлга кир ё бош олиб кет бир томон,
Жонга кўш жонингни ўт бир томон.

Жон ила этсанг қабул асрори ишқ,
Жон бериб, бошингни эт даркори ишқ.

Бенаво қолсанг яна, жондин нари,
Сенга қолган сўз бўлур: кир ичкари...

ХИКОЯТ

3650 Бор эди соҳиб камолу хуш күнгил,
Бўлди бир соҳиб жамолга ошиқ ул.

Севгани учраб касалга ногаён,
Ётди бемор, бўлди ранги зарьфарон.

Кундузи тун бирла тўқнашди магар,
Битди дармони, яқинлашди ажал.

Айтдилар бу гапни ошиқقا ҳамон,
Кўлда ханжар, ул югурди ёр томон.

Дерди: маҳбубимни ўлдиргум атай,
То ажал бирлан шу асно ўлмагай...

3655 Дедилар: ҳай, жинни бўлдингми, уят!
Ул санамни ўлдиришдин не мурод?

Тўкма қон, сабр айласанг, не бўлгуси?
Ҳа демай жон бергай ул шўрлик ўзи.

Мурда ўлдирмак-ла не ҳосил бўлур?
Мурда бошин кесса ким, жоҳил бўлур.

Деди: ўз илким-ла ўлдирсан ани,
Ўлдирурлар ал-қасос айлаб мени.

Рўзи маҳшарда этиб мардумни жам,
Ал-қасос деб ёндирурлар мисли шам.

3660 Бас, бу дунёда ўлармен ёр учун,
Сўнгра уқбода куярмен ёр учун.

Икки дунёда бўлур комим менинг,
«Ўлди, куйди» деб қолур номим менинг...

Ошиқ аҳли бўйла жонбозлик этар,
Икки оламга қиё боқмай ўтар.

Заҳмати жон чекмагайлар бир замон,
Кўнгил узмишлар бу дунёдин тамом.

Жонки кетса ўртадин, бежон бўлур,
Хилват айлар, маҳрами жонон бўлур.

3665 Хилват этса, йўлда бир дайёр йўқ,
Икки олам ёру бир ағёр йўқ.

Кимки бу хилватга топса йўл даме,
Кўрмагай ул аҳли хилватда ғаме.

Мард дема, то етмагунча дард анга,
Ўйлаким, етмас бу йўлдин гард анга...

ҲИКОЯТ

Чун Халилиллоҳга етди ўлмаги,
Бўлмади осон унинг жон бермаги.

Деди Азроилга: эт Оллоҳга арз,
Истамасмен сенга жон бермакни, бас.

3670 Ҳақ таоло деди: дўст эрсанг, халил,
Сен бу дам дўстингга жонинг эт сабил...

Жон берурлар жонга чун етганда тиғ,
Дўстидин ким жонни тутгайдир дариғ?

Сўрдилар чун: эй Халил, шамъи жаҳон,
Бермагайсен нега Азроилга жон?

Аҳли ишқ жонбозлик айлар бешу кам,
Сен нечун жонингни асрайсен бу дам?

Деди: жон бермоқчи эрдим мен ҳамон,
Тушди Азроил арога ул замон.

3675 Ўт аро келмишди менга Жабраил,
Ҳам демишди: ҳожатинг айт, эй Халил.

Ул тарафга боқмадим мен бир қиё,
Йўлни тўсди, ҳамдамим эрди Илоҳ.

Боқмагандим унда Жаброилга мен,
Жон нечук бергаймен Азроилга мен?

Этмагаймен баски жонимни нисор,
Эт нисор, деб айтмагунча Биру Бор.

Этса гар жон бергали фармон менга,
Икки пулдир бу жаҳону жон менга.

3680 Токи Ул амр этмагунча, эй киром,
Кимсага жон бермагаймен, вассалом...

МАЪРИФАТ ВОДИЙСИ

Сўнг очилгайдир назарга бир улуг
Маърифат водийсиким, поёни йўқ.

Кимса борму, ҳаддига бул ҳавзанинг
Кўз солиб чун боши айланмас анинг?

Бунда йўллар айру, чандон ўзгадир,
Солики тан, солики жон ўзгадир.

Жону танда баски нуқсону камол,
Ҳам тараққийдир уларда, ҳам завол.

3685 Ложарам водийда йўллар кўп неча,
Ҳар бирининг йўлчиси бир ўзгача.

Бу гўзал йўл узра, айтгил, ҳеч маҳал.
Филга ургимчак бўлурму ҳамсафар?

Ҳар киши боргай камоли борича,
Курби етгунча ва ҳоли борича.

Пашша гарчи неча парвоз этгуси,
Сарсари елга қачон ул этгуси?

Мухталифдир баски бу йўлда юриш,
Кўкда учгайму у қуш янглиғ бу қуш?

3690 Маърифат бунда тафовут айлагай,
Ул бири меҳроб, бири бут танлагай.

Бул табаррук йўлда чун олий сифат,
Порласа гар офтоби маърифат,

Ҳар киши ўз қадрича кўргай уни,
Ҳам ҳақиқат бобида ўз ўрнини.

Сирри дониш унга чун равshan бўлур,
Гулхани дунё анга гулшан бўлур.

Мағзни кўргайдир кўраркан пўстин ул,
Ҳар қаён қўз солса, кўргай дўстни ул.

3695 Ҳар не кўрса, рўйи Ҳақни кўргуси,
Зарра-зарра кўйи Ҳақни кўргуси.

Юз туман асрор, ечилса ул ниқоб,
Юз очар унга мисоли офтоб.

Юз туман мард ҳам адодирлар мудом,
То бири бўлсин деб асрорбин тамом.

Кимсайи комил керакдир йўлда чун,
Ул буюк денгизда сузмоқлик учун.

Етса асрор, дилда завқ пайдо бўлур,
Ҳар замон бир янги шавқ пайдо бўлур.

3700 Ташналиқ жонларда ҳар дам бундадир,
Юз туман хуни ҳалол ҳам бундадир.

Қўл чўзиб, етсанг магар Арши мажид,
Бир нафас тарқ этма: ҳоли мин мазид?¹

Баҳри ирфонда сузиб, отгил қулоч,
Йўқса, бор, бошингга тупроқларни соч.

Бўлмаса ушбу жаҳонда хуш даминг,
Не учун ҳолингга йўдир мотаминг?

Гар насибинг эрмас эрса васли ёр,
Нега чекмайсен базе ҳижрону зор?

3705 Сенга хуш эрса агарда бул жаҳон,
Ройгон бўлмасму умри жовидон?

¹ Байтнинг мазмуни: қўлинг арши мажидга етса ҳам «яна йўқми?» дейишдан бир нафас тўхтама.

Маърифатда бор ҳамиша салтанат,
Жаҳд этиб, касб айлагил олий сифат.

Ҳар кишиким масти ул ирфон эрур,
Жумла олам аҳлига султон эрур.

Мулки олам, ўйлаким, мулки унинг,
Ул фалак ҳам кемаси, фулки унинг.

Кўрмасанг гар сен жамоли ёрни,
Бор, талаб қил ул азиз асрорни.

3710 Гар талаб ҳам этмасанг сен, ҳай, уял,
Юрмагил яйдоқ эшакдек дарбадар.

Тарки жон айлаб югур Ҳақ сўйига,
Токи етгайсен кўнгилнинг кўйига.

Не эмиш ушбу жаҳоннинг давлати?
Ўзга мулқдандир у шарбат лаззати.

Жумла мотам ичра, рўйи зард ила,
Оҳ урарлар бас уни деб лард ила..

ҲИКОЯТ

Бош суқиб Маҳмуд бир вайронага,
Келди дуч бир бедилу девонага.

3715 Бошини эгмишди, бағри доғ эди,
Бошида ташвиши гўё тоғ эди.

Кўрди шоҳни чун дедиким, кет нари,
Йўқса, жонингга чекармен ханжари...

Шоҳ эмассен, ёт эрур ҳиммат сенга,
Ҳайф эрур Ҳақ мулкидин неъмат сенга.

Деди Маҳмуд: ҳой, мени кофир дема,
Битта сўз айтгил-да, сўнгра сўйлама.

Деди ул девона: билсайдинг агар,
Шоҳ бўлиб, кимдин йироқсен шу маҳал.

3720 Ўлтириб тупроғу қул узра давом,
Бошинга сочгай эдинг оташ мудом...

ТЎРТИНЧИ - ИСТИҒНО ВОДИЙСИ

Сўнгра ул водийи истиғно келур,
Унда не даъво ва не маъно бўлур.

Бениёзликдин етишгай сарсари,
Йўқ бўлур бир зумда мулки, кишвари.

Етти денгиз битта тўлқин бўлгуси,
Етти дўзах битта учкун бўлгуси.

Бунда саккизта биҳиштинг ҳам ўлик,
Бунда етти дўзахинг муздир, сўник.

3725 Бир чумолига бу ерда, эй ажаб,
Юзта фил қурби берилгай бесабаб.

Битта калхат ризқи бўлсин деб йирик,
Юзта карвон ичра қолмас бир тирик.

Кўкда юз минглаб малаклар ёнди чун,
Ерда Одам машъали ёнсин учун.

Неча юз минглаб оғочдин учди рух,
Токи билсин деб дурадгорликни Нуҳ.

Пашшалар лашкарни босди ёприлиб,
Токи Иброҳим етишгай бош бўлиб.

3730 Неча минглаб дийдалардин оқди қон,
Токи зиндондин Юсуф чиқсин, дебон.

Неча юз минглаб гўдаклар ўлдилар,
То Халил топгунча етсин деб назар.

Бўлди минглаб халқ басе оташпараст
То халил топшгунча оташдин халос.

Юз туман халқ бойлади зуннор басо,
Бўлмагунча маҳрами асрор Исо.

Бўлди торож неча минг жону кўнгил,
То Муҳаммад чиқмади меърожга ул.

3735 Эскидир, янги, қадрсиздир ҳама,
Хоҳи бир иш айла, хоҳи айлама.

Гар жаҳони дилни қўргайсен кабоб,
Сен фараз этгилки туш эрмиш бу, хоб.

Гар бу денгиз ичра минглаб жон чўкар,
Баҳр учун ул қатрайи шабнам магар.

Неча юз минг халқ ўлар бўлса шу тоб,
Соядир, кетгай чиқаркан офтоб.

Кўқдаги анжум тўқилса, не демак,
Даҳр оғочидин узилмиш битта барг.

2740 Кетса шу дунё ародин, не эмиш?
Бир чумолининг оёғи лат емиш.

Икки олам соврилиб, битса шу дам,
Ўйла, бир қум донаси топмиш адам.

Қолмаса гар деву инсондин асар,
Бу камайган қатра бир ёмғир қадар.

Жумла танлар бўлса бирдан зери хок,
Даҳр аро бир тук йўқолмишдир, не бок?

Бунда жузву куллагар бўлса тамом,
Бир сомон чўпи йўқолмиш, вассалом.

3745 Кетса гар тўқиз фалак ҳам, ўйла, бу –
Етти денгиздин камаймиш қатра сув...

ҲИКОЯТ

Бор эди қилоқда барно ўспирин,
Чоҳга тушди ул Юсуфдек, билмайин.

Тошу тупроқ остида қолди тани,
Бир киши келди, халос этди ани.

Ҳоли танг эрди, хароб аҳволи, бас,
Умридин қолмишди икки, уч нафас.

Эрди, эвоҳки, Мұхаммад ном анга,
Бир қадам қолмишди то итмол анга.

3750 Отаси кўрди, деди: жоним болам,
Эй кўзим нури, юрак қоним болам.

Эй Мұхаммад, мен томонга ташла күз,
Менга бир сүз айт... Дедиким, қайда сүз?

Қайда мен? Қайда Мұхаммад? Қайда жон?
Айтди шу сүзларни, жон берди ҳамон...

Боқ ўзинг оламга, эй соҳиб күнгил,
Ул Мұхаммад қайда, Одам қайда ул?

Қайда Одам, зурриёти қайдадир?
Жувзиёти, куллиёти қайдадир?

3755 Қайда еру тоғу дарёву фалак?
Қайда деву қайда инсону малак?

Қайдадир ул неча минглаб жисми хок?
Қайдадир ул неча минглаб жони пок?

Қайдадир ул жон бераркан, нола, ох?
Жону танлардин не қолди? Ҳеч вақо.

Икки оламни, яна юзлаб жақон
Мулкини йиғсанг, қориштирсанг ҳамон,

Бир сарой пайдо бўлур қаршингда то,
Сол уни ғалвирга, қолмас ҳеч вақо...

ҲИКОЯТ

3760 Шайх Юсуф муқтадойи роҳ эди¹,
Сийнаси поку дили огоҳ эди.

Дер эдиким, чиқ баланд Арш устига,
Сўнгра тушгил то қаро ер остига.

¹ Шайх Юсуф Ҳамадоний.

Неки бўлмиш, неки бор, не бўлгай ул,
Ҳар нечук яхши, ёмон – бир заррадир.

Қатрадир, ул баҳри жуддин келгуси,
Бўлса не, гар бўлмаса, не бўлгуси?

Йўқ бу водий ичра соҳил, эй салим,
Кўргай ул соҳилни жоҳил, эй салим,

3765 Гар ёниб, юз бора хун бўлгай дилинг,
Бўлмагай сенга мұяссар манзилинг.

Ҳар нафас кезсанг жаҳонни сарсари,
Аввалин жойингда тургайсен ҳали.

Ҳеч киши бу йўлга поён топмамиш,
Ҳеч бирор бу дардга дармон топмамиш.

Юрмасанг гар, муз қотиб турсанг, сўник,
Ё ўлакса, ёки бўлгайсен ўлик.

Турмасанг, елсанг, югурсанг доимо,
Кел бери, деб сенга етгайдир садо...

3770 На туришдин, на югурмоқдин асар,
На ўлишдин, на туғилмоқдин самар.

Мушкилот бошингга тушмиш, не илож?
Яхши устодинг-да йўқмиш, не илож?

Ур бошингни, урма, эй соҳиб сукут,
Кўй бу ишни, ишни бошла, ишга ўт.

Ҳам ишинг тарк айлаю ҳам ишлагил,
Ишлагил камроғу ишни пешлагил.

Иш бўлур, ишг дорую дармон сенга,
Иш бўлур, иш охири поён сенга.

3775 Бўлмаса иш сенга дармон, қувватинг,
Бўлгай ишсизлик насибу қисматинг.

Аввалин қилган ишинг тарк айлагил,
Ишни қилсанг, қилмасанг ҳам яхшидир.

Не билурсен ишниким, бўлмас билиб,
Билганинг ул ишни бўлгайму қилиб?

Бунда истиғнога ташла бир назар,
Хоҳ мутриб бўл, хоҳи навҳагар.

Бунда истиғно чақин чақмиш чунон,
Тафтидин ёнмиш, ёқилмиш юз жаҳон.

3780 Юз жаҳон бунда тўкилмиш, бунда хок,
Йўқ эса олам бу водийда, не бок?..

ҲИКОЯТ

Кўрганинг бордир, ҳакими пурхирад
Лой шуваб, бир лавҳа ҳозирлар фақат.

Сўнг чизар ул лавҳага нақшу нигор,
Собиту сайёра бўлгай ошкор.

Ҳам фалак пайдо этар ул, ҳам замин,
Гоҳ анга, гоҳ бунга тортгай диққатин.

Ҳам нужуму ҳам буруж пайдо қилур,
Ҳам уфулу ҳам уруж пайдо қилур¹.

¹ Уфул – сайёранинг пастлаб, ботиши; уруж – сайёранинг баландлаб, болқиши.

3785 Ҳам касофат, ҳам саодатни чизар,
Манзил айлаб, мавту мавлудни чизар¹.

Не ёмон, не яхшидир, этгач ҳисоб,
Тахтанинг бир четидин тутгай шу тоб.

Ўчирур, гўёки ул бор бўлмамиш,
Ул ҳама нақшу нигор ҳеч бўлмамиш.

Бўйладир ушбу жаҳоннинг муҳлати,
Сидрилиб, бир онда ўчгай суврати.

Тоб беролмайсен бу ганжга сен ҳамон,
Бас, бориб, бир гўшани тутгил макон.

3790 Бунда эрлар, боқки, хотиндир ҳама,
Икки оламдан-да маҳрумдир ҳама.

Гар бу йўлга юргали йўқ тоқатинг,
Гарчи тоғсен, хору хасдир қийматинг...

ҲИКОЯТ

Бор эди бир кимса улким аҳли роз,
Олами асрор юз очди рўй-рост.

Етди овоз унга: тиинглармиз сени,
Ҳар не истарсен, сўраб билгилани...

Пир дедиким, мен билармен, анбиё
Доимо ранжу балога мубтало.

3795 Қайдаким ранжу бало қўзгалгуси,
Анбиё унга гирифтор бўлгуси.

¹ Мавту мавлуд – ўлиш ва туғилиш.

Анбиёга шунча заҳматдир насиб,
Бас, нетиб кўргай фароғат ул ғарib?

Чун буюкларнинг насиби дарду ранж,
Биз кичикларга қаёқда дуру ганж?

Анбиё иш узрадирлар, кўр ани,
Менда йўқ сабру таҳаммул, кўй мени.

3800 Неча сўйлай жон чекиб, андин на суд?
Боқмасанг сен майл этиб, андин на суд?..

Мавж урап тегрангда чун баҳри хатар,
Сен эсанг каклик каби беболу пар.

Билсанг эрди йўлда не ваҳму алам,
Ложарам бу йўлга қўймасдинг қадам.

Бошда бўлгайсен бу янглиғ бекарор,
Жонни қутқармоққа сўнг бўлмас мадор.

ҲИКОЯТ

Пашша ризқ излаб учарди, шу маҳал
Кўрди бир бурчакда ул бир хум асал.

3805 Шавқига тўлди аслнинг бўйлаким,
Деди: бир соҳиб саховат бормикин?

Ўз паноҳига ҳамон олса мени,
Очса шу хум оғзини, солса мени.

Берди бул вуслат бутоғи чун самар,
Не ширин оламда ширин бол қадар?

Бир киши очди у хумнинг оғзини,
Истагин андоқ бажо этди ани.

Урди ўзни чун асалга, толди ул,
Кўл-оёғи-ла ёпишди-қолди ул.

3810 Ўзни қутқармоқ бўлиб, чекди азоб,
Сакради, бўлди яна ҳоли хароб.

Чекди фарёд, деди: толе келди шум,
Бу асал менга заҳар бўлди, зақум.

Неки сўрса, жон дебон бергум ани,
Ким фалокатдин ^{халос} этса мени...

Кимса бу водийда фориғ бўлмагай,
Бормагай ул, токи болиғ бўлмагай¹.

Рўзгоринг, эй дили ошуфтакор,
Бойланиб қолмиш асалга устувор.

3815 Умрни беҳудага этдинг басар,
Қайда топгайсен уни, эй бехабар?

Боқ, ўйин, эрмакка кетгай рўзгор,
Ёки ғафлат ичра ўтгай рўзгор.

Тур оёққа, бу қийин водийни ош,
Жонни тарк эт, айла учмоққа талош.

Кечмасанг жону кўнгилдин сен ҳамон,
Сен ўзинг мушрик, ишинг андин ёмон.

Жон фидо эт, айла кўнгилни нисор,
Йўқса, истиғнога бўлгайсен дучор.

¹ Болиғ – етук, балоғатга этишган.

ХИКОЯТ

3820 Бор эди шайх хирқатпүшү номдор,
Күрди бир қизни ва бўлди бекарор.

Эрди ул сакбон қизи, шайхи забун¹
Ул санам савдоси бирлан чекди хун.

Кўзларин тикмиш эди ёр сўйига,
Итлари бирлан кезарди кўйида.

Топди бул ишдин хабар қиз онаси,
Деди шайхга: эй замон алломаси,

Баски қизга ошиқ эрсанг шунчалик,
Касби кор бизга, биларсен, итчилик.

3825 Кел-да, сен бир йилча ит боқ биз била,
Сўнгра ол, тузгил никоҳинг қиз била.

Шайхда эрди бўйлаким ошиқ кўнгил,
Хирқани ечди, киришди ишга ул.

Ит етаклаб тушди бозорга ҳамон,
Шул йўсин бир йилча бўлди сагбон.

Бошқа бир сўфийки эрди ҳамнафас,
Кўрди шайхни чун деди: эй булҳавас,

Эрдинг ўтиз йил ҳамиша марду мард,
Бўйла иш қилдингки, солди дилга дард...

3830 Деди: ғофил, мунчалар дам урма, тур,
Пардани очсам, сенга мушкул бўлур.

¹ Сакбон – ит бокувчи.

Хақ билур бул шевайи асрорни,
Не бўлур гар сенга ортса корни.

Тинглади чун таъна отгонинг менга,
Мендин олгай итни ул, бергай сенга...

Неча сўйлай, мен чекиб бу йўлда оҳ,
Кўрмадим бир танти йўлчи, марди роҳ.

Мен бўлиб беҳудага бисёргўй,
Кўрмадим бир кимсани асроржўй¹.

3835 Сиз агар билсайдингиз асрорни,
Дардини англардингиз мен, зорни.

Бундан ортиқ сўйламак беҳуда, бас,
Жумла ухлок, йўлда йўқ юргувчи кас...

ҲИКОЯТ

Сўрди шайхдин чун муридлардин бири,
Айт, хузур не? Шайх дедиким, тур нари...

Ювсангиз юзларни лекин шул замон,
Мен хузурдин нукта сўйлармен ҳамон.

МУНОЖОТ

Эй Худойи зулжалол, ийсор қил,
Жонимизга ҳақ сўзинг такрор қил.

3840 Оч қулоқларни, Худо, додим сенга,
То ҳақиқатнинг сўзи етсин анга.

¹ Бисёргўй – кўп гапирувчи. Асроржўй – сир-асрор изловчи.

Бас, дуо сендин, ижобат ҳам сенинг,
Эътиқод сендин, муҳаббат ҳам сенинг.

Гар хато этсак, ўзинг ислоҳ қил,
Сен тузатгувчи, ўзинг султони дил.

Ахлат ичра мушкбўйлиқдин не суд?
Маст-аластга нуктагўйлиқдин не суд?..

БЕШИНЧИ ВОДИЙ - ТАВҲИД

Сўнг эса ул водийи тавҳид келур,
Манзили тажрид ила тафрид келур¹.

- 3845 Йўл сари юзланса юзлар даъфатан,
Бир яқодин бош чиқаргай барча тан.

Гар кўрарсен беадад, гар андаки,
Йўлда барча биттадирлар бешаки.

Ул ягона бирма-бир келгай мудом,
Ҳар сафар ул битта келгайдир тамом.

Демаким, ёлғиз Аҳад келгай сенга,
Бир бўлиб, юз бир адад келгай сенга.

Бунда не ҳадду ҳисоб бор, не адад,
На азал чексин нигоҳинг, на абад.

- 3850 Чун азал кетса, абад бўлса адо,
Ўртада не қолгуси? Ҳеч бир вақо.

Ҳар вақо ҳечдир, бўлак бир сўз дема,
Дарҳақиқат даҳр аро ҳечдир ҳама...

¹ Тажрид – бошқалардан узоқда тутиш, ёлғиз қолдириш. Тафрид – ёлғиз қолиш, гўшанишин бўлиш. Нахли = асалари уяси.

ХИКОЯТ

Сўрди бир девонадин бир марди пир,
Сўйла менга, бер изоҳ, олам надир?

Деди: олам ному нанг бирлан тўла.
Наҳлидирким, товланур юз ранг ила.

Гар бирор кўл сурса наҳл узра давом,
Барчаси бир мумга айлангай тамом.

3855 Барчаси мумдин иборат, бошқамас,
Бошқаси рангдир, бўёқдир, жилва, бас.

Бўлса бирлик, иккилиқ бўлгайму, ҳай,
Ўртада менлик ва сенлик бўлмагай.

Нардбони халқ эрур биз бирла мен,
Ложарам, андин йиқилмоқлик тайин.

Ким баландроқ интилур, нодон ўшал,
Сирпаниб, ерга йиқилгай бир маҳал.

ХИКОЯТ

Бу Али ёнига келди бир аёл¹.
Зарварақ унга узатди, деди: ол.

3860 Шайх деди: аҳд айлаганмен бўйлаким,
Олмагаймен нарса Ҳақдин ўзгадин.

Ул аёл деди анга: эй бу Али,
Қайданам етмиш сенга бу аҳвали?²

¹ Бу ерда Абу Али Тусий кўзда тутилмоқда.

² Аҳволи – ғилайлик.

Мард киши күзига бунда ғайр йүқ,
Каъба йүқ бунда, калисо, дайр йүқ.

Сен бу йўлда марди аҳду ҳал эмас,
Ғайр кўргайсен, кўзинг аҳвал эмас.

Мард кўнгил ҳаддига қўйгайдир қадам,
Сўнг бу йўлда етгай ул манзилга ҳам.

3865 Тинглагай сўзларни андин ошкор,
Ҳам бўлур андин вужуди пойдор.

Андин ўзга зотни кўрмас бир замон,
Андин ўзга зотни билмайдир жаҳон.

Андадир бор нарса, бас, андин келур,
Бўйлаким поку мунаzzaҳ Ул эрур.

Ҳар киши ваҳдат сувида гум эмас,
Гарчи одамдир, vale мардум эмас.

Гар киши аҳли хунардир, аҳли айб,
Гар яширмиш эрса офтобини ғайб,

3870 Бир куни келгай-да, гизли офтоб
Шуъла сочгай ярқираб, очгай ниқоб.

Кимки етгай офтобга рўй-рост,
Бўлгай ул яхши, ёмонлардин халос.

Бор эсанг, яхши, ёмон пайдо эрур,
Йўқ эсанг, ул барча пуч савдо эрур.

Айласанг менликка меҳру иштиёқ,
Бўлгай ул яхши, ёмон-ла йўл йироқ.

Баски, йўқлиқдин келиб, борсен ўзинг,
Ўз вужудингга гирифторсен ўзинг.

3875 Кошки эрди бўлса аввал бўлганинг,
Барча борлиқдин муаттал бўлганинг¹.

Паст сифатлардин тамоман пок бўл,
Сўнгра ол кафтингга елни, хок бўл

Сенда не қаҳру ҳасадлар бўлгуси,
Сен кўролмассен, эранлар кўргуси.

Сен биларсенму, яшар шу тан аро
Не қароликларки, чун гулхан аро.

Гулхан ичра аждаҳолар неча бор,
Faflat ичра сен берибсен ихтиёр.

3880 Ҳам илонлар, ҳам чаёнлар сенда жам,
Уйқу ичра барчаси ётгай бу дам.

Қилча жой берсанг вужудингдин агар,
Ҳар бири бир аждаҳо бўлгай улар.

Ҳар кишига бир жаҳаннам бор эмиш,
Сен жаҳаннам қурма, этгил бошқа иш.

Сен қутилсанг гар булардин пок бўлиб,
Роҳат ухларсен маконинг хок бўлиб.

Йўқса, хок ичра илон бирлан чаён
То қиёмат оғу солгай ҳар замон...

3885 Токай, эй Аттор, сенга ҳарфи мажоз,
Кел яна тавҳидга, андин сўйла боз.

¹ Муаттал – бўшамоқ, халос бўлмоқ.

Марди солик бу мақомга етгуси,
Үртадин марди мақом ҳам кетгуси.

Кетгуси, зероки Ул пайдо бўлур,
Лол қолур, зероки Ул гўё бўлур.

Тўрт унсур ажралур тўртдин бу дам,
Неча юз мингдин яна юз мингта ҳам.

Бўйла мактабдирки бул сирри ажаб,
Олдида юз минг ақллар ташналаб.

3890 Ким эмиш бунда ақл? Бир бесамар,
Онадин туғма сўқир ул, туғма кар.

Ким бу гапдин заррача воқиф эрур,
Икки олам сиррининг султони ул.

Толмиш ул йўқликка, чун топмиш адам,
Қилча борлиқ кўрмагай оламда ҳам.

Гарчи йўқдир, лек ўзи борлиқ сифат,
Ул вужуди ичра йўқлиkdir фақат...

ҲИКОЯТ

Деди Луқмони Сарахсий: эй Илоҳ,
Кексайиб, саргаштадирмен, гумроҳ.

3895 Кулки кексайди, хўжа шод айлагай,
Рухсатин бергай-да, озод айлагай.

Бандалик айлаб сенга, эй подшо,
Қолмади бошимда бир сочим қаро.

Фам-алам чекдим басе, шод айлагил,
Қартайиб қолдим-ку, озод айлагил.

Деди Ҳотиф: Эй ҳарамга хосу хос,
Бандаликдин кимки истайдир халос.

Ақлу хушни тарк этар, таклифни ҳам¹,
Сен-да тарк этгил уларни, бос қадам.

3900 Деди: Раббим, мен сени дерман мудом,
Ақлу таклифдин кечармен, вассалом...

Баски таклифу ақлдин қолди ул,
Қарс уриб, девоналилка толди ул.

Деди: энди ким эрурмен, билмадим,
Банда эрмасмен, не энди, билмадим.

Бандалик-ла бўлди мавҳ озодлигим,
Қолмади бир зарра қайғу, шодлигим.

Бор сифотим кетди, қолдим бесифат,
Ориф эрдим, йўқ эди лек маърифат.

3905 Билмадим, мен сенму ё сен менмисен?
Сенда мавҳ ўлдим, йўқолди сену мен...

ҲИКОЯТ

Сувга тушди, бўлди маъшуқ ғарқи об,
Сувга отди ўзни ошиқ ҳам шу тоб.

Икки тан сувда топишди бир маҳал,
Сўрдин ёрдин маъшуқи: эй бехабар.

¹ Таклиф – бу ерда диний талаблар маъносида.

Ногаҳон тушдим, йиқилдим сувга мен,
Не сабабдин сувга отдинг ўзни сен?

Деди ошиқ: сувга отдим ўзни чун,
Айру эрмас, биттадирмиз, бир бутун.

3910 Сенда ғарқ бўлдим-да, топдим мен тамиз,
Не замондирким иковлон биттамиз.

Менмусан сен, сенмуман мен, не билай?
Ё ўзим сен, ё ўзинг мен, ўргилай...

Сен эсанг мен, мен эсам сен бардавом,
Иккимиз яктан эрурмиз, вассалом...

Иккилиқ бўлганда ул ширкат бўлур,
Иккилиқ йўқ бўлса, ваҳдат порлаюр.

Бўйла йўқ бўлсанг, у тавҳид бўлгуси,
Йўқ бўлиш йўқ бўлса, тафрид бўлгуси...

ҲИКОЯТ

3915 Кун фараҳли эрдию маъсуд эди,
Саф чекарда лашкари Маҳмуд эди.

Беадад фил эрди анда ҳам сипоҳ,
Бир баландлик узра ҳозир эрди шоҳ.

Ёнида эрди Аёз бирлан Ҳасан,
Кўз соларди ўрдуга дикқат билан.

Чор тарафни қопламиш эрди сипоҳ,
Ёприлиб мўру маҳадек беадо.

Бўйла лашкар кўрмамиш эрди жаҳон,
Кўрмамиши кимса аскар ончунон.

3920 Сўзга лаб очди баногоҳ Маҳмуд ул,
Юзланиб деди Аёзга: эй ўғил,

Бул ҳама кутгай чу фармоним маним.
Сен фақат, сен шоҳу султоним маним.

Бўйла бир сўз айтди шоҳи номдор,
Лек Аёз жим турди, этмай эътибор.

Шоҳга айру эҳтиром кўрсатмади,
Шоҳ сўзига бир жавоб ҳам этмади.

Жаҳл этиб деди Ҳасан ул: эй ғулом,
Шоҳ сенга айлар бу янглиғ эҳтиром.

3925 Сен турарсен зарра бузмай ҳолатинг,
Қайда қуллук, қайда қолди хурматинг?

Сен туриб жим лутфи дунё олдида,
Беадаблик айладинг шоҳ олдида.

Чун Аёзга етди бундоқ бир хитоб,
Деди: бордир менда бирмас, қўш жавоб.

Биттаси улдирки, қул чун айласа,
Шоҳга қуллук айламакни ўйласа.

Бош қўяр пойига ул хорлик била,
Раҳмат айтиб, ёлборур зорлик била.

3930 Ҳолбуки шоҳ олдида хордир ғулом,
Шоҳга муҳтоҷдир мудом, зордир ғулом.

Ким эмишмен менки күз-күзлаб атай,
Оlam аҳлига ўзимни күрсатай.

Кул унингдир, баски эҳсон ҳам унинг,
Лутф унингдир, амру фармон ҳам унинг.

Бир кун эрмас ҳар қуни етмиш менга,
Ул карамким шоҳ бугун этмиш менга.

Икки оламда ўқилса хутбаси,
Лутфига лойик бўлурму тухфаси?

3935 Мен қаён, бул шевага юрмоқ қаён?
Мен қаён, бул ишга қўл урмоқ қаён?

Чун Ҳасанга айтди бул сўзни Аёз
Ул деди: аҳсант, Аёзи ҳақшунос.

Токи тургай даҳр аро айёми шоҳ,
Сенга бўлсин ҳар қуни инъоми шоҳ.

Сўнг Ҳасан сўрди: недир ул бир жавоб?
Деди: сен борингда айтмоқ носавоб.

Шоҳ ила ёлғиз эсам айтгум уни,
Лек сенинг олдингда айттолмам буни.

3940 Шоҳ эмассен, бас. нечук айтгум сенга,
Айтмагум, чун шоҳ эмасдирсен менга...

Шоҳ буюрди, ташқари чиқди Ҳасан,
Ҳамнафас бўлди бориб ўрду билан.

Ўртадин биз кетдию мен қолмади,
Чун Ҳасан қил эрди, ул хам қолмади.

Шоҳ дедиким, бўлди хилват, сўйла роз,
Сўйлагил менга жавобинг рўй-рост.

Деди: ҳар гал кўрсатиб лутфини шоҳ,
Мен ғариб, мискин сари солса нигоҳ.

3945 Сочса менга нурини офтоб назар,
Борлиғим-ла маҳв ўлурмен ҳар сафар.

Бошим узра шоҳ қуёши келса, бас,
Йўқ бўлурмен, балки топгаймен абас.

Қолмагай мендин бирор ному вужуд,
Бас, нетиб пойингда этгаймен сужуд?

Кимсани қошингда кўрсанг ул замон,
Мен эмасмен, ул фақат шоҳи жаҳон.

Гарчи юздир, гарчи мингдир неъматинг,
Сен ўзингга айлагайсен ҳимматинг.

3950 Соя маҳв ўлгай чиқаркан офтоб,
Ул нетиб пойингга бош ургай шу тоб?

Бул Аёзингдир кўйингда соя чун,
Офтобингда йўқолмиш бус-бутун.

Кечди ўздин бир йўла, қул қолмади,
Не тиласен, айлагил, ул қолмиади...

ОЛТИНЧИ ВОДИЙ – ҲАЙРАТ

Сүнгра ул водийи ҳайрат келгуси,
Неки ҳайрат, дарду ҳасрат келгуси.

Ҳар нафасда неча тиф келгай сенга,
Ҳар замонда во дариғ келгай сенга.

3955 Ох бўлгай, дард бўлгай, сўз ҳам¹,
Кеча бўлмайдир сенга, кундуз ҳам.

Ким кезиб ўтгай бу водий қўйидин,
Қатра-қатра қон оқур ҳар мўйидин.

Музлаган оташга ўхшар бўйла мард,
Чун таҳайор ичра ўртар дилни дард.

Ҳайрат ичра кўзлабон манзилни ул,
Ҳайрат ичра сўнг йўқотгай йўлни ул.

Ул тураг ҳайратлар ичра маҳву мот,
Билмагай, ким ул, не эрмиш коинот?

3960 Жонига тавҳид чекар эркан рақам,
Ул унугтай ўзни ҳам, дунёни ҳам.

Сўрсалар: ҳушёрмисен ё мастмисен?
Сарбаландирсенми ёки пастмисен?

Ўртада, ё ўртадин четда ҳамон?
Чеккада, ёки ниҳонсен, ё аён?

Фоний ё боқиймисен, ё иккиси?
Сенмисен, сенмасмисен, кимсан ўзи?

¹ Сўз – бу ерда ёниш, ўртаниш маъносида.

Дерки, билмасмен муайян нарсани,
На буни билгум ва на билгум уни.

3965 Гарчи ошиқмен, билолмам, кимга мен?
На мусулмонмен, на кофир, кимсамен?

Бехабардирмен тамом ишқимдан ул,
Ишқقا тўлмишdir ва бўм-бўшdir кўнгил.

ҲИКОЯТ

Бор эди бир шоҳ жаҳон айвонида,
Бир қизи ўсмишди гул бўстонида.

Рашк этарди хуснига ҳуру пари,
Юсуф эрди мисли, моҳи анвари.

Кокили эрди чу кўнгилларга дор,
Сочининг ҳар торига жонлар нисор.

3970 Ой юзи чун жаннатул фирдавс эди,
Қошлиари эрди камон, пайваст эди.

Ул камонлар ўқузаркан ҳар замон,
Қоба қавсайн мадҳ этар эрди ҳамон¹.

Наргиси масти отаркан орни,
Бас, йиқитгай эрди ҳар хушёрни.

Офтоб балқиб юзи кўзгусида,
Махлиё эрди унинг ўтрусида.

Кулса, гулгун лаблари – оби ҳаёт,
Ташналар андин сўрар эрди закот.

¹ Қоба қавсайн – икки қош ораси.

- 3975 Ким занахдонига солса бир нигох,
Юз тубан тушгай эди то қаъри чоҳ,

Ой юзига ким назар соглай эди,
Чоҳга тушгай эрдию қолгай эди.

Гапни чўзмай, айтайн, хуллас қалом,
Келди шоҳнинг хизматига бир ғулом.

Бўйла бир қул эрдиким, соҳибжамол,
Ою офтобга эди андин завол.

Оlam ичра фарду беҳамто эди,
Кўйида, бас, шўришу ғавғо эди.
- 3980 Неча минглаб мардуми бозору кўй
Термуларди чиқса ул хуршидрўй.

Бир куни шоҳнинг қизи кўз ташлабон,
Кўрди ул барно йигитни ногаҳон.

Кетди қўлдин эрки, шайдо бўлди ул,
Пардани очди ва пайдо бўлди ул.

Кетди ақли, баски қаттиқ келди ишқ,
Ул ширин жонига аччиқ келди ишқ.

Ўйлади ҳар неча, бори қолмади,
Оқибат сабру қарори қолмади.
- 3985 Жонини ёндириди чун ҳажру фироқ,
Кўнглини кул қилди дарду иштиёқ.

Ўн канизи бор эди чун мутриба¹,
Жумла хушовозу олий мартаба.

Барчаси созандаву булбулнаво,
Куйласа, Довуд мисоли жонфазо.

Ҳолини айтди уларга, сўйлади,
Тарки ному номусу жон айлади.

Кимда эрса ишқи жонон ошкор,
Ўртанур ул, жонга не парвоси бор...

3990 Деди: қулга сўйласам ишқим агар,
Ул тушунмас балки, бўлгай иш чигал.

Номусим, номимга етгайдир зиён,
Қул деган подшога тенг бўлмиш қачон?

Этмасам ишқимни унга ошкор,
Парда ортида ўлармен зор-зор.

Сабр достонин неча хатм айладим,
Не қиласки, битди сабру тоқатим.

Истарам, жон энди айро бўлмасин,
Мен олай баҳра, у огоҳ бўлмасин.

3995 Гар муродим бўйлаким ҳосил бўлур,
Бахтлимен, жонимга иқбол юзланур.

Бас, канизлар тинглади бу сўзни чун,
Дедиларким, бўлмагил зору ҳазин.

Келтиармиз бул кеча қошингга, ҳай,
Бўйлаким, ўзи хабардор бўлмагай.

¹ Мутриба – чалғувчи, созанда.

Бир каниз қул олдига борди ҳамон,
Күрдиким ул ёлғиз эрди, тутди жом.

Жоми майга дору қүшган эрди ул,
Ичса майни, хушдин айрилгайди қул.

Майни ичди, хушдин айрилди ғулом,
Ул канизак етди мақсадга тамом.

4000 Шул куни то кечгача ул сиймбар,
Ётди маст, икки жаҳондин бехабар.

Қош қорайгач, ул канизлар келдилар,
Масту бехуш сори елдек елдилар.

Бир тўшакка ётқизиб қизни ҳамон,
Элтдилар кўп эҳтиётлаб қиз томон.

Ўтқизиб тахт узра сархушни шитоб,
Боши узра сочдилар мушку гулоб.

4005 Қоқ ярим тунда ярим маст ул ғулом
Кўзни очди, қолди ҳайратда тамом.

Кўрди бир кошона андоқким баҳор,
Тахт қурилмиш эрди унда зарнигор.

Анбарин шамлар ёнарди ярқираб,
Уд ёниб, анбар сочарди ҳар тараф.

Не гўзаллар соз чалиб, айтар наво,
Ақлу жону жону тан эрди фидо.

Даврада қиз ўлтирас эрди шу тоб,
Мисли шамлар ичра ял-ял офтоб.

4010 Қизнинг ул офтоб жамолини кўриб,
Қолди ҳайрат ичра қул суврат бўлиб.

Ақлу жондин бир йўла айрилди қул,
На бу олам ичраю на унда ул.

Кўзлари ўнгидагилор эрди, бас,
Ҳам қулоғида мусиқор эрди, бас.

Кўксига севги, забони лол эди,
Жонида завқу сафодин ҳол эди.

Бурнига атру фароғатлар етиб,
Оғзига оташ тароватлар етиб.

4015 Жоми май сунди у жонон, сийлади,
Ортидин бир бўса инъом айлади.

Кул боқиб, лол эрдию ҳайрон эди,
Кўзлари олдида ул жонон эди.

Сўзга келмасди тили, ул гунгу зор,
Кўзидин ёшлар оқарди шашқатор.

Ул санам ҳам термулиб ул сори жим,
Йиғлар эрди, ёш тўкарди бетиним.

Лабларидин гоҳ тутар эрди шакар,
Ул ўпичлардин куяр эрди жигар.

4020 Қиз боқарди ёр юзи ёғдусига,
Кўз соларди кўзлари жодусига.

Маст эди қул ҳам, асири дилнавоз,
Бир йўла бўлмишди ул ўздин халос.

Шул йүсін күз узмади қиздин ғулом
Тун кечиб, тонг ҳам оқаргунча тамом.

Тонг отиб, тонг еллари келгач етиб,
Ул йиқилди маст бўлиб, ўздин кетиб.

Ухлади ул бош қўйиб қиз пойига,
Элтдилар зудлик билан ўз жойига.

4025 Кечди бир муддат ародин, сиймбар
Тортди ҳушёр, топди чун ўздин хабар.

Чекди фарёд, кўксидин оҳ учди, дуд,
Бўлган иш бўлмишди, фарёддин не суд?

Дил ёниб, сув қолмамишди қатрадек,
Сувлари бошидин ошмишди ва лек.

Тўнини йиртди, яқо чок этди қул,
Хунгради, бошига тупроқ сочди ул.

Сўрдилар: не бўлди, эй шамъи Тироз?
Дедиким, мен айта олмам, сўрма боз.

4030 Улки кўрдим мен кўзим ўтрусида,
Кўрмамиш ҳеч кимса ўз уйқусида.

Улки савдо тушди бошимга бу кеч,
Тушмамиш бир кимсанинг бошига ҳеч.

Сўйлагил, деб қистама боз, бўлмагай,
Бундин ортиқ бир ажиб роз бўлмагай.

Сўрдилар: очгил бир оз кўнгил сирин,
Сўйлагил кўрганларинг юздан бирин.

Дедиким, ҳолим харобу күр эдим,
Билмадим, күрдимми ёки күрмадим.

4035 Билмадим, маству адо күрдимми мен?
Ёки ҳушёрлик аро күрдимми мен?

Туймагандим, улки мен туйдим кеча,
Күрмагандим, улки мен күрдим кеча.

Деди оқил: күрганинг тушдир магар,
Ул сабаб девонадирсен, бехабар.

Деди: қайдам, мастмидим, ҳушёрмидим?
Уйкуда эрдимми ё бедормидим?

Күрмамиш бундоқ ажиб ҳолни жаҳон,
Ҳолате, на ошкордир, на ниҳон.

4040 Сўйламак ҳам, сўйламаслик ҳам маҳол,
Ўртада мен мискину афтодаҳол.

На унугтай ёдини бир лаҳза жон,
На кўармен васлидин ному нишон.

Кўрганим ул бўйлаким ҳусну жамол,
Васфини айтурга менда йўқ мажол.

Чеҳраси олдида ҳечдир офтоб,
Заррадир, валлоҳу аълам бис-савоб.

Бор гап шу, баски мен айтдим шуни,
Бундан олдинроқ vale кўрдим уни.

4045 Ҳам кўриб, ҳам кўрмадим, ҳайронамен,
Икки ўт ичра ёниб, девонамен...

ХИКОЯТ

Она йиғларди қизи қабрида хун,
Бир йўловчи ул тарафга боқди чун.

Деди: хотиндан биз эрларга сабак,
Ул билур, биз билмагаймиз, унда ҳақ.

Ул билурким, кимдин айрилмишdir ул,
Не сабаб афтодаҳолдир, ул билур.

Бахтлидир, билгай надир ҳоли ситам,
Яхши билгай ким учун йиғлашни ҳам.

4050 Менга мушкулдир vale, мен ғамзада,
Кеча-кундуз ўлтириб мотамзада,

Билмагаймен, не сабабдин зор-зор,
Йиғлагаймен мисли абри навбаҳор.

Билмагаймен, бўйлаким ҳайрон бўлиб,
Кимга бўзлармен басе гирён бўлиб.

Мендин афзалдир бу хотин, боқ, чунон,
Кимдин айрилмиш у, билгай бегумон.

Мен эсам оварамен ҳайрат аро,
Ул тўкар қонимни бул ҳасрат аро.

4055 Бўйла манзилда йўқолгай дил ҳамон,
Дил не эрмиш, йўл ҳамон, манзил ҳамон.

Ақлу хуш сарриштаси ҳам гум бўлур,
Фикру ўй, андишаси ҳам гум бўлур.

Etса ким бунга, йўқотгай бошини,
Кўл-оёғи, сабр ила бардошини.

Кимки йўл топгай, муқаррар билгуси,
Сирри Кулл не, ул саросар билгуси...

ҲИКОЯТ

Кўрди сўфий чун, эшикда бир йигит
Дер эдиким, ҳай, йўқотдим мен калит...

4060 Бир калит йўқми очишга бул замон,
Чун эшик берк, чорасиз қолдим тамом.

Гар эшик қулф бўлса бундоқ, мен нетай?
Ғам-алам ёприлса бундоқ, мен нетай?

Сўфий айтди: чекма мунча оҳу зор,
Турма бунда, сен эшик олдига бор.

Ул эшикка кўз тикиб ўлтириб басе,
Оқибат очгай эшикни бир касе.

Мушкул эрмас унча ҳам коринг сенинг,
Ҳайрат ичра ўртанур жоним менинг.

4065 Боши йўқдир, сўнгги ҳам йўқ, бўйла иш,
Эшиги йўқдир, калит ҳам бўлмамиш...

Кошки сўфий ҳам югурса, чопса ул,
Беркми ё очиқ эшикни топса ул.

Даҳр аро мардум насибидир хаёл,
Бир киши билмас не эрмиш сенда ҳол.

Улки етмиш водийи ҳайрат анга,
Ҳар нафасда юз жаҳон ҳасрат анга.

Ҳасрату саргашталик битгайми ҳеч?
Ул йўқолган йўлни топгаймен нечук?

4070 Билмадим, билсам эди бир дона мен,
Бўлмас эрдим бунчалар ҳайрона мен.

Бунда эр этса шикоят, шукр эмиш,
Куфри чун иймону иймон куфр эмиш...

ҲИКОЯТ

Шайх Насрободий дилига тушди дард,
Ҳаж адо этмишди қирқ бор шери мард.

Кўрдилар бир кун тани нимжон эди,
Сочи оқ, эгнида бир иштон эди.

Жони оташ ичра, маст эрди кўнгил,
Белда зуннор, хайр деб чўзмишди қўл.

4075 Йўқ эди нутқида бир даъвою лоф,
Габр оташгоҳин айларди тавоғ...

Деди кимдир: эй бузургу номдор,
Бу не қилмиш, этма ўзни шармсор.

Шунча ҳам айлаб, бўлиб бир муқтадо,
Ҳосилинг кофирилик ўлмишми, аё?

Бул ишинг ғўрлиқдиру хорлиқдир ул,
Аҳли кўнгил сен сабаб бадном бўлур.

Сен каби бир шайхи гумроҳ бормидир?
Билмагайсенму бу оташгоҳ надир?

4080 Шайх дедиким, тушди шу жонимга ўт,
Ёнди жоним, кетди қўрғонимга ўт.

Ўт ёқиб, еллар совурди хирманим,
Бўлди барбод номусим, номим маним.

Ўз ишимга мен боқиб, ҳайронамен,
Не қиласни билмайин, девонамен.

Бўйлаким бир оташ ичра қолса жон,
Ному номусни не билсин ул ҳамон?

Бўйла бир ўтким гирифтор айлагай,
Каъбадин ҳам жонни безор айлагай.

4085 Заррача юз очса гар ҳайрат сенга,
Ёприлиб келгай ғаму ҳасрат сенга...

ҲИКОЯТ

Бор эди бир ёш мурид, уйқусида
Пирини кўрди кўзи ўтрусида.

Сўрди: пирим, сўйлагил, ҳолинг нечук?
Охират қўйида аҳволинг нечук?

Сен кетиб, қолдим таҳайор ичра мен,
Ўртаниб, ҳажру фироғинг тортамен.

Ҳасрат ичра ахтарурмен бунда роз,
Ул тараф не кечди ҳолинг, сўйла боз?

4090 Пир деди: ҳайратдадирмен ҳар замон,
Баски бармоғу лабимни тишлабон.

Бунда аҳли чоху зиндонмиз ҳама,
Сиздин ортиқроқ-да ҳайронмиз ҳама.

Бўйла чексиздир бу уқбо ҳайбати,
Не эмиш олдида дунё ҳайрати?..

ЕТТИНЧИ ВОДИЙ - ФАҚРУ ФАНО

Сўнгра келгай водийи фақру фано,
Сўзу тавсиф унга эрмишму раво?

Дема водий, ул фаромушлик эрур,
Кўрлигу карлик ва беҳушлик эрур.

4095 Неча юз минг сояким мавжуд эса,
Гум бўлур бир онда гар хуршид эса.

Баҳри қуллий қайнаса, тошса ҳамон,
Унда қолгайму нақшдин бир нишон.

Икки олам баҳр узра нақш эрур,
Кимки ундоқмас, деса, савдойи ул.

Кимки ул дарёйи Куллга ғарқ эмиш,
Унга тинч-осудалик мутлақ эмиш.

Дил чўкиб осудалик қаърига, ҳай,
Йўқ бўлишдин ўзга нарса топмагай.

4100 Йўқ бўлиб, сўнг қайта бор бўлса агар,
Соҳиби асрору санъатбин ўшал.

Йүлчиларким йўл уза мардону мард,
Етсалар гар сўйи ул майдони дард,

Гум бўлурлар илк қадамда, бас, тайин,
Ким босур иккинчи одимни кейин?

Илк қадамда баски бўлгайлар хароб,
Сен жамодий деб уларни эт ҳисоб¹.

Уд билан гар хору хас ёқилгуси,
Иккиси бирдек куйиб, кул бўлгуси.

4105 Суврат ичра гар улар бир нарсадек,
Лек сифат ичра тафовут бор буюк.

Бетамизлик бўлса ғарқи баҳри кулл,
Ўз фисоти бирла унда қолгай ул.

Гар ҳалоллик баҳр аро ғарқ бўлгуси,
Ўз вужудидин ҳамон айрилгуси.

Жунбуши чун жунбуши дарё бўлур,
Йўқ бўлур ул, бул иши зебо бўлур.

Йўқдиру бордир, нечук мен англатай?
Бул жиҳат ақлу хаёлга сиғмагай...

ҲИКОЯТ

4110 Бир кеча маъшуқи Тусий, баҳри роз,
Деди асҳобга: ёнингиз боз-боз...

Дарди ишқ бирлан ёниб, кул бўлсангиз,
Ҳам заифлик зўридин қил бўлсангиз,

¹ Жамодий – жонсиз жисм.

Бўлсангиз қилдек магар зору низор,
Сизга маскан ул муаттар зулфи ёр.

Кимки қил бўлгай ўшал ёр кўйида,
Қил бўлур ул ёр зулфи, мўйида.

Улки эрмиш йўлни кўргувчи киши,
Қилни қил узра кўриш бўлсин иши.

4115 Ким кетар бўлса ародин, ул фано,
Гар фанодин ҳам фано топса, бақо.

Етса қурбинг, эй дили зеру забар,
Оташ узра қилдин этмакка гузар¹,

Чекма ғам, пайдо қилур деб ул чароғ
Зоғ қанотидек қаро бир дуду доғ.

Ёғки ёнгай бўйлаким оташ аро,
Ёғлиги битгай, таратгайдир зиё.

Кимки йўлда жонни чун сўзон қилур,
Ўзни андоқ қолиби Қуръон қилур.

4120 Сен агар бундоқ мақомни истасанг,
Унга мен валлоҳки етгумдир, десанг,

Кеч ўзингдин, ташла ҳар не борини,
Йўлга сол сўнгра адам тулпорини.

Кийгали йўқлик тўнингни шайлагил,
Тўлдириб, йўқлик майин нўш айлагил.

¹ Бу ерда жаҳаннам устидаги сирот, қилқўприк назарда тутиляпти.

Ташла йўқлик ҳирқасин елкангга чун,
Сўнгра йўқлик тайласонин ҳам ёпин¹.

Маҳв рикобига оёғинг ур яна,
Ҳеч сари ҳечлик бедовни сур яна.

4125 От суриб, бу йўлда бўл зеру забар,
Сен белингга бойла йўқлиқдин камар.

Жон кўзинг оч, тан кўзинг юм, кўрмасин,
Кўзларингга чек адамнинг сурмасин.

Йўқ бўлиб, йўқлиқданам кеч шул замон,
Сўнгра кечгил ул мақомингдин ҳамон.

Бўйлаким ўзни тамом осуда эт,
Сўнгра юргил, олами йўқлика ет.

Бўлса сенда гар бу оламдин асар,
Топмагайсен ўзга оламдин хабар.

4130 Ўзлигингдин қолса қилдек бир нишон,
Етти дарё борлигинг айлар аён...

ҲИКОЯТ

Бир кеча парвоналар жам бўлдилар,
Жам бўлиб чун, толиби шам бўлдилар.

Дедилар: ул шамъи жонни изларак,
Биттаси борсин-да, келтирисин дарак.

Учди бир парвона, кўрди бир қаср,
Қаср аро юлдуз каби шам эрди бир.

¹ Тайласон – енгиз, кенг, узун авра тўн.

Изга қайтди, бул хабарни сўйлади,
Ул жамоатни хабардор айлади.

4135 Ул жамоат сарвари, соҳиб назар
Деди: бул парвона шамдин бехабар.

Бошқа бир парвона учди шам томон,
Айланиб, боқди йироқдин ул ҳамон.

Чун мұяссар нури матлуб бўлди ул,
Шамъ ғолиб келди, мағлуб бўлди ул.

Қайтди ул ҳам, сирни оғоз айлади,
Шамъ васли шарҳини боз айлади.

Боз улуғ дедики, гапни чўзма, бас,
Сен анув парвонадин ортиқ эмас.

4140 Бошқаси учди, оловга етди ул,
Урди ўтга, жонни таслим этди ул.

Жонидин кечди, тамом борлиқданам,
Чулғаниб оташга ул топди адам.

Ўт унинг бошдин оёғин чулғади,
Бор вужудин қип-қизил чўғ айлади.

Сарвари кўрди бу аҳволни чунон,
Ки ёниб, парвона эрди шамсимон.

Деди: бу парвона тушди ишга, бас,
Ул билур шамъи жаҳонни, бошқамас...

Этмасанг кўйида жонингни бадар,
Сенга жонондин нечук етгай хабар?

Ким сенга қылдин нишон күрсатгуси,
Жабрини жонга аён күрсатгуси.

Бул мақомга кимса маҳрам бўлмади,
Етмади, чун унда бир дам бўлмади...

ҲИКОЯТ

Бош эгиб сўфий борар эрди, ҳамон.
Бўйнига бир мушт туширди бир ёмон.

Сўфий юз бурди анга, деди малул:
Кошки бош бўлсайди менда, урсанг ул.

4150 Эгаси ўлмишди ўттиз йил бурун,
Олами борлиқни тарқ айлаб бутун.

Ул ёмон дедики, бул даъво ҳама,
Мурда ҳам сўйларми? Қўй, лоф айлама...

Кимки сўйлар, ул ҳали ҳамдам эмас,
Қилча борлиқ бўлса, ул маҳрам эмас.

Бўлса гар қилча изофат ўртада,
Баски юз олам масофат ўртада.

Қолса гар ҳам бехабар, ҳам бесар,
Ул фақат топгай ҳақиқатдин хабар.

4155 Истагинг гар ул азиз манзил эрур,
Ўртада қил бўлса, бул мушкул эрур.

Ҳар не боринг қолмасин, оташда ёқ,
Қолсин иштон, бошқасин оташда ёқ.

Хеч вақойинг қолмагач, эй бекафан,
Үзни сен оташга отгил дағфатан.

Молу мулкинг баски хокистар бўлур,
Зарра шубҳанг ҳам дағи камтар бўлур.

Ул Исадек битта нинанг қолса гар,
Юз туман бўлгай йўлингда йўлтўсар.

4160 Молу мулқдин кечди Исо, хулласи,
Неча бир сирларни очди игнаси.

Етмоқ истарсен магар манзилга то,
Парда бўлгай молу мулку ҳуббу жоҳ.

Ҳар не борингдин кечиб, тарк айлагил,
Сўнгра бир хилватсаройни танлагил.

Чулғагай йўқлик сени, кўнглингга боқ,
Ҳар нечук яхши, ёмондин сен йироқ.

Қолмаса яхши, ёмон, ошиқ ўзинг,
Ишқ либосин кий, анга лойиқ ўзинг.

ҲИКОЯТ

4165 Бор эди бир шоҳким, соҳиб сарой,
Ўғли бор эрди Юсуфдек хушчирой.

Бўйлаким кўрку тароват йўқ эди,
Бўйла бир савлат, салобат йўқ эди.

Кўйида не-не гўзаллар хок ҳама,
Не йигитлар эрди кўкси чок ҳама.

Кечалар ул ой чу пайдо эрди, бас,
Офтоб кўқда хувайдо эрди, бас.

Юзини васф айламак имкони йўқ,
Етмагай сўз, васфининг поёни йўқ.

4170 Тимқаро соchlар расан эрди расо,
Неча минг жонлар ани деб банди чоҳ.

Зулфи оламсўзу ул шамъи Тироз
Чулғамишди аҳли оламни дароз.

Васфин ул Юсуф жамолнинг, эй Худо,
Сўйласам, йилларча бўлмасди адо.

Қоқса бир киприк агар наргис кўзи,
Ўтаро қолгайди буткул ер юзи.

Лаб очиб этса табассум гар нисор,
Боғ аро гуллар очилгайди ҳазор.

4175 Чун даҳони борму, йўқ, маълум эмас,
Кўрмамишди ҳеч уни мардум, бас.

Парда ортидин чиқиб келса, басе,
Қон тўкарди сочининг ҳар толаси.

Фитнайи жону жаҳон эрди ўғил,
Неча айтсам, бас, чунон эрди ўғил.

Отланиб чиқса, ғулув солгай эди,
Олди, ортида қиличлар шай эди.

Кимга анга солса нигоҳи ногаҳон,
Ҳайдалиб, йўлдин сурилгайди ҳамон.

4180 Бор эди дарвеш, гадойи бехабар,
Бўлди ошиқ унга чун солди назар.

Нотавон эрди ва ноқис эрди ул,
Лаб очиб, сўзлашга ожиз эрди ул.

Дардини айтмакка ҳамдард йўқ эди,
Ишқи бор эрди, бўлак дард йўқ эди.

Кеча-кундуз кўйида юрмишди ул,
Кўзларин элдин тамом юммишди ул.

Йиғлар эрди, гарчи сўз қотмасди ҳеч,
Ухламасди, бир нима тотмасди ҳеч.

4185 Йўқ эди кимса анису меҳрибон,
Дардини ёлғиз чекар эрди ниҳон.

Заъфарон юз, кўзда ёшу сарнигун,
Интизор эрди йигитга, бағри хун.

Бўйла дард бирлан яшаркан интизор,
Гоҳ йироқдин ўтгай эрди ул нигор.

Гоҳ йироқдин ул ўтаркан шаҳд ила,
Жумла бозорга тушарди ғулғула.

Бир қиёмат қўзғалар эрди Амон,
Тирқираб мардум қочарди ҳар томон.

4190 Олди-ортини човушлар тўлдириб,
Тиф чекарди барчани йўлдин суриб.

Юксаларди кўкка таҳдиду нидо,
Тўлдириарди жумла майдонни сипоҳ,

Бул нидоларни эшитгач, ўлтириб,
Ўрнида дарвеш қотарди тош бўлиб.

Ишқ уни ўртаб, ёқар эрди давом,
Ўз-ўзини тарқ этар эрди тамом.

Ул замон кўзлар керакди юз ҳазор,
Холига йиғлашга андоқ зор-зор.

4195 Гоҳ кўкаргай эрди зору нотавон,
Кўзидин қонлар оқар эрди равон.

Музлатарди оҳи кўзда ёшини,
Гоҳи кўз ёшлар ёқар эрди уни.

Гоҳи қолмасди яримта жони ҳам,
Гоҳи бўлмасди яримта нони ҳам.

Нотавон, афтода эрди бўйла қул,
Бўйла бир шаҳзодага етгайму ул?

Соя эрди заррадек ул бехабар,
Орзу айларди қуёшни сарбасар.

4200 Бир куни шаҳзода бирлан ул сипоҳ
Чун ўтаркан, наъра чекди ул гадо.

Чекди фарёд ул, йўқотди ақлу хуш,
Деди: шул жонимни ўтлар чирмамиш.

Ёнди бул оташда борим, қолмади,
Ишқ аро сабру қарорим қолмади.

Бўйла бир сўзларни дарвеш айтибон,
Бошига тошлар уради ҳар замон.

Ақлу хуш учди думоғидин анинг,
Оқди қон күзи, қулоғидин анинг.

4205 Тинглабон бу гапни навкар англади,
Борди ул шоҳ олдига, арз айлади.

Дедиким, шаҳзодага, эй шаҳриёр,
Бўлмиш ошиқ бўйла ринди бекарор.

Тинглади бу сўзни, мадхуш бўлди шоҳ,
Қайнади, қаҳру ғазабга тўлди шоҳ.

Сўнг буюрди: дор тикиб, тортинг ҳамон,
Дорга тортинг, бошини қирқинг ҳамон.

Мирғазаблар йўлга озим бўлдилар,
Ул гадони ҳалқа ичра олдилар.

4210 Судрабон сўнг элтдилар дор остига,
Халқ йиғилди бул тамошо қасдига.

Дардини бир англагувчи йўқ эди,
Бир шафоат айлагувчи йўқ эди.

Дор оғочи остида йўқсил, гадо,
Юзланиб вазирга чекди ўтли оҳ.

Деди: муҳлат бер, Худо ҳаққи, бир оз,
Тиз чўкиб, дор остида айлай намоз.

Берди муҳлат, бенаво ул, кўзда ёш,
Тиз чўкиб, қўйди ҳамон тупроққа бош.

4215 Саждалар айлаб, дедиким, ё Илоҳ,
Шоҳ мени ўлдирмоқ истар бегуноҳ.

Ёлмасимдин олдин, эй, додим сенга,
Ул йигитнинг васлини кўрсат менга.

Васлини кўрсат менга шаҳзодани,
Мингта жоним бўлса гар, олгил ани.

Васлини бир бора кўрсам, майлига,
Сўнгра шул жонимни берсам, майлига.

Подшоҳим, ҳожатин истар қулинг,
Бўлди ошиқ, жонин олгайлар унинг.

4220 Бул эшикдин мен юзимни бурмадим,
Бўлдим ошиқ гарчи, кофир бўлмадим.

Айлагайсен не тилакларни бажо,
Ҳожатим бер, айлагил комим расво...

Ҳожат истаб чекди оҳ мазлум ёник,
Отган ўқи тегди мўлжалга аниқ.

Чун эшикдин бул нидоларни вазир,
Қалбини қақшатди ул оҳи фақир.

Борди подшо олдига ул, йиғлади,
Ошиғи бечора ҳолин сўйлади.

4225 Зорини, оҳи адосин айтди ул,
Сажда ичра илтижосин айтди ул.

Шоҳга ҳам бул дарди дил этди асар,
Юмшади, афв айламак бўлди самар.

Сўнг нигоҳин узмай ул шаҳзодадин,
Дедиким, юз бурма ул афтодадин.

Бор, деди, ҳозир ўшал дор олдига,
Ошиғи саргашта, бемор олдига.

Мустаманд бўлмиш, анга овоз қил,
Сенга бермиш кўнглини, эъзоз қил.

4230 Лутф айла, чекди қаҳрингни сенинг,
Жоми май тут, тотди заҳрингни сенинг.

Қўлидин тутгил-да, сайд эт гулшаним,
Сўнгра келтиргил ҳузуримга маним...

Турди ул шаҳзодайи Юсуф мисол,
Юрди ул дарвеш-ла этмакка висол.

Кетди ул шаҳзодайи рўйоташин,
Зарра бирлан бўлгали хилватнишин.

Борди ул шаҳзодайи гавҳарнисор,
Қатрани этмакка хурсанд, баҳтиёр.

4235 Етди дор остига андоқ комрон,
Бир қиёмат қўпди унда шул замон.

Ул гадони ҳушдин айро кўрди ул,
Юз суриб тупроққа ётмиш эрди ул.

Кўздин оққан қон ёши беҳад эди,
Боши узра олами ҳасрат эди.

Маҳв эди, йўқ эрди ул, ночиз эди,
Ҳар не ожиздин яна ожиз эди.

Ул гадо чун ғарқи хун эрди бу дам,
Кўрди, кўзга олди ёш шаҳзода ҳам.

4240 Күрмасин, деди бу күз ёшим сипох,
Бўлмади, кўз ёши тўқди, чекди оҳ.

Ашки ёмғирдек қўйилди шул замон,
Дард уза дардлар ёғилди ногаҳон...

Ул кишиким ишқига содик келур,
Маъшуқи бошига чун ошиқ келур.

Ишқ сидқи ишқ бўлиб келгай сенга,
Маъшуқинг ошиқ бўлиб келгай сенга.

Боқди шаҳзода, қуёшдек порлади,
Исмини айтиб, гадони чорлади.

4245 Бул овозни туймамишди ул гадо,
Чун йироқдин кўрмиш эрди гоҳ-гоҳ.

Бошини тупроқдин узди нотавон,
Бошида шаҳзодани кўрди ҳамон.

Гар туташса ўт ила дарёда сув,
Ўт олур, лекин кўринмас кўзга у.

Эрди ул дарвеши ошиқ оташе,
Тушди чун дарёга, бўлди дилхуше.

Жон узиб дарвеш деди: эй шаҳриёр,
Баски ўлдирмоқ тиласен зор-зор.

4250 Бўйла бир лашкарга ҳожат бормиди?
Үлди сўнг, гўёки ҳаргиз йўқ эди.

Наъра чекди, ҳайқириб жон берди ул,
Шам каби яшнаб, кулиб жон берди ул.

Ёр висолини кўриб, ул юмди кўз,
Фонийи мутлақ бўлиб, ул юмди кўз.

Йўлчилар билгуси, бу майдонда, ҳай,
Ишқ фаноси жонга нелар қилмагай...

Бул ариқдин оқди сувлар неча бор,
Ул маоний бардавому барқарор.

4255 Эй вужудинг ул адам бирлан туташ,
Лаззатинг қайғу, алам бирлан туташ.

Кўлларинг очдинг, чақиндек чақнадинг,
Лек чақин олдида боғлиқдир қўлинг.

Истагинг эрса агар шул кимиё,
Бир нафас кўз солгали келгил, аё.

Турма ортиқ, мен қаби бехуш бўл,
Бир замон фикр айла, хушандиш бўл.

4260 То дами охир бу дарвешликка ет,
Завқу шавқлар бирла бехушликка ет.

Мен эмасмен мен бу нақлимдин йироқ,
Хайру шарим бўлди ақлимдин йироқ.

Сочди нур бошимга йўқлик, офтоб,
Икки олам мен учун ҳечдир шу тоб.

Баски бошим узра ул ёғду яна,
Қолмадим, сувга қўшилди сув яна.

Мен тикиб боримни, чўқдим бағрига,
Борлиғим отдим қаро сув қаърига.



4265 Маҳв ўлдим, ҳеч вақойим қолмади,
Мен адо бўлдим, адойим қолмади.

Қатра эрдим, бўлди маскан баҳри роз,
Чора йўқ ул қатрани топмоққа боз.

Мен фано топдим етиб йўқликка, бас,
Мен каби ғарқи фанолар кам эмас.

Оlam ичра бормикин бир кимса, ҳай,
То фано топмоқни орзу этмагай?

Барча бу ҳолга мұяссар бўлгуси,
Озмидир, кўпдир, муқаррар бўлгуси.

ҲИКОЯТ

4270 Сўрди бир поксийна Нурийдин савол:
Ул нечук йўлдирки, бошлар то висол?

Етти денгиз бор, деди, оташ ва нур,
Бўйла бир йўлким, висолга бошлаюр.

Етти денгиздин кечиб ўтдингми, бас,
Бир балиққа ем бўлурсен шул нафас.

Бир наҳангдир, бошизу думсиздир ул,
Маскани ул баҳри истиғно эрур.

Икки оламни ютар ул, қўймагай,
Жумла халқни бир нафасда ямлагай...

ҮТТИЗИНЧИ МАҚОЛА

4275 Тинглабон бул сүзни водий қушлари,
Күркәдилар, чун бошдин учди хушлари.

Билдиларким, баски оғир бул камон,
Тортыб отмоққа улар күп нотавон.

Шул сабабдин бўлди жонлар бекарор,
Нечаки бирлар ўлди йиғлаб зор-зор.

Бошқа қушлар ҳайрат ичра учдилар,
Тарқ этиб манзилни, йўлга тушдилар.

Учдилар гоҳо баландлаб, гоҳи паст,
Бул узун йўлда умрлар кечди, бас.

4280 Чекдилар бу йўлда қанча қаҳру кин,
Мен нечук сўйлай уни, шарҳ айлайин?

Оқибат бу йўлга тушсанг бир куни,
Сен дағи кўргай, кечиргайсен уни.

Маълуминг бўлгай, улар не этдилар?
Қанчалар ғамлар, аламлар ютдилар.

Қон ютиб бу йўлда қушлар барчаси,
Етди даргоҳга фақат бир қанчаси.

Нечаки бирлар етмади, ўлди, холос,
Етгани мингдан бири бўлди, холос.

4285 Нечаки бирлар ғарқайи дарё бўлиб,
Нечаки бирлар маҳву нопайдо бўлиб,

Неча бирлар күп баланд тоғлар аро
Қолдилар лабташна, сувсоғу адо.

Неча бир жонларни ёқди офтоб,
Күйдилар оташда андоқким кабоб.

Неча бирлар йўлда айларкан давом,
Шеру қоплонларга ем бўлди тамом.

Неча бирлар йўлда сарсон бўлдилар,
Қақраган чўлларда чанқаб ўлдилар.

4290 Неча бирлар гушна жон қайғусида,
Ўлдилар бир дона дон орзусида.

Неча бирлар бўлдилар ранжуру зор,
Қолдилар йўлларда чун маҳжуру хор.

Неча бирлар не ажойиблар кўриб,
Тутдилар маскан, у жойда ўлтириб.

Неча бирлар айлабон айшу тараб,
Чиқдилар сафдин, унут бўлди талаб.

Юз туман қушдин етиб келди бири,
Не довонлардин ўтиб келди бири.

4295 Йўлга чиққанда улар сўнгсиз эди,
Етгани манзилга нақ ўттиз эди.

Барчаси беболу пар, ҳорғину суст,
Дилишикаста, жонҳалак, тан нодуруст.

Кўрдилар даргоҳни бевасфу сифат,
Лол эди идроку ақлу маърифат...

Барқи истиғно чақынлар чақса то,
Бир нафасда неча юз олам адо.

Неча юз минг офтоби мўътабар,
Неча юз минг ою юлдуз жилвагар.

4300 Барчасин бунда жамулжам кўрдилар,
Тек қотиб, чун лолу ҳайрон турдилар.

Дедилар барча: ажаб, ул офтоб,
Бул маконда заррадек эрмиш ҳисоб.

Эй дариғо, бизни ким ҳам кўргуси?
Йўлдаги заҳматни ким ҳам сўргуси?

Биз боқиб, ўздин умид уздиқ ҳамон,
Ўнгимиизда ўзга оламдир тамом.

Юз фалак эрмиш бу ерда зарра хок,
Бунда биз бормизми, йўқмизми, не бок?

4305 Барча қушлар изтиробга тўлдилар,
Йиғлашиб, чун ними бисмил бўлдилар¹.

Бўлди маҳв, гум бўлди қушлар ончунон,
Шул зайл кечди ародин бир замон.

Охири этди карам Ҳақ даргаҳи,
Чиқди бир шотир у ёқдин ногаҳи.

Кўрди ўттиз қушни чун бағри кабоб,
Дилшикаста, жону тан эрди хароб.

Ҳайрат ичра, бас, нажотсиз эрдилар,
Қовжираб, кўлсиз, қанотсиз эрдилар.

¹ Ними бисмил - чала сўйилган.

4310 Сүрдиким, эй қавм, қаёқдин келдингиз?
Не тилак бирлан бу ёқقا елдингиз?

Кушлар ичра не эмишdir номингиз?
Қайси юртdir манзили оромингиз?

Сизку бундоқ ожизу оворалар,
Не ният бор сизда, эй бечоралар?

Дедилар: келдик бу даргоҳга ҳамон,
Бизга Симурғ подшо бўлсин дебон.

Биз бу даргоҳ бандайи бечораси,
Биз бу йўлнинг ожизу овораси.

4315 Неча муддат йўл босиб дуру дароз,
Мингдан ўттиз қуш ечиб келдик, холос.

Чун турибмиз даргаҳи ўтрусида,
Подшони бир кўриш орзусида.

Бор умид, ул лутфи султон айлагай,
Лутф этиб, дардларга дармон айлагай.

Деди шотир: эй ғариб, саргашталар,
Эйки гўл, ўз қонига оғушталар.

Сиз жаҳонда борми, йўқми, ҳар замон
Ул ягона подшоҳи жовидон.

4320 Юз туман оламча лашкар бўлса-да,
Бир чумолидек эрур шоҳ олдида.

Ранжу озор сизда, ўзга не бўлар?
Ортингизга қайтинг, эй афтодалар...

Ушбу сўздин бўлди кўнгиллар сўник,
Бўлдилар ул жумла андоқим ўлик.

Дедиларким, ҳолимизга войки, ул
Хор этиб, гар ортимизга қайтарур...

Кимсага шоҳдин ҳақирлик келмагай,
Келса гар, иззатдин ўзга бўлмагай.

ҲИКОЯТ

4325 Деди Мажнун: гар мени аҳли башар,
Мақтаса ҳар онда, андин не самар?

Истамам мадҳимни этса ўзга кас,
Айласа мадҳимни Лайли, менга бас.

Менга афзал таъна, дашноми аниңг,
Икки олам мулкидин номи аниңг.

Мазҳабимни сўйладим сенга, азиз,
Хўрласа, согайму хўрлик жонга из?

Барқи ғайрат чақса, не ҳосил қилур?
Ёндириб, жонларни андоқ кул қилур.

4330 Ёнса жон, зорлиқдин унда не самар?
Иzzату хорлиқдин унда не самар?..

Дедилар бечора қушлар ул яна:
Жонимиз ўтларда ёнсин, майлига.

Ҳеч қачон парвона ўтдин қочмаюр,
Ул ўшал оташда топгайдир хузур.

Бўлмаса бизга муюссар васли ёр,
Ўртаниб, ёнмоқ-да бизга эътибор.

Бўлмаса даргоҳга етмоққа илож,
Тиз чўкиб, тупроғин ўпмоқ ҳам қувонч...

ҲИКОЯТ

4335 Жумлайи паррандаким дунёда бор,
Кўрдилар парвона ҳолин ошкор.

Дедилар ул жумла: эй зору заиф,
Тобакай эрмак сенга жони шариф?

Бўлмагай сенга ўшал шамъи висол,
Сен жаҳолат ичра чун ошуфтаҳол?

Бўлди бул сўздин яна маству хароб,
Айлади ул жумла қушларга жавоб.

Деди: басдир менга чун сўзонамен,
Талпиниб, шам бошида парвонамен...

4340 Барча қушлар ишқ аро мард эрдилар,
Бошдин охир ғарқайи дард эрдилар.

Нозу истиғно агар бисёр эди,
Ёнида лутфу карам ҳам бор эди.

Ҳожиби лутф келди, эшик очди ланг,
Пардалар ҳам очди сўнг ул рангба-ранг.

Бас, жаҳон бўлди ҳижобсиз ошкор,
Сўнгра нурни нурга пайваст бўлди кор.

Барчани қурбат аро ўтқиздилар,
Ҳайбату иззат аро ўтқиздилар.

4345 Барчанинг олдига бир қоғоз қўйиб,
Дедилар: ўқинг буни ихлос қўйиб.

Ул қоғозларда ёзиқлар не эрур?
Бул ҳикоятдин ўшал маълум бўлур.

ҲИКОЯТ

Чун Юсуфни ул қудуққа отдилаr,
Ўн ағоси сўнгра пулга сотдилаr.

Малики мисрий сотиб олган замон,
Бас, улардин хат талаб қилди ҳамон.

Ўн биродар бунга ҳозир эрдилар,
Хат ёзиб, бирдек гувоҳлик бердилар.

4350 Сўнг азиз қўзғолди, тушди йўлига,
Берди ул мактубни Юсуф қўлига.

Сўнгра юксалди Юсуф подшо бўлиб,
Ўн биродар келди унга бош уриб.

Билмадилар тахтда Юсуф эрканин,
Отдилаr ўзни оёғига аниng.

Чорасизлар чорайи жон сўрдилар,
Ўзни бундоқ хор этиб, нон сўрдилар.

Юсуфи сиддиқ деди кўз ташлабон:
Менда бир хат бор, тили ибрий забон.

4355 Билмагай ибрийчани бунда касе,
Сиз ўқинг мактубни, нон бергум басе.

Жумла ибрийхони моҳир эрдилар,
Биз ўқиймиз, қайда мактуб, дедилар.

Юсуфи сиддиқ уларга тутди хат,
Қалтираб барча шу он бўлди караҳт.

На ўқирга майлу рағбат бор эди,
На-да сўз айтурга ҳолат бор эди.

Жумла абгори таассуф бўлдилар,
Мубталойи кори Юсуф бўлдилар.

4360 Сўрди Юсуф: нега бехуш бўлдингиз?
Хат ўқиш ўрнига хомуш бўлдингиз?

Дедилар: гар бошимизга тушса тоғ,
Бизга бу хатни ўқишидан яхшироқ.

ҚУШЛАРНИНГ ХАТ ЎҚИШГАНИ

Улки ўттиз қуш, ўшал си мурғи зор¹
Боқдилар хатларга айлаб эътибор.

Неки қилмиш эрдилар ҳар он ҳама,
Нақш этилмиш эрди то поён ҳама.

Кўрдилар, не ранжу не таҳқир эди,
Барчасидин бул вале оғир эди.

4365 Жон Юсуфин чоҳга отмиш эрдилар,
Ҳам уни олтинга сотмиш эрдилар...

¹ Симурғ – ўттиз қуш.

Боқ ўзингга, эй гадо, афтода қул,
Юсуфингни сен-да сотгайсен нуқул.

Юсуфинг ул бир куни шоҳ бўлгуси,
Сенга ҳукм айларда пешво бўлгуси.

Сен эсанг йўқсил, яланғоч бир гадо,
Бош эгиб, олдида тургайсен адо.

Баски бундоқ бош эгарсен бир куни,
Не учун арzonга сотгайсен уни?..

4370 Босди қушлар жонини шарму ҳаё,
Бўлдилар фоний, вужудлар тўтиё.

Кули куллдин покланиб чандон ҳама,
Топдилар нури бақодин жон ҳама.

Қайта бошдин соҳиби жон бўлдилар,
Қайта бошдин лолу ҳайрон бўлдилар.

Ҳар не қилмиш, қилмамишлар, барчаси
Хотиротдин ўчди-кетди хулласи.

Порлади қурбат қуёши, сочди нур,
Жумла жонларга насиб этди хузур.

4375 Чехра очди бўйла Симурғи жаҳон,
Кўрдилар Симурғни қушлар ул замон.

Кўрдилар Симурғни, гўё туш эди,
Аслида Симурғ у ўттиз қуш эди.

Қолдилар сўнгсиз таҳайюр ичра ул,
Билмайин чун улмидирлар ёки бул.

Күрдилар ўзлар
Эрди ул Симурғ у.

Солсалар Симурғ тағ
Унда ўттиз қуш эди бе.

- 4380 Солсалар гар ўзлари сори
Ярқираб Симурғ туарди, ж.

Боқдилар ҳар иккисига дамба-,
Битта Симурғ эрди бунда бешу қ

Ул эди бул, бул эди ул, айни қуш,
Бўйлаким, оламда кимса кўрмамиш.

Қолдилар чексиз таҳайюр ичра, бас,
Бетафаккур бир тафаккур ичра, бас.

Билмас эрдилар сира, не эрди ҳол,
Сўрдилар тилсиз у даргоҳдин савол.

- 4385 Бул саволнинг тафсирини сўрдилар,
Менлигу сенлик сирини сўрдилар.

Келди даргоҳдин ўшал тилсиз жавоб:
Сизга биз ойинамиз, чун офтоб.

Кимки боқса унга, ўзни кўргуси,
Жону тан ҳам қошу кўзни кўргуси.

Сизки ўттиз қуш келибдирсиз ҳамон,
Ўттизи ойинада бўлмиш аён.

Келсангиз қирқ, эллигу олтмиш бўлиб,
Акс этар кўзгуда у олтмиш бўлиб.

¹ Яъни, ўттиз қуш.

Боқ ўзингга, эй гадо, афтода қул,
Юсуфингни сен-да сотгайсен нуқул.

Юсуфинг ул бир куни шоҳ бўлгуси,
Сенга ҳукм айларда пешво бўлгуси.

Сен эсанг йўқсил, яланғоч бир гадо,
Бош эгиб, олдида тургайсен адо.

Баски бундоқ бош эгарсен бир куни,
Не учун арzonга сотгайсен уни?..

4370 Босди қушлар жонини шарму ҳаё,
Бўлдилар фоний, вужудлар тўтиё.

Кули куллдин покланиб чандон ҳама,
Топдилар нури бақодин жон ҳама.

Қайта бошдин соҳиби жон бўлдилар,
Қайта бошдин лолу ҳайрон бўлдилар.

Ҳар не қилмиш, қилмамишлар, барчаси
Хотиротдин ўчди-кетди хулласи.

Порлади қурбат қуёши, сочди нур,
Жумла жонларга насиб этди ҳузур.

4375 Чехра очди бўйла Симурғи жаҳон,
Кўрдилар Симурғни қушлар ул замон.

Кўрдилар Симурғни, гўё туш эди,
Аслида Симурғ у ўттиз қуш эди.

Қолдилар сўнгсиз таҳайюр ичра ул,
Билмайин чун улмидирлар ёки бул.

Күрдилар ўзларни шунда бардавом,
Эрди ул Симурғ ул си мурғ тамом¹.

Солсалар Симурғ тарафга гар нигох,
Унда ўттиз күш эди беиштибоҳ.

- 4380 Солсалар гар ўзлари сори назар,
Ярқираб Симурғ турарди, жилвагар.

Боқдилар ҳар иккисига дамба-дам,
Битта Симурғ эрди бунда бешу кам.

Ул эди бул, бул эди ул, айни қүш,
Бўйлаким, оламда кимса кўрмамиш.

Қолдилар чексиз таҳайюр ичра, бас,
Бетафаккур бир тафаккур ичра, бас.

Билмас эрдилар сира, не эрди ҳол,
Сўрдилар тилсиз у даргоҳдин савол.

- 4385 Бул саволнинг тафсирини сўрдилар,
Менлигу сенлик сирини сўрдилар.

Келди даргоҳдин ўшал тилсиз жавоб:
Сизга биз ойинамиз, чун офтоб.

Кимки боқса унга, ўзни кўргуси,
Жону тан ҳам қошу кўзни кўргуси.

Сизки ўттиз қүш келибдирсиз ҳамон,
Ўттизи ойинада бўлмиш аён.

Келсангиз қирқ, эллигу олтмиш бўлиб,
Акс этар кўзгуда у олтмиш бўлиб.

¹ Яъни, ўттиз күш.

4390 Гарчи ул бундан-да ортиқ бўлса ҳам,
Кўзгуда чун ўзни кўргайлар бу дам.

Кимса борму, улки бизни сайр этар?¹
Қайси кўз авжи Сурайёга этар?

Елкага сандонни мўр ортгайму ҳеч?
Пашша фил арқонини тортгайму ҳеч?

Ҳар не англаб етдингиз, мулҳам эмас,
Ҳар не талқин этдингиз, ул ҳам эмас.

Неча бир водий аролаб юрдингиз,
Неча бир дониш-ла сухбат қурдингиз.

4395 Сўнгра бизнинг феълимиизга ўтдингиз,
Водийи зоту сифатга етдингиз.

Сўнгра сиз, си мурғ ҳайрон қолдингиз,
Бедилу бесабру бежон қолдингиз...

Барча қушларнинг азиз, аълоси биз,
Чун ҳақиқатнинг асл маъноси биз.

Маҳв ўлиб бизда, кўриб юз иззу ноз,
Топдингиз бизда бу янглиғ ўзни боз...

Бўйлаким маҳв ўлди қушлар бардавом,
Офтобга сингди соя, вассалом.

4400 Йўл босарканлар, эди сўз омади,
Етдилар манзилга, сўз ҳам қолмади.

Баски қисқартмоқ керакдир сўзни ул,
Йўлчию йўлбошли кетди, битди йўл...

¹ Сайр этиш – бу ерда кўриш, мушоҳада этиш маъносида.

ХИКОЯТ

Мансури Халложни ўтга отдилаар,
Токи кул бўлгунча гулхан ёқдилар.

Бир куйик, афтода ошиқ бор эди,
Кўнглига ишқи ҳақиқат ёр эди.

Кўлида чўп бирла пайдо бўлди ул,
Келдию кул бошида ўлтириди ул.

4405 Чўпи бирлан кулни қўзғатди неча,
Кўзғади кулни ва сўз қотди неча.

Дедиким, кул эрса бул, ҳақ қайдадир?
Ростин айтинг, ул Анал-Ҳақ қайдадир?

Неки сўйлаб, не эшитдинг, барчаси,
Не кўриб, хотирга битдинг, барчаси.

Чин эмасдир, бошданоқ афсонадир,
Маҳв ўлким, масканинг вайронадир.

Асл иста, асл мустағнию пок,
Фаръ бўлдинг, бўлмадинг, андин не бок?¹

4410 Баски хуршиди ҳақиқат бардавом,
Зарра бирлан соя турмас, вассалом...

¹ Фаръ – туб, асл эмас, иккинчи даражали нарса, масалан, дарахт та-насидан ўсиб чиқсан новда.

ЎТТИЗ БИРИНЧИ МАҚОЛА

Кечди юз минглаб асрлар дамба-дам,
Аввалий йўқди уларнинг, сўнгги ҳам.

Улки, қушлар жумла фоний эрдилар,
Эврилиб, ўзликка қайтиб келдилар.

Беҳуш эрмас, ҳушлимиз деб айтдилар,
Ал-фанодин ал-бақога қайтдилар.

Кечмишу ҳозирда бўлсин, кимса, бас,
Ул фаною ул бақодин сўйламас.

- 4415 Ул мақом эрмиш назардин чун йироқ,
Баски мушкулдир уни шарҳ айламоқ.

Истагайлар, не эмишдир унда ҳол,
Сўйласам айтиб неча рамзу мисол.

Қайданам айтгум уни, бергум дарак?
Ўлтириб, янги китоб ёзмоқ керак.

Не эмиш ул янги асори бақо,
Англагай ул кимсаким, эрмиш сазо.

Кимсада эрса вужуд бирлан адам,
Ул нечук қўйгай бу манзилга қадам?

- 4420 Қолмаса ул ҳам сенга, бул ҳам сенга,
Ул бақойинг юз очур ул дам сенга.

Манзилинг олис, чу жондин оҳ чек,
Жонни шайла йўлга, азми роҳ чек.

Йўлда манзилдин кейин манзил келиб,
Сен етарсен жон чекиб, бедил бўлиб.

Мен кўрармен кони заҳматдир бу йўл,
Нега ухларсен, аё нодону гўл?

Аввалу охирга ҳар дам сол назар,
Кўр ўшал охирни, унда не самар...

4425 Нутфа айлаб, кўрсатиб юз иззу ноз,
Оқил айлаб сўнг уни, ҳам корсоз.

Сўнг авайлаб, воқифи асрор этиб,
Ўз ишида чун маърифат ёр этиб.

Сўнг ўлим бирлан йўқотгайдир уни,
Чўққидин чўнқирга отгайдир уни.

Шул йўсинда хокроҳ айлар яна,
Неча бир карра фано айлар яна.

Ул фано ичра очар юз турфа роз,
Ул ҳали бор бўлмай айтур унга роз.

4430 Унга борлиқни яна айлар нисор,
Топгай ул пастлиқда юксаклик қарор.

Не кутар олдинда, бир дам ўйлагил,
Йиғ ҳушингни, фикру андеш айлагил.

Токи жонинг бўлмагай мардуди роҳ,
Бўлмагайсен бунда ҳеч мақбули шоҳ.

Етмагунча кулли фонийлик сенга,
Етмагай ул жумла боқийлик сенга.

Қолдир ул ўзликни йўлда бул замон,
Бир куни тутсин қўлингдин ногаҳон.

- 4435 Йўқ эсанг, борлиқ етишгай, эй ўғил,
Бор эсанг, қандоқ етишсин сенга ул?

Топмасанг хўрлик ила маҳву фано,
Қайданам етсин сенга иззу бақо?

ҲИКОЯТ

Бор эди бир шоҳ, унинг давронида
Етти иқлим амрию фармонида.

Амру фармон узра Искандар эди,
Оlam аҳли измида лашкар эди.

Довруғин юксалтмиш эрди ойга то,
Хоки роҳ ой эрди йўлга чиқса шоҳ.

- 4440 Хизматин айларди доно бир вазир,
Не вазир, чин хурдадону хурдагир¹.

Ул вазирнинг битта ўғли бор эди,
Оlam аҳли ҳусни унга ёр эди.

Унча барно кўрмамиш эоди жаҳон,
Мунча барноликни ҳам аҳли замон.

Бўйла ҳусни бирла, андоқким пари,
Кундузи чиқмасди уйдин ташқари.

Кундузи уйдин чиқиб келгай эди,
Юз қиёмат элда қўзғолгай эди.

¹ Хурдадону хурдагир – зийрак ва нуктадон.

4445 То яшаркан бу жаҳони хуррамий,
Бўлмамишди мунча барно одамий.

Чеҳраси эрди мисоли офтоб,
Сим-сиёҳ сочи муаттар, мушкноб.

Соябони офтоби мушк эди,
Лабларида оби ҳайвон хушк эди.

Бас, қуёшдек эрди равшан чеҳраси,
Оғзи эрди ул қуёшнинг зарраси.

Дема зарра, фитнайи мардум эди,
Ўттиз анжум зарра ичра гум эди.

4450 Зарра ичра гарчи эрмишди жаҳон.
Ўттизи порлаб, ёритгайди жаҳон.

Сочлари ўсмиш-да, юксалмиш эди,
Мавж уриб сўнг елкага тушмиш эди.

Сочларида неча тола, тор эди,
Ҳар бири жонлар осилган дор эди.

Қошлари мисли камон эрди ани,
Лек уни эгмоққа куч-дармон қани?

Наргиси афсунгар эрди кўзлари,
Отгали ўқ эрди киприклар бари.

4455 Лаблари сарчашмайи оби ҳаёт,
Ширин эрди ўйлаким қанду набот.

Хатти сабзи эрди андоқ bemisol,
Тўтийи сарчашмайи баҳри камол.

Ул йигит барнолигин мен сүйласам,
Етмагай умрим ва ожиздир қалам.

Шоҳ йигитга ошиғи шайдо эди,
Бошида ишқ дардидин савдо эди.

Қадри юксак эрди гар офтоб мисол,
Ул тўлин ой дардида эрди ҳилол.

4460 Ишқаро мустағни эрди ул қадар,
Маст эди андоқки, ўздин бехабар.

Кўрмаса офтоб жамолин бир замон,
Бағридин қонлар оқар эрди ҳамон.

Йўқ эди сабру қарори бир нафас,
Эрки бирлан ихтиёри бир нафас.

Кеча-кундуз ул йигит ҳамдам эди,
Кеча-кундуз мунису маҳрам эди.

Уззи кун шоҳ ёнидин қўймас эди,
Мехри роз айтиб анга, тўймас эди.

4465 Тун чўкиб, зулматни этса ошкор,
Шоҳда қолмас эрди орому қарор.

Ухлар эрди шам нурида маҳлиқо,
Тун бўйи бошида посбон подшо.

Дарди ишқдин бағрини тиғлар эди,
Юзларига термулиб, йиғлар эди.

Гоҳ сочар эрди юзига атри гул,
Сочларини гоҳи сийпар эрди ул.

Оҳ чекарди, оҳи эрди мисли дуд,
Кўзларидин сел қуярди чун булут.

4470 Термулиб ой юзлининг ҳуснига гах,
Оҳ чекарди, сипқорар эрди қадаҳ.

Айру тутмас эрди ўздин бир нафас,
Қайга борса, ёнида ул эрди бас.

Ул йигит хурсанд эмасди бунга ҳеч,
Боғламишиди шоҳга қўркув эрта-кеч.

Шоҳдин айрилса йигит гар бир даме,
Шоҳ унинг бошини узгайди ҳаме.

Ўғлини кўрмакка ота-онаси –
Интизорди, йўқди лекин чораси.

4475 Шоҳ қаҳру заҳридин қўрқиб улар,
Бул хусусда ҳеч оғиз очмасдилар.

Шоҳга қўшни уй-айвон бор эди,
Унда бир қиз бўй етиб, дилдор эди.

Бул йигит ул қизга кўнгил бойлади,
Ишқи бирлан ўзни мажнун айлади.

Бир кеча ул қурди суҳбат ёр ила,
Айлади васлу висол дилдор ила.

Ёр ила ўлтирди шоҳдин ул нихон,
Шоҳ маст эрди шароб нўш айлабон.

4480 Тун яримда уйқу учди шоҳдин,
Кўлда ханжар, чиқди ул хобгоҳдин.

Ахтариб чун, ўзни ҳар ён урди ул,
Икки ёр турган тарафга юрди ул.

Кўрди қиз бирлан йигит сармаст эди,
Икки кўнгил бирлашиб, пайваст эди.

Шоҳи номдор, бас, боқиб, кўрди буни,
Рашк ўти чирмашди, ёндириди уни.

Шоҳки бундоқ ошиғу ҳамдам эди,
Севгани лек ўзгага маҳрам эди.

4485 Деди: нодон мен каби шоҳни қўйиб,
Ўзгага бермиш кўнгил, жондин суйиб.

Ҳиммат айлаб, этдим унга мунча иш,
Кимсага ҳеч кимса мундоқ этмамиш.

Боқ, мукофотимга ул чун айлагай,
Айласин, ал-ҳақки, ширин айлагай.

Бор хазинамнинг калити илкида,
Не улуғлар бош эгарлар мулкида.

Мен анга ҳамрозу ҳамдам бўлсаму,
Ҳар нафас ҳамдарду маҳрам бўлсаму.

4490 Бир гадо бирлан севишса ул ниҳон,
Мен уни сургум жаҳондин шул замон...

Бас, амр этди: тутиңгиз, бойлангиз,
Келтиринг, қаршимда ҳозир айлангиз.

Тутдилар ошиқ йигитни, подшо
Урди бир калтак била тўйгунча то.

Сүнг буюрди – судраб элтингиз уни,
Дор тикиб, сүнг дорга тортингиз уни.

Терисин аввал шилингиз, деди, сўнг
Сарнигун айлаб, оёғидин осинг.

4495 Токи билсин барча, минбаъд аҳли шоҳ,
Солмагай ҳаргиз бирорвга бир нигоҳ...

Элтдилар судраб йигитни дор томон,
Терисин шилмоққа ҳам азм айлабон.

Келди ўғли бошига вазир шу дам,
Чекди фарёд, деди: эй жоним болам,

Қайданам сенга ёпишди бу бало?
Не сабабдин сенга душман бўлди шоҳ?

Ўнта қул фармонга нозир эрдилар,
Қасди жон айларга ҳозир эрдилар.

4500 Келди вазир, кўксида дард эрди, доғ.
Ҳар бирига берди дурри шабчироғ.

Дедиким, мастдир бу оқшом подшо,
Бул йигитда йўқ сира айбу гуноҳ.

Тортса гар ҳушёр чу шоҳи номдор,
Ҳам пушаймон бўлгуси, ҳам бекарор.

Юз киши илкида ўлса шу ўғил,
Юзтасин ҳам қўймагай, ўлдиргай ул.

Деди қуллар: тўғри, лекин шоҳ агар
Келса, дорни холи кўрса бир маҳал,

4505 Бағримизни ул ҳамон хун айлагай,
Тиғ чекиб, қонларни Жайхұн айлагай...

Бор эди қотил, уни келтирдилар,
Қатлин айлаб, терисин ҳам шилдилар.

Осдилар сүңг дорга айлаб сарнигун,
Қылди тупроқларни қони лолагун.

Элтди вазир ўғлини, этди ниҳон,
Парда ортидин не бўлгай деб аён...

Кўз очиб, шоҳ тортди ҳушёр эрталаб,
Жонини ўрттар эди қаҳру ғазаб.

4510 Чорлади қулларни ҳиддат ичра тез,
Сўрди: ул итваччани не қилдингиз?

Дедилар ул барча: тутдик, бойладик,
Терисин шилдик, уни қатл айладик.

Дорга осдик сүнгра айлаб сарнигун,
Ул ҳамон дорга осиғлиқ, ғарқи хун...

Тинглабон бундоқ жавобни, қулди шоҳ,
Үнта қулдин баски амнун бўлди шоҳ.

Ҳар бирига тўну хилъат берди ул,
Неча мансаб бирла рағбат берди ул.

4515 Деди: ул мурдор қоронғу кечгача
Дорда турсин шул осиғлиқ ҳолича.

Барча кўрсин, ким әмиш ул нобакор,
Ибрат олсин жумла халқи рўзгор...

Бу хабар етди шаҳар аҳлига чун,
Ўртаниб диллар аламдин бўлди хун.

Халқ келиб тўп-тўп, сира тинмасдилар,
Дорда ким эрди, vale билмасдилар.

Дорда эрди қонга ботган эт фақат,
Териси буткул шилингган бир жасад.

- 4520 Ҳар кишиким кўз солиб, кўрган замон
Ул йигит ҳолига йиғларди ниҳон.

Барча бирдек термулиб, бош эгдилар,
Барча бирдек қайғуриб, оҳ чекдилар.

Тун кириб, шоҳ интиқиб дилдорига,
Бас, пушаймон бўлди ўз кирдорига.

Ишқ оширди дардини, зўр айлади,
Шерюрак подшони бир мўр айлади¹.

Ул юсуфваш бирла шоҳ улфат эди,
Сұхбат айлаб, маскани хилват эди.

- 4525 Ҳам шароби васли бирлан эрди маст,
Энди унга дарди ҳижрон эрди, бас.

Битди сабри, кетди орому қарор,
Йиғлабон кўз ёши тўқди зор-зор.

Жонига чирмашди чун дарду фироқ,
Бағрини ёндириди оташ иштиёқ.

Ёшини селдек оқизди, қўйди шоҳ,
Бошини тупроққа охир қўйди шоҳ.

¹ Мўр – чумоли.

Кўк кийиб, мотам тутиб, оҳурди ул,
Хуну хокистар аро ўлтириди ул.

4530 На таом айлар тановул, на шароб,
Кўзларидин учмиш эрди уйқу, хоб.

Сабру тоқат тунда тарк этди уни,
Деди: холи айлангиз дор остини.

Борди пинҳон ул йигитнинг ёнига,
Неки этмиш эрди, олди ёдига.

Ҳар ишин шоҳ бўйлаким ёд айлади,
Баски, фарёд узра фарёд айлади.

Сигмас эрди кўксига дарди, ғами,
Ҳар замон юксалди, ортди мотами.

4535 Ул жасад остида ҳунграп эрди шоҳ,
Қонларин юзига суркар эрди шоҳ.

Оҳуриб, тупроқقا ўзни ташлабон,
Кўлларин тишлаб, узарди ҳар замон.

Йиғлабон тупроқ сочарди бошига,
Йўқ эди ҳадду ҳисоб кўз ёшига.

Тун бўйи чекди алам, ўртанди ул,
Шам каби кўз ёши тўқди, ёнди ул.

Чун насими субҳ эсгач беқарор,
Турди-да, юрди саройга шахриёр.

4540 Хуну хокистар аро ётди фақат,
Фам мусибат баҳрига ботди фақат.

Кирк кеча-кнудуз келиб, кечди тамом,
Бўлди қилдек ул шаҳи олий мақом.

Чилла ўлтирди, талабгор бўлди шоҳ,
Ул йигит ҳажрида бемор бўлди шоҳ.

Кимсада бир ҳолу ҳолат йўқ эди,
Шоҳга сўз айтурга журъат йўқ эди.

Чилладан ҳам ўтди муддат бир неча,
Ул йигитни тушда кўрди бир кеча.

4545 Ой юзи кўз ёшидин сўлмиш эди,
 Қон ютиб, қон ичра ўлтирмиш эди.

Шоҳ сўрди: эй латифи жонфизо,
Не сабабдин ўлтирурсен қон аро?

Деди: аввал ошнолик айладинг,
Сўнгра бундоқ бевафолик айладинг.

Сен менинг терими шилдинг бегуноҳ,
Шулмидир расми вафо, эй подшо?

Дўст жўстга шунча ҳам этгайму бас,
Кофир ўлгайменки, кофир айламас.

4550 Мен не қилдим сенга, хун этдинг мени,
 Дорга тортдинг, сарнигун этдинг мени.

Юз ўгиридим энди сендин, эй жаноб,
Менга бергайсен Қиёматда жавоб.

Юзлашармиз ул арова ошкор,
Интиқомимни олур Парвардигор...

Баски шоҳга бўлди бундоқ бир жавоб,
Оҳ чекиб, уйғонди ул, тарк этди хоб,

Қолди оташ ичра боз жону дили,
Дам сайин бўлди зиёда мушкули.

- 4555 Бўлди чун девона ул, гирёна ҳам,
Бошида дард узра дард, ғам узра ғам.

Бўлди чун девона, кўзни ёшлади,
Бир ёниқ фарёд чекишга бошлади.

Деди: эй, бошимда бундоқ мушкулим,
Ёнди жоним, қонга ғарқ бўлди дилим.

Неча йиллар дўсту ёр этдинг мени,
Мен vale қонларга гарқ этдим сени.

Мен каби ким бўйла мудҳиш кор этар,
Ўз-ўзига тиф чекиб, аборг этар?

- 4560 Арзигай ҳар лаҳза бўлсан ғарқи хун,
Мен нечун дўстимни қатл этдим, нечун?

Ўртаниб, ёндим жудоликдин, ўғил,
Бурмагил юз ошноликдин, ўғил.

Мен ёмонлик айладим, сен айлама,
Қасди жон этдим ўзимга мен ҳама.

Кўнглим ичра доғ уза доғмен бугун,
Мен сенинг кўйингда тупроқмен бугун.

Қайдин излай мен сени, жоним менинг,
Шафқат айла, битди дармоним менинг.

4565 Гар жафо этдим сенга мен бевафо,
Сен вафо қил, этмагил жабру жафо.

Түкдим ул қонингни, вах, мен бехабар,
Тобакай қоним түкарсен, эй жигар?

Маст эдим, келди хатолиғ қошима,
Тушди қисматдин қаролиғ бошима.

Ул куни кетдинг қошимдин ногаңон,
Не эмиш сенсиз менга мулки жаңон?

Даҳр аро сенсиз ололмасмен нафас,
Қолди умримдин бир-икки лаңза, бас.

4570 Келди жон оғзимга, энди шаҳриёр
Хунбаҳойингга этар жонин нисор.

Мен ўлимдин қўрқмагум, ул не писанд?
Этганим жабру жафодин қўрқамен -

То абад узрини жоним сўрса то,
Ўтмагай узри, ювилмас бу гуноҳ.

Кошки эрди чексалар бўйнимга тиғ,
Кетса қўнглиминдин басе дарду дариғ.

Холиқо, ёндириди бу ҳасрат мени,
Солди оташларга боз ҳайрат мени.

4575 Менда йўқ ҳеч тоқату тоби фироқ,
Мунчалар куйдирди жоним иштиёқ.

Ол шу жонимни, аё, бер раҳматим,
Қолмади ортиқ кутишга тоқатим...

Бўйла сўзлар айтди, хомуш бўлди шоҳ,
Сўнгра хомушликда бехуш бўлди шоҳ.

Оқибат пайки иноят етди, бас,
Келди шукронга, шикоят битди, бас.

Ҳаддидин ошди чу дарди подшо,
Вазири пинҳон боқар эрди анго.

4580 Ўғлини орастга этди, шайлади,
Сўнгра ул шоҳи жаҳонга йўллади.

Борди шоҳ олдига ойдек дафъатан,
Илкида шай эрди шамширу кафан.

Борди шоҳ олдигаву тиз чўкди ул,
Сел каби кўз ёшларини тўқди ул.

Кўрди ул ой юзлини шоҳи жаҳон,
Мен буни айтмоққа ожизмен ҳамон.

Шоҳ йиқилди ерга, сўнгра ул ўғил,
Кимса билмас, не ажаб ҳол эрди бул.

4585 Ҳар не айтсам, битмагай ул, кам эмиш,
Инжу сув қаърида бундоқ жам эмиш.

Шоҳ бўлди дарди ҳижрондин халос,
Тутдилар маскан яна айвони хос.

Ул ароди воқифи асрор йўқ,
Икки дўст эрди, vale ағёр йўқ.

Ул сўз айтиб, бул муқаррар тинглагай,
Кўр киши қўргай буни, кар тинглагай.

Ким бўлибманки, буни шарҳ айласам,
Жон берурмен шарҳ этишни ўйласам.

- 4590 Кўрмайин, бўлгай нечук шарҳ бермагим.
Четдадирмен, яхшидир жим турмагим.

Гар ижозат этса пешволар менга,
Бир қадар шарҳини сўйлардим сенга.

Лек арога бунда қил ҳам сиғмагай,
Бас, сукут қил, ўзга маҳрам сиғмагай.

Сиғмагай қил ҳам арога бул замон,
Сенга хомушлик эрур тифи забон.

Боқки, савсангул тили ҳам юз эрур,
Лек кўнгил бермиш чу хомушликка ул.

- 4595 Бунда мен ҳам сўзни этгаймен тамом,
Иш керак, сўз неча айтдим, вассалом...

КИТОБ ХОТИМАСИ

Айладинг, Аттор, шу оламга нисор
Мушки асрорингни ҳар дам неча бор.

Чулғаниб атрингга оғоқи жаҳон,
Тўлдилар шавқингга ушшоқи жаҳон.

Кел, ишқдин дам уриб, оғоқ чек,
Гаҳ навое пардайи ушшоқ чек.

Ёзганинг ушшоқи Ҳаққа келди хуш,
Ҳар сўзингдин тушди шу жонларга жўш.

4600 Сенда хатм ўлди чунон офтобда нур,
Мантиқут-тайру мақомоти туюр¹.

Бул надир, йўл узра ҳайронликмидир?
Ё магар девони сарсонликмидир?

Дилда дардинг бўлса, кел, майдонга туш,
Жон фидо этгил-да, бул девонга туш.

Бўйла майдонким, кўринмас жон сенга,
Ҳам кўринмасдир ўшал майдон сенга.

Бўлмаса дардинг, билинмас дарди ҳам,
Не эмиш дарди, кўринмас гарди ҳам.

4605 Дулдули дардингга мин, юргил ҳамон,
Баски юрдинг, юр муродинг қўзлабон.

Бемуродлик бўлмагунча нонинг ул,
Хеч тирилгайму дили бежонинг ул?

Дард ҳосил қилки, дармонинг ўшал,
Аввал-охир доруий жонинг ўшал.

Гар китобимга боқарсен, марди роҳ,
Боқма мағур, айлама кибру ҳаво.

Боқ менинг дардимгаю додимга ет,
Юзта дардимнинг бирига бовар эт.

4610 Бул китобга дард ила боқсанг неча,
Етгай ул давлат тўпинг даргоҳгача.

Не эмиш зоҳидлигу озодалик?
Дард лозим, иш сенга – афтолалик.

¹ Мақомоти туюр – қушларнинг мақомлари.

Кимда дард эрса, у дармон топмасин,
Кимки дармон истаса, жон топмасин.

Эр керак, бегонадир уйқу анга,
Ташнадир, бўлмас мұяссар сув анга.

Ким бу сўзни жонига этмас ҳабиб,
Унга етмас ишқ тарийқидин насиб.

- 4615 Ким ўқирса, илтифотга етгуси,
Англаган, мақсад, муродга етгуси.

Аҳли суврат ғарқи гуфторим менинг,
Аҳли маъни марди асрорим менинг.

Бул китоб оройиши айём эрур,
Бўйлаким, хосу авомга завқ берур.

Муз қотиб қолганлар очса бул китоб,
Юзланур оташ анга, очгай ҳижоб.

Бор менинг назмимда бир файзи ажиб,
Дам сайин андин зиёд бўлгай насиб.

- 4620 Гар ўқиш сенга мұяссар бўлгуси,
Ҳар сафар кўпроқ муаттар бўлгуси.

Парда ортида келиндирил ул чунон,
Бир йўла ҳуснин сенга этмас аён.

То қиёмат бўлмагай бир муғтанам,
Мен каби сурса қоғоз узра қалам.

Мен ҳақиқат баҳримен, гавҳарфишон,
Хатм ўлди менда сўз, булдир нишон.

Мақтоворимни сүйладим, айтиб баёт,
Бир киши айларму бунга илтифот?

4625 Ахли инсоф билгуси қадрим менинг,
Нур сочар андоқ маҳи бадрим менинг¹.

Сүйладим ҳолимни андак сўз аро,
Англаган инсоф ила бергай баҳо.

Халққа сочдим бўйлаким дурру гуҳар,
То қиёмат мен тирикмен ҳар маҳал.

Халқ мени қўймас тилидин ҳеч қачон,
Ёдланурмен, бас менга шул армуғон.

Гар ўшал тўққиз фалак емрилса ҳам,
Бул китобдин бўлмагай бир нуқта кам.

4630 Кимсага йўлбошчи бўлса бул китоб,
Йўл очиб, кўз ўнгидин сургай ҳижоб.

Бул китобдин етса қўнгилга камол,
Ул дуогўйга дегилким, ёд ол...

Илкингизга гул каби тутдим буни,
Эй азизлар, ёд этинг, эсланг мени.

Ҳар киши ким эрди, кўрсатди аён,
Жилва айлаб, йўлга ул бўлди равон.

Ухлаганлар олди бошимдин хушим,
Жилвалар этди уларга жон кушим.

4635 Бул сўзим жону қўнгилга етгуси,
Ухлаган жонларни ул уйғотгуси.

¹ Маҳи бадр – тўлин ой.

Ўнгланиб чун, олға босгайдир ишим,
Оқибат битгай ғамим ҳам ташвишим.

Ўзни ёқдим мен чароғдек бир умр,
Шам каби сочдим жаҳонга шуъла, нур.

Бир чароғдон бўлди бул жисму думоғ,
Тобакай дунёда бўлгаймен чароғ?

Билмадим роҳат, фароғат, хурду хоб¹,
Жоним ўртанди, жигар бўлди кабоб.

4640 Мен дедим кўнглимга: эй бисёр гўй²,
Энди жим бўл, изла асрор, сўзни кўй.

Деди: айб этма, ичимда ўт, тутун,
Сўзламас эрсам, ёнармен бус-бутун.

Ёнса бундоқ баҳри жоним ичра ўт,
Мен нечук бир лаҳза этгаймен сукут?

Кимсага беҳуда айтмам сўзни мен,
Ҳар нафас машғул этармен ўзни мен.

Неча бор дарди дилимни сўйлайн?
Мен бу иш марди эмасмен, найлайн?

4645 Бул ҳама афсонаю беҳудалик,
Эр иши жондин кечиш, осудалик.

Дилки бул беҳудага машғул эрур,
Не чиқар сўздин агар эскирса ул?

¹ Хурду хоб – еб-ичиш ва уйқу.

² Бисёр гўй – сергап, эзма.

Жон фидо этмак керак, юз бор дедим,
Чўзма гапни, айла истиғфор, дедим.

Тобакай ёнгай бу жон, куйгай давом,
Жон фидо этгил-да, хомуш бўл тамом...

ҲИКОЯТ

Жон бераркан пири дононинг бири,
Деди: билсайдим агарда илгари.

4650 Сўзламоқдин тингламоқ афзал эрур,
Сўзламасдим, зое этмасдим умр...

Ложарам олтинга тенгдир яхши сўз,
Айтмаган сўз эрса олтиндан азиз.

Бори мушкул қисмати мардони мард,
Бизга қисмат бўлди сўзу дарду дард.

Дарди дин бўлсайди сенда ончунон,
Ҳар не айтсан, англай эрдинг бегумон.

Ошноликдин дилинг бегонадир,
Ҳар не айтсан, ул сенга афсонадир.

4655 Бор-да, роҳатлан-да, чўмгил уйқуга,
Мен эсам афсоналар сўйлай сенга.

Сўйлагай афсона Аттор хуш-хуш,
Уйқу босса, ухласанг роҳат, на хуш.

Ёғ тўкиб, кўйлакни андоқ мойладик,
Инжуни тўнғизга маржон айладик.

Сидқидилдан суфра ёздиң неча бор,
Суфрадин турдик ва лекин оч-наҳор.

Айладим нафсимга фармон, бўлмади,
Дору бердим унга, дармон бўлмади.

4660 Келмади бир иш қўлимдин, ўйладим,
Кўлни ювдим ўздин, узлат айладим.

Жазбайи Ҳақ бунда лозим, йўқса, ҳай,
Жаҳд этарсен, бир натижа бўлмагай.

Нафс семирди, ўзни бир дам тиймади,
Мен тўйиб жондин, vale ул тўймади.

Олмади бир дам қулоққа хоҳишим,
Зое кетди барча оху нолишим.

Токи мен жон бермагунча зор-зор,
Олмагай пандимни ул, Парвардигор...

ҲИКОЯТ

4665 Ўлди Искандар тутиб ул роҳи дин,
Чун Арасту деди унга: шоҳи дин,

Панд-насиҳат айлар эрдинг сен мудом,
Халққа ул пандинг бугун бўлди тамом...

Эй кўнгил, юз бир бало олдингдадир,
Бори сергак бўл, ажал ортингдадир.

Мен сенга қушлар каломин сарбасар
Сўйладим, фаҳм айлагил, эй бехабар.

Айламишлар аҳли ошиқ, неча кас
Ул ажал келмай туриб тарки қафас.

- 4670 Бас, улар шарҳи, баёни ўзгадир,
Бунда қушларнинг забони ўзгадир.

Ким Симурғ олдида иксир ўнглагай,
Ул ҳама қушлар тилини англағай.

Чун билиб ул панди юонийни сен,
Не билурсен ганжи руҳонийни сен?

Панди юондин керак фард бўлмагинг,
Йўқса, қайдин дин аро мард бўлмагинг?

Кимки ул ҳикматга кўнгил берса гар,
Ул демак девони ишқдин бехабар.

- 4675 Фалсафа «фе»сини суйгаймен нечук?
Куфр «коф»и менга андин кўп суюк.

Чун куфрдин парда тортилса, ҳижоб,
Сен куфрдин ўзни тортгайсен шу тоб.

Лекин ул илми жадалким йўл тўсар,
Мардуми огоҳга этгайдир асар.

Гар ўшал ҳикматга бергайсен кўнгил,
Ёндириб, кул айлагай кўнглингни ул.

Ёқса юон ҳикматин ул шамъи дин,
Шамъи кўнглингга зиён етмас кейин.

- 4680 Сенга басдир неча пирлар ҳикмати,
Ҳикмати юоннинг ул не ҳожати?..

Дам уарсен мунча, Аттор, бесабр,
Сен бу ишнинг марди эрмассен, ахир.

Кеч вужудингдин басе, эй жони пок,
Сўнг сочил тупроқ бўлиб, хок узра хок.

Токи борсен, поймолдирсен фақат,
Йўқ эсанг, бош узра тождирсен абад.

Сен фано бўл, жумла ул аҳли фано
Токи даргоҳ йўл бўшатгайлар санго.

4885 Бул сўзим ҳар кимсага раҳбар эрур,
Сенга ҳам басдир, кифоят айлаюр.

Йўлдаги қушлардин эрмасмен, сенга
Зикрини айтдим уларнинг, бас менга.

Ўтди карвонлар, чу гард этмиш насиб,
Кечди жонлар, менга дард этмиш насиб...

ҲИКОЯТ

Сўрди сўфийдин бирор: айтгил ўзинг,
Тобакай мардони Ҳақдандир сўзинг?

Дедиким, мардони Ҳақдин бардавом
Сўйласам, бул менга хуш келгай мудом.

4690 Ҳар сафар айтиб уларнинг қиссасин,
Жону дилдан сўйлагаймен ҳиссасин.

Мен шакар деб отини айтсам нуқул,
Бул заҳардин яхшироқдир ҳар тугул.

Жумла девоним басе девоналиқ,
Ақлу хушдин айрилиқ, бегоналиқ.

Неча сўзлармен яна, билмам, ажаб,
Неча излармен яна, билмама, ажаб.

Мен чу нодон давлатим тарқ айладим,
Аҳли ғафлатга ўгитлар сўйладим.

- 4695 Десалар: йўлдин адашган, гумроҳ,
Бул гуноҳ узрин ўзингдин сен сўро.

Билмадим, келгайму тўғри менга бул,
Юз умр етгаймикин узримга ул?

Йўлида гар машғул эрсам корга мен,
Мунчалар ботмас эдим ашъорга мен.

Гар унинг йўлида тутсайдим мақом,
«Шин»и шеърим «син» бўлур эрди мудом.

Мен узр айтгум бу гуфторим учун,
Бўйлаким бехуда ашъорим учун.

- 4700 Шеър айтмоқ – бесамарликка далил,
Ўзни кўрмак бу ва жоҳиллик эрур.

Кўрмадим оламда бир маҳрам касе,
Шеър ила дардим баён этдим басе.

Бўлса сирдошинг, дилинг оч, сўзлагил,
Бўзлагил ҳар дам, аслни излагил.

Мен-да ўртандим мудом, қон йиғладим,
Бўйла қон сочгувчи сўзлар сўйладим.

Хидласанг шул баҳри күнглимини басе,
Сўзларимдин бурқирайдир қон иси.

- 4705 Заҳри бидъатга йўлиқса кимса ул,
Унга шул юксак сўзим тарёқ эрур.

Кимсалар борким Худодин бехабар,
Ичкизурлар менга бу хуни жигар.

Битта қотган нон-ла ёзгум суфрани,
Кўзларим ёши-ла намлармен уни.

Суфрада кўнглимини бирён айлагум,
Гоҳ-гоҳ Жибрилни меҳмон айлагум.

- 4710 Менга Руҳул қуддус ул ҳамкоса чун,
Ўзгалар нонини синдиргум нечун?

Ўзгаларнинг нони эрмас менга хуш,
Менга бас ноним била шу нонхуруш.

Ганжи дилдир жонафзойим менинг,
Чин ҳақиқат кўнгил оройим менинг.

Бир кишида шунча давлат бўлса, бас,
Суфлалар олдида ул тушгайму паст?¹

Минг шукур, дарбор ила йўқдир ишим,
Номуносиблар била йўқ ташвишим.

- 4715 Бош эгиб, ҳар кимга таъзим этмадим,
Дуну олчоқни хўжам деб айтмадим.

Тотмадим золим таомин мўлтираб,
Бир китоб ҳам битмадим унга атаб.

¹ Суфла – пасткаш, нокас.



Химмати олий нишоним бас менга,
Куввати рухи равоним бас менга.

Пешқадамлар бирла бўлди улфатим,
Борму худбинларга сабру тоқатим?

Халқ ғамидин бўйла озод ўлмишам,
Юз бало гирдобида шод ўлмишам.

4720 Мен улардин баски фориғмен ҳамон
Хоҳ десин яхши мени, хоҳи ёмон.

Мен чунон дард ичрадирмен, ўйлаким,
Жумла дунёдин этакни силкидим.

Гар ўшал дарди дилимни сўйласам,
Сен менга ҳайрон бўлурсен менданам.

Жисму жон кетди, улардин менга боз
Қолгани дарду дариф эрди, холос...

ҲИКОЯТ

Чун етишди пирга Азроил тиғи,
Деди: менда йўқ сира йўл озиғи.

4725 Манглайим терини тупроққа қориб,
Битта фишт қуйган эдим чарчаб, ҳориб.

Шишага йиғдим кўзим ёшини ман,
Жанда тикдим эскидин, бўлгай кафан.

Аввал ул ашким-ла мурдамни ювинг,
Сўнгра бошим остига ғиштим қўйинг.

Ул кафанни ёшларим бирлан ювиб,
Эй дариғо, деб ёзув ёздим, қавиб.

Ул кафан бирлан ўралсин бу вужуд,
Топширинглар сўнг уни тупроққа зуд.

4730 То қиёматга қадар рангим сариғ,
Ул мозоримга ёғар дарду дариғ.

Не сабаб дардим туташмиш ончунон?
Пашша бирлан ел турарму ёнма-ён.

Соя истар баски офтобдин висол,
Лек етишмоқ унга савдои маҳол.

Гар маҳолдир, лек урингайдир фақат,
Ўзни ул офтобга ургайдир фақат.

Кимки тушгайдир бу янглиғ пешага,
Бундин ортиқ бормагай андишага.

4735 Дам сайин бошимда ортар мушкулим,
Мен нетиб андин аритгаймен дилим?

Мен каби бир зору танҳо бормикин?
Ташналаб чун, ғарқи дарё бормикин?

Кимса борму, бўлса ул ҳамдам менга?
Бўлса ҳамдард, улфату маҳрам менга?

На биронни мадҳ этарга ҳимматим,
На қоронғу ичра бордир хилватим.

На дилим, на ўзга дил бирлан ҳавас,
Яхшилик этмам, ёмонлик ҳам эмас.

-
- 4740 На ҳавои луқмайи султон менга,
На сазои силлайи дарбон менга.

На бориб, танҳо туришга ҳолатим,
На улисдин айрилишга тоқатим.

Бўйла аҳволим менинг зеру забар,
Деб ўшал пир ҳолидин берди хабар...

ҲИКОЯТ

- Бир киши дедики, ўттиз йил тамом
Кун кечиргаймен бу янглиғ мен давом.
- Не эди ул онда И smoилда ҳол,
Отаси бошин кесаркан, шу мисол.
- 4745 Боқки, И smoилда бир дам эрди ул,
Менда бу ҳолат туганмас бир умр.

Кимса билмас, мен нечук зиндан аро,
Кечалар зулмат менга, кундуз қаро.

Гоҳ ёниб шамдек, чекармен интизор,
Гоҳи йиғлармен чу абри навбаҳор.

Сен боқиб шамга, кўрарсен нур фақат,
Бошида оташ унинг кўксига дард.

Кимсага кимса йироқдин боқса ул,
Термулиб, кўнглига ҳеч топгайму йўл?

4750 Билмагум, чавгонга тобе тўпсимон,
Қайда бошимдир, оёғимдир қаён?

Бир самар кутдим танимдин, келди ҳеч,
Неки айтдим, не бажардим, бўлди ҳеч.

Эй дариғо, кимса ёрдам айламас,
Умр зое кечди бекорликда, бас.

Қувватим бор эрди, ишни билмадим,
Ишни билган онда, битди қувватим.

Бул замон чун ожизу бечорамен,
Чора излармен басе, оворамен...

ҲИКОЯТ

4755 Этди тарк Шиблий жаҳонни қайғуда,
Бир кеча шогирди кўрди уйкуда.

Сўрди: не бўлди ишинг, эй некбахт?
Деди: бўлдим мен сўроқ пайти каракт.

Чун кўриб афтода аҳволим маним,
Ўз-ўзимга баски душман эрканим,

Раҳматин кўрсатди Тангрим бешу кам,
Этди баҳшойиш менга лутфу карам...

Холиқо, кўйингда бир бечорамен,
Бир чумолимен, чўлоқ, чоҳ ичра мен.

4760 Бехабармен, даҳр аро киммен ўзим?
Қайдадурмен, кимга мансубмен ўзим?

Бекасу бедавлату беҳосиле,
Бенавою бекарору бедиле.

Кечди, бас, хуни жигар бирлан умр,
Етмади жонимга бир дам баҳра ул.

Ҳар нечук сўз айтдим, эрди ул гуноҳ,
Келди жон оғзимгаву бўйдим адо.

Учди қўлдин, кетди, диним қолмади,
Қолди суврат менда, маъним қолмади.

- 4765 Мен на кофир, на мусулмонмен бу дам,
Бул аро йўл узра ҳайронмен бу дам.

На мусулмону на на кофир, не қилай?
Иш менга ҳаддин жафодир, не қилай?

Тангу тор эшикда кўргаймен ўзим,
Чорасиз, деворга бургаймен юзим...

Йўлни очгил мискину оворага,
Эт иноят мен ғариб, бечорага.

Гарчи йўқдир зоди роҳим, эй ҳабиб¹,
Бор ҳамиша ашку оҳим, эй ҳабиб.

- 4770 Оҳ ила айбимни куйдирсанг, нетар?
Дафтарим кўз ёш ила ювсанг, нетар.

Кимки кўзда ёшини дарё қилур,
Бас, муносибдир ўшал манзилга ул.

Улки кўзда ёши чун хунбор эмас,
Айт анга, борсин, у бизга ёр эмас...

¹ Зоди роҳ – йўл озиғи.

ҲИКОЯТ

Йўл босар эрди аролаб Пири куч,
Ногаҳон неча малакка келди дуч.

Пир уларга боқди, бўлди қўнгли ғаш,
Бир ҳовуч пул ўртада эрди талаш.

4775 Пир уларга юзланиб, сўрди савол:
Англатинг, не ақча эрмиш бу, не ҳол?

Кушсимон эрди бири, деди: аё,
Кечди бу йўлдин ғарибу бенаво.

Кўнглидин оҳ чекди андок, ўтди ул,
Кўзидин ёш тўқди қайноқ, кетди ул.

Биз ҳамон бул роҳи дард узра юриб,
Оҳ ила кўз ёши олгаймиз териб...

Эй Худо, чун ашку зорим бор менинг,
Йўқса молим, бўйла борим бор менинг.

4780 Баски бул ерда раводир ашку оҳ,
Кам эмас, бандангда мўлдир бул матоҳ,

Покла оҳим бирла шул жоним менинг,
Юв кўзим ёши-ла девоним менинг.

Бўйла бир чоҳ ичрадирмен, пойбаст¹,
Сендин ўзга кимса бермас менга даст.

Ҳам тани заҳматкашим бўлмиш адо,
Ҳам бу қўнглим порадир чун қон аро.

Бу забун ҳолимни маъзур тут, Эгам,
Чоҳу зиндандин келурмен ушбу дам...

¹ Пойбаст – оёғи боғлиқ.

ҲИКОЯТ

4785 Бу Саиди Михна дўст, асҳоб аро,
 Ўлтиарди, маскан эрди хонақоҳ.

Кирди ногоҳ кимса маству бекарор,
Кўзларидин ёш тўкиб, ошуфтавор.

Йиғлабон, бадмастлик оғоз айлади,
Неча носоз ишни ул боз айлади.

Шайх турди, келди мастнинг қошига,
Мехру шафқат-ла эгилди бошига.

Нега йиғларсен, аё маҳжур, деди,
Бер қўлингни, ётма бундоқ, тур, деди.

4790 Маст деди: эй, Тангри ул ёринг сенинг,
 Дастгирикми магар коринг сенинг?

Сен олиб бошингни, боргил дашту кўй,
Мен йиқилдим, бул ишимни Унга кўй.

Дастгирик келса ҳар кимдин, ҳамон
Бек бўлур эрди чумоли шул замон.

Этма даъво, сен этар ишмас бу, мен
Сенча эрмасмен, бўлак бир кимсамен...

Шайх йиқилди, туйди мастнинг дардини,
Ювди ёши бирла ранги зардини...

4795 Холиқо, ҳар лаҳза шул додим сенга,
 Тут менинг илкимни, бўл дастгир менга.

ҲИКОЯТ

Бир азиз дедики, Тангри зулжалол
Дашти маҳшарда сўрар мендин савол.

Айт, не келтирдинг, деса, дерманки, ох,
Чоҳу зиндандин не келтиргум, Илоҳ?

Чиқдим ул зиндандану саргаштамен,
Ғамга ғарқмен, дард ила оташдамен.

Бенавомен, ғамга ботган бир қулинг,
Чоҳу зинданингда ётган бир қулинг.

4800 Бор умидим, лутф этгайсен менга,
Хилъати фазлингни тутгайсен менга.

Кир ва иркитмен, мени пок айлагил,
Эт мусулмону фараҳнок айлагил.

Фишту тупроқ ичра ётгайдир таним,
Сен кечир яхши, ёмонимни маним.

Бўйлаким йўқдин яратдинг, эй Худо,
Айласанг маъзур яна, бўлгай раво...

ҲИКОЯТ

Чун Низомулмулк оларкан сўнг нафас,
Деди: Эй Оллоҳ, кетармен хушк даст¹.

4805 Эй Худойим, мен очиб оламга қўз,
Кўрганим ҳар кимса сендин очса сўз,

Жонни ул сўзга харидор айладим,
Ўзни ундоқ кимсага ёр айладим.

Ҳар нафас бўлдим харидоринг сенинг,
Сотмадим ҳеч номусу оринг сенинг.

Мен сотиб олдим, Эгам, ёлғиз сени,
Лек бироғга сотмадим ҳаргиз сени.

Сўнг нафасда кел, харидор бўл менга,
Дўйсту ёрим йўқ, ўзинг ёр бўл менга.

4810 Сўнг нафас жонимга бундоқ етди, бас,
Эй Худо, бошимда тургил бир нафас.

Дўйстларим тупроққа чун айлаб ниҳон,
Кўл узиб мендин, нари кетган замон,

Кўл узатгил сен қулингга, Ҳувву Ҳай,
Домани фазлингни мен маҳкам тутай...

¹ Дунёдан бўм-бўш, куп-куруқ кўл ила кетяпман.

ХИКОЯТ

Гар Сулаймон этса-да касби камол,
Қолди ожиз бир куни, сўрди савол.

Эй чумоли, деди, айтгил бир йўла,
Қайси лой кўпроқ қоришмиш ғам ила?

- 4815 Ланг чумоли деди: ғамга сарнавишт
 Тор қабр устига қўнган сўнгги ғишт...

Сўнгги ғишт қабримга қўнган ул замон,
Кесилиб халқдин умидим ҳам тамом,

Ул қаро ер остида, эй пок зот,
Кўз юмиб ётсам жаҳондин бенажот,

Сўнгги ғишт ёпгач юзимни чун залил,
Эй Худо, мендин юзингни бурмагил.

Бас, юзим тупроқقا босдим, бўлди кеч,
Кўзларимга бир нима кўрсатма ҳеч.

- 4820 Бор умидим, гарчи кўп этдим гуноҳ,
 Айру тутгайсен азобингни, Илоҳ.

Сен ўзингсен соҳиби лутфу карам,
Айла маъзур келгану кетганни ҳам...

ҲИКОЯТ

Бу Саиди Михнага ҳаммом эди,
Ходими, ҳаммомчи довдир, хом эди.

Кирларин ишқаб, туширгай эрди ул,
Сўнгра шайхнинг олдига сургайди ул.

Бир маҳал сўрди: аё муршиди пир,
Бул жаҳон ичра жавонмардлик надир?

4825 Шайх дедиким, кирни қўрсатмай ҳамон,
Халқ қўзидин ҳам ани тутмак ниҳон...

Бул жавоб андоқки тушди жойига,
Ул йигит бош қўйди шайхнинг пойига.

Тавба қилди гўллигин иқрор этиб,
Шайхни хурсанд қилди истиғфор этиб...

Холиқо, Парвардигоро, Раббано,
Сенга юз шукрон, сенга ҳамду сано.

Халқи оламнинг жавонмардлиги, бас,
Денгизингдин қатрадир ул, бошқамас.

4830 Қойими мутлақ ўзингдирсен фақат,
Ул жавонмардликка йўқдир ҳеч сифат.

Бизки чиркин, беҳаёдирмиз, кечир,
Неча иркитмиз, ани қўрсатмагил...

ҲИКОЯТ

Борди Шиблий ул Жунайд олдига чун,
Деди: бошдин то оёғимда тугун.

Қайга борсам, унда сирри дафтаринг,
Бор эмиш қимматбаҳо бир гавҳаринг.

Ё уни бахш эт менга, ҳамроҳ қил,
Ёки сотгил, нархидин огоҳ қил.

- 4835 Деди Жунайд: мен агар сотсам уни,
Бебаҳодир, айлагай музтар сени.

Сийласам, осон кечиб илкингга, бас,
Қадрини билмай, бўлурсен худпараст.

Мен каби сен ҳам уни фарқ айлагил,
Ўзни заҳмат баҳрида ғарқ айлагил.

Интизорлик бирла кутгил ҳар маҳал,
Оқибат бағрингга келгайдир гуҳар...

Шайх Фариуддин Атторнинг
«Мантиқут-тайр» китоби тугади

МУНДАРИЖА

Навоийни мафтун айлаган китоб. (<i>Иброҳим Ҳаққул</i>)	5
Мантиқ ут-тайр	14
Ҳикоят	35
Ҳазрати Расули Акрам	
саллаллоҳу алайҳи вассалам васфида	36
Ҳазрати Расули Ақрам	
саллаллоҳу алайҳи вассаламга илтижо	48
Ҳикоят	50
Халифайи аввалин, амирал-мўминин	
Абубакр-ас-Сиддик розийаллоҳу анху васфида	51
Халифайи соний, амирал-мўминин	
Умар розийаллоҳу анху васфида	53
Учинчи халифа, амирал-мўминин	
Усмон розийаллоҳу анху васфида	54
Тўртингчи халифа, амирал-мўминин Али ибни Абу Толиб	
каррамаллоҳу важҳаҳу васфида	55
Таассуб баҳси	57
Ҳикоят. Ҳазрати Умарнинг халифалиқдан воз кечгани	61
Ҳикоят. Ҳазрати Алининг ўз қотилига шарбат сунгани	62
Ҳазрати Али ҳақида яна бир ҳикоят	63
Ҳазрати Али розийаллоҳу анхунинг	
буюклиги, олижаноблиги васфида	64
Ҳикоят. Билолнинг диндаги саботи	65
Ҳазрати Абубакр ва ҳазрати Алининг	
Пайғамбарга садоқати	65
Ҳикоят	67
Дебоча. Кушларга хитоб	69
Биринчи мақола. Ҳудхуднинг қушларга хитоб этгани	75
Иккинчи мақола. Ҳудҳуд Семурғни мадҳ этгани	80
Булбулнинг узр сўрагани	81
Ҳудхуднинг Булбулга жавоби	83
Ҳикоят. Бир фақирнинг шоҳ қизига ошиқ бўлгани	84

Худҳуднинг тўтига жавоб бергани.....	87
Ҳикоят. Хизрнинг девона билан сұхбати.....	87
Товуснинг узр сўрагани	88
Худҳуднинг товусга жавоб бергани	89
Ҳикоят. Талабанинг устоздан савол сўргани.....	90
Фознинг узр сўрагани	91
Худҳуднинг ғозга жавоб бергани	92
Ҳикоят. Девонанинг дунё ва охират ҳақида айтганлари	92
Какликнинг узр сўрагани.....	93
Худҳуднинг Какликка жавоб бергани	95
Ҳикоят. Сулаймон шоҳнинг салтанат ҳақида айтганлари	96
Хумонинг узр сўрагани	97
Худҳуднинг Хумога жавоб бергани	98
Ҳикоят. Бирор тушида султон Маҳмудни кўргани	99
Лочиннинг узр сўрагани.....	100
Худҳуднинг лочинга жавоб бергани.....	101
Ҳикоят. Подшо ва унинг севимли қули	102
Бутимор қушнинг узр сўрагани.....	103
Худҳуднинг Бутиморга жавоб бергани.....	104
Ҳикоят. Бир кишининг денгиздан савол сўргани.....	105
Бойкушнинг узр сўрагани.....	106
Худҳуднинг Бойқушга жавоб бергани.....	107
Ҳикоят. Бир ўғилнинг марҳум отасини тушида кўргани	107
Саъванинг узр сўрагани	108
Худҳуднинг Саъвага жавоб бергани	109
Ҳикоят. Яъқубнинг ўғлига муҳаббати.....	109
Кушларнинг узр сўрашгани	111
Учинчи мақола. Кушларнинг Худҳуддан савол сўрашгани	112
Худҳуднинг кушларга жавоб бергани	113
Ҳикоят. Подшоҳнинг ойнабанд қаср қургани	115
Ҳикоят. Искандарнинг бир мамлакатга	

элчи бўлиб боргани.....	118
Султон Маҳмуд ва Аёз ҳикояти.....	118
Тўртингчи мақола. Кушларнинг Ҳудҳуддан яна савол сўрашгани	121
Ҳудҳуднинг қушларга жавоб бергани	121
Шайх Санъон қиссаси.....	123
Шайх Санъон қиссасининг давоми	144
Бешинчи мақола. Кушларнинг ўзига раҳбар сайлашгани	159
Олтинчи мақола. Кушларнинг йўлга шайллангани.....	160
Боязид ҳақида ҳикоят.....	161
Йеттинчи мақола. Кушларнинг Ҳудҳудга арз этишгани	162
Ҳудҳуднинг қушлар мушкулини ҳал этгани	165
Саккизинчи мақола. Ҳудҳуднинг саволга жавоб бергани.....	165
Ҳикоят. Султон Маҳмуд ва балиқчи бола.....	166
Бир қотил ва Ҳабиби Аъжамий ҳикояти.....	168
Ҳикоят. Султон Маҳмуд ва тиканчи чол	169
Тўққизинчи мақола. Бошқа бир қушнинг савол сўрагани.....	172
Ҳудҳуднинг саволга жавоб бергани.....	173
Ҳикоят. Шайх Харақонийнинг Худодан нон сўрагани	175
Ҳикоят. Бир девонанинг Оллоҳдан тўн сўрагани	177
Ҳикоят. Робианинг етти йил юриб, Маккага боргани.....	178
Ҳикоят. Бир азизнинг девона билан сухбати	179
Ўнинчи мақола. Бошқа бир қушнинг савол сўргани	180
Ҳудҳуднинг саволга жавоб бергани.....	180
Ҳикоят. Бир гуноҳкорнинг тавбасини бузгани	181
Ҳикоят. Тангрининг бутпарастга жавоб бергани	182
Сўфий ва асалчи ҳикояти.....	184
Ҳикоят. Тангрининг Мусога танбеҳ бергани	185

Ҳикоят. Тангрининг марҳамати	186
Ҳикоят. Малаклар ибодати	188
Ўн биринчи мақола. Бошқа бир қушнинг савол сўргани	189
Худхуднинг саволга жавоб бергани.....	189
Шайх Шиблий ҳикояти	190
Ҳикоят. Икки дарвеш мажароси	191
Ҳикоят. Бир йўқсилиниг Миср подшосига ошиқ бўлгани.....	192
Ўн иккинчи мақола. Бошқа бир қушнинг савол сўргани	194
Худхуднинг саволга жавоб бергани.....	194
Гўрков ҳикояти.....	195
Ҳикоят. Аббосанинг нафс ҳақида айтганлари	196
Подшо ва сўфий ҳикояти	197
Овчи ва тулкилар ҳикояти.....	199
Ўн учинчи мақола. Бошқа бир қушнинг савол сўргани	200
Худхуднинг саволга жавоб бергани.....	200
Ҳикоят. Бир ғофилниг иблисдан шикояти	201
Ҳикоят. Бир киши молики динордан, ҳолинг нечук, деб сўргани	202
Ҳазрати Исо ва шайтон ҳикояти.....	203
Ҳикоят. Бир бадавлат кимсага девонанинг дегани.....	205
Бир мунофиқ ҳақида ҳикоят	206
Ўн тўртинчи мақола. Бошқа бир қушнинг савол сўргани	206
Худхуднинг саволга жавоб бергани.....	207
Ҳикоят. Бир дарвеш тангасини яширгани.....	209
Ҳикоят. Робианинг ип йигириб сотгани	210
Ҳикоят. Бир зоҳид қуш овозига маҳлиё бўлгани	212
Ўн бешинчи мақола. Бошқа бир қушнинг савол сўргани	213

Худхуднинг саволга жавоб бергани	214
Ҳикоят. Бир сўфийнинг подшога айтганлари	214
Ҳикоят. Бир савдогарнинг иморат қургани	215
Пашша ва ўргимчак ҳикояти	216
Бир авом ва дарвеш ҳикояти	218
Ҳикоят. Ўғли ўлган кимсага ошиқнинг айтганлари	219
Инсон умрининг азизлиги ҳақида ҳикоят	220
Ўн олтинчи мақола. Бошқа бир қушнинг савол сўргани	220
Худхуднинг саволга жавоб бергани	221
Ҳикоят. Устозининг канизагига ошиқ бўлган талаба	223
Ҳикоят. Шиблийнинг чин дўст ҳақида айтганлари	228
Ҳикоят. Бир тожирнинг пушаймонлик чеккани	228
Подшо ва суякка интилган ит ҳикояти	230
Ҳикоят. Халлож юзига ўз қонини сургани	232
Ҳикоят. Жунайднинг ўғлини ўлдиришгани	233
Ўн еттинчи мақола. Бошқа бир қушнинг савол сўргани	234
Худхуднинг саволга жавоб бергани	234
Қақнус қиссаси.....	235
Бир боланинг отаси тобути олдига тушиб, йиғлагани	238
Ҳикоят. Найчидан аҳвол сўрашгани	239
Ҳикоят. Исонинг ариқдан сув ичгани	240
Ҳикоят. Буқрот ҳакимнинг айтганлари	241
Ўн саккизинчи мақола. Бошқа бир қушнинг савол сўргани	242
Худхуднинг саволга жавоб бергани	243
Ҳикоят. Бир бирорнинг қўлидан шарбат ичмайдиган кимса	243
Ҳикоят. Бир подшо қулига мева бергани	245
Ҳикоят. Бир сўфийнинг айтганлари	246

Ҳикоят. Бир кампирнинг	247
шайх Михнаийдан дуо сўрагани.....	
Ҳикоят. Бир тиланчининг	248
Жунайддан савол сўргани.....	
Ҳикоят. Шабпаракнинг айтганлари.....	249
Ўн тўққизинчи мақола. Бошқа бир қушнинг дегани	250
Худхуднинг унга жавоб бергани.....	251
Ҳикоят. Маҳбуслар зиндонни безатишгани.....	252
Ҳикоят. Бирор тушида Боязид ва Термизийни кўргани	254
Ҳикоят. Шайх Ҳарақонийнинг сўнг нафасда айтганлари	256
Ҳикоят	257
Йигирманчи мақола. Бошқа бир қушнинг	
савол сўргани	257
Худхуднинг саволга жавоб бергани.....	258
Ҳикоят	259
Ҳикоят	259
Ҳикоят. Зуннуннинг савол бериб,	
Хотифдан жавоб олгани	261
Ҳикоят. Фиръавн сеҳргарлари топган давлат	262
Йигирма биринчи мақола. Бошқа бир қушнинг	
савол сўргани	263
Худхуднинг саволга жавоб бергани.....	263
Ҳикоят. Юсуфни Мисрда сотишгани.....	264
Ҳикоят. Иброҳим Адҳамнинг	
бир фақирга айтганлари.....	265
Ҳикоят	266
Ҳикоят	267
Ҳикоят	268
Йигирма иккинчи мақола. Бошқа бир қушнинг	
савол сўргани	270
Худхуднинг саволга жавоб бергани.....	270
Ҳикоят	271
Ҳикоят	272
Ҳикоят. Бир ғозий намоз ўқиши учун	
кофиридан муҳлат сўрагани.....	274

Ҳикоят. Юсуф ва унинг оғалари	276
Йигирма учинчи мақола. Бошқа бир қушнинг савол сўргани	278
Худхуднинг саволга жавоб бергани	279
Ҳикоят. Амиднинг қуллари ва девона	280
Ҳикоят	281
Ҳикоят	282
Ҳикоят. Бир девонанинг Тангрига хитоб этгани.....	284
Ҳикоят	285
Ҳикоят	286
Йигирма тўртинчи мақола. Бошқа бир қушнинг айтганлари	287
Худхуднинг қушга жавоб бергани	287
Ҳикоят. Бир мурид Боязидни тушида кўргани	288
Ҳикоят	289
Ҳикоят. Султон Маҳмуд ва Гулханий	290
Ҳикоят	293
Йигирма бешинчи мақола. Бошқа бир қушнинг айтганлари	294
Худхуднинг қушга жавоб бергани	294
Ҳикоят. Шайх Нишопурийнинг дарвешга айтганлари	296
Ҳикоят. Иблинсинг Мусога насиҳати	298
Ҳикоят. Бир покдиннинг айтганлари	298
Ҳикоят. Шайх ва унинг ити	299
Ҳикоят. Биров Мусодан савол сўргани	300
Ҳикоят. Бир тўрва соқолнинг сувга чўккани.....	301
Ҳикоят. Бир сўфийнинг булатга дўқ ургани	302
Йигирма олтинчи мақола. Бошқа бир қушнинг савол сўргани	303
Худхуднинг унга жавоб бергани	303
Ҳикоят. Тоғдаги Мажнун	304
Ҳикоят. Ошиқнинг ўлим ҳолатида йиғлагани	305
Ҳикоят	306
Ҳикоят	306

Ҳикоят	307
Ҳикоят	308
Йигирма еттинчи мақола. Бошқа бир қушнинг савол сўргани	309
Худхуднинг саволга жавоб бергани	309
Ҳикоят	310
Ҳикоят	311
Ҳикоят	312
Ҳикоят. Робианинг Ҳаққа илтижоси	315
Ҳақ таолонинг Довудга хитоб этгани	315
Ҳикоят. Султон Маҳмуд бутни ёндиргани	317
Ҳикоят	318
Йигирма саккизинчи мақола. Бошқа бир қушнинг савол сўргани	320
Худхуднинг саволга жавоб бергани	320
Ҳикоят. Зулайҳо Юсуфни калтаклагани	321
Ҳикоят. Бир қулнинг хўжасига айтганлари	323
Ҳикоят. Абу Али Тусийнинг айтганлари	324
Ҳикоят	325
Йигирма тўққизинчи мақола. Бошқа бир қушнинг савол сўргани	326
Худхуднинг саволга жавоб бергани	326
Етти водий	327
Талаб водийси	327
Ҳикоят	329
Шиблий ҳикояти	331
Мажнун ҳикояти	332
Шайх Юсуф Ҳамадоний ҳикояти	333
Ҳикоят	334
Ҳикоят	335
Ҳикоят	337
Ҳикоят	338
Ишқ водийси	338
Ҳикоят	340
Ҳикоят	341

Ҳикоят	343
Ҳикоят	347
Ҳикоят	349
Ҳикоят	350
Маърифат водийси.....	351
Ҳикоят	353
Тўртинчи – Истиғно водийси	355
Ҳикоят	357
Ҳикоят	358
Ҳикоят	360
Ҳикоят	361
Ҳикоят	362
Ҳикоят	364
Ҳикоят	365
Муножот	365
Бешинчи водий – Тавҳид	366
Ҳикоят	367
Ҳикоят	367
Ҳикоят	370
Ҳикоят	371
Ҳикоят	372
Олтинчи водий – Ҳайрат	376
Ҳикоят	377
Ҳикоят	384
Ҳикоят	385
Ҳикоят	386
Ҳикоят	387
Еттинчи водий – Фақру фано	388
Ҳикоят	389
Ҳикоят	391
Ҳикоят	393
Ҳикоят	394
Ҳикоят	403
Ўттизинчи мақола	404
Ҳикоят	408

Ҳикоят	409
Ҳикоят	410
Күшларнинг хат ўқишгани	411
Ҳикоят	415
Ўттиз биринчи мақола	416
Ҳикоят	418
Китоб хотимаси	431
Ҳикоят	436
Ҳикоят	437
Ҳикоят	439
Ҳикоят	442
Ҳикоят	444
Ҳикоят	445
Ҳикоят	447
Ҳикоят	448
Ҳикоят	449
Ҳикоят	450
Ҳикоят	451
Ҳикоят	452
Ҳикоят	453

Адабий-бадиий нашр

**ШАЙХ ФАРИДУДДИН АТТОР
НИШОПУРИЙ**

МАНТИҚ УТ-ТАЙР

Мұхаррір
Феруза ҚУВНОНОВА

Бадиий мұхаррір
Дилфұза САЛИХОДЖАЕВА

Компьютерда сақыфаловчи
Маъмур РАҲМОНОВ

Техник мұхаррір
Сурайё АҲМЕДОВА

Лицензия рақами: АI № 252. 02.10.2014 да берилған.

Босишга 09.12.2021 йилда рухсат этилди.

Бичими 84x108 1/32.

Гарнитура «Cambria». Офсет қоғози.

Босма табоғи 10,0. Шартли босма табоғи 16,8

Адади 2000 нұсха. Буюртма № 191.

Баҳоси келишилған нархда.

«Янги аср авлоди» НММда тайёрланди.

«Ёшлар матбуоти» МЧЖда чоп этилди.

100113. Тошкент, Чилонзор-8, Қатортол күчаси, 60.

Мурожсаат учун телефонлар:

Нашр бўлими – (78) 147-00-14; (78) 129-09-72.

Маркетинг бўлими – (98) 128-78-43.

Факс – (71) 273-00-14;

email: yangiasravlodi@mail.ru



ЯНГИ АСР АВЛОДИ

ISBN 978-9943-20-892-6

9 789943 208926